

近代中國史料叢刊第二十四輯  
沈雲龍主編

平浙紀略

秦湘業  
陳鍾英纂輯

文海出版社印行

平浙紀略

同治癸酉冬  
浙江書局刊

W. H. ...

平浙紀略敘

自古治極亂生天必篤生賢哲  
以戡定之迨戡定已久斯民無  
復兵革之苦豈知當日之崎嶇  
險阻歷萬死一生卒能蕝其功  
烈者固非一手一足之力耶嗚呼  
此平浙紀略之所以不可示作也



成堂之初賊牙禁於廣西圍；不  
先乃蔓延十數行省痛毒矣編  
天下最後浙江省城一再淪陷而  
十一郡之獲全者僅溫衛二州猶  
且殘其屬縣是浙之痛毒亦幾  
編方其盤踞金陵堅守九江安  
慶時出沒於湘鄂間長江形勢

盡為賊占故狼奔豕突竭數省  
官軍之力歷十載之久而無功  
何及連陷蘇杭據有東南財賦  
之區其勢益熾當是時湘鄉  
曾文正公江蘇巡撫今大學士  
合肥李公為浙江巡撫今大學士  
湘陰左公奉任討賊左公既下杭

垣教月而曾公之師亦克金陵然  
則淞江軍務以金陵失守而始  
而江南軍務實以克復淞省而  
終雖各路逸出之賊復由徽甯嚴  
衢間道以竄閩粵然所過郡縣卒  
不敢為踞守計蓋其悍黨在淞  
已十殲八九矣則雖謂賊滅於淞

可如當左公督師入浙時所部止  
數千人耳餼饋又絀甚以之當教  
十萬方張之賊而所向皆克固已  
非尋常所能擬議矣既而召募漸  
廣兵勢日甚又得升廣東巡撫  
前布政使蔣公升陝西巡撫前按  
察使劉公前溫處道魏公升廣西

布政使前福建延建邵道康公各  
軍佐之乃由金銜嚴轉戰而前不  
及三載而陷賊數十城次第規復  
遂克省垣全浙底定一何其神且  
速也非仰賴

廟謨廣運左公勤協機宜鄰省吟  
域無分將士皆踴躍用命又烏能

使之於茲維時閩浙總督耆公則  
遣師復處州提督秦公亦力保溫郡  
李公既平三吳則分兵復嘉興及平  
湖海鹽嘉善長興各城並會攻湖  
郡而台州民團則復台州前寧紹台  
道史致諤張景渠則約同中外兵勇  
復甯波紹興皆足瀉左公兵力之

所示速而左公則隨時分兵援皖南  
江西以紓我軍後顧之慮及浙已  
肅清則追賊直至閩廣俾不留餘  
孽而後已是浙江之平固閩繫東  
南大局而粵匪之平又惟左公實收  
其全功也 昌濬 間嘗與參幕府親  
履行陣於浙中軍事顛末亦既目

擊而心誌之矣而今方繼左公之後  
備位海疆深懼案牘散失後將無  
可紀述如友屬候補道無錫秦緝業  
存補知縣衡山陳鍾英纂輯成書  
其事蹟則以當時奏報為憑傳聞  
無稽之詞不敢闌入而體例則略仿  
歷朝紀事本末及




皇朝武功紀盛

聖武記等書逐事分編以清眉目  
而撫卹籌餉諸事以及從前失事  
之由亦約略附見焉越二年書成共  
得十有六卷剗剗既竟而請余序  
之余謂書中大旨與夫敘次之法已  
備詳於凡例亦無俟余言惟是浙

江之平人安社席且十載於茲矣  
內患不作外患宜防所願覽是編  
者深知用兵之難而憬然於武備  
之不可以不講則庶幾有合乎居  
安思危有備無患之義也夫

同治十有三年歲次甲戌孟秋之月  
兵部侍郎都察院右副都御史浙江

巡撫兼理鹽政湘鄉楊昌濬序



平浙紀略凡例

一是書所紀非一人一時之事亦有事同而人異時同而地異者若用編年之法眉目固爲清楚賓主必至混淆故略仿歷朝紀事本末及

聖武記體逐事分編有正有附閱者勿以年月先後倒置爲病

一是書所紀戰事多以各統兵大臣奏報爲憑其野老傳聞私家紀載卽不無可取恐與

國史參差未敢濫入惟咸豐年間案卷久已燬失無存不得已藉資采訪嘉興許太守瑤光著有談浙一書於前

事頗詳是紀後二卷大半本此其年月人名或有傳聞舛錯處尙有待於攷證焉

一是書凡

欽差大臣及各直省督撫書銜書姓而不名惟恭錄

諭旨及書中初見則名之其在事文武員弁升降不時皆就其時之官書之卽後有洊擢大府而當時尙屬偏裨竝非統兵者不得不直書其名以示區別

一是書自以左公爲主以左公奉

命督辦浙江軍務爲始其如何進取情形於入浙之先卽備陳之與諸葛隆中之對何異所謂謀定後戰也足爲全

書之綱領詳載其所上諸疏爲第一卷

一左公入浙先肅清開化縣境竝克復遂安縣城是爲  
第二卷其第三卷則紀克復壽昌嚴州湯溪龍游蘭谿  
金華之事第四卷則紀克復武義永康東陽義烏浦江  
諸暨桐廬富陽之事第五卷則紀克復杭州省城及餘  
杭之事第六卷則紀招撫各酋收復海甯桐鄉石門竝  
克復武康德清之事第七卷則紀克復湖州孝豐安吉  
竝追剿竄賊之事於是浙江全省肅清焉  
一處州府及溫處各屬爲閩軍克復甯波紹興二府及  
各屬則爲前署甯紹台道張景渠約同外國兵勇克復

台州府及各屬則爲本地各民團克復均爲左公兵力之所未及故次之爲第八第九卷

一嘉興府城及平湖乍浦海鹽嘉善長興等處實爲蘇軍克復其克復湖州府城蘇軍亦與有力焉雖所收者浙省之地而所用者終非浙省之兵故次於後爲第十卷

一皖南江西均爲浙軍後路臂齒相依故左公先清徽境而後入浙後雖疆土日闊一聞徽廣有警無不遣師力援恤鄰卽所以自衛也其後浙省告平餘逆竄閩竄粵我軍蹻蹻追勦奔馳三省十數年逋誅狂寇一旦聚

而殲旃雖非浙省之事而實左公之力也故附書之爲  
第十一十二卷

一善後以撫卹爲先用兵以籌餉爲本故縷述之爲第  
十三十四卷

一前此浙師嘗遠出克復徽甯二郡又嘗保守衢城竝  
克復處州等處其杭省初次失守亦旋即收復非無戰  
功可紀然皆往事也後卒全省淪胥人民塗炭揆厥喪  
敗所由不能無述爰附之爲末二卷云





平浙紀略卷一

咸豐十一年十月

上命太常寺卿左宗棠督辦浙江軍務提鎮以下統歸調遣  
後二月卽授宗棠爲浙江巡撫其時浙江省城被陷已  
二十餘日矣浙西之嘉興浙東之金華嚴州處州甯波  
紹興台州各府縣城先後均爲賊踞所存者僅衢州溫  
州二府而湖州則尙堅守未破耳賊僞忠王李秀成僞  
侍王李世賢率數十萬眾胥萃於浙蹂躪殆徧浙之受  
禍爲尤烈焉左公旣受督辦之

命乃上疏言臣於江西廣信營次准曾國藩恭錄

諭旨咨會後卽宣示各營嚴裝以待惟由江西入浙之路徧地賊氛逆賊每陷一城卽分黨踞守竝盤踞村莊設立卡隘勢非節節攻勦不能深入節節攻勦又恐曠日持久餉竭兵疲先已自困勢非乘虛蹈瑕誘賊野戰不可以東南現在大局言之湖北江西一律肅清皖北逆氛漸息羣賊悉萃江浙兩省如各路統兵諸臣聲勢聯絡力保完善之區以規進取則江西湖北安徽數省生民稍得蘇息錢漕釐稅徵收日廣從此漸徧漸進庶可作士氣而掃賊氛利戎機而運戡定以浙江現在局勢言之皖南守徽池以攻甯國廣德浙江守衢州以規嚴州

閩軍嚴扼其由浙竄閩以繞犯江西之路然後餉道疏通米糧軍火接濟無誤諸路互相知照一意進剿得尺則尺雖程功迂緩實效可期此固一定之局也正在籌商布置間忽接探報杭城於十一月二十八日被陷事勢業已如此則援浙之局應卽通盤籌畫從新整理以圖恢復竊維浙江軍務之壞由於歷任督撫全不知兵始則竭本省之餉以濟金陵大營皖南各軍冀藉其力以爲藩蔽而於練兵選將之事漫不經心自金陵皖南大局敗壞之後又復廣收潰卒糜以重餉冀其復振卒之兵日增餉日絀軍令有所不能行以守則逃以戰則

敗恩不知感威不知畏局勢愈益渙散決裂而不可支  
矣臣奉

命督辦浙江軍務節制提鎮非就現存兵力嚴爲挑汰束以  
營制不可非申明賞罰予以實餉不可非另行調募預  
爲換補不可然欠餉日久則有不能汰遣之患餉需不  
繼則有不能調撥之患經費不敷則有不能募補之患  
名爲節制各鎮實則營官哨長亦且呼應不靈不得其  
指臂之助而徒受其迫促之擾雖有能將無餉何以馭  
兵雖有謀臣無兵何以制賊此事之應辦而不能辦者  
臣軍人浙以後餉需茫然兵勇卽有飢潰之時軍火卽

有缺乏之慮縱令竭力圖維何從措手可否請

旨敕下部臣查明各省應協濟浙江之欸閩省及各省奉  
旨撥解浙軍餉各欸開單咨會到臣如各省撥解遲延及  
各委員逗遛貽誤應由臣隨時咨明部臣查取藩司及  
委員銜名參奏又附奏言用兵之道選將爲先臣自上  
年襄辦軍務卽募勇丁五千餘訓練兩月率以東行轉  
戰江皖之間尙能得力曾國藩屢次函商請募足萬人  
臣以謀餉爲艱人才難得未敢逕諾現在陸續增加尙  
止八千餘人除畱防婺源四營外能隨臣出戰者不滿  
七千兩浙爲賊淵藪徧地賊氛占地千數百里賊眾較

十萬近則裹脅益眾爲數愈增臣以孤軍轉戰而前有  
守城之兵卽無雕剿之兵有攻城之兵卽無截剿接賊  
之兵有攻剿一路之兵卽無牽制各路賊勢之兵又加  
之各將領從征日久除傷亡外有積勞致疾而殞者有  
因事請假而歸者局勢益寬人才日乏殊爲可危廣西  
臬司蔣益澧才氣無雙任事勇敢本年春閒以臣軍太  
孤願率所部助臣討賊臣比函商曾國藩奏調赴皖尙  
未具奏旋蒙

簡放廣西臬司廣東巡撫劉長佑新授貴州巡撫江忠義湖  
北巡撫李續宜署四川布政使劉蓉皆臣同鄉素契氣

類相許之人所部率多勁旅江忠義亦曾函商願爲臣  
募選將士助勦劉長佑已擬派副將戴盛寬挑勇丁五  
百名前來尙未見到湖南撫臣毛鴻賓憐臣軍餉苦窘  
願助臣每月一營五百人之餉現在浙江全局已壞急  
應從新布置以期挽救東南應請

敕下兩廣督臣勞崇光籌給行資其由湖南江西經過各營  
行資應由湖南江西撫臣發給臣現咨商毛鴻賓毓科  
勸諭浙江流寓之官紳商幕捐輸軍餉竝請戶部速發  
部照執照一千張分交湖南江西撫臣飭司轉給以期  
迅速集事會賊僞輔王楊輔清率大股賊眾犯徽左公



自督師赴婺源援之未卽入浙

上諭左宗棠迅卽督率所部兵勇親赴衢郡將開化及附近  
衢城股匪力行掃蕩竝會合閩省援師及李元度進攻  
龍游之師節節進剿爲收復金巖之計金巖一經收復  
則官軍進攻杭州自可杜賊匪由浙竄徽之路左宗棠  
身任浙省封圻責無旁貸自當力籌進取毋得再事遷  
延致滋貽誤近日一切軍情及如何布置竝著左宗棠  
迅速覆奏左公乃於同治元年正月二十九日覆奏言  
臣前奉

諭旨督辦浙江軍務甫三日卽接徽防副將張運桂等報楊

輔清犯徽之粟臣以楊逆凶狡黨夥眾多必將分犯徽  
婺徽州僅張運桂一軍五千人婺源僅臣畱防之一千  
六百餘人以之當大股十萬之寇未免太單深恐徽婺  
稍有疏虞則江西饒廣腹地防不勝防而衢州又成孤  
注臣軍入衢後路將梗不得已派各營馬步三千餘交  
劉典率以赴婺爲固婺援徽之計擬徽事速竣此軍卽  
由徽入浙臣由玉山入浙率以進剿去臘十五日拜摺  
後十七夜復接各路探報大股賊數萬已由遂安踞開  
化張村中村馬金街一帶與徽郡屯溪篁墩之賊相爲  
首尾蔓延百數十里逼近大鏞嶺濟嶺山腳勢又出官

軍之後臣以衢州城堅易守雖閩省援師已經調回然李定太兵勇八千餘李元度所部安越軍七千餘又奉甌端檄調自龍游回衢兵力較厚暫可無虞逆賊每遇堅城必取遠勢包圍待其自困而後陷之頻年東南賊蹤驗之歷歷不爽辦賊之法必避長圍防後路先爲自固之計然後可以制賊而不爲賊所制臣若先入衢城無論不能固江皖邊圍亦且不能壯衢城聲援一墮逆賊長圍詭謀又成糧盡援絕之局故決計率親兵營由婺入浙先勦開化之賊以清徽郡後路飭所部老湘營由白沙關漸進扼華埠要衝以保廣信而固衢城幸三

次克獲大捷開化肅清婺源無警饒廣兩郡相庇以安而楊逆又屢爲徽軍所創敗潰宵遁臣軍可無須遠赴徽郡尤非意想所及臣雖未親赴衢郡而開化賊巢埽蕩無餘臣軍現駐開化縣城馬金街兩處正可兼顧衢城未敢稍事遷延自干重戾臣奉

諭旨督辦浙江軍務又奉

恩命巡撫浙江浙事成敗利鈍臣一身任之無可諉卸謹當盡瘁圖之冀有尺寸之補惟師行荒僻之鄉又正值戎馬倥偬之會有時奏報稍遲或思慮未周奏報未及詳盡伏乞

皇上鑒臣愚衷垂念微臣才力不逮曲賜鑒原不勝惶悚感  
激之至又奏言臣於軍旅一切向雖研求其理未嘗練  
習其事近年親履行陣於軍情賊勢地形刻意講求頗  
有所悟然所當者一路之任所統者數千之師故勉竭  
駑駘幸免疏失茲疊蒙

新命督辦軍務巡撫浙江鉅任驟膺時危正迫夙夜憂思深  
懼無以仰副

九重倚注之

恩下慰兩浙士民之望除現在攻克馬金肅清開化接攻遂  
安立復縣城先後馳奏仰慰

聖懷外所有將來籌畫進取情形謹爲我

皇上陳之查浙省大局離披恢復之效未可驟期進兵之路  
最宜詳審浙江列郡僅存衢州溫州其湖州一府海甯  
一州孤懸賊中存亡莫卜此時官軍從衢州入手則堅  
城林立旣阻其前金嚴踞賊復撓其後孤軍深入餉道  
中梗斷無自全之理無論首逆李世賢正圖窺犯衢州  
江山臣軍已由遂安回援目前不能舍衢前進也金華  
介衢嚴之中城堅賊眾臣軍若由金華進攻則嚴州之  
賊必由淳壽一帶潛出包鈔亦非善策若奕者置子四  
旁漸近中央未有孤立賊中而能善其後者似臣軍救

浙必須依傍徽郡取道嚴州較爲穩妥惟浙西皖南一帶山鄉瘠薄產米無多尋常無事之年民食尙須從江西之饒州廣信糴買搬運現在臣軍食米亦係從饒廣採購轉運而來勞費殊多師行不能迅速此餉事之難也臣軍除已募未到外不滿九千除分守遂安開化外隨臣出戰者不過五千有奇此外如徽信兩處防軍雖經曾國藩毓科奏明歸臣調遣然兩處正在戒嚴未可調以入浙其衢州之李定太一軍八千餘人江山之李元度一軍八千餘人雖人數與臣軍相等然均未足深恃此次李世賢入犯李定太僅守衢城李元度分扼江

常而皆迫切呼援惴惴不能自保臣亦未能責其遠離  
 城池浪戰求勝致損軍威此兵事之難也前蒙准調蔣  
 益澧劉培元兩軍來浙尙未接有該員等確耗蔣益澧  
 一軍積欠之餉非兩廣督臣速爲清給難以成行劉培  
 元新募經費非湖南撫臣速爲發給亦難集事相距二  
 千餘里恐須三四兩月乃可取齊臣已迭次檄催伏懇  
 敕下兩廣督臣湖南撫臣速清兩軍欠餉發給經費行資俾  
 得遄赴戎機是爲至幸至浙東一帶郡縣均爲賊氛所  
 隔勢難迅速馳援能從海道出師乃爲便捷昨接曾國  
 藩鈔錄正月二十一日



上諭因杭州甯波等處失守沿海各口宜防

諭令迅速購買洋人船礮以資攻剿

聖慮周詳實深欽佩臣等將來轉戰而前必可終資其力疏  
入

上嘉納之兩江總督曾公國藩亦言閩浙之道惟衢郡可以  
圖存欲保衢州必先守廣信玉山而後有運糧之路欲  
復杭省必由徽州以攻嚴州而後有進兵之路既飭糧  
臺籌撥餉精軍火竝於玉山設立轉運局源源接濟衢  
防兵勇至進攻嚴州則專賴左宗棠一軍必先掃清歙  
縣婺源之零股攻克開化遂安之堅城乃能達於嚴郡

其意與左公吻合闡浙總督慶端公則議分兵三路一由溫台直搗甯紹一由處州直搗金蘭一由衢州直搗嚴杭但能攻拔一城則全局自振其後閩軍專辦溫處一路頗能自踐其言然彼時賊勢注重金衢嚴一帶故溫處收功較易也昔金人侵南宋明師伐張氏皆從四安吉竝入獨松關直搗杭城元兵南下偏師亦由徽甯以趨獨松文丞相於百丈關屯兵三萬禦之師不得入今杭州初次失守賊亦循金明故道自皖南來一走武康一出餘杭以進攻省會論者遂謂獨松關爲必爭之險而不知其二次則李秀成李世賢兩大股皆由江

西敗退先後竄浙陷江常二縣未幾分道陷處州金華  
嚴州紹興甯波各府然後併力以攻陷杭城據而有之  
局勢比前少異用兵亦自不同至嘉興之失賊則由蘇  
松而來獨先於浙東諸郡縣然賊雖扼我咽喉終未能  
攻吾腹心其形勢可睹矣此杭州之復所以必有賴乎  
衢嚴之師也左公深悉軍情地勢成竹在胸既不株守  
衢城亦不銳師直下先清浙東而後致力於浙西尤以  
保固江西皖南後路爲第一義迨

朝廷詰問反覆敷陳洞中窾要後卒削平列郡恢復杭垣雖  
曰天數豈非人謀哉故備載其籌畫進取情形諸疏以

爲平浙張本云

平浙紀略卷一

平浙紀略卷二

咸豐十一年十二月奉

命督辦軍務浙江巡撫左公宗棠駐師廣信令直隸州知州  
劉典統領各營馳赴婺源擬卽由婺人浙時賊僞輔王  
楊輔清率領大股蔓延於屯谿篁墩巖寺等處將回撲  
徽州賊炳天義鍾明佳理天義藍以道率各股賊盤踞  
開化之張村中村等十餘處將踰濟嶺大鏞嶺以犯婺  
源左公謂婺源地勢居徽州廣信兩郡之中北可掣圍  
犯徽郡之賊南可扼分竄饒州廣信之賊中可截開化  
遂安之賊爲我與賊之所必爭而防婺之兵止五千餘

不足以當巨寇左公乃親率各營由廣赴婺督勦會鍾  
明佳已遣零騎分犯諸嶺嶺脚劉典派隊擊卻之二十  
六日卽率各營踰大鋪嶺三路竝進且令馬隊出步隊  
之後相機抄擊同知直隸州知州朱明亮當左路恃勇  
直前四鼓列炬徑擊張村賊壘賊倉卒迎拒勢已不支  
忽嶺上之賊吹角擂鼓四路包抄而下廩生陳脩匹馬  
衝入賊隊手刃數賊而死朱明亮督隊左衝右突正危  
急閃參將黃少春同知直隸州知州張聲恆從右路石  
佛嶺馳下殺賊數百忽賊從後路抄出都司馬德順參  
將楊芳桂亦出馬隊斜出抄之賊數路俱潰我軍分途

躡蹤猛追至厚山而還是役也連破賊壘十餘處陣斬  
應天福李賊及大小賊目五十餘斃賊千餘生禽百五  
十餘散出難民數千奪獲賊馬及刀矛鎗礮無算我軍  
陣亡者三十七人創者多至百三十餘蓋亦血戰矣鍾  
明佳旣敗遁回馬金街老巢是日徽防副將張運桂署  
皖南鎮總兵唐義訓衢州鎮總兵朱品隆會擊巖寺潛  
口之賊亦獲大勝楊輔清喪膽遠遁徽郡解嚴而婺源  
之防亦固時大雪數日巖壑皚素漫漫不辨行徑及後  
晴霽冰凍未銷嶺路滑澁阻我軍行者兼旬同治元年  
正月十五日左公始率七營由汪口踰大鏞嶺進剿典



率五營由江灣踰濟嶺進道員王開來率七營由白沙關進駐箕岸兼扼開化華埠之衝十七日我軍前隊甫抵箕岸賊眾數千先一夕五更捲旂蛇行由銀坑出張村曹門而至石佛嶺都司楊和貴前驅遇賊卽與之戰賊由石佛嶺分路包圍我軍亦分路禦之王開來令參將羅瑞山郭德韓副將王明輝等由箕岸左右衝出賊不意官軍突至駭而奔我軍乘勝蹙之愈戰愈猛斬賊無數追至張村而還陣斬偽檢點偽將軍等賊目十數斃賊近千生禽百餘十八日左公率各營進至張村劉典率各營進至何村兩路相距三十餘里持數日糧約

期分路進剿賊於馬金街高環霞山厚山徐塘口秧畝等處據險爲巢而於近巢之山凹徧立卡棚及梅花椿層層密布守禦甚固二十日黎明黃少春張聲恆帶所部由何村出竹嶺之右攻高環劉典督親兵繼之馬隊在後策應知縣陶鴻勛生員鄭錫溥游擊余萃隆各帶所部別覓樵徑由橫嶺出大蘇坑徑抵高環後嶺出賊不意壓擊之賊見正兵先出悉力憑牆堵禦忽嶺後號鼓齊鳴奇兵突出賊不知所措棄壘狂奔劉典及黃少春張聲恆楊芳桂分四隊循嶺包抄而下阻賊去路縱橫痛擊適張村各營已攻破高平賊壘總兵崔大光及

朱明亮各率所部登嶺急進知縣劉琰李耀南主簿楊  
鼎勛參將李世顏彭定太楊和貴張人和馬德順等各  
率所部分途追剿與何村各營合立將馬金街霞山厚  
山徐塘口等處十餘賊巢掃蕩一空大小賊目之被戮  
者約百餘斃賊五千餘生禽二百餘解散脅從數千拔  
出被擄婦女幼孩數百奪獲旂幟刀矛鎗礮牲畜不可  
勝計敗賊或竄遂安或竄常山地界均器械盡失爲各  
鄉民沿途截殺者亦不下千餘於是開化縣境一律肅  
清左公卽令老湘營進駐開城自率各營進駐馬金街  
相機再進陣亾廩生陳脩守備朱三和歐光保羅朝松

把總曾義成外委嚴福保廖朝棟請

旨議卹是時遂安縣城尙有賊踞而金華龍游之賊紛紛上  
竄距衢州江山皆數十里左公欲親往援剿忽聞賊僞  
侍王李世賢嗾令壽昌蘭谿各賊目完天安盧有成幅  
天安黃文政譚世得陳老北等糾約遂安踞賊恭天義  
賴連繡窺犯開化馬金爲長圍困我之計左公以衢州  
常山均有守兵八千餘足以自固而開化已復之地遽  
行撤防難保不復失不如乘援賊未集之先回攻遂安  
庶幾奸謀窮而凶燄自息二月初五日遂調回援衢各  
營由馬金前進初七日駐營遂安之橫沿百畝畝墩南

諸處距縣城二十餘里見城西楊村一帶皆有賊壘城北一帶山嶽路岐難容大隊初九日王開來率所部自墩南進攻楊村之南劉典率所部由百畝畝進攻楊村之西劉璈率所部由中路攻楊村之西北李耀南楊鼎勛率所部列隊北路山岡遙作撲城之狀以疑之賊見官軍三路竝至卽列隊相抗各村皆負山依水賊沿兩岸而下呼聲振山谷張聲恆率所部覓水而過出賊之後劉璈擊敗東岸之賊繼之劉典率親兵各營督同黃少春朱明亮橫衝而出陶鴻勛鄭錫淙楊和貴各率所部翻嶺而下出楊村之後總兵丁長勝副將喻勝榮及

郭德馨羅瑞山等各率所部自墩南馳至馬德順楊芳桂各率所部馬隊由東岸衝過西岸截賊去路各營奮勇衝殺刀矛並舉斃賊約數千陣斬盧有成而奪其馬楊村水西股賊得脫者止數騎耳各營急循兩岸窮追至縣城南數里始收隊還殺斃溺斃之賊殆以萬計散出難民數千生禽僞符天侯羅音及僞檢點僞將軍等賊目數十皆伏誅奪獲刀矛鎗械旗幟不可勝數而我軍陣亡者一人傷者三十餘人而已是夜四鼓分隊攻城城賊已四散竄逃遂安縣城卽時克復有此一戰賊膽盡喪不獨江皖邊界無虞闌入卽窺伺衢州江山之

賊亦失勢而不敢逞矣左公於十二日入城安撫居民  
布置城守事宜畢卽拔營馳援衢郡而畱道員王文瑞  
王開來所部二千五百人駐守遂安二十日有大股賊  
由瀆安竄偏城東五十里之梓桐源城北二十里之墩  
頭二十二日分路來撲城垣王文瑞等堅壁不出靜以  
待之賊卽退去二十三日東路之賊忽偏城外營壘竝  
攜帶木梯布袋意圖填濠攻城王文瑞令丁長勝郭德  
馨率所部分伏左右親督參將王萬友及喻勝榮趙人  
和羅瑞山各率所部由中路奮擊令康榮詔潘謨各率  
親兵相機策應王明耀率所部扼要以防北路各軍奮

勇衝殺斃賊甚多賊亦以死抗拒正憲戰閒康榮詔潘  
謨等繼之丁長勝郭德馨復率伏兵由左右橫截而出  
賊紛紛敗潰我軍猛追十餘里始回甬近城壘忽北路  
賊又乘虛來犯王明輝督各哨極力堵禦康榮詔潘謨  
王萬友羅瑞山等分路擊之王文瑞率郭德馨趙人和  
等從中路迎擊喻勝榮丁長勝率所部翻山而下我軍  
數路衝殺勇氣百倍賊又大敗斬馘數百級是日二戰  
約共斃賊二千餘陣斬偽檢點黃德貴劉世學偽指揮  
黎文明偽丞相劉正順汪定遠李世源等奪獲木梯百  
餘騾馬鎗械無算二十七夜諜報別股援賊由東亭而



來北路敗賊亦於是日歸併東路二十八日辰刻賊眾五六萬直至城東築壘密布竹箴花籬以防我軍衝突王文瑞憑牆穩守待至未刻見賊勢少懈卽令丁長勝郭德馨率所部從城北小路抄出賊壘之後趙人和王明輝從中路之右進擊王文瑞自率親兵由中路之左進擊康榮詔潘謨率親兵與喻勝榮由東路河邊橫擊我軍分三路進攻賊亦分三路拒戰雖斃賊不少而賊自恃人數眾多略無退卻迨見丁長勝郭德馨等軍由後路抄出始敗歸壘中然放鎗礮拒守我軍先將壘外箴籬拔棄殆盡直撲壘下羅瑞山首先躍入立斬數悍

賊各勇繼進乘勢連破諸壘賊四散狂奔我軍兜剿追殺賊尸枕藉不可勝計沿途拋棄鋤耨旂幟刀矛無算餘賊一由淳安港口竄往嚴州一由濟嶺竄往徽州屯谿休甯而去惟威坪之賊仍於梓桐源一帶往來窺伺有糾合楊輔清來攻遂城竄擾江西之說左公仍令王文瑞嚴密防守並令崔大光等四營相機應援以免疏虞陣亡守備廖有貴軍功陳子春請

旨議卹先是李世賢率巨股由金華龍游犯衢於東南路之大洲全旺等處連營數十里將以長圍困之前衢州鎮總兵李定太署總兵崇志署金衢嚴道江允康署衢州

知府吳艾生等嬰城固守二月十八日左公率各營馳  
抵常山之水南地方偵知賊分股竄踞招賢一帶衢城  
與常山江山道路中梗糧運隔絕是夜左公令劉典督  
同張人和楊和貴楊芳柱等各率所部由左路進李耀  
南楊鼎勛黃少春黃有功朱明亮馬德順各率所部由  
右路進劉璈張聲恆余萃隆各率所部相機接應十九  
日黎明齊抵招賢賊不及列隊棄械狂奔我軍奮力追  
殺斬馘二百餘生禽數十於是衢城糧路始通其賊之  
犯江山縣城者屯踞北路大谿灘栲竹街四都一帶東  
路塘源毛村一帶李世賢由大洲竄至江山且調金華

巨股前來署布政使李元度時守江城左公檄令嚴密堵禦一面派隊分兩路至四都栝竹街截擊三月初一日甫行抵大陳賊知大軍將至先於是夜遁走初三日元度親率十營分路進剿毛村賊巢行抵碗窰賊僞主將譚星率眾萬餘列隊抗拒游擊喻科癸參將鍾志瑞彭寶三等首先衝入賊勢不支參將李正盛等復率所部從左路抄出游擊徐國香率所部從清湖繞出賊後賊卽奪路而走各軍乘勢追擊忽小清湖賊萬餘過河來犯元度卽率各軍回援喻科癸李正盛大呼迎擊都司張勝飛知州李積經等分路齊進立斃驍賊百餘追

殺六七里申刻收隊初五日賊復糾眾撲犯峽口閩軍營盤閩軍先勝後挫退回浦城賊遂踞峽口肆行焚掠下自清湖花園港石門江郎街等處上至峽口鳳林等處連營數十里勢復猖獗左公以其地可達福建之浦城浙江之處州龍泉江西之廣豐玉山如有疏失則浙軍後路可虞大局亦不堪問爰令劉典督四營先行竝令李元度所統安越軍六營會剿初七日劉典等行抵江山縣城新塘邊賊之前隊亦至典當分各營三成隊擊之殺賊數十追至河干賊覓水道去詢知李世賢竄踞花園港結營自固初八日我軍分三路進攻典自率

所部及馬隊由中路進殺賊數百燒賊二壘進逼李世賢之營世賢騎黑馬而遁我軍亦遇雨收隊左公以賊勢趨重於此自督各軍繼進十五日進駐江山之石笏謀報李世賢帶騎賊數百由小清湖過河窺探路徑並有步賊數百散居村莊左公檄調防守玉山之副將顧雲彩八百人助勦令劉典督同黃少春黃有功余萃隆等各率所部至清湖一帶搜勦踞賊賊見官軍旂幟紛紛潰走乘勢追擊殲斃殆半忽花園港石門出驍賊萬餘排列禮賢上下一帶山岡而以數千人涉淺過河徑撲安越軍營壘當令安越各營及朱明亮所部飛往河

邊堵截斃賊數十賊勢少卻劉典率各營馳至大呼殺  
入賊奪路而奔追殺二十餘里斬馘數百級其鳳林踞  
賊潛至毛畷翼襲我軍後路顧雲彩等擊走之十八日  
分路進攻石門花園港等處賊巢左公台劉璈陶鴻勛  
張聲恆黃少春余萃隆率所部及安越軍一營由中路  
進劉典黃有功朱明亮楊芳桂率所部由左路進同知  
楊昌濬楊鼎勛率親兵及張人和楊和貴李世顏馬德  
順顧雲彩游擊張志超所部由右路進黎明至江郎街  
賊望風而潰我軍節節搜剿而前連破石門賊卡數重  
直搗賊巢追殺十餘里至午刻各營畢集花園港三面

環攻拔開花籬運備賊壘賊見我軍銳氣百倍堅匿不出穴牆開礮抵死抗拒我軍於鎗礮如雨中排隊屹立踰越重濠肉薄壘下有攀壘先登而墜者有入壘被斫而死者前者被創後者復進相持三時之久賊壘垂破復完乃收隊而還賊之潛伏清湖者伺官軍收隊突起衝我歸路安越軍於河邊扼擊禽斬百餘賊始鼠竄而去是日殺賊不過數百而我軍之陣亡者三十餘傷者至二百七八十人之多蓋攻堅之難如此二十一日僞主將翟賊復於石門前面山岡築七壘詢知李世賢潛約僞對王洪春元糾合大股由衢州西北而來左公以



賊援將至而花園港老巢未破我軍有腹背受敵之虞  
二十二日黎明仍令各營三路進攻賊巢楊昌溶督各  
營至石門直逼新巖李世顏麾眾猛撲賊爲披靡各營  
繼進遂將賊七壘次第蹋平斃賊無數餘賊翻山遠遁  
不暇跟追隨與劉典等偪攻花園港老巢將竹篳柴草  
填濠而進施放火箭火彈延燒賊棚忽北風陡轉大雨  
傾注賊一面撲救一面出壘死拒黃少春身受三創屹  
立不退哨官李裔輝簡桂林伍先申周春農等均裹創  
血戰始徐徐收隊而還是日破賊七壘殺賊數百奪獲  
旂幟鎗礮以數百計而賊之舊壘仍垂破復完二十三

日諜報洪春元率賊數萬已至雙橋二十五日我軍移營前進一面攻撲老巢一面迎剿援賊而賊卽於是夜向上台毛村一路潛遁左公疏言竄擾浙江之賊本祇李世賢李秀成兩股楊輔清一股從而和之自迭陷各城後凶燄更張兩浙胥遭荼毒李秀成一股已由浙入吳楊輔清之黨時往來於徽州甯國嚴郡之間與李世賢互相首尾臣所剿開化遂安之賊卽楊輔清之黨見勦衢州江山之賊卽李世賢此逆爲賊中渠魁凶狡特甚臣之注意於此原冀殲除此股則餘賊震慄浙事轉機可望自回援衢州以來賊黨望風而靡雖未及痛創

然已散竄潛逃不敢抵禦惟該逆負嵎自固於形勢見  
絀之餘猶復堅忍相持拚死抗拒又糾合巨股來援意  
在闌入江西今爲臣軍所阻潛遁而去或由衢州仍回  
大洲全旺老巢或由遂昌而竄龍泉均屬未定臣現畱  
安越軍八營及江西仁右營副將顧雲彩長左營卽補  
道王德榜等照舊駐守與江山各營聯絡一氣以固江  
西藩籬一面飛飭駐防馬金記名總兵崔大光等四營  
回軍華埠相機邀擊臣自率各營卽日由常山跟蹤追  
剿務期悉數殲旃免致流毒他方終成不了之局疏入  
詔嘉之左公督師行抵常山李世賢已繞由衢南回竄龍游

令賊黨堅踞龍游縣城及衢南之石宰街并喉壽昌縣賊分竄衢州東北之蓮花一帶修築堅壘以抗我師而率諸賊回竄金華府城老巢其別股由塘口繞竄遂昌龍泉邊界者爲兩縣鄉團及福建總兵林文察截擊斃賊約一二千餘賊由松陽遁走遂昌龍泉兩縣肅清賊之大勢趨重金華而倚龍游壽昌蘭谿三縣賊巢爲犄角左公方欲勦除衢北之賊以攻龍游忽聞楊輔清率大股由威坪圖撲遂安而甯國自提督鮑超等連戰克捷後各路敗賊亦由甯轉竄而至前隊已抵遂安之界首東亭一帶蔓延四五十里左公遂令劉典率各營由



華埠馬金以抵昏口自率親兵及各營由常山進駐開  
化相機圖之四月十四日劉典率各營由昏口進屯百  
畝畝而崔大光等四營亦至楊輔清聞官軍大集十五  
夜乘雨霽月明全股捲旂棄營而遁王文瑞劉典派隊  
追勦沿途僅殺斃尾賊數百追至瀆安賊已急竄昌化  
甯國而去左公卽馳告皖南各軍嚴行戒備謀報壽昌  
龍游之賊聞官軍已赴開遂一路遂漸上竄逼近衢城  
左公令劉典崔大光等各營陸續撤回而自仍由華埠  
出常山赴衢勦之五月初四日馳抵衢城西北沐塵訶  
知李世賢糾集賊目馮谷勝陳壽僞主將賴賊僞佐將

林賊駱賊等由龍游蘭谿壽昌上犯於北路峽口蓮花  
童村裏外黃五坦洋塘盈川一帶連三十餘營並盤踞  
杜澤雲溪埠塘等處村莊又令假天義李賊鮫天義侯  
賊於南路石室街築四壘聯爲一大壘東路大洲全旺  
安仁埠等處各築數壘相爲犄角其北路地勢毘連遂  
安開化常山賊勢亦較重於東南兩路左公令處州鎮  
總兵劉培元進軍常山而調江西道員屈蟠王德榜兩  
軍會合培元進駐江山縣屬之後溪街以防石室街之  
賊而自率各營由北路進剿其東路安仁街一帶之賊  
令總兵李定太郭啟舉等憑河堵截以防橫竄十二日

我軍九路並進甫抵雲谿賊卽潰退因卽進屯雲谿十  
五日分三路進攻裏外黃蓮花等處賊集我軍右路南  
至良山涼亭而蓮花洋塘盈川等處之賊先列隊山隴  
並挑驍賊數千過河而陣張聲恆率勇先進甫列隊驍  
賊數十躍馬而來步賊繼之張聲恆以鎗礮排擊賊敗  
退追至田隴賊復張兩翼來抄對岸之賊亦紛紛躡淺  
過河聲恆悉力抵禦正鏖戰聞楊和貴馬德順先後馳  
至斬騎馬數賊賊勢少卻乘勝追至河邊李世賢張紅  
蓋坐山巔麾騎賊向前衝突楊昌濬率親兵往來堵禦  
刀矛緊接斃賊數十我軍傷亾者亦以數十計相持兩

時之久適我軍由右路進攻峽口者斃賊二百餘破賊  
三壘楊鼎勛復由蓮花過河燒賊一大壘斃賊數十李  
世賢知中左兩路俱敗不敢戀戰紛紛遁走我軍復追  
數里始整隊而還嗣大雨連旬溪流暴漲我軍與賊巢  
前阻一谿不能梟水出隊六月初五日天霽水退初七  
日劉典督同各營由左路進攻裏外黃之賊楊昌濬督  
同各營分列良山涼亭一帶會攻蓮花洋塘盈川之賊  
我軍左路行抵童村上山瞭見外黃村莊甚大後崙山  
一帶賊壘亦固劉典遂揮軍嚴陣村前河令楊和貴  
李良平伏童村下山內黃有功邢得伏童村上山內遣



親兵數十人至村前挑戰外黃之賊見我兵不多蜂擁而前劉典令各軍穩站勿動而黃有功邢得冕水過河繞出賊後裏黃壘中之賊大隊來撲典卽麾軍過河接戰楊芳桂馬隊繼之外黃壘中之賊見我軍過河亦冕水來抄後路李良平楊和貴於林內突起擊之各路齊進呼聲動天無不一以當百賊敗退入營然放鎗斃我軍奮勇直前拔開花籬地刺踰濠而入賊勢不支適楊鼎勛劉光明張志超所部由峽口繞至外黃後山巔搖旂插鼓而下羣賊驚駭不知所措棄械狂奔中右兩路見左路煙塵蔽空知我軍得手卽乘勢進攻蓮花壘中

之賊亦悉數遁走逐北二十餘里闕平沿途賊壘而還  
是日斃賊數百生禽數十散出難民男婦以數千計奪  
獲偽印軍械鎗礮旂幟無算其下自盈川上至襄外黃  
一帶數十里間賊三十餘壘一律平毀無餘南路石室  
街東路大洲之賊聞北路賊巢已破驚怖殊甚初九日  
卯刻剽培元李定太會同屈蟠王德榜等各率所部由  
南路進剿賊聞官軍大至棄壘而奔各軍急起追之比  
至大洲大洲賊亦棄壘遁沿途斃賊百餘所有澗州東  
南兩路賊壘亦均平毀各敗賊分竄龍游亦有竄至蘭  
谿者左公疏言浙江賊數雖數十萬之眾而皆聽首逆

李世賢一人指喉該逆自江山墜敗後卽由遂昌邊境繞道回踞龍游而倚金華爲老巢嚴處爲犄角蘭谿壽昌湯谿宣平松陽等縣皆分布賊黨拚死抗拒五月十五日該逆經官軍擊敗夜由龍游退回金華嗣竄永康近又有竄湯溪縣境之耗賊蹤倏忽靡常其注意仍在抄襲臣軍後路臣先擬衢州江山兵力足資堵截卽當由壽昌瀘安直搗嚴州以規省會近探杭州守賊無多賊之大勢趨重金華自應併力先將龍游壽昌蘭谿湯溪等處次第攻剿撤其藩籬犁其巢穴然後分兵嚴處躡之以取破竹之勢蔣益澧五月初七日自廣東發稟

尚無啟行確期所部十七營已早抵湖南臣又飛札催  
之大約到浙當在六七月臣相度形勢似宜先金華而  
後嚴州拜摺後卽當進圖龍游壽昌節節搜剿冀於全  
局有尺寸之補臣軍新募之勇已陸續前來劉培元所  
部三千二百人已於五月朔到浙現在造船調礮添設  
水師一俟就緒相機布置亦可稍省陸路兵力而護運  
軍食軍火乃能免遲滯而速戎機六月左公將進攻龍  
游壽昌以規金華先耀兵於龍游對岸兼察地勢城賊  
鼠伏不動忽謀報李世賢率大股賊由嚴州信安而來  
前隊已至遂安之東亭四都沿途賊館亘數十里其來

甚速左公遂令駐防遂安之道員王文瑞率所部嚴守城壘密令新授浙江按察使劉典率馬步九營卽夜由嶺路倍道馳援與文瑞併力截剿一面飛檄由湖南調來知府魏諭義帶勇二千由常山取道華埠馬金屯扼昏口防其上竄又檄江西赴援之屈燾王德榜等由西安常山出華埠截之十八日李世賢同驍賊數萬分兩路攻撲遂安縣城王文瑞令各營穩守待賊撲近始發大礮飽以羣子轟斃騎馬賊十餘賊勢轉而南趨忽江西援師先由僻道馳至賊見官軍旗幟從嶺巔倏降不測其多寡駭而奔竄則此軍急於赴援奔馳數晝夜已

忍飢半日矣王文瑞開壁迎之餐畢合隊由西門出擊縱橫盪決斃賊不計其數賊之列隊對岸者復開礮抵拒我軍亦以鎗礮排擊龔隆貴身中礮傷力戰不退東路之賊見我軍由西路出擊渡河來撲東門復爲康榮詔等擊退兩戰共斃賊千餘奪獲旂幟器械計三百餘少頃援師大隊畢至而賊已敗走遂各收隊二十日劉典督各營由遂安南路進剿行至三都之麥田李世賢出驍賊千餘接戰餘盡伏於對岸山內圖俟我軍過河卽分路來抄劉典令黃有功劉光明李世顏黃大玉馬德順等督隊迎剿李良平從後接應楊鼎勛楊和貴各



率所部防東岸之賊壘戰四時之久斃賊數十賊猶以死抗拒後路之賊復蜂擁而來哨官郭文彬力竭死之官軍勢漸不支李良平楊鼎勛楊和貴橫截而出立斬當先老賊數十賊始敗遁官軍躡蹤緊追沿途復斃賊二百餘時已日晡乃徐徐收隊而回李世賢自連日爲我軍擊敗知遂安城守嚴固援師醫集乃於二十二夜鼠竄而去大股仍由壽昌回金華劉典派馬隊追剿僅斃其尾賊三十餘而中鎗礮子傷不能行動者不下數百則悉斬之解散脅從約數千計搜獲賊中五月二十四日僞文言金陵急須救援然必先將衢城官軍擊退

始可前往時聞李世賢回至金郡修濬城濠盡調各路  
驍賊歸併金華蘭谿龍游武義等處以圖久踞而抗官  
軍左公仍令王文瑞守遂安魏喻義駐昏口自率各營  
卽日進攻龍游蘭谿湯谿等城賊自受此數大創不敢  
再窺三衢復犯遂安左公旣免後顧之虞始一意進取  
矣迭次捷聞均有

詔嘉獎其在事出力文武將士自剡典以下叙功賞賚有差



平浙紀略卷二

平浙紀略卷三

同治元年七月十六日奉

命督辦軍務浙江巡撫左公率諸軍進剿龍游龍游城小而  
堅東南北三面依水唯西面平曠彌望前此安越軍壁  
城外賊開濠五道密排梅花椿每濠內置犬繫鈴以防  
我軍潛越犬噪鈴動城上賊覺卽施放鎗礮乘高擊下  
多傷士卒自秋迄冬盡銳攻之弗能克迨大軍入浙頻  
捷賊倚龍游爲南岸門戶守愈固左公旣調回援剿遂  
安各營卽規進取是時賊僞侍王李世賢敗竄後復糾  
合金華巨股並調溫處各路驍賊分踞南岸湖鎮羅埠

北岸蘭谿所屬之永昌鎮太平祝家諸葛村孟塘油埠  
裘家堰等處意伺官軍深入卽乘虛襲我後路左公訶  
知之遂檄署衢州鎮總兵劉培元一軍駐龍游城西十  
里之圭塘山以副將睦金城等四營助之又調江西會  
勦道員屈蟠王德榜兩軍屯扼全旺爲培元後路聲援  
總兵崔大光率四營屯軍於龍游城隔河北岸之茶圩  
左公自率親兵各營進駐距城十五里之潭石望以策  
應兩路別遣按察使劉典率馬步十營軍於高橋截勦  
援賊布置已定是日軍次東門橋適遇李世賢率千餘  
賊來偵楊鼎勛朱明亮卽率所部攔橋奮擊殺傷相當

賊見我軍後隊踵至始遁去生禽數賊據言世賢之黨  
駿天義鄧積仕嘏天義李賊撫天義楊賊眾共數萬屯  
踞油埠高園等處左公以不破平諸壘不足奪李賊之  
氣而孤龍游之援卽於十七日分路進攻油埠賊巢劉  
典由中路進行至高園遇賊數十楊芳桂率馬隊盡殲  
之隨令各營擂鼓猛進張聲恆黃有功奈萃隆齊蘭禮  
率所部出油埠之右賊不虞我軍猝至棄巢而走中路  
朱明亮劉光明整隊迎擊鏖戰逾時張聲恆等馳至兩  
路來攻楊芳桂以馬隊橫衝賊不能支紛紛敗潰其從  
左路來抄者經楊鼎勛李耀南李良平突出截擊遂皆

奪路狂奔我軍追殺十餘里陣斬鄧積仕及驍天燕廖  
得書等賊目數十共斃賊千數百生禽百餘獲偽印數  
十旂幟鎗礮以一二千計敗賊退踞太平祝家孟塘裘  
家堰等處結壘自固二十一日劉典率各營從中右兩  
路進楊昌濬督同親兵及前授黔撫江公派援之副將  
陳希祥劉榮合等從左路進前隊甫抵蓮塘值李世賢  
擁眾上犯欲撲我高橋營壘楊鼎勛李良平揮兵接戰  
擊斃賊數十各營催隊繼進賊遁還會日暮收軍不  
及窮追二十四日我右路之師先燬賊巢五處直撲裘  
家堰壘賊出隊抗拒典令各營奮力齊進賊敗入壘

環攻兩時垂破忽後路援賊膺至李良平受礮傷裹創力戰典率中營各哨扼擊斃其當先大旂數賊賊仍退併守壘我左路之師行近孟塘賊分數路來犯我軍亦分三路迎剿李耀南率所部首先衝殺楊鼎勛繼之鏖戰兩時擊斃龍旂賊目數人賊陣少卻別股賊突從左右兩路抄來楊昌濬一面分軍堵禦一面令鼎勛督隊向前力戰相持數時之久右路攻壘各營正收隊閒聞左路礮聲大震星馳會擊賊退走我軍亦收隊而還左公疏言臣查太平祝家裴家堰一帶地勢平闊村房稠密該逆盤踞於此與南岸羅埠湖鎮之賊相爲犄角意

在死守金華蘭溪諸城以阻我進軍之路臣甯船尙未  
造齊不能扼截金華河路攻北則南岸之賊來應攻南  
則北岸之賊往援暫尙未能制賊死命李世賢屢經勦  
攻凶饑已衰入夥數年之死黨雜髮潛逃者實不下一  
二千之多而新擄之眾則逃散不止萬計近以金陵首  
逆屢召赴援因臣甯苦與相持未能猝脫臣之一軍除  
防守遂安昏口分布衢城偏攻龍游縣城外其足供騷  
勦援賊者僅五千有餘近爲疾疫所苦病弱物故者多  
每接仗不能派六成之隊而各路賊黨方源源而來人  
數之多奚止數倍官軍自不得不慎以圖之再臣查溫

處之賊盡聚金華一帶而李世賢挑其悍黨屯踞蘭谿縣屬之油埠永昌鎮等處近日因與廣東賊不睦令其分踞嚴郡又嗾新到之賊分踞壽昌近城各鄉賊之蹤跡偏重北路世賢凶狡素著其詭計似阻我師進攻金華而覓路竄皖南以赴金陵賊渠之召臣已密致曾國藩預飭徽甯守將嚴爲扼截並飭卽選道王文瑞卽選知府魏喻義嚴扼遂安一路以撓其謀一面飛飭蔣益澧星速赴浙以便分道截剿蔣益澧聞於八月初二日始自長沙啟行具前隊於七月初九日啟行計此時已行抵廣信臣飛調其赴常山聽候調遣是時李世賢旣



屢岨堅匿不出見官軍方力攻北路意南路之備必虛  
遂嗾龍游賊遊天義陳廷香勘天義李國羣等於八月  
十五十九兩日率眾撲犯城西圭塘山劉培元睦金城  
等營壘均經擊退二十九日城賊萬餘復撲近圭塘山  
培元等出隊迎敵崔大光潛由北岸渡河衝擊賊陣之  
背賊駭而奔劉培元率各營乘勢壓擊追至城邊燬一  
賊卡睦金城暨楊和貴張人和王樹棠等大隊齊至賊繞  
城而走我軍由西門進至南門斃賊二百餘城上矢石  
雨下我軍仰攻逾時收隊三十日李世賢遣僞忠裨上  
將李尙揚及樓天義胡明順毘天義張賊等由永昌湖

鎮率驍賊五六萬分三路來撲劉培元等營壘龍游城賊亦於西北門列隊相向裏外重疊排擁十餘里勢張甚培元令各營鎮靜毋動一面飛報左公立派親兵隊並劉榮合賴錫光兩營馬德順馬隊一營馳援合劉璈率各部伏於河邊林內崔大光嚴扼下游防賊偷渡指麾甫定時中路之賊正撲至培元營外壕邊劉榮合賴錫光率所部從左路繞出中路大呼殺入賊陣錫光股中礮傷裹創督戰愈急賊漸靡培元各營空壁而出楊昌濬督親兵從山坡壓下將士無不踴躍當先以一當百中路之賊由左路敗走楊和貴張人和率所部邀之

馬德順帶馬隊兩旁抄擊賊大敗狂奔拋棄旂幟器械  
無數右路之賊見中路賊敗仍蜂擁而來屈蟠王德榜  
兩軍從右路馳至會合中路諸軍併力急戰兩時許斃  
龍旂賊目十餘賊復潰走我軍三路追勦縱橫騰擊勢  
如拉朽其伏於西門之賊爲睦金城王樹棠擊退北門  
河邊之賊爲劉璈崔大光擊退是役也陣斬胡明順及  
泗天福印賊僞檢點黃賊僞指揮吳賊僞統制李賊等  
數十其斃賊千數百生禽百餘奪獲龍旂及鎗礮器械  
不少賊不逞於南路復糾合巨股萬餘人由永昌鎮竄  
踞壽昌縣城別分悍黨由壽昌出上方嶺左公以上方

嶺地勢緊接遂安西可竄開化常山南可竄衢州非將  
此股殄滅則南路各軍旣爲龍游城賊所牽制而衢防  
西北一帶在在堪虞左公所部皆節制之師號令素肅  
陷堅靡銳所向無前江西樂平之戰背水置陣以數千  
人破賊十餘萬眾雖淮陰拔幟臨淮麾旂不是過也李  
世賢負重傷以布絡繩昇之而遁故深畏之及是復數  
摧其鋒賊救死扶傷不給一意堅守浙固巖疆城隘旣  
多防勦兼施並扼皖南江西福建三省門戶而安越一  
軍及衢防舊旅久役思歸又多遣散賊勢蔓延眾寡殊  
絕每患兵少不敷調遣適新授浙江布政使蔣益漯所

部總兵高連陞率前隊至衢州左公卽令由雲谿進駐  
蘭溪之高園閏八月初六日益灑率全軍抵衢分遣副  
將熊建益所部三千人往扼上方嶺一路高連陞所部  
三千人由梅嶺往攻壽昌行至距城八里而營賊見官  
軍猝至擁眾出城直撲營塹高連陞分兵由左右兩路  
進自領一軍由中路進大戰三時賊屢卻屢前官軍奮  
勇齊上呼聲震山谷立斃先鋒驍賊數十賊蒼黃走追  
至城邊乘勢殺入復斃賊數百立將縣城克復餘賊由  
南門奪路而逃追殺十餘里始收軍左公密令蔣益灑  
劉典由蘭溪西鄉進兵其圖李世賢所踞太平祝家老

巢世賢聞克壽昌懼官軍由小方嶺出襲其後卽於十  
四夜竄赴裘家堰結七大壘背河而陣及蔣益澧率部  
馳往斬殿後驍賊數十遂與劉典督各營躡蹤追至裘  
家堰距賊巢二三里軍焉約期會剿十八日黎明劉典  
率各營進攻逾時壘堅猝不可拔蔣益澧大隊急進合  
圍二壘高連陞率所部四營踰濠先登連破中間二大  
壘賊盡殲僅逸出數騎劉典令朱明亮劉清亮奮攻第  
三壘破之餘壘皆潰陣斬賊元天福萬興仁走天福劉  
茂林等生禽蓋天福王福勝等賊目二百餘皆伏誅共  
斃賊一千數百賊宵渡而竄溺斃者不可勝計獲偽印

百餘旂幟鎗礮器械無算拔出難民數千北路賊壘崩  
清其屯踞南岸羅埠湖鎮五里街等處者尚不下數萬  
眾而其地當龍游湯谿之衝爲賊所必爭左公隨令蔣  
益澧全軍渡河節節攻剽與軍仍駐油埠爲後路聲  
援會羅埠賊酋僞王宗李世祥遣人詣益澧軍前乞降  
益澧密諭世祥相機內應二十六日夜率各營掩旂息  
鼓疾起赴之平明行近賊壘然礮爲號官軍由外殺入  
世祥率黨千餘由壘中殺出賊猝不及備棄壘潰竄官  
軍乘勝追殺斃賊七八百生禽三百餘賊壘悉毀湖鎮  
之賊運糧適至五星街崔大光偕李世顏邢得率各營

潛由北岸涉淺過河出不意擊之立將賊壘踏平殺驍  
賊五六百南路各壘亦清而龍游諸軍於閏八月二十  
日二十九日二次奮力併攻賊堅守不出城壘皆占地  
勢猝難力取左公於是進駐新涼亭距龍游城五里令  
各軍脩築長濠移營逼之而蔣益澧一軍由羅埠進攻  
湯溪劉典一軍扼汕埠湖鎮以防蘭金援賊九月初一  
日湯溪踞賊見官軍逼近出撲高連陞熊建益營壘我  
軍擊敗之殺傷甚眾初二日益澧攻北門連陞攻東門  
典會師攻西門圍城數匝賊穴牆門放鎗礮官軍踰濠  
肉薄城下前者被創後者復進相持至暮始收隊連日



誘賊出戰痛剿兩次復斃賊數百而官軍連日陣亡者三十餘傷者三百餘蓋又一血戰矣左公疏言龍游湯溪之賊皆勢窮力詘求援於金華守賊自羅埠湖鎮五星街等處要隘攻克後道路隔絕城賊之勢已孤督臣耆齡復派知府康國器率粵勇三營至湯溪會剿兵力益厚惟兩城之賊附城築壘堅固異常恐未免曠日持久據投誠李世祥供稱李世賢山太平祝家竄赴裘家堰之時擬乘閒由分水桐廬竄回溧陽護其眷屬然後由溧陽回援金陵留僞朝將李尚揚李泳旺僞王宗李遇茂劓天義劉政宏遴天義陳廷香勘天義李國羣等

率悍賊十餘萬分守金華龍游湯溪等處城壘以阻我師若將此數凶殄滅以下堅城似不難迎刃而解軍中搜獲李世賢僞文諄屬諸賊死守龍游湯溪金華四十日卽行折回且言逆眷在溧陽爲各僞王欺陵不能不急回料理之狀查賊中僞王可數者共三十餘惟僞忠王李秀成僞章王林紹璋與世賢尙稱投合餘則彼此猜疑勢不相下金陵逆首洪秀全之兄僞勇王洪仁達尤爲各賊所恨似從前楊韋兩逆互相吞噬之事不久必將復見而李秀成嗾各賊圍犯皖南意在緩浙軍之攻而抄浙軍之後其謀甚狡臣擬俟龍游湯溪攻克緩

攻金華急攻藏州相機辦理以圖其掃狂氛此後軍行  
分合進止蓋難預定臣惟有隨時與曾國藩熟籌大局  
以期其濟左公既備龍游而軍遂於西南兩門外濬長  
濠引溪水灌之又以東門外寶塔嶺俯瞰賊巢地勢最  
要初十日商令劉培元就嶺設三小壘並分軍列隊防  
護申刻新壘成甫收隊賊忽出壘分股急撲培元親督  
所部極力堵禦左公復令各營回擊賊大敗走追近壘  
前城賊復出官軍昏夜進戰殺傷頗多賊敗入城乘勢  
追至城下轟攻良久乃還賊既失寶塔嶺之險爲之奪  
氣不敢復出城拒戰矣是役也培元督戰最力所部守

備師有勝熊得先陷陣手刃數賊猝中賊洋鎗死之其餘將士陣亡者十五人受傷者七十人而斃賊則有三百餘焉翼日左公令各營分攻城壘五鼓揚昌濬暨虞紹南劉璈各率所部併攻傍城一壘出賊不意疾驅拔開花籬地刺堆草填濠而進拋火彈然賊藥桶火起賊亂官軍乘勢肉薄登壘尤驍勇者直從礮眼鑽入壘中斃賊數百脫去者僅三四十人而已禽斬俘天安任方海等十餘賊所有偽印及鎗礮器械馬匹悉爲官軍所獲而紅綢蜈蚣形畫龍旂多至二百三十餘面賊之暴殄於此可見其餘各營猛攻數時之久被創不退四壘

垂破復完城賊出自東門爲王德榜劉墩等截斷大旂  
賊數人餘敗入城各營悉銳力攻卒以鎗礮太密傷亡  
過甚而止是役陣亡者八十餘受傷者至七百餘之多  
十月初二日左公派隊專攻第一賊壘以誘其出賊由  
牆穴環開鎗礮無隙可乘久之驍賊百餘持洋鎗躍出  
爲官軍擊斬數十而官軍亦陣亡十餘傷五十餘哨官  
受傷者七人游擊瞿端明創重而殞亦諸將中之敢戰  
者也攻堅之難如此其湯溪之軍蔣益澧令熊建益謝  
永祜等與康國器所部四面合圍高連陞防金華援賊  
而益澧自駐羅埠以遏蘭谿之援東門外山上賊壘最

堅難以仰攻復派兵偪紮與之相拒分向城壘開通地道數處而蘭溪賊僞天將譚星先於正月初十日率黨萬餘來援龍湯在江坑花園一帶結八壘踞村莊十餘里焚掠至羅埠三里外勢殊猖獗十二日益豐督諸將三路進攻副將劉清亮參將周廷瑞曹魁甲及馬德順馬隊由左知縣楊道洽軍功李世祥率所部由右副將何萬華守備徐文秀率所部由中益豐自率親兵策應諸路誘戰良久賊伏不出益豐審視惟江坑二壘較固遂令右路一軍往攻以牽之急麾中左兩路並進沿途焚賊館十餘處先破一小壘各壘賊紛紛出援擊斃驍

賊二十餘賊敗歸我軍乘勢猛撲王東林何萬華徐文秀等從礮石中大呼躍人五壘次第踏平追奔至距蘭溪縣五里乃還擊斬溺斃之賊不下六七百生禽八十餘獲牛馬數十鎗礮旂幟刀矛無算拔出被虜老幼男婦以千計惟譚星帶死黨自踞江坑之壘未破益豐卽於是夜械約劉典翼日會攻十三日黎明各營齊抵江坑典率所部自五家圩渡河合圍破其後壘餘匪梟水逃竄我軍截擊斃賊近千生禽百餘無得脫者獲騾馬二十餘匹旂幟軍械無算復合攻前壘我軍氣勢百倍拔去椿籤數丈踰過二濠以火箭火彈拋入壘中賊正

惶急閒忽蘭谿援賊大至益漴令高連陞劉清亮徐文秀馬德順楊芳桂等率馬步迎剿殲其前鋒數十賊乘勝追至蘭谿城對岸悉燬沿途賊巢復斃賊百餘溺死者甚眾申刻歸隊併力攻壘賊以死抗拒卒未能下賊亦膽落焚壘遁去分兵追斬及溺死者數百從羅埠至蘭谿道路已清連日諜報金華援賊進至湯溪城東二十里白龍橋一帶縱火燒村煙燄四起劉典高連陞出隊往剿賊駭卻十五日益漴復派高連陞熊建益率隊前往搜捕會賊由金華運糧至官軍驟乘之斬獲頗眾賊棄糧潰連陞等率馬隊追殺直至距金華府城十里



而還沿途復禽斬賊百餘湯溪城賊連夜出撲均經熊建益劉清亮康國器等營擊退十月初三夜賊突於東門外築兩壘南門城根築一壘意在連絡城壘而留竄金華之路初四日黎明益澧卽督高連陞及康國器所部力攻至午悉將各壘踏燬陣斬級天義李占魁共殺賊二百餘生禽十六獲大旗五十餘軍火器械二百餘賊遁入城中譚星自江坑退走築壘蘭谿城外固守並來往剽掠溪西虹霓山中施家灘厚仁寺女埠等處九月二十四日劉典督黃少春朱明亮楊鼎勛楊芳桂等馬步四營會合白露山民團進剿賊卽紛紛退走過河

我軍乘勢追至樟木村賊入壘拒守黃少春率勇從壘後斬關入楊鼎勛督隊截其前門賊踰牆出者均陷濠塹籬椿之中約殲賊六七百各村壘出賊千餘來援爲朱明亮楊鼎勛等分路擊敗追近蘭谿城邊又斃賊數百日暮收隊過河譚星復率黨千餘合敗賊來犯劉典飭各營扼河堵禦朱明亮率隊從右截之殺傷先鋒驍賊十餘奔竄溺死者數十是日共斃賊千餘生禽三十餘均伏誅獲僞印及驟馬旂幟軍械無數賊迭被痛創復糾合義烏浦江及嚴州援賊於金華江蘭江西岸潛脩堅壘自固十月初二日蔣益澧劉典各派隊分攻截

殺蘭谿援賊百數十而益澧所部陣亡八十三受傷亦  
數十則以地曠路歧收隊不易坡陀間多遇伏賊故也  
譚星之弟譚富擁眾萬餘屯踞嚴州府城並於近城數  
十里內節節設卡河下安泊戰船以阻我進師之路左  
公調魏喻義自遂安率所部二千人移屯瀟安銅關及  
壽昌縣城攻破洋溪賊卡斬賊目黎滿志餘眾悉降十  
月初三日會合民團攻破嚴城北路三卡殲賊數百奪  
獲偽印四顆初四日城賊分股竄至南路黃山頂一帶  
將併蘭谿賊眾上犯喻義派隊合民團擊敗之禽斬頗  
多左公疏言龍游湯溪蘭溪嚴州諸處大小數十戰攻

破壘卡三十餘處殺悍賊六七千賊目近百惟各城及  
 附城諸壘堅不可拔賊知官軍不可力敵遂以死守城  
 壘之外濠溝深闊木椿地鉞環濠數十丈徧地密布不  
 能容此官軍偏攻愈猛傷亡愈多而龍游湯溪兩城爲  
 金華要道必兩城下後路清而後可攻金華蘭溪一水  
 直達嚴州必蘭谿下餉道通而後可攻嚴郡此三城者  
 如骨在喉非採取之不快而各營距城壘不過一里半  
 里勢亦難舍此他圖屢據逃出賊言龍游城內折屋爲  
 炊賊數雖有兩三萬除老弱患病外能戰者實不過數  
 千人湯溪賊情勢亦同臣現密飭各營於賊所可竄之

路分起放哨設伏斷其接濟截其去蹤湯溪只一城一壘尚有可開地道之處現已設法趕辦劉典駐軍太平祝家及湖鎮之間專備截剿嚴州蘭谿接賊蔣益澧一軍屢奉

寄諭飭援金陵臣亦屢接曾國藩械谷頻催蔣益澧率所部馳援皖南以便鮑超赴金陵之援維時蔣益澧已逼近湯溪縣城連紮十餘營宵柝相聞一時不能卽撤而賊首李尙揚勢頗窘蹙蔣益澧意此城旦夕可下不欲棄垂成之功且以此間局勢論之湯溪不拔則龍游之賊得通金華蘭溪之援臣軍之圍龍游者亦將四面受敵

正躊躇閒續准曾國藩咨械曾國荃頻獲勝仗連破賊壘金陵大營局勢漸臻穩固鮑超與張運蘭力禦甯國之賊蔣益澧無須馳援洵爲意外之幸龍湯久被圍賊倚金華爲老巢而實恃嚴州爲犄角左公以其地外通皖南達杭尤關形勝魏喻義旣駐軍銅關據險設卡號召民團聲勢漸壯然猶慮其兵單令將分駐壽昌千人併歸銅關並遣劉典一軍力攻蘭溪以分賊勢蓋賊首譚富兄弟本廣東著名老賊分踞嚴蘭互相首尾乃李世賢嗾其合勢以扼我軍者也十一月初八初九日嚴賊糾集桐廬浦江各賊疊次來犯喻義俱擊走之頗有

斬獲民團之氣亦振城中被脅難民時詞賊動靜詣營  
密告賊恃其眾不之覺十一日譚富傳僞令期十三日  
傾巢撲營魏喻義聞之於十二日巳刻率所部偃旂息  
鼓赴洋溪二鼓潛趨鐘嶺下分路設伏少頃先鋒賊五  
百餘行過嶺前伏兵驟起圍殺無一脫者後隊萬餘見  
前賊被殲驚竄回城魏喻義令揚旂發號佯退洋溪以  
弛其備次日晡令諸營各昇攻具約聞礮卽登所造礮  
船直下南門大河斷其水道馬隊由北繞過東門斷其  
下竄桐廬之路喻義督親兵於夜半潛抵西北兩門監  
立雲梯號礮一鳴前營通判李昌彩守備劉華汜千總

李光彩左營都司黃占鰲外委楊信成中營都司魏光  
謨周世運守備王宗高右營都司魏發沅千總胡世忠  
把總魏名璋後營游擊李成化及各營軍功雷繼裘邱  
奪才等先登師從之盡殺守堞巡夜賊百餘城賊分段  
擁上我軍奮威衝殺火彈火球連環拋擲自亥至丑殺  
賊二千餘城上賊盡始下賊復巷戰呼聚愈多我軍轉  
戰愈勇至南門大街各營畢集斃賊不知其數餘賊數  
千向東南狂竄城門鍵固猝不得啟則由女牆躍下墜  
死者又百餘卽將嚴州府城克復其河亾艍船二百餘  
艘爲軍功李本鴻督帶礮船駛下蘭溪港口轟燒殆盡



兗水各賊率皆淹蹙越城得脫者沿河爲礮船所擊竄  
至東路又被守備林德元魏光翰馬隊追斬千餘時已  
將晨各路圍丁悉至餘賊數百無路可遁偪回東門城  
下拋置器械伏地請降魏喻義受之及被虜之本地難  
民概令薙髮分別安撫遣散計共殺賊萬餘搜獲偽印  
二百九十三顆奪獲馬匹二百餘旂幟軍械無算惟譚  
富訪無下落而獲其畫龍大纛及黃緞繡龍袍帽鞞等  
物我軍陣亡僅十八人傷者一百七十五人左公疏請  
將魏喻義等有功將士優擢並言新昌嶧縣之賊均竄  
諸暨東陽義烏之賊亦紛紛西竄據紳團探報羣賊窟

聚金華意在援救湯溪龍游然徘徊不敢遽進龍湯兩  
城之賊揚言李世賢已至徽州給諸賊固守實則接濟  
已斷外援不來諸賊亦自相猜貳其偶爾衝出零星小  
股均被官軍擊退每次禽斬數十百人然城壘極堅多  
傷精銳一時未能遽下臣聞江西五千觔木壳銅心大  
礮能發三十七八觔炸彈其製與洋人落地開花礮略  
同臣於調取到時兩次親自監放並攜礮規測驗均近  
城而墜次將礮壘移近除閒有先炸數顆外餘均墜入  
城中轟塌房屋炸斃逆賊諒亦不少然賊之穩踞如故  
可見西洋所恃爲利器者亦祇能驚可動之眾無備之

城也現在嚴郡既克金華右臂已斷龍湯兩城之克當亦不遠臣惟有盡瘁圖之軍中自夏徂秋疾疫甚行夫勇物故者至四千餘之多入冬漸息前此奉

諭垂詢左公傳知各營官哨官剴切宣示諸將士無不感荷皇仁時已缺餉七八月卽病弱稍能起者俱不忍言去士氣若此識者知賊不足平矣兩城久困全浙賊勢亦併力西注湖紹兩郡賊酋僞戴王黃呈忠僞首王范汝增僞梯王練業坤各率黨白金華城西至甯坊開化村白龍橋一帶連營數十里以援湯溪新昌嵯諸暨浦江各縣之賊與蘭溪賊譚星合勢自縣北將軍巖大慈巖至溪

西一帶亦連營數十里以援龍游城壘惟時出零賊潛  
赴各村掠食並偵援賊消息遇官軍輒縮退自十一月  
十三日至十二月初十日龍游各營邀擊四五次計共  
斬賊數百而湯溪各營十一月二十二日迎剿援賊范  
汝增練業坤於白龍橋殺賊二千餘生禽百餘奪獲賊  
馬三十六旂幟軍械無算二十四日湯溪賊知援且至  
兩次出城撲營均爲熊建益擊退是日蘭溪之賊亦渡  
河而來蔣益澧派隊擊之陣斬賊二百餘生禽十七二  
十五日劉典會益澧所部擊譚星於羅埠之外殲驍賊  
六七百幾生獲星星易馬擁洋鎗隊遁去二十六日益

禮會劉典及康國器分攻酷坊援賊陣斬數百是日魏  
喻義由嚴州潛搗蘭溪將軍巖之賊焚七壘亦斃賊三  
百餘十二月初八日益豐因地道阻壞憤而攻壘竟日  
斃賊數百士之勇銳者傷亾亦三百餘而副將何萬華  
守備賀啟泰以登壘中礮殞初十日同知劉璈率所部  
三百人會署蘭溪知縣江紹華夜攻溪西賊壘遇伏矢  
利都司李錦榮守備賀秩成譚永和把總劉德明侯忠  
信力戰死團勇傷亾共一百六十餘官軍亦陣斬一賊  
酋並禽斬驍賊二百餘迨收隊副將黃有功奮勇截殺  
連斃騎馬賊目三復斬驍賊百餘劉典策賊必由西路

上犯約益漴派隊助剿十一夜設伏馬公嘴近村次日賊果大至縱其深入斜出抄之四面合擊斃賊七百餘斬譚星之姪榮生禽百餘獲馬十餘匹十四日蔣益漴劉典復會剿開化村援賊斬馘數百級而游擊彭永壽陣亡二十一夜劉典率水陸各營進攻蘭谿城壘賊匿不出僅斬其放哨賊數十奪賊船八艘而還是夜賊目張成功率黨五百餘乘閒詣益漴軍前乞降受之左公以援賊雖眾悉爲我軍截隔城賊益憊勢難久存而賊注意西竄局勢有不容不慮者於是疏言臣軍以江皖爲後路蘭谿之賊可由壽昌閒道出常山而入江亦可

由遂安而入皖金華之賊可由松陽遂昌出江山以入江亦可由龍泉以入閩此數縣者斷難任其侵軼惟有勉力圖維隨時咨商閩浙督臣江西撫臣力保完善之區以制方張之寇十二月除夕四更微雨初歇天容黯黹龍游突有賊數千出撲東門營盤噴筒火箭並射直前劉培元督眾憑壘轟擊斃賊數百侵曉遁回同治二年正月元日馬德順率馬隊巡哨至城東南五峰廟遇掠食賊擊斃數十生禽二十八嗣是駐營湖鎮之崖大光駐營張家埠之劉光明余萃隆等皆屢有斬獲難民藉刈野菜逃出者日以數十計初九日王德榜請率所

部於城南移築三小壘偏之左公令各營列陣以俟賊  
謂官軍盡趨東南忽出悍黨千餘猛撲西面營壘參將  
余佩玉督新練溫州勇奮擊斃賊數百劉明燈張人和  
劉明珍等各率所部衝殺賊敗入城之時官軍開放劈  
山礮又轟斃紅衣騎馬數賊是夜城中賊自相鬪人  
聲鼎沸左公知其將遁益令嚴備初十一日賊將城  
內輜重出屯外壘左公射示城中諭降十二日酉刻月  
色瑩澈賊潛啟東門向湯溪大路奔竄左公先已派水  
陸馬步各營分路邀擊並飛檄將益澧及閩軍截之具  
時劉培元王德榜陳希祥賴錫光劉榮合毛正道等各



率所部分入城壘捕剿餘賊遂克龍游城中賊目張可成蔡廣元率黨千餘款楊和貴營乞降受之諸軍一面奮追剽光明李世顏邀之張家埠水師礮聲齊震賊逃竄至湖鎮崔大光余萃隆橫出截殺剽培元督剽明珍梁雲山黃本富鍾南英剽明燈楊和貴張人和簡桂林與馬德順馬隊繼進楊昌濬及虞紹南李光瑩許瑤光余佩玉率親兵營向西南一路迤東兜剿賊且拒且走官軍或遮其前或轟其後或撓其旁重重截殺約計萬餘山谷坡陀賊尸填委沿途棄械四散及難民逃出者不知其數賊酋陳廷香李國羣逸去獲其眷屬及偽印

僞令十三日卯刻追近湯溪縣城益澧等整軍迎擊又  
斃賊數千其得竄往金華者寥寥無幾後爲官軍所殲  
蓋各軍已於十一日克湯溪十二日並克蘭谿金華矣  
先是蔣益澧於湯溪城外加掘重濠屢敗金華援賊時  
復射示城中曉以禍福正月初九日賊目僞朝將彭禹  
蘭遣人乞降益澧隨令副將劉樹元守備徐文秀軍功  
李世祥等至城邊密與要約初十日亥刻彭禹蘭計誘  
僞出裨天將李尙揚瀛天義張公慶喻天義劉明榮慈  
天義李加斌等至濠邊劉樹元徐文秀出不意禽之益  
澧見巨酋就縛卽令各營分攻城壘自率親兵於西門

策應而康國器軍攻其南彭禹崗見官軍大至疾啟西門徐文秀匹馬衝入剽清亮曹魁甲周廷瑞賀國輝王春林率隊繼之與賊巷戰約一時許擊斃三千餘余朝貴丁賢發亦以所部梯城而上復殺賊二千餘城中火四起哭聲殷地驍賊各奪門出走自相蹂躪死者不可勝數間有跳越重濠者高連陞謝永祐楊道洽及閩軍蹙之又斃賊四千餘殆無遺類卽將湯溪克復東門壘賊見城破火起亦棄壘驚奔爲高連陞等截殺殆盡時已天明益禮立遣高連陞熊建益乘勝迅擊援賊戴首梯三僞王正惶怖聞大軍擁至卽悉眾逃奔掩殺二千

餘搜斬數百餘所有酷坊開化村白龍橋等處數十賊壘一律焚毀奪獲輜重軍火器械馬匹偽印無算十二日連陞督率十一營進屯白龍橋賊酋黃呈忠等奪路從東北竄去金華踞賊劉政宏亦率黨從東門而逸高連陞熊建益等乘勢奪門而入殺賊二千遂克金華府城蘭谿之賊先後爲劉典攻擊已分竄浦江江城賊無多惟馬公嘴溪西兩壘尙堅守是日聞湯溪已破棄壘分兩路逃走劉典令黃少春李耀南黃有功楊芳桂各率所部羅啟勇水師與湯溪會勦各營追斬賊數百夜間復跟追三十餘里又斃賊數百解散甚眾奪獲輜重軍

火不少而蘭谿縣城亦克金華占婺州城垣鞏固最得  
地勢考近代浙中兵事皆以婺爲關鍵如李文忠之制  
方氏李之芳之拒耿藩是也賊旣阻險於此更恃列城  
近爲屏蔽遠作爪牙困獸游魂稽誅歲月嚴州旣定皖  
防益安二三日間連克嚴邑乃乘勝舉之不煩攻取之  
難已成築入之勢扼吭拊背杭州震動機局爲之大轉  
左公以賊酋李尙揚與蕭韋諸賊始事並起凶獷夙著  
近復擁眾爲世賢死守惡尤貫盈磔之餘咸伏誅捷聞  
有

詔嘉獎布政使蔣益澧按察使劉典總兵高連陞劉培元以

賜卹

下敘功有差節次攻戰陣亡將士均荷

平浙紀略卷二

平浙紀略卷四

同治二年正月奉

命督辦軍務浙江巡撫左公既督諸將連克湯溪龍游蘭谿  
金華各城軍聲大振賊失重險枝葉離披腹心震懾不  
敢徑歸杭州乃獸駭烏菽思延旦夕之命金華潰賊與  
首梯戴三僞王由義烏竄至諸暨譚星率蘭谿敗賊竄  
至浦江會福建援剿之總兵林文察方攻武義至是與  
署永康知縣程陶成稟報十三日武義永康之賊同時  
遁走文察督軍追殺遂復武義陶成亦率民團收復永  
康東陽義烏之賊聞風向諸暨一路紛竄並復其城左



公先已令蔣益澧分軍由武義永康義烏進剿按察使  
劉典由浦江進剿合攻諸暨縣城典督各營先偏浦江  
十八日劉城黃少春等率所部馳至賊望風奔潰擊斬  
數百追至距城五十里之白馬橋而還遂復浦江典卽  
令各營乘勢進攻諸暨黃少春及黃有功李耀南喻可  
宗楊芳桂各率所部由牌頭攻諸暨之南劉城及朱明  
亮齊蘭禮各率所部由草塔截其竄逃之路諸暨枕山  
襟谿號爲險固明師進取杭溫皆力爭之民風素悍團  
丁屢殲於賊及見官軍至無不踴躍爭先願爲前導二  
十二日夜半黃少春等督隊掩至城外二十里遇賊急

擊之禽斬數百賊敗入城官軍圍而攻之四面民團助  
聲喊殺城賊驚惶無措遣黨詣軍乞降少春等受之次  
日率隊及民團入城遂復諸暨所有投誠賊眾千餘劉  
典令薙髮遣散歸籍餘賊回竄紹興而僞首王等及金  
華敗賊聞官軍將至復遁義橋惟譚星一股由浦江敗  
竄李秀成之黨阻其回竄杭州別向桐廬而去蓋羣賊  
喪膽咸無固心一聞官軍追至卽復狂奔足不停趾假  
息維喙破竹埽籟此之謂矣左公令劉培元率水師順  
流而下會魏喻義所部合擊桐廬之賊遏其西趨而自  
移軍蘭谿欲俟金華等處布置稍定親至嚴州相機調

度又以劉典一軍當由嚴赴徽爲肅清皖南之計必江  
皖邊圍安謐我軍無後顧之虞方可一意進取是時蔣  
益澧解送龍游賊酋李國羣并鷹天義萬連勝燕天安  
陳其得等訊稱陳廷香在白龍橋被官軍擊斬國羣率  
其死黨翻山竄至蘭背源後遇參將化儒軍阻截於是  
詐稱李懷忠乞降前所獲偽印偽令由賊日蜚天福劉  
洪飛帶護已被龍游追軍禽斬左公以國羣抗拒官軍  
最爲悍鷙當勢窮力竭始乞命歸誠詭易本名希圖免  
死罪無可赦磔之並以連勝其得爲賊力戰創痕徧體  
亦皆梟示我軍旣克諸暨賊酋何文慶由紹興率黨三

222

千餘來犯徑撲城下適高連陞熊建益已於二十三日  
率所部馳至卽督隊迎擊斃賊三四百生禽數十餘賊  
竄回正欲移營而東陽永康敗賊萬餘又紛紛竄至高  
連陞熊建益黃少春李耀南合兵追擊大敗之殺賊近  
千拔出難民數千奪獲旂幟器械無數劉典復率各營  
追至應店街斃賊數百首梯戴三酉因官軍追躡率黨  
由義橋登舟下竄人多船重沿江溺斃甚眾桐廬先有  
賴賊踞守益以各路敗賊萬餘於沿江修築石壘勢復  
熾二十八日劉培元令副將楊政謨率舢板師船急駛  
下流截獲一賊船二十九日賊見官軍少悉眾來戰政

謨督隊奮擊燒賊船百餘號奪礮船數號民船二十餘  
號將沿江賊壘悉數焚毀殺賊數千溺斃無算餘賊竄  
伏城中是夜政謨約會魏喻義所部陸軍併力圍攻遂  
克桐廬杭州上游唯富陽一縣尙爲賊踞左公疏言劉  
典一軍追賊已抵富陽縣境當杭州之西南距省城僅  
八十餘里蔣益澧所部高連陞熊建益等已由臨浦義  
橋蕭山而前當杭州之南距省城亦不過數十里若遂  
乘勝長驅杭州糧少城孤似亦無難速克惟譚星一股  
已與花旗賊合由於潛昌化竄入皖南必將勾結太平  
石埭諸賊擾我後路其僞王黃呈忠等聞已向富春渡

江意在與賊首李秀成合勢謀犯江北杭紹嘉湖均爲  
秀成分地臣現飭蔣益澧率所部全軍規取杭州以輟  
其北竄之謀臣所部除分駐金華外均隨臣進駐嚴州  
而催劉典一軍仍回嚴州以漸向皖南其由湘新募之  
勇計此時已行過南昌臣飛檄廣信府暫爲截留聽候  
劉典隨時調遣以重江西邊圉之防並先檄劉培元率  
所部三營前赴馬金街會合王德榜一軍相機截剿再  
由臣軍分撥八營扼紮淳安縣之港口茶園以遏淳遂  
之衝一面申儆各營切勿貪省城克復之功而進而忘  
大局勿憚江皖迂阻之勢就易而昧戎機將及皖浙肅

清臣擬願懇

天恩總以殺賊之多寡爲勞績之高下一體錄敘以昭獎勸庶人心競奮易就救平於是杭賊之勢漸孤陸路以富陽爲屏蔽自賊踞杭後卽脩築富陽城壘雉堞一新城背山面江左嶺右谿西接七里瀧東屬錢塘江面漸闊形勢完固而當官軍克復桐廬之時杭屬新城紹屬蕭山之賊均棄城鼠竄併聚於此踞杭之賊亦以前所奪戰船溯流上拒左公令水師副將楊政謨都司羅啟勇等先率所部師船駛往察看賊勢二月初六日政謨自桐廬擊楫而下遙見賊船數百簇列城邊前後護以礮

船遂傳令師船分兩隊翼排疾進頭隊繞向南岸直攻中堅百礮齊轟江流鼎沸火箭噴筒迸注賊船頃刻延燒殆徧賊之礮船復爲我後隊師船擊敗官軍前被賊擄脅者各以礮船大呼投誠羅啟勇適帶所部師船駛至與政謨並受之返礮轟擊賊大擾亂並棄船入壘官軍亦登岸蹙之踏平二壘殺賊甚多奪獲旂幟鎗礮無算日暮收隊是役共燬賊船數百艘奪獲礮船十數民船數十斃賊近千政謨等駐營南岸城賊爲之奪氣蔣益澧既定臨浦義橋諸鎮卽令高連陞熊建益馳抵富陽自率後隊繼進並自南岸上游渡江魏喻義奉檄率



所部由桐廬來會左公以抗賊援富陽宜先挫慌之如  
堅城不可驟拔則令益澧率眾直撼杭城而分兵助  
義扼要爲營以綴富陽再由嚴州撥兵駐新城師船翼  
之以遏賊援而通餉道又兼籌皖南富是時皖南賊有  
三其一胡黃古賴諸賊卽踞甯國太平石埭旌德者也  
其一花旗賊素皆廣東無賴雖眾實怯戰游行掠食蹤  
跡靡常爲賊黨所不齒前年由粵湘江右竄入浙皖者  
也又其一卽譚星在浙境被官軍截殺遂由千秋關竄  
徧徽州左公前卽疏陳以劉典一軍肅清皖南時已從  
威坪行至屯溪新募之勇亦令由廣信趨婺源會賊從

太平石埭來犯黟祁門界分駐漁亭之總兵丁長勝副將王明輝等於二月初一初二日新授贛南道王文瑞督率郭德馨楊海泰羅瑞山喻勝榮等於初十日連破走之斬獲甚眾賊美天福張北湖被天福張小滿謙天福鍾有朋偽丞相王大吉軍政司蘇四達黃齊升皆被禽斬之胡古兩賊之勢頓衰而徽防較固左公疏言規杭郡可以緩賊竄繞江北之謀剿皖南可以遏賊突犯江西之路爲大局計卽所以爲浙計富陽賊爲水師所挫連伏十餘日於西門脩卡置大礮堅守僞天將謝賊僞朝將汪賊踞城東北之新橋環築數壘以爲犄角蔣

益灑既至二十二日令高連陞熊建益兩軍移駐新橋  
偏之築壘未竟賊分股來撲官軍然放大礮轟斃數十  
賊勢稍卻我軍一鼓齊進賊退回壘新授溫處道郝喻  
義乘勢會同總兵劉清亮亦進偏富陽二十四日益灑  
移駐新橋田壠與賊隔水而軍令高連陞由右熊建益  
由左賊卽出大隊先撲左路我軍以礮擊之斃賊數十  
仍潮湧而來建益大呼馳馬陷陣王聯芳李運榮李世  
祥翁桂秋楊道洽兩旁齊出王陳林從田壠橫截之前  
賊甫敗後隊之賊又進熊建益等奮力衝殺斃大旗數  
驍賊始大敗奔回陣斬四五百奪馬匹三十六當左路

酣戰之時賊分兩大枝並撲中右益灃令徐文秀鄧受  
 福掩旂伏於低田周廷瑞賀國輝余朝貴等佯敗誘之  
 伏起掩殺賊駭而奔益灃縱兵進擊斬馘無算高連陞  
 以右路之師迎戰連斃騎馬及大旂十數賊賊敗走官  
 軍乘勝追之賊復分隊來抄官軍小卻益灃急揮徐文  
 秀鄧受福往援賊來愈眾殊死戰張志公王宗元匹馬  
 衝入賊陣手刃數賊宗元中洋鎗死志公亦身被數創  
 益灃督親兵及張會元馬隊馳之高連陞等復奮短兵  
 前鬪斃驍賊百餘始大潰其被官軍追戮及墮港淹斃  
 者又二百餘戰方急時城中突出二千餘賊乘虛撲我

西門營盤曹魁甲憑壘守禦劉清亮督隊抄擊殺賊數十賊敗過石橋楊政謨羅啟勇等率師船沿江追轟復斃多賊會陰雨彌月谿流暴漲左公以地勢遼闊後阻深潭難以趣戰又自富春江下潮汐甚大製長龍戰船未成舳板身輕不能壓潮駛運乃調甯波水師布輿有等艇船並令甯紹台道史致謬僱募烏船十二號從鼈子壘駛入錢江助剿復令李錫回賴錫光率所部駐守新城楊鼎勛率所部駐守桐廬以通餉道而固後路謝汪諸賊皆李秀成死黨故戰最力旣挫其悍氣頗窮賊左公見富陽新橋賊並堅踞屢誘不出意有詭謀並以

新城屏蔽桐廬與富陽官軍聲勢響應地尤要害慮兵力尙單於是令魏喻義所部二千人馳往備之布置甫定李秀成果嗾僞聽王陳炳文釋常熟昭文之圍而急援富陽且糾集蘇常杭嘉驍賊數萬嗾踞守嘉興石門之僞歸王鄧光明及新橋僞將汪黃二賊由餘杭趨臨安將襲新城以抄富陽官軍之後已竄踞觀音山一帶進紮山口距新城僅三十餘里值魏喻義馳至四月朔日會賴錫光等進剿賊大至縱鎗礮擊之斃賊數百猶死拒不退喻義分軍由小路抄之自率親兵殲其先鋒數賊始奔潰我軍乘勢追之斬賊千餘生禽百餘奪獲

旂幟軍械數千件一賊騎黑馬掠陣官軍闕之數重爲  
數十賊騎擊洋鎗擁護突圍去僅於道旁獲其黃呢大  
轎訊之禽賊卽陳炳文也是夜僞朝將汪賊復分路來  
犯比曉已至永昌山霧漫空不辨咫尺魏喻義督軍迎  
勦賊潛由林谷中抄出我軍奮勇衝殺鏖戰三時守備  
劉立號陣亡都司楊陞斌被重創其餘將士傷亡數十  
人喻義且戰且退由東門收隊入城賊躡蹤追至賴錫  
光等由南門出擊賊少卻急折附城民屋嚴軍守堞賊  
復進合圍火箭噴筒進射城上環攻兩時賊多傷斃乃  
退三更後又分三路撲城拔開木椿梯城而上我軍伏

於牆內待其偏近發礮石擊之斃賊不知其數方諭義  
之退保新城也蔣益澧遣熊建益尾賊後至板橋殺賊  
百餘禽五十餘獲米數十石而還復遣提督高連陞率  
數營赴援而自以親兵繼之令熊建益回防新橋初三  
日高連陞馳抵新城之南楊昌濬率十營自嚴州往援  
賊見我師大集拋棄攻具向臨安一路遁去連陞邀斬  
殿後賊數十而返先是賊圍新城城中糧僅一百餘石  
各營呼號求援昌濬馳書諭之以賊由杭州裏糧而來  
斷難耐久但堅守三四日援師集矣賊必望風遁去已  
而果然是時新橋賊壘見官軍方援新城突出數千賊



分路來犯熊建益擊敗之乘勝攻壘右臂中洋鎗猶裹  
創督親兵踰重嶺直薄地邊猱騰而上賊勢大亂將遁  
矣忽洋鎗洞中建益小腹踣地親兵昇回而卒賊亦不  
敢復出建益隨征十年橫勇善戰所向有功左公深惜  
之疏請與王宗元劉立號同優卹並請

予諡於死事處所建立專祠蔣益澧聞報折回時楊昌濬援  
師前隊羅大春簡桂林楊鼎勛陳錦爵四營先抵新城  
益澧遂調高連陞一軍還駐新富適中之地往來策應  
初六日賊陳炳文率各賊由桐嶺謝聖嶺千家村一帶  
至洪莊上陳泗洲布陣數十里漫山彌野意與我軍決

死戰初七日蔣益澧正在派隊迎剿賊已分股來撲王東林曹魁甲兩營從高馳下勢殊迅猛官軍列隊仰攻相持兩時許王東林曹魁甲冒礮石衝上斬驍賊十餘賊敗歸對山復悉銳來撲高連陞營連陞分軍左右伏自率親兵嚴陣待之賊近礮發斃黃衣賊一先鋒賊數十賊卻伏兵左右抄擊賊大敗王東林曹魁甲復從後截殺陣斬僞朝將李賊等三十餘生禽數十皆伏誅其斃賊四百餘傷賊近千自此賊抄襲官軍之計始沮矣先是水師楊政謨羅啟勇聞杭城踞賊隨陳炳文上竄欲乘虛襲之月朔率師船直下閘口遇賊船百餘艘卽

開徽譚擊游擊布良帶等見上游師船駛至各率戰艇  
夾擊賊勢不支棄船而走政謨等登岸追殺直抵杭州  
望江門外踏平一賊壘殺賊數百燒船數十奪船三十  
餘杭賊大驚亟呼陳汪各賊回援賊旣在富陽攻壘而  
敗知官軍布置嚴密無懈可乘而趨援者日數至遂鼠  
竄回杭左公疏言蘇常各賊急援杭州本在意料之中  
其逕犯新城思襲官軍後路亦賊之常技新城城小而  
固我有重兵駐守以主制客以逸待勞賊雖悍且眾亦  
何能爲惟以規復局勢而言非重兵由新城臨安直搗  
餘杭不能扼杭城之吭而拊富陽之背乃徽休祁黠雖

以次肅清而賊由池屬建德犯江西饒景太平石埭等處尙有餘賊踞守劉典一軍勢須兼顧遽難撤回通計臣軍水陸馬步僅三萬餘人劉典王文瑞兩軍之在皖者已一萬有奇蔣益澧全軍之攻富陽者亦一萬有奇臣復撥馬隊水師助之其餘各營除分撥下游之新城桐廬及義橋一帶上游之淳安遂安兩縣外尙須分防衢州金華嚴州兵力實不爲厚如新隸各軍漸知紀律機會可乘臣自當迅速以赴戎機蓋其時甯波軍頗冗雜方議汰遣而福建助剿各軍統領乏人亦應分別去留束以營制而專其責成左公欲收餉節兵精之效不

行險以邀利不浪戰以急功其謹慎師武鄉老成似營  
平而戡定之功卒不外乎此觀其前後所上事兢兢於  
此三致意焉是月左公於嚴州營次得

旨補授閩浙總督兼署浙江巡撫旋因疫氣流行左公及諸  
將僚佐均病瘧痢軍士物故病憊者且半劉典一軍方  
轉戰江皖之間王文瑞駐守祁門浙中兵力過單首尾  
相距太遠聲援不繼顧此卽有失彼之虞能守卽有難  
戰之勢形隔勢阻未能乘勝深入迨七月杪江西一律  
肅清劉典引軍還歙左公乃調康國器所部粵勇馳赴  
富陽助剿蔣益澧亦請令法國總兵德克碑量帶洋礮

及洋鎗隊前來富陽爲會攻城壘之計並力疾察看沿江上下形勢見城北雞籠山以下賊連踞壘卡十餘處地勢最險必由北進攻奪其要隘斷其糧道始可制賊死命於是約水師副將劉連陞都司梁雲山等調集師船八月初六日令徐文秀余朝貴李運榮鍾九如張志公張政順等所部陸師渡過江中橫沙繞出富城之北以攻雞籠山賊壘令水師副將楊政謨法國總兵德克碑由寶塔嶺腳登岸以攻倚城賊壘又令總兵劉清亮率原駐新橋各營出隊牽制賊勢而自率親兵督戰調度已定次日水師戰船分載各營陸續渡江至雞


龍山賊見官軍大至齊出拒戰扈照乾徐文秀督隊奮擊攻破第一層賊壘賊以死撐拒照乾中矛傷仍與文秀鼓噪大進余朝貴等繼之撲入第二層賊壘殺賊百餘賊大潰官軍乘勢盡破諸壘卡新橋出千餘賊來援益灃遣徐文秀及丁賢發分兵擊退遂令文秀等就賊舊壘及沿江背水結營以舢板師船護之江中拖罟廣艇大小礮船連放炸彈向城賊大懼楊政謨率水勇德克碑率花勇越嶺而下力攻倚城大壘城賊出隊迎敵花勇環放鎗礮自未至酉斃賊不計其數賊殊死戰我軍亦列隊向晚益灃令副將劉清望都司謝茂勝率親

兵助之徹夜轟擊賊創甚初八日黎明益澧復率李運  
榮所部前往親自督戰德克碑益奮迅士百其勇先破  
一壘賊奔潰不敢入城向新橋而遁又被總兵王月亮  
都司馬雲標截殺數百遂於巳刻克復縣城其時劉清  
亮已會合高連陞督率各營分攻新橋各壘賊出死黨  
萬餘拒戰連陞知各路已捷激勵諸軍奮擊立破六壘  
清亮等亦破五壘各殺賊數百適益澧令徐文秀等繞  
出新橋長驅並進悉破二十餘壘殺賊不知其數生禽  
七百餘奪獲輜重旂幟器械馬匹無算跟追二十餘里  
始還益澧隨令劉清亮等八營駐紮新橋王月亮等兩



營駐守富陽餘眾悉隨益禮進薄杭州距城十五里而  
軍水帥各船飛駛東下直向城岨轟擊賊酋陳炳文方  
拔嘉興聞之馳回守禦左公疏言富陽爲杭城鎖鑰賊  
負岫死守中外水陸各軍晝夜環攻其苦戰克城則以  
德克碑楊政謨爲最李運榮等次之人險奪隘則以徐  
文秀梁雲山張政順余朝貴爲最張志公丁賢發等次  
之臣敵康國器迅率所部直趨餘杭魏喻義由新城出  
師夾擊如能一鼓攻下杭城已成孤注則當調國器所  
部襲取海甯固我浙東之防斷賊退竄之路乃爲周密  
蓋餘杭在杭之西北海甯在杭之東北並通嘉湖富陽

既克賊勢專倚二城而餘杭距省四十里尤恃爲近援  
左公先策之自是剖巢燔穴戰勝攻取之形益在掌中  
矣



平浙紀略卷五

同治二年八月十六日奉

命督辦軍務閩浙總督兼署浙江巡撫左公旣以富陽之克  
入告擬卽力疾由嚴州前進值賊犯皖南之休黟祁各  
境雖爲按察使劉典及王開琳等擊退而賊別由績溪  
歙過嶺欲竄援杭州左公以嚴州爲居中策應要區仍  
暫留駐分遣各營防守新城分水并令典軍遏賊關入  
之路勿遽出嶺而趨蔣益澧進攻杭州益澧請調聞家  
堰西興各營渡江會勦翼以水師壁壘漸偪清波鳳山  
兩門別派副將劉濟亮率六營助康國器魏喻義等進

取餘杭益灃自駐留下相機策應賊偽聽王陳炳文偽歸王鄧光明偽朝將汪海洋等見官軍分道並進於杭州負郭一帶要隘重重堅築壘卡城外繞建木柵並喉餘杭踞賊偽欽王謝天義等併力死守爲犄角之勢自倉前長橋女兒橋老人畝東塘西谿埠觀音橋三墩縱至武林門外北新關橫至古蕩連營四十餘里以拒我師二十五日偵知汪賊領黨前赴餘杭益灃卽令高連陞率所部各營進攻十里長街洋將德克碑率花勇同知魏光邴率親兵四哨爲之接應王月亮率所部及閩楚營依山列隊以防清波門一路楊政謨劉連陞羅啟

勇率師船沿江而下黎明水陸各軍俱抵濠邊陸師拔  
開樁籤水師排放鎗礮賊驚惶失措官軍乘勢湧入立  
破街口大壘三四百賊殲焉街後賊數千憑壘據守不  
敢出戰我軍亦以進攻路狹未遽深入正相持間城內  
出驍賊萬餘高連陞縱令逼近乃揮眾迎戰王月亮等  
橫出抄之礮船連環轟擊賊大潰追入第二重卡斃賊  
頗多並鎗斃賊中一夷人賊退入城官軍亦收隊還二  
十六日益濃令高連陞等節節移營進屯十里長街六  
和塔萬松嶺等處先占高地俯瞰城中而自率徐文秀  
馬德順赴東嶽廟察看形勢乘賊不意揮軍疾進立破

三卡斃賊數十餘賊烏水逃去各壘堅踞不出九月初六日辰刻城賊萬餘由雷峰塔及饅頭鳳皇九曜等山分四路來撲官軍新壘其旂幟之鮮明隊伍之整齊迥與前異我水陸各軍高連陞王月亮劉連陞楊政謨羅啟勇等亦分路迎敵賊從對嶺鳴鼓颺旂而下官軍鎗礮排擊諸將往來馳突噫先鋒賊數十賊卻仍前余朝貴高有志由江邊繞至高連陞橫出山踰魏光邴劉清亮實德棧各率所部繼之縱橫盪決士氣益厲師船礮無虛發賊大敗走追奔至饅頭山沿途斬賊三百餘奪獲旂幟器械無數鄧光明陳炳文自率死黨據險督戰

仍驅敗賊回撲沿街破屋中伏賊千餘鎗發如雨高連  
陞等督眾奮擊王月亮率各營出九曜山萬松嶺一帶  
衝殺而出賊勢不支始狂奔入城我軍直追至城邊乃  
還初八日益灃令王月亮甯世杰進軍天馬南屏兩山  
羅山網進軍翁家山別派礮船向饅頭山一帶轟擊使  
賊不得成列高連陞等出隊備禦至申各壘遂成賊不  
敢偪益灃旋於留下河內搜獲賊小船三十餘艘改造  
礮划分布萬春廟楊家橋何母橋梧桐村蔣村各隘日  
夜巡防以固餘杭運道十三日賊於楊家橋築一壘益  
灃令徐文秀率勇乘夜攻之禽斬百餘賊餘多溺死乘



勝過河攻破一小壘又斬賊數十奪獲米船數艘禽賊  
言饅頭山之戰偽歸王受傷遁回偽欽王在餘杭亦中  
礮死蓋官軍之攻餘杭康國器由富陽魏喻義由新城  
先後移營八月初九日喻義與劉榮合羅大春簡桂林  
等分三路前進十一夜我右路連破花牌樓半背嶺栗  
樹村諸卡賊望風走併青山老巢十二夜魏喻義由大  
路進羅大春等由臨安小路進各破沿途賊卡十餘道  
見青山油車頭賊巢燈炬熒熒柝聲不絕喻義急令涉  
淺過河分軍半攻村落半攻賊壘賊恃洋鎗礮拒戰我  
軍從後掩襲先走其村落之賊巢堅椿密猝不可破喻

義合放炸彈火箭噴筒隨之賊營火起羅大春等繞出壘後夾攻賊驚潰奪獲馬騾數十大礮二十七擡鎗等百餘旂幟器械無算共斃賊數百餘賊竄回縣城青山一帶壘卡悉平我軍陣亡十餘人受傷亦五十餘人旋移營青山漸偏餘杭之西餘城東南尤多賊壘而近城寶塔山文昌閣兩壘形勢最要爲我軍所必爭之地十八日劉清亮攻南門賊壘康國器攻寶塔山賊壘康熊飛古捷芳先登吳光亮繼之林珠等左右抄截一鼓而拔卽分軍據壘二十日汪海洋從杭州來援康國器劉清亮合軍擊敗之追至倉前收隊是夜魏喻義約會國

器等進兵攻城賊伏不出入其舊城斬數賊而還二十  
一二十二日汪賊仍由倉前過河結壘西島村壘外復  
爲礮臺官軍乘其初築破之賊焚壘遁賊國器以旣得  
寶塔山之險卽可移營北岸斷其水道於是設立浮橋  
二十六日與劉清亮台攻城南破長沙堰一卡後進攻  
南門賊壘賊久不出會鄧光明率黨由倉前來援我軍  
分隊擊敗其前鋒斬十餘賊奪大旂多桿並攻破小耿  
廟一卡賊退還巢三十日嚮明南門出賊千餘列陣石  
門橋北門又出數千賊捲旂疾趨潛撲官軍之後魏喻  
義設伏林中並約羅大春賴錫光等嚴陣待之賊至伏

起截爲數段斬馘甚多賊大敗走還追抵城下石門橋之賊亦退九月初七日康國器分所部六營爲三選兩營擡鎗四隊沿河環擊以兩營設伏林內又兩營列隊遇大南東武兩橋賊衝約劉清亮分攻南岱門半度橋各壘以綴賊勢自率親兵然大礮直轟文昌閣賊壘自午至申賊死傷不可勝計吳光亮林珠從林內突至壘邊康熊飛亦督隊過河夾攻賊憑石壘施放鎗礮我軍皆越濠拉柵而入盡殲壘賊城中悉銳來援復經擊退我軍亦陣亡十一人受傷七十餘人初十日魏喻義出隊至石門橋賊來戰又敗之是時左公疾新愈而營中

疫氣未息聞花旗賊山甯國竄至昌化之白牛橋及於  
潛之太陽埠其前竄廣德者復進踞孝豐剡興行抵績  
溪叢山關偵知賊竄浙境遣七營一平隊入昱嶺關以  
勒於潛昌化之賊旋又聞湖州賊由武康來援杭州杭  
賊專待嘉湖之援並資接濟而餘杭實爲湖杭要衝與  
杭州尤結唇齒輔車之勢不克餘杭卽杭州不能合圍  
蔣益澧一軍僅扼杭州之西面餘杭各營亦祇圍其東  
南而兼偏其西顧北路無重兵屯駐兩城之賊往來自  
若終莫能制其死命而錢江東岸及富陽新城分水桐  
廬滔安遂安各隘口皆不得不置兵防守左公暫駐嚴

州所統兵不過千餘有防勦之兵無策應之兵雖局勢  
漸穩而我機尙難迅速左公上疏具言之賊復於餘杭  
東門至杭州倉前長橋女兒橋等處添集驍黨欲由何  
母橋繞犯餘杭諸軍之後我師擊走之蔣益澧以何母  
橋太平橋一帶汶港紛歧若少疏防賊必乘隙內竄十  
月十六日令副將周廷瑞都司王東林於天水橋立一  
壘參將鄧受福於護國橋立一壘康國器亦令參將古  
捷芳會勦賊伏不動鄧受福率親兵覘之突遇賊二千  
餘受福直前搏戰斃賊數十親兵有被賊圍者受福陷  
陣救之手刃數賊忽賊鎗洞穿右脇而殞王東林帶隊

馳援賊乃退十七日益盪令劉樹元曹魁甲徐文秀出隊至何母橋遂於方家橋太平橋加築二壘十八日長橋女兒橋之賊來犯復擊退而嘉興等處驍賊數萬新集杭州是日天微明乘大霧迷漫潛由萬松嶺直撲官軍營壘張志公憑濠拒之賊偪前丁賢發率所部從山嶺馳下入壘助守約一時許高連陞督率余朝貴張志順等馳至張志公丁賢發出壘奮擊賊少卻洋將德克碑率勇助戰並令淺水輪船然放開花大礮轟斃數賊楊政謨劉連陞羅啟勇各率師船擊退沿江之賊登岸衝殺賊見水陸各軍大隊齊至分拒酣鬪兩時我軍愈

奮斃賊數百賊大敗其出清波門者亦被王月亮所部  
暨閩字營截勦潰回各軍乘勢追殺又斃多賊十一月  
初五初七日康國器進攻餘杭東門賊壘壘有斬獲時  
左公已移駐富陽卽於初十日率輕騎馳赴餘杭見縣  
城依山帶水地勢遼闊東南直達杭州雖爲我軍所扼  
而北通武康德清西北通安吉孝豐賊聲勢聯絡非厚  
集兵力盡銳急攻不可爰調富陽朱明亮劉璈楊和貴  
余佩玉等五營分水張聲恆等四營至餘杭會勦而以  
副將劉明珍率嚴州兩營淳安兩營移屯分水總兵黃  
少春克勇一軍適由皖南調回亦出分水新城以扼餘



杭之西北十三日令羅大春簡桂林劉榮台賴錫光等  
出青山進軍丁橋十七日令朱明亮劉璈余佩玉等進  
軍石門橋並令魏喻義徐文秀各營列隊南門康國器  
所部各營列隊東門以分賊勢羅大春等三營出西門  
大路楊昌濬率親兵及楊和貴所部出丁橋小路李耀  
南黃有功張福齊等繞出西北隅布置甫定城壘及東  
北門外之賊悉眾來撲官軍分路迎戰西路賊勢較重  
徐文秀朱明亮與劉清亮等六營馳往夾擊鏖戰良久  
賊忽分股由左擁上山梁其鋒甚銳賴錫光軍卻楊昌  
濬及白冠玉等亟從左路峽中突起衝擊賊始駭奔我

軍截殺百餘生禽黃衣白衣賊十餘追近城邊賊阻水  
各軍蹙之殺傷溺斃甚多又有黃衣賊從村屋衝出李  
耀南羅大春等左右抄擊賊亦奔東門外之賊復被康  
國器擊敗各軍共斃賊數百奪獲洋鎗六十餘桿擡鎗  
鳥鎗百數十旂幟刀矛無算二十四日張聲恆齊蘭禮  
劉端冕楊松林進屯城西北隅楊昌濬督劉榮合賴錫  
光楊和貴列隊而前蔣益澧率馬步九營從石門橋出  
西路劉焆等四營繼之黃少春楊詠春率馬步十三營  
由丁橋並出北路甫成列驍賊萬餘來戰西門之賊亦  
皆負城壘而陣黃少春等先進蔣益澧楊昌濬各督隊

衝入並擊斃先鋒賊數十賊悉銳抗拒官軍三面包之  
奮呼騰擊賊奪路奔至城北伏屍枕藉鄧光明汪海洋  
猶麾其死黨苦相搆格益澧策馬陷陣諸軍乘之鄧光  
明左脅中鎗墜地賊眾昇入城官軍亦以日暮收隊是  
日自辰至酉戰數十合斬五百餘級傷斃曳屍入城者  
殆以千數百計奪獲馬匹二十餘洋鎗旂械無算康國  
器各營攻東門柯埭賊卡破之進攻牛阪太平橋賊壘  
擊敗倉前拔賊又斬馘百餘賊箠頓衰乘夜於城西北  
脩濬長濠並加築北門外三壘連日鼠伏不出而東北  
瓶窰鎮及倉前林清堰何家陡門一帶賊益集揚言將

撲官軍營壘而實瑟縮不前左公督攻餘杭半月回富  
陽大營清理積牘然後進駐東西南三路適中之橫溪  
頭並議由北路築壘分軍襲取瓶窑絕其餉道留楊昌  
濬暫駐青山而令蔣益澧回留下布置機宐益澧抵營  
後昌濬連得諜報知因官軍急攻餘杭各路援賊均趨  
重杭州西北餘杭東北并杭城悍賊亦多出援有自城  
中逃出者皆言賊將併力以爭餘杭昌濬意賊既趨重  
餘杭則杭州守禦必疏隨函商益澧乘隙先攻附城各  
賊壘以怵之益澧以爲然十二月朔令提督高連陞洋  
將德克碑會水陸各軍進攻鳳山門外賊壘親督馬步

各隊排列錢塘門外秦亭山樓霞嶺一帶以防城賊之  
援連陞等數道並進賊紛紛揚旂而出尙未成列諸將  
大呼陷陣師從而突之賊披靡退入石壘我軍躡蹤急  
破一壘殲其守賊自辰至午賊望風竄復破九壘直追  
抵城隍山腳而楊政謨劉連陞等率師船攻江邊石壘  
亦破之其斃賊二千餘奪獲鎗礮等不可勝計益豐卽  
令高連陞分所部據賊五壘德克碑據二壘偪之唯餘  
古蕩賊壘及近城兩壘次日各軍力攻仍未能拔益豐  
令各營分屯錢塘湧金鳳山清波等門直踞饅頭山雷  
峰塔秦亭山爲營圍賊中央而請調橫溪徐文秀等五

營助攻古蕩左公從之並檄衢州鎮總兵劉培元統領  
錢江水師各營以一號令且令糧道楊昌濬伺擊餘杭  
之賊適益澧亦以書致昌濬言杭城有初一日之捷援  
餘杭之賊又必回顧杭州可乘機攻取初三日昌濬等  
各軍分路進攻北門出賊千餘東北門外村屋出賊數  
千各拒戰黃少春左師先勝縱火焚港邊賊壘並破二  
卡右師劉明燧等從三里鋪以火器攻壘亦破之魏喻  
義張聲恆等中路之師與賊大戰踰時我兩路乘勝夾  
攻賊奪路狂奔追近北門港邊突起黃帽紅衣賊目數  
人率黨迎拒並驅敗賊回鬪殊死戰各軍整隊進擊楊

昌濬督親兵及羅大春備桂林所部更番應戰至數時  
之久賊復卻劉璈等進攻西北角城壘賊忽分股從旁  
來抄爲朱明亮余佩玉擊退屢垂破復完計斃賊數百  
生禽二十餘奪獲軍械無算而賊先於城東通杭州要  
道之姚家埭王家廟閘竺堰及太平橋牛畝加築堅壘  
與倉前聯爲一氣是日康國器令吳光亮康熊飛古捷  
芳林本丁應龍攻克姚家埭等處四壘進攻牛畝汪海  
洋率賊來援爲光亮等擊敗其斃賊一千有奇賊愈窮  
蹙杭賊亦自守不暇初五日水師劉連陞楊政謨羅啟  
勇梁雲山彭大光等進攻清泰門外觀音堂賊壘分兵

縱燒附城民屋以誘城賊賊果出連陞等擊斬數十賊  
初六夜賊於錢塘門外偷撲我營羅山綱擊敗之劉培  
元以西湖一帶多汊港恐有伏賊遂令蔣榮彩劉仁和  
等拽數十舢板戰船由開口過嶺入湖初八日榮彩等  
擊斃賊百餘奪獲礮船三艘划船十餘歲闌雨雪兩城  
之賊堅伏連旬我軍亦未進攻二十五日雪霽楊昌濬  
督諸將及劉清亮等馬步七營進攻餘杭北門康國器  
督所部進攻東路黃少春由北路繞攻瓶窑魏喻義簡  
桂林劉榮合等列隊西北以爲策應黎明國器令康熊  
飛古捷芳吳光亮丁應龍等出賊不意疾趨越濠連破



四壘賊大股來援國器分軍迎勦斬賊數百賊復分眾千餘從楊家橋抄截軍後康熊飛林本匹馬突陣各手刃數賊師乘之賊敗潰遂焚楊家橋賊卡我北路之師分而爲三張聲恆等由右攻三里鋪賊壘劉清亮等由中攻北門港邊賊壘賊皆併力死拒朱明亮谷香山劉璈等繞從五聖廟下陡門堯水過河麾兵驟進連破何家陡門五壘殺賊千餘屍橫委積溪水爲之不流是日東北兩路共斃賊二千有奇陣斬闕天義李有慶等賊奪獲偽印旂幟鎗礮無算惟瓶窑賊壘負山巖石堅守不出官軍仰攻多爲所傷僅破五卡焚其附壘之屋而

還二十六日各軍復分道進攻劉清亮率五營及聶邦  
光廖涓臣等扼其中路時以汪海洋老巢在林清堰僉  
謂不廓清外賊則城終不可得而下楊昌濬督朱明亮  
劉璈谷香山余佩玉劉明燈張定元張人和馬雲標等  
營黃少春率王正德李耀南等營仍由五聖廟分兩路  
繞越縣城而北直搗林清堰巢穴汪賊負固拒戰我軍  
自辰至未擊斬驍賊六七百余佩玉等乘勝深入前隊  
既動後軍不可復止追至小港偏近賊巢賊復率悍黨  
抵死回拒相持又時許昌濬立堰上審視見賊阻水爲  
壘汶港縱橫深可滅頂不便衝突顧來路隄堦長十五

六里雙港夾之兩岸桑竹陰翳賊易設伏而我難成列壘堅不可猝拔恐日暮爲賊所乘乃令徐徐收隊甫過橫港賊果分伏港邊竹林暗放鎗礮壘中賊亦悉銳來撲朱明亮劉璈余佩玉等殿後力戰出險佩玉中礮陣亡將士傷亡共三百餘城賊欲邀我歸路南門賊出數百奈萃隆等擊退西門賊出數百羅大春等擊退東路賊出亦爲康國器擊斬數十而遁二十七日杭州古蕩壘賊出撲我軍營壘高連陞等擊敗之二十八日楊昌濬及黃少春等復由五聖廟列隊進攻遣輕騎誘戰賊伏不出左公疏言餘杭城非堅峻惟地勢平行而多溝

泗汪海洋於賊酋中最爲狡悍所據林清堰在城北十里又溪流之所環漚進攻路狹此次官軍收隊爲賊所乘由臣未詳察地勢趨戰過急非將士戰陳之不力也三年正月杭州之師晝夜攻城偵知賊援嘉興二十五日高連陞會合劉連陞水師各營及洋將德克碑所部攻克望江門外三石壘斃賊千餘直偪城下賊礮石如雨仰攻數時始還餘杭諸軍亦迭有斬獲二月十六十八日康國器所部各營均乘夜進攻倉前李家場等處賊壘斃賊近千二十夜左公令各軍環攻城壘炸彈火箭飛墮壘中賊驚擾達旦官軍暫憩旋復出隊康國器

令林本吳光亮爲前鋒康熊飛古捷芳林珠等繼之游擊蔡盛恩所部截勦倉前拔賊賊見官軍驟至率黨數千逆戰林本等督隊衝擊斃賊數十賊前隊方卻後隊湧至熊飛等馳往接戰復斃賊無數乘勢將附近蔣元壩賊卡焚掃一空偽裕王劉賊率黨來援吳光亮等合力奮擊劉賊中礮死並斬黃衣賊十餘賊敗走忽倉前賊由橫渡橋斜抄來援蔡盛恩力戰中鎗落河而亡古捷芳康熊飛等馳救擊斃賊數十陷入賊圍捷芳左右衝突手刃賊目數人亦力竭陣亡正危迫問林珠帶隊突圍殺入康熊飛吳光亮卽奮勇殺出賊始潰奔官

軍追斬數百賊出城援應羅大春劉璈等截殺西門賊百餘楊和貴等截殺南門賊數十賊不得逞恇懼不知所爲潛將賊中輜重婦女移入城外各壘左公知其將遁令各營嚴裝以待並多鼓軍聲作撲營之勢以擾之並令劉仁和將所部舢板船駛入南湖晝夜轟攻賊益懼先是僞聽王陳炳文於上臘遣其兄陳大桂赴江蘇大營乞降巡撫李公鴻章決其議於左公隨令同知薛時雨伴送大桂來浙乃炳文不俟大桂回報卽將杭城謀內應者悉行殺害左公以賊誠款未著徒藉空言爲緩兵之計謂大桂如炳文實投誠應卽獻城散眾以表

信迨十七日大桂入城仍無音耗密令蔣益澧相機圖  
之二十一日益澧令高連陞率四營攻觀音堂賊壘劉  
清亮五營及水師劉連陞唐學發羅啟勇所部助之周  
廷瑞徐文秀率湘軍六旂攻占蕩賊壘楚軍一營闕軍  
兩營助之德克碑發大礮轟攻鳳山門親兵四哨助之  
黎明高連陞等進薄觀音堂官軍奮勇齊上一躍過濠  
羣賊驚竄立破兩壘數十炳文率黨萬餘來援劉清亮  
劉連陞諸軍踵至益澧督親兵並馬德順馬隊馳往策  
應敗之時德克碑已轟倒城垣三丈餘益澧調轉大隊  
赴之守備丁賢發等及洋兵十餘先登賊恃鎗礮力拒

我軍受傷百餘高連陞王聯芳俱裹創督攻久乃收隊  
徐文秀等因古蕩賊壘隔水環攻未下分兵旁攻葛嶺  
賊由錢塘門趨援蔣榮彩賀國輝邀擊敗之遂破葛嶺  
二壘殲賊七百餘各壘之賊望風奔潰曹魁甲胡榮連  
破古蕩二壘徐文秀周廷瑞及王東林進克武林門外  
二壘追至十里街而還是日其破十堅壘禽賊言僞侍  
王李世賢前竄至昌化時聞蘇軍攻宜興復由甯國回  
竄旋聞官軍克復宜興溧陽乃竄湖州其竄溇安威坪  
一股本圖竄越江西因前股遇浙軍勦截被創亦折回  
甯國縣翻山竄入湖屬孝豐南鄉饑憊特甚自是各路



敗賊始趨集湖州癸二十三日蔣益澧復令徐文秀等  
四營攻十里街賊壘劉清亮等七營擊武林門拔賊劉  
清亮等三營及將榮彩水師攻錢塘門附城賊壘高連  
陞率四營會合德克碑進攻鳳山門王月亮率兩營進  
攻清波門劉連陞謝永祜唐學發羅啟勇布興有等各  
帶一半水師登岸分攻望江清泰兩門益澧自率親兵  
馳赴武林門督戰徐文秀周廷瑞王東林賀國輝督隊  
銜枚疾走比近長街始發號鳴鼓各勇爭先拔取木椿  
竹籤越濠而進賊伏壘中排放鎗礮我軍被傷數十徐  
文秀親執小旂冒矢石躍過內濠周廷瑞賀國輝繼之

士之先登者屢上屢蹶文秀亦受矛傷士益憤怒陳炳  
文復率黨萬餘來援劉清亮王東林等分路截擊席得  
元以親兵四哨策應賊少卻周廷瑞等攻壘垂破城中  
又出援賊數千益灃急令謝茂勝陳念親率洋鎗隊偪  
城門迎擊先出者悉被傷餘賊不敢復出惟炳文力戰  
不退壘賊恃外援守益堅鏖戰三時殺賊無數而我軍  
亦傷亾四百餘會大雨驟至官軍嚴陣不動雨止仍攻  
直至薄暮收隊清波清泰各門賊壘亦因鎗礮稠密未  
能攻克而賊之精銳盡喪炳文氣沮是夜四更潛啟武  
林門而竄益灃偵知城柝漸稀人聲鼎沸卽令徐文秀

周廷瑞賀國輝王東林劉清亮李運榮翁桂秋李世祥  
馬雲標胡榮李國棟羅山綱葉紀來等大隊分從武林  
錢塘兩門衝入自率親兵繼之徐文秀周廷瑞王東林  
等並由武林門一帶截殺悉捕街巷匿賊駢誅之賊尸  
枕藉填委人馬騰喧殺聲振聞數里高連陞德克碑王  
月亮劉連陞唐學發羅啟勇謝永祐余朝貴張志公張  
政順丁賢發姜子豹布興有等水陸各軍同時由鳳山  
清波慶春清泰等門梯城而入四路勦殺其斃賊數千  
生禽千餘拔出難民無數所獲鎗礮器械不可勝計遂  
於二十四日卯刻克復杭州省城益澧卽分軍移屯各

門並遣馬隊跟追沿途又斃賊數百是日黎明餘杭賊酋汪海洋亦啟東門從瓶窰一路竄走羅大春劉榮合簡桂林等各營分路追剿斃賊無數其有逃竄不及者悉被康國器所部截殺遂克餘杭追過東門數里殿後驍賊見官軍逼近拚死回鬪林本簡桂林匹馬衝殺被賊斫傷猶裹創力戰賊復敗走羅大春等追至瓶窰杭州之賊亦已竄至與瓶窰踞賊憑壘力拒官軍左公令各營加派隊伍躡蹤緊追而自率親兵繼進賊知大軍踵至卽夜棄壘而走次日左公馳抵瓶窰督各營疾驅十八里至安溪關羣峯矗立地勢險峻舊設礮臺禦賊

汪賊之守餘杭也以瓶窑扼北路又於此築大石壘障之比由瓶窑竄至分黨半伏壘中半伏林內意俟官軍攻壘卽從後抄襲羅大春劉榮台楊和貴朱明亮張聲恆等追近壘邊先將伏賊搜剿殆盡然後攻壘賊乃潰奔我軍攻克關隘奪獲大礮數十尊烏鎗千餘桿旂幟無算二十六日張聲恆羅大春等分路出安溪關追剿值曉霧迷漫聲恆率所部五營轉戰而前陷賊伏中傷亾二百餘朱明亮羅大春楊和貴等左右馳援力戰卻之斃賊數百生禽數十奪獲汪賊大旂數十面洋鎗礮械無算其前隊分趨德清武康左公令各營急追竄往

武康之賊令楊昌濬率親兵暫駐瓶窑爲各路策應并令蔣益澧所部攻石門德清以期規復湖州斷賊回竄之路左公疏告捷並言杭州爲全浙根本餘杭又爲杭州西北屏蔽賊首陳炳文汪海洋負隅死守力抗大軍數月以來攻勦殆無虛日茲幸兩城同時克復浙西大局漸可次第肅清此皆仰賴

皇上神威文武諸臣同心協力得以迅奏膚功據謀報賊酋黃文金李遠繼李世賢等麇聚湖州爲蘇皖諸賊逋逃淵藪臣自當殫竭心力慎以圖之賊在浙境則圍攻賊出浙境則追勦務將積年逋誅劇寇聚而殲旃

免致流毒完善地方又成不了之局左公以滅賊爲己任灼見先機算無遺策類如此後一一皆踐其言所有迭次攻戰陣亡之副將扈照乾余佩玉參將鄧愛福王洪熙張明遠劉質彬古捷芳游擊陳宗說蔡盛恩都司陶晉陞周富棠唐得勝李世德陳吉進守備邱得勝吳葆光陳宗懿千總李祥林梁貞祥徐再發把總尹其順黃連陞等俱請優卹並請以余佩玉張明遠劉質彬李陞德陳宗懿唐得勝六人入祀湖南昭忠祠又僞比王錢貴仁前曾遣人納款獻城因謀洩而止迨攻克杭城貴仁率黨千餘叩求免死左公以貴仁雖劫於凶威未

能立功贖罪而事前通款尚可貸其一死附奏分別遣  
留疏入得

旨嘉獎閩浙總督左宗棠加太子少保銜賞穿黃馬褂浙江  
布政使蔣益澧提督高連陞均賞穿黃馬褂益澧並給  
雲騎尉世職道員楊昌濬康國器朱明亮均加按察使  
銜國器並以福建道員遇缺簡放總兵王月亮以下同  
知魏光邴以下文武四十三人敘功賞賚有差杭州初  
克左公卽傳令申儆各軍嚴禁攜帶婦女搬運器物出  
城一面設局安撫難民令紳士胡光墉購米賑濟訪明  
被難婦女家屬所在分別領送三月朔天大風雨左公



拜疏後卽由餘杭入城杭州連年再陷久爲賊踞屋廨  
僅存鳳山錢塘門內被害尤酷斷瓦頽垣蕞蓬沒路湖  
山佳勝地腥疔至此一旦洗而清之遺民鳩形菜色次  
第來歸皆噉吁歎息以爲不圖復有今日也左公爲之  
慨然嗣行經滿營追思瑞傑二公之忠勇闔城之義烈  
躬率僚佐設筵爲文痛哭而奠之一時從祭及旁觀者  
無不流涕其日天氣陰霾頽雲如墨若有萬靈還沓乘  
風雨而上下者祭後倏然清明人皆異之浙實奧區負  
阻易守而難攻兼吳會皖南氛合響應軍從三衢一路  
宋入重關堅城所在連衡旣不能銜尾橫刀直剗巢窟

復不能擊其首尾以潰腹心力戰銳攻勢且棘手賊用  
數十倍之眾席百戰之餘畢智殫力以死負固乃左公  
提一旅之師轉戰而前不三十月恢復省城豈非長算  
勝略而能使之然哉是時附近各城望風款附惟賊聚  
湖州滋益多廓清之功尙在異日云

平浙紀略卷五

平浙紀略卷六

同治三年正月初五日奉

命督辦軍務閩浙總督兼署浙江巡撫左公附奏勦撫事宜  
疏云用兵之道勦撫兼施而實則撫之流弊極多非臨  
機應變措置得宜難免事後之悔臣自入浙以來祇行  
解散一策而不敢輕議招撫者以此現在杭州城內及  
石門德清各賊酋均有求撫之事海甯撫局一成賊中  
私相猜貳者更復不少臣以各賊偪聚一方勢實窮蹙  
其求降固在意中然事前之詐僞宜防事後之安插不  
易惟有分別勦撫相機辦理乃爲穩著蓋是時官軍方

急攻杭州餘杭迭獲大捷杭賊欵計未堅又不近投誠於浙而速求撫於蘇情事詭異意在緩兵已詳第五卷中而海甯一州城濱大海雄踞下游爲杭垣東北屏蔽與餘杭遙相鼎峙左公前疏卽欲俟皖氛肅清抽回勁旅分襲海甯以斷杭州左臂僞會王蔡元隆擁眾萬餘踞守州城致攻杭之師未能北渡浙東之防亦時形喫重迨蔣益澧軍薄鳳山清波湧金錢塘等門迴環進攻聲勢益盛并爲規取海甯之計元隆素負其強旣而知事不可爲又與杭州賊首陳炳文咀晤乃因前署海甯營都司王錫馴願率所部獻城乞降益澧商之前甯紹

台道張景渠亟馳赴富陽大營面請於左公左公以元隆當大軍未至之先望風歛附與窮賊始降者有間令益漣安籌招撫益漣先遣署杭州知府陳思矯署海甯知州廖安之往覘而自率親兵及副將劉樹元所部及水師各營於上年十二月十六日馳赴海甯城對江小駟渡屯駐以俟之先是元隆踞太倉州蘇軍攻之急以無援納款巡撫李公鴻章遣將受其降元隆出城逐適賊援大至元隆復變甫交言伏戎驟起幾爲所害刃拂馬尾而免軍士先入城者四百餘人皆死以故滋欲審其虛實益漣知安之膽略可任請於左公俾牧海甯遺

之西渡二十四日安之與錫馴及都司將益賢輕騎並入直造元隆僞府元隆盛陳兵衛逸巡未卽出安之乃促元隆並集賊目於庭大言曰若輩皆

朝廷赤子今大軍來攻城必旦夕破所以許若歸誠者憫玉石俱焚耳脫復游移將貽後悔如欲用太倉故智者可斷吾首毋徒事鬼域也賊眾大駭旣而皆傾首曰我等懷疑亦恐旣降不免耳今性命一繫公於是元隆隨安之錫馴渡江見益灑叩首泣陳謂幼木讀書粗知禮義咸豐四年賊陷岳州被裹脅年甫十六勢難自拔茲幸覩大軍安懇出貸俾得復爲

盛世良民死且不朽益澄察其情詞懇切卽宣布

皇仁爲更名元吉令回城將所部賊黨一律薙髮並呈繳偽  
印器械二十七日官軍入城元吉率黨羅拜馬前歡聲  
雷動益澄選其精壯列爲元字八營卽令元吉管帶駐  
城外聽調遣立功贖罪餘均資遣回籍元吉請捐給八  
營兩月口糧及遣散之資其眾皆悅是時海甯城內有  
劉樹元楊應龍等營分布防守外有張景渠葉炳忠等  
營錯綜控制人心亦定左公疏言臣初欲襲取海甯固  
我浙東之防斷賊退竄之路茲餘杭未復海甯先下杭  
州賊勢更孤從此東北兩面漸可合圍於大局實有裨



益固非始願所及蔡元吉雖久陷賊中而自拔來歸不煩兵力請援照洪容海古隆賢投誠成案賞給四品翎頂以示激厲已革署甯紹台道張景渠上年克復鎮海甯波餘姚紹興各城此次防守西興一帶隨同蔣益澧辦理招撫均著微勞請免罪留營差遣並請將王錫駟開復都司廖安之賞換花翎得

旨俞允蔣益澧以桐鄉距海甯州僅三十餘里爲杭州通嘉興問道必先攻下此城始可分取嘉興石門等處正月初二日令蔡元吉乘夜襲之元吉突至卽梯城而上爲桐鄉賊酋僞朝將何培章開礮拒傷百餘人未能立克

次日分屯西南兩門益澧復令直隸州知州李邦達都司謝茂勝率親兵六哨與張景渠葉炳忠所部馳往分屯東北兩門培章見官軍雲集乃遣人通款於都司張其光初六日單騎赴景渠營中乞降率眾薙髮獻城竝呈繳軍械益澧以其情詞非詐而可省我兵力受之給以旂幟號衣初八日官軍整隊入城選其精壯列爲章字六營責令管帶立功贖罪遣見左公培章自請捐給已營三月口糧並以雙橋烏鎮爲浙西往來要道願率眾駐守左公皆許之嗣杭賊運糧嘉興行經雙橋爲培章所敗餉道遂斷屢來攻撲皆被擊退湖州賊酋僞培

王黃文金偽輔王楊輔清偽佑王李遠繼偽戴王黃呈忠等見兩城就撫復扼據衝要率黨數萬來犯攻我新降之卒冀綏嘉興之圍益澧遣同知楊道洽馳往援勒並令葉炳忠四營蔡元吉八營由嘉興回駐桐鄉二月初七日後賊自陡壘架浮橋潛渡爲蔡元吉擊退復糾合大股自烏鎮鎮頭鎮三里街陡壘雙橋等處連營數十里直撲桐鄉西門元吉馳禦之斬賊甚多十五日會合楊道洽分路進攻鎮頭鎮三里街賊壘張景渠亦遣張其光陳紹助勒元吉督眾力戰手受鎗傷筋骨俱斷勇氣彌厲諸軍乘之賊敗走遂踏平十餘壘斃賊二千

餘生禽百餘十六日李遠繼黃呈忠等賊乘官軍築壘未成復率黨萬餘來撲元字副營軍功楊嘉玉被創十傷亾五十餘勢危甚元吉與李邦達楊道治馳援鏖戰三時賊猶不退元吉乃率親兵從深林繞出賊後縱火焚之賊陣始亂道洽揮眾夾擊追斬三百餘淹斃四百餘奪獲旂械無算十七十八日元吉等力攻陡暨賊壘克之十九日進攻烏鎮賊壘先是蔣益澧既受桐鄉之降令劉樹元所部移駐嘉興東門外會杭州知府陳思矯遣人招嘉郡守賊偽榮王廖發受出降發受因與降將蔡元吉有隙不果從旣而蘇軍圍攻甚急乃乞援於

湖州守賊黃文金許以重賂願存城屬之文金悉眾赴  
援而扼於烏鎮烏鎮者素爲何培章所轄其降眾水陸  
七營分駐四柵中有大石壘三自居之黃文金旣恨培  
章降我又慮截其歸路於是築壘柵外激銳圍攻培章  
亦畏文金驍勇悉力扼守日多死傷恐不支請益澄率  
重兵馳援不暇往乃貽書劉樹元激勵之樹元奮自任  
卽於正月二十六日進屯烏鎮之中石壘偏閱四柵見  
西南兩面尤要二十八日出隊前往補築土壘並分軍  
備賊文金果嗾賊僞樂王等十八僞王合力猛撲土壘  
左右兩石壘降眾併潰賊遂層層圍裹我軍相持至日

暮亦突圍出游擊尹長青陣亡樹元且戰且退沿河無  
船過片板乘之士皆鳧水乃得渡四鼓還入石壘固守  
並分軍助守旁兩壘賊環鎮合圍二十餘日更番來攻  
所轟大礮輒炸裂復分黨進犯桐鄉雙橋皆敗時嘉興  
垂克賊卒不敢棄烏鎮往救迨二月十八日蘇軍復嘉  
興黃文金驚懼卽夜退回湖州嗾僞樂王來圍烏鎮火  
光達旦十九日黎明我軍見賊列隊如舊而旂幟前後  
倏易知其更換齊開三壘大譟乘之僞樂王疑官軍因  
援至內應駭而俱奔適蔡元吉等亦至合隊跟追斃賊  
三百生禽百餘賊向高橋萬年橋等處竄回左公不輕

議招撫旣撫之後卽委任不疑蔣公益禮亦胸懷坦廓  
前此蔡元吉來見推赤心待之賜酒食引臥帳中或有  
以岑彭費禕事諫者弗聽元吉聞之感泣他酋亦然每  
屏人問策畫不設防維故皆能得其死力焉官軍旣克  
杭州餘杭賊分竄武康德清武康於湖屬爲瘠區土田  
民戶不及中縣之半大縣三之一夙彫敝然欲安固杭  
州必遠戍皖南近備四安安吉以及武康今賊尙踞武  
康德清其爲湖州屏蔽一日不克則旦夕可伺杭州之  
便而湖州之守益堅石門介在杭嘉之間亦慮其從後  
牽制左公欲先取三城以圖湖郡乃令楊昌濬督各營

由瓶窑安溪關進規武康令蔣益澧分軍進規石門德清並令知府李耀南副將劉明燈等馬步七營出孝豐武康之間截勦竄賊二月二十八日李耀南等破俾頭賊卡楊昌濬破上陌賊卡進攻武康先是賊目吳開俊遣人通款於總兵羅大春約爲內應昌濬以武康雖無城垣而賊憑水阻二大石壘堅甚不可力拔令大春曉以禍福率軍先進而副將余萃隆簡桂林等營並駐上陌偏之時陳炳文汪海洋及侍輔首戴利來各賊酋咸萃德清眾尙十餘萬然皆潰敗之餘囂而不整一日數驚三月朔道員張聲恆夜令滿建桂挑降人趨捷者二



十餘潛入放火燒一賊營數處賊館賊喧擾達旦初二  
初三日紛紛由德清西渡以援武康大春率親兵并礮  
船百餘巡至黃洞橋與援賊遇即將浮橋折斷賊不得  
過急令各營乘夜分伏武康城邊用火器攻擊城賊大  
震會賊目楊芸桂等遣人至大春營申內應之約初四  
日大春及楊和貴余萃隆簡桂林等即率眾薄城環攻  
楊昌溶與劉榮合朱明亮湛玉連等繼之賊首吳海勝  
猶憑卡抗拒正轟擊間降人楊芸桂李文林向安邦李  
秀明彭玉桂金權衡等開門延納官軍海勝棄卡逃竄  
遂克武康羅大春等分兵追剿抵三橋埠適德清援賊

大至海勝驅眾回鬪官軍扼橋拒戰斃賊數百賊悉敗走楊昌溶入城見其彫殘特甚於是下令軍士無犯民間秋毫無意拊循遺黎稍得蘇息並待降人以誠選其壯士爲數營卽令楊芸桂統帶餘悉遣散後攻湖郡其戰亦最力云當克復武康之日高連陞王月亮兩軍方進駐德清上七鋪偵知陳汪二賊將遁李賊爲殿初五日連陞率騎數十先抵城邊見賊正開西門而竄卽策馬衝入街巷破屋伏賊忽起先竄之賊折回併拒連陞及余朝貴等突圍殺出隨招各營分路進擊鏖戰自辰至未賊始棄城逃奔高連陞王月亮等督隊追剿斃賊

數百生禽七十三奪獲大小船數十旂械無算遂克德清是日並收復石門先是石門踞賊僞歸王鄧光明於上年十一月二十四日由杭州趨救餘杭爲官軍所敗擡礮洞中左脇死而復蘇昇歸石門蔣益澧旣收海甯桐鄉遣人招降光明請俟杭嘉克後就撫然創甚伏處不能再戰及益澧令李邦達蔡元吉率師進逼石門仍遣人覘之光明伏枕涕泣立遣其黨開城出降而身赴杭州待罪因言久已蓄意投誠因爲陳炳文所逼不能猝脫並言咸豐十一年杭州城陷時曾以禮收斂王巡撫張學政載棺送至上海并衛送林福祥等求其代陳

款志左公初以其不早歸誠而必待恢復杭嘉之後嚴  
詰之光明叩頭流血願照蔡元吉何培章所請前驅效  
力贖罪左公見光明左手已廢縱力屈始降殺之不武  
乃奏免死選其驍黨分爲數營責令隨大軍進規湖郡  
全浙各郡縣以次蕩平惟湖州府屬縣接壤皖疆遙與  
金陵響應各路敗賊並集或竄或踞又煩兵力矣其先  
竄德清僞利王僞來王兩賊繞出武康之西欲竄孝豐  
李耀南劉明燈聶邦光張人和廖涓臣亦於初五日由  
箬頭出隊截勦賊急竄向遞鋪正追殺間陳炳文繼至  
聶邦光橫突其陣斃賊數百奪獲騾馬十餘賊大潰利

賊率眾回援劉明燈張人和廖涓臣等從後夾擊又斃賊數百遂棄械狂奔我軍追殺無算拔出難民數千賊迭次被創眾心渙散陳炳文等議守湖州及官軍偏近李遠繼又欲由安吉以竄甯國謀無適從高連陞等謀知之乘其紛亂於初八日進兵距湖州尚數十里遇賊大隊擁至縱兵奮擊斃賊數千燒船千餘賊望風潰竄其前竄孝豐股復繞從千秋關太陽埠竄至昌化縣境左公疏言臣前因江皖羣賊麇聚湖州卽慮突犯上游亟檄分水新城嚴州遂安各處守軍嚴防並調康國器張聲恆兩軍赴臨安截剿今賊旣悉由廣德孝豐上

竄嚴遂之防尤爲緊要臣又加派劉清亮各營由新城  
以赴嚴州唐學發彭大光兩營水師於桐嚴一帶巡防  
賊裹糧而趨斷難持久若前路各軍力扼奔衝後面各  
軍躡蹤猛擊或可聚而殲旃卽有漏網他竄臣亦當督  
飭各軍出境追勦務期全數肅清以紓

聖慮蓋其深思遠慮皆燭先幾宐賊之卒殄也

平浙紀略卷六

平浙紀略卷七

同治三年三月奉

命督辦軍務閩浙總督兼署浙江巡撫左公既克復武康德清石門三縣賊皆上竄惟僞堵王黃文金僞佑王李遠繼僞輔王楊輔清堅踞湖州如故左公乃令布政使蔣益澧進攻湖州督糧道楊昌濬進駐武康而命駐守嚴州淳安各軍相機截剿初九初十日賊之竄至昌化者漸趨績谿十一日副將劉明珍由分水前赴昌化會同鄉團截其後隊禽斬甚眾奪獲旂幟刀矛騾馬無算十二日明珍追至白牛橋僞侍王李世賢等繞由昌化十



都過老竹嶺竄向績溪而去復由間道走歙西之岩寺  
篁墩以竄屯溪其陳炳文汪海洋等賊均走水南村分  
路向南源口深渡過河以折入浙境十五日徑趨小川  
欲分犯淳安遂安二縣十七日駐防遂安總兵王開琳  
令王福昌一軍嚴守雪嶺黃蔚嶺自率親兵及龔隆貴  
羅瑞山喻勝榮三營由黃蔚村舉嶺進丁長勝康榮誥  
莫坤和三營及水師礮船由威坪街口沿河直上行近  
小川賊出隊來撲羅瑞山喻勝榮匹馬衝鋒賊爲披靡  
退據石橋官軍乘勢急進衝過橋北丁長勝莫坤和各  
率隊繼至師船遙於河中排礮轟擊斃賊數百賊敗走

一向深渡一向小川裏山而遁開琳摩兵逐北約七八里賊復回拒羅瑞山莫坤和等沿山圍剿賊始大敗爭向山谷狂奔自相踐踏而死者不計其數其向深渡逃竄之賊爲龔隆貴等截殺殆盡餘賊悉敗竄屯溪是役也殺賊二千有奇生禽五百有奇踏斃溺斃者倍之其湖州一路自初八日高連陞進剿獲勝後羣賊皆退聚菱湖東林山茅山青山脩築堅壘附城二三十里皆有賊營且與長興四安互相聯絡左公令劉連陞水師赴德清高連陞王月亮蔡元吉各軍由德清進規湖州西南劉樹元何培章各軍由石門進規湖州東南十三十



四日劉連陞羅啟勇等各率師船進攻菱湖破賊一卡  
蔡元吉復率軍進駐靈山高連陞王月亮進駐埭溪二  
十二日湖賊分路來撲連陞月亮營壘復潛竄格舍圍  
襲我後路俱爲我軍擊敗劉連陞等旋將菱湖東林山  
要隘攻克蔡元吉卽進屯菽港賊見官軍漸逼調集城  
中悍賊數萬悉趨東南路力圖抗拒五月初十日出抄  
蔡元吉營後且分撲長生橋各營元吉督軍堅壁不動  
相持竟日賊不得逞至夜賊冒官軍旂幟出小港欲劫  
我營元吉偵知密令洋鎗隊二百人分伏於桑林待賊  
撲近突起轟之斃賊數百比曉賊復出大股隔河而陣

我軍迎敵以阻水未能痛勦左公以賊勢旣趨重此路  
蔡元吉所部兵力尙單令蔣益澧分撥師船且調都司  
湯葆元飛划一營前往助勦十四日賊大股麇至元吉  
督隊奮擊相持至哺賊卽偪長橋亭子橋而營時總兵  
劉樹元以元吉各營苦戰連日待援孔亟乃率所部及  
洋將實德稜花勇馳往策應劉連陞亦率水師各營移  
駐菱湖東林山下昂一帶以壯聲援十六日劉連陞各  
營由荻港進發蔡元吉劉樹元督同陸軍助之賊憑河  
抗拒我師未能猝拔十七十八日賊又於亭子橋增築  
兩壘蔣益澧令高連陞加撥丁賢發錢桂仁兩營復調

知府楊道洽一營馳往助勦二十日賊又撲元吉營壘環攻五時均被擊走羣賊益憤日暮遂分七路來犯並以大礮向長生橋營壘轟擊勢甚凶悍元吉令各營鎮靜以待約會水師各營憑河扼守自率親兵馳赴長生橋力戰卻之是夜密令營官楊成棟誘禽僞軍政司樂興等六賊斬之賊知元吉各營有備不可攻復乘虛襲我夔湖後路劉連陞率副將蔣榮彩參將梁雲山等師船力堵高連陞又命高有志洋鎗隊助之二十四日賊全股來犯劉連陞梁雲山率所部迎勦焚賊船十餘艘賊爲少卻劉連陞乘勝追擊賊退而復前殊死戰鎗子

如雨我軍傷亾百餘人正相持間高有志率洋鎗隊抄出賊後楊道洽亦率所部至自餘杭賊見援軍大集駭而奔二十九日袁家滙賊目李得芳來蔡元吉營中乞降元吉許之三十日親赴袁家滙欲督同降人出其不意攻取未降各壘楊輔清覺其有異卽率悍賊來爭元吉麾眾分路截殺羣賊潰竄遂將袁家滙賊壘一律焚燬收降眾七百回營方楊輔清之并攻東南路也黃文金復分大股由太湖塘楊漚以向軋村冀撲犯林墟何培英各營之後牽掣我師五月初九日賊大股來撲劉樹元令培英馳往截擊而自率所部繞出軋村兜勦賊

方欲架浮橋渡河培英乘其半渡擊之斃賊二十餘屍  
水死者無算追至軋村樹元亦至兩路夾擊賊勢不支  
紛向太湖塘楊淩竄去嗣官軍百計誘戰賊鼠伏不出  
樹元見太湖塘之賊暫無動作南潯一路已有蘇軍屯  
駐而蔡元吉各營連日攻勦賊未大挫遂率所部及花  
勇馳援乃賊復由太湖塘繞出林墟後路之陸家灣以  
拒蘇軍不時分賊至林墟左右擄掠二十四日樹元令  
何培英進勦賊負嵎如故培英分兵抄出賊後夾擊破  
其一卡乘勝督隊猛攻樹元亦馳往接應立破賊壘三  
餘賊棄之而竄我軍逐北數里將太湖塘楊淩賊壘一

律蹋平二十七日復分攻晟舍賊壘鏖戰三時破其一  
卡而還餘賊悉退四安梅溪其地本爲賊踞遂與之合  
楊昌濬以四安梅溪賊勢方熾意必上竄自率各營由  
牌頭進桐嶺扼之令知府劉璈副將劉端冕谷香山等  
三營周廷瑞等六營由黃湖進白水灣直搗孝豐六月  
初三日劉璈等乘夜潛師踰嶺以進黎明抵孝豐城下  
賊猶未覺瞥見官軍突至卽伏堞內施放鎗礮軍士多  
受創谷香山劉端冕躍過重濠揮軍直入劉璈督隊繼  
之哨長吳德華首由南門梯城而上立斬賊坪天義潘  
和周廷瑞督各營亦由東門攻入營官李有慶立斬僞



天將洪恩坊城賊大亂紛紛奪路而逃卽將孝豐縣城克復時初四日午刻也周廷瑞劉琰麾兵追擊遙見羣賊擁一賊騎馬狂奔琰急率所部躡蹤追至城北十五里皈山場外委李必得以矛刺之落馬生禽以歸餘賊四散訊之乃僞感王陳榮也是役也斃賊千餘生禽長髮老賊二百餘拔出難民婦女五六百奪獲騾馬百數十云時安吉廣德尙爲賊踞楊昌濬方攻安吉安吉一城當皖浙之交居萬山中其險阻倍於孝豐爲湖賊必爭之地而梅溪四安踞賊亦有數萬與廣德安吉互相聯絡我軍攻安吉則梅溪四安廣德之賊來援腹背受

敵其時長興已爲蘇軍攻克左公謀之蘇撫請檄長興之軍分攻四安以掣其勢密令楊昌濬如安吉一時不能驟下或先攻梅溪搗其要脅庶湖州安吉之賊勢分收功較易十八日楊昌濬攻其東南兩門周廷瑞攻其西北兩門昌濬所部銜枚疾進抵城下天未曙各軍拔去濠外籬簽梯城而上及城堞賊始覺出死力以拒我鎗礮雨下參將朱尊賢攻破東門橋卡登其礮臺手斬悍賊三忽中洋礮陣亡都司陳壽照亦受重創總兵羅大春道員朱明亮麾軍猛攻逾時迄未得手其蔡元吉一軍由袁家漚進駐東埠黃文金見元吉懸軍深入糾

集羣賊於是月初八日後迭次攻撲元吉營壘均擊走之初十日又分人股繞出思溪雙福橋築壘以蔽我軍餉道元吉力攻之不克劉連陞彭大光蔣榮彩湯葆元李錦堂各率水師楊道洽率陸師來援惟地多汊港兩岸桑林蓊翳我軍前進賊以鎗划船數百四出抄襲且林中設伏以洋鎗轟擊我不及備頗多傷亡蔣益澧令知府李邦達督鄧光明各營由東林山馳赴菱湖會合劉連陞水師進剿思溪劉樹元何培英等由林墟進剿長超山并調劉清亮一軍由分水駐埭頭以厚兵力益澧親赴菱湖督剿邦達先於十六日令鄧光明分三營

屯孫家橋分一營屯鳳凰橋距雙福橋僅八里賊乘划  
船數百蜂擁來撲光明令各營一面築壘一面迎敵賊  
舍舟登陸猛撲五次均爲我軍擊退十九日益澧抵蘄  
湖二十一日卽會合諸軍而前令李邦達鄧光明各營  
攻思溪以楊道洽之洋鎗隊劉連陞之師船繼之高連  
陞率所部攻雙福橋黃鎮湘率內河師船扼荻港而約  
駐守南潯之蘇軍會合張景渠各營攻屐舍劉樹元率  
何培英各營攻重兆以掣賊勢是日黎明各軍分路齊  
進益澧率親兵先抵思溪卽令鄧光明各營渡河分攻  
賊壘賊從桑林突出光明督隊奮擊賊敗走我軍乘勢

進攻賊伏牆施礮軍上蛇伏而進拔去椿箠一鼓而上壘已垂破忽有賊從左右樹林抄出鄧光明急撤隊迎敵賊亦出壘來撲光明奮衝殺賊爲披靡會劉連陞彭大光師船駛近思溪賊以飛划抗拒火箭突入船中霎時煙燄飛騰人心齊亂各船回救爲賊所乘方危急間楊道洽李邦達二軍馳至益澧亦麾親兵策應賊始敗遁其進攻雙福橋重兆晟舍各軍亦未得手二十二日水陸各軍合攻雙福橋賊負隅不出二十三二十四日益澧令鄧光明楊道洽於思溪傍水成壘護以水師二十五日令光明爲第一隊劉清亮爲第二隊高連陞

爲第三隊益漚自率親兵爲第四隊更番迭戰賊初不  
動相持至未申之交黃文金率賊數萬來犯益漚飛馬  
直前與高連陞等併力鏖戰洋鎗連環轟擊賊敗走時  
已薄暮正欲收軍賊復大股衝出蔣益漚高連陞仍匹  
馬陷陣諸將士無不鼓勇衝殺一以當百立斬大旂悍  
賊十餘賊乃潰退是日血戰六時殺賊無算而官軍之  
傷亾者百數十人參將翁桂秋營官周大受俱被重創  
益漚戰馬亦幾爲鎗子所洞時洋將德克碑以官軍無  
日不戰未能取勝願率所部洋鎗隊及淺水輪船來助  
二十七日益漚攻思溪令高連陞德克碑攻雙福橋劉

樹元攻展舍三路齊進德克碑以開花礮攻雙福橋賊壘竟不得破益澧因令高連陞於思溪雙福橋之間立一營鄧光明於雙福橋河邊增一營而馬雲標則軍於大河沙州以防賊船自後抄襲其地距蔡元吉營止隔一河因對岸賊營環列未之能達賊圍東埠各營歷二十餘日元吉晝夜戰守迄無休息糧亦垂盡左公調副將徐文秀游擊王東林水師總兵楊政謨馳救之七月初二日益澧於思溪雙福橋之間架浮橋三道以通元吉營接濟會徐文秀王東林兩軍馳至益澧卽令劉清亮李邦達楊道洽鄧光明各率所部攻思溪徐文秀王

東林等繼之劉樹元何培英四營及洋將賁德稜花勇  
攻重兆雙福橋益澧自率親兵及高連陞李運榮陳武  
職賀國輝李世祥馬雲標等分兩隊嚴陣以待命洋將  
德克碑率所部沿河助戰令淺水輪船泊於河汊以開  
花礮對思溪八角亭賊壘轟擊各軍並乘竹筏而渡甫  
至中流賊壘鎗礮齊發軍多受傷蔣榮彩彭開壽仍奮  
勇前進各軍復於對岸開巨礮助之我軍離岸三丈許  
賊鎗礮愈密軍士傷亡愈多蔣榮彩彭開壽及陸軍營  
官李世祥均被重創益澧復用飛划渡德克碑花勇及  
李運榮一營過河偪岸攻擊花勇先進遇賊伏而卻其



攻思溪賊賊之劉清亮等亦收隊而還生禽賊首是役也黃文金親來決戰亦爲洋鎗子傷其左肩悍賊約斃數百而受傷者則不可數計云益漕以思溪雙福橋勢難力攻欲由袁家滙荻港出湖蚨漾以達長超山襲其後路初六日高連陞率賀國輝王東林席得元陳念親等進屯荻港之中洲徐文秀軍雙堂子初七日益漕親至荻港督戰時高連陞賀國輝王東林已率陸軍進薄賊之前壘楊政謨劉連陞各率師船會勦賊憑卡死拒不出高連陞令各軍士佯作疲憊狀誘之賊突出遇伏大潰我軍齊進將壘賊殲除殆盡當陸軍鏖戰時賊船

齊出一擊卽退劉連陞率師船逐之伏賊在桑林中暗放洋鎗子貫連陞右顙我軍少卻益灃令湘軍師船泊荻港護之賊忽以鎗划載悍賊各執洋鎗由支港抄出我師船之後勢將不支益灃疾率大隊由南岸馳至賊乃駭遁初八日益灃調洋將德克碑日意格淺水輪船赴荻港會勦高連陞賀國輝王東林等亦至荻港是日申酉之交會同向前衝殺輪船亦開巨礮賊不及備我軍已拔箴越濠而入壘中悍賊斬馘殆盡餘賊多溺斃遂將荻港三賊壘攻克是夜有賊酋譚世友鍾大旺率長龍舢板船十艘向蔣益灃軍前乞降十一日益灃親

督徐文秀謝茂勝乘師船四十艘由荻港繞出太湖察看地勢賊乘鎗划數十飛駛而來爲洋鎗擊退我軍遂乘勝入湖蚘漾分立三營并花勇駐守以湘軍師船護之令楊政謨師船進泊八角亭以德克碑日意格輪船佐之十三日政謨會同日意格由荻港河中以開花礮轟攻袁家漕賊壘益灃督師船由湖蚘漾與之對攻高連陞王東林李運榮陳念親由荻港渡河進擊袁家漕街旁賊館梁雲山黃鎮湘率師船分扼湖尾支港官軍三路齊進百礮交轟羣賊伏壘不出我軍環攻三時賊壘轟裂大半斃賊無數蔡元吉見賊勢趨重袁家漕一

路令五百人隨游擊楊應龍由思溪突圍而出將至河邊賊從左右層層抄截應龍奮勇衝殺手刃數賊力竭陣亡營官楊成棟向得勝亦同歿於陣僅衝出百餘人益灃恐賊知元吉一軍虛實圍益急乃令各營竟夜力攻袁家漚以掣賊勢自率親兵及楊道治所部馳往雙福橋長生橋一帶策應是夜元吉竟自東埠舉水三道衝出重圍同出不及千人饑疲無人色自云營中馬粟已盡而煮食桑樹皮者且六七日矣士卒感大軍援救雖餓不能起無一願附賊者其伏匿草間及積屍之下賊退而歸伍者復四百餘人是日蘇軍及張景渠等亦

將晟舍賊營攻克斃賊千餘賊見元吉已出晟舍之壘  
又破意氣沮喪十六夜思溪雙福橋之賊紛紛退竄劉  
清亮劉樹元李邦達於是夜各率所部潛坐划船過河  
大呼殺入刀斫矛刺斃賊近千其落水溺死者不計其  
數將賊數十營一律踏毀劉清亮李邦達鄧光明等遂  
移屯亭子橋進攻長超山踞賊高連陞等各營會同德  
克碑仍攻袁家漚左公疏言湖州地勢守易攻難逆賊  
東踞長超山昇山袁家漚西踞楊家莊梅溪四安安吉  
北踞廣德南扼妙喜和平兩鎮以爲犄角賊勢雖蹙而  
地險人眾難以偏圍現在蘇軍之距城最近者爲大錢

湖口之水陸各營浙軍之最近者爲東路日月山各營此外皆相距二三十里十餘里也蘇軍自克巖舍後北路西路日事鏖戰李鴻章毅然以攻取廣德州爲己任尤爲制賊要著大局旣合長圍之勢已成賊雖暫肆鴟張檻獸釜魚遲速有必滅之理而察看機局一時尙未能就緒據金陵逃出難民及投誠之賊目等皆言僞幼主洪福瑱於六月二十一日由東壩逃至廣德二十六日黃文金迎入湖州府城因初二日之戰懼而仍避至廣德文金遣其弟文英護之各處賊館預備乾糧似有急竄之意蘇浙兩軍自湖城北面進東及東南一帶水

陸合成長岡尙無罅漏惟西路山嶺複峻路徑紛歧地勢遼濶又安吉一城尙稽克復其比連之甯國縣並無防兵倘賊竄甚速誠恐防不及防必致蔓延他方又成不了之局幸江西賊勢已衰臣軍之援江者除劉興一軍跟蹤追剿外其王德榜王開琳兩軍可就近調赴婺源馬金一帶與浙師聯絡其黃少春一軍及劉明燈劉明珍各營現駐常山江山邊隘可移至嚴州相機分撥備迎頭攔剿之用如能仰仗

天威全股蕩平東南全局底定臣自當會同江蘇撫臣馳報若僅收復湖州一城各營當卽躡蹤緊追不准居以爲

功也自官軍進信日月山亭子橋東埠長超山麓後二  
十五日湖州城南門守賊僞天將陳學明率千餘眾來  
降二十六日踞長超山之僞天將陳賊及姚賊劉賊以  
所轄三壘之眾來降是日日月山守將劉樹元會同蘇  
軍猛攻昇山賊壘拔之蔣益澧令高連陞督同蔡元吉  
等進駐湖州西南妙喜鎮卽進攻長超山袁家滙賊壘  
賊初以死抵拒瞥見湖城火光燭天遂棄壘而竄時東  
路劉樹元何培英各營已進八里店蘇軍道員潘鼎新  
亦率所部來會勦敗賊竄至湖州未進城城賊已急啟  
西門而遁劉樹元潘鼎新當先入城益澧途遇竄賊多



有禽斬遂與劉清亮李邦達張景渠等先後馳至分門而入搜斬城中尾賊數千遂於二十七日巳刻將湖州府城克復其西門竄出之賊高運陞與之遇斬殺二千有奇益灃卽率各營追之焚賊船數百二十八日黎明追至梅溪賊已連夜棄船登岸而逸爲蘇軍及總兵羅大春截殺尾賊千數奪獲賊船尤多拔出難民無數僞穰王黃紹忠率黨四百餘詣大春軍前乞降餘賊分三路竄走僞堵王黃文金一股由梅溪徑趨廣德約十餘萬賊僞佑王李遠繼一股由安吉以出孝豐別分一大股由四安竄廣德約四萬餘賊益灃令元吉培英兩軍

暫駐梅溪自率親兵及高連陞徐文秀賀國輝王東林  
鄧光明所部各營向四安一路追剿三十日抵四安竄  
賊先爲蘇軍截殺殲斃甚多後股則已竄往廣德矣遂  
次遇難民來言黃文金於二十八日到廣卽夜挾僞幼  
主由甯國縣昌化績溪一路逃竄黃文英及僞忠王子  
由甯國府向涇縣祁門一路逃竄蘇浙兩省官軍或躡  
蹤猛追或橫腰攔截殺賊不下萬餘溺斃及自相踐踏  
死者不可勝數其逃散之賊或三四千爲一隊或一二  
千爲一隊或數百爲一隊或數十爲一隊見官軍至輒  
跪伏道旁泣求免死陸續遣散者又不下數萬云其楊

昌濟進規安吉一軍於七月二十四日會同周廷瑞各營分路而進火箭噴筒迸射入城附城椿箠拔去大半北門橋邊木柵亦毀自寅至午轟攻五時城賊大震二十八夜急向孝豐一路逃逸會湖州大股亦竄至昌濟令羅大春率所部赴梅溪截剿朱明亮楊和貴各營出安吉南路會同周廷瑞一軍兜剿是夜大雨傾盆河流暴漲前隊之賊甫竄孝豐後隊尙未及渡各軍追至殺賊無算降賊七八千奪獲賊馬千餘騎昌濟追至孝豐賊正撲城因督隊奮擊守城之劉墩谷香山劉端冕亦各率所部而出會剿賊卽退竄官軍乘勝蹙之陣殪僞

駙馬徐朗及僞夫將朝將等賊酋數十斬馘千餘級生禽數百赴水死者數千解散尤眾奪獲輜重馬騾洋鎗不可勝數賊向山谷奪路狂奔其已過河者悉向甯國縣千秋關一路竄走官軍追殺二十餘里又斬斃溺斃無算僞朝將王召福率黨千餘迎降三十日楊昌濬復率劉璈谷香山劉端冕及朱明亮馬隊疾趨白馬村賊且戰且退我軍追殺至章村賊無路可竄悉河死拒我軍衝殺過河鎗礮齊施聲震山谷賊不能支翻山越嶺而遁官軍追七十里至孔夫關賊人馬擁塞多自相踐踏而死我軍復於兩旁綠山而進縱橫痛擊賊四散奔

竄我軍追至甯國縣之七都突遇龍旂悍賊千餘騎賊數百黃衣賊目三四蜂擁而來哨長彭練州甘大有彭榮華劉春熙大呼奮擊立斃黃衣騎賊賊大敗走是日殺斃溺斃及墜崖死者千餘生禽二千有奇拔出難民五六千奪獲騾馬鎗礮無算并獲偽佐王大小偽印及各賊酋偽印一二百顆八月初一日劉墩令游擊唐湘遠帶隊出孔夫關追擊有尾賊向千秋關一路逃竄又殺其數百收降千餘解散數千李遠繼僅帶數十賊逃往廣德卽由廣德與洪福瑱及黃文金黃文英分路上竄山甯國墩千秋關黃花關以出昌化白牛橋偽借王

譚體元僞樂王之子莫桂先僞首王范賊等由甯國縣  
胡樂司山羊坑以出涇安威坪約同竄徽八月初三日  
分水守將劉光明率所部迎勦白牛橋之賊未分勝負  
副將崔大成參將盧本堂等由分水麻家埠馳至奮力  
接戰禽斬數十賊賊始敗退初五日劉光明等復進勦  
賊方向昱嶺關十都一帶竄逸各營追擊斃賊不少羅  
大成聞黃文金後隊復至白牛橋由臨安於潛兼程疾  
進初七日追至白蛇嶺及之營官楊芸桂躍馬而前大  
呼奮擊賊以死回拒劉榮合劉光明崔大成等先後馳  
至夾擊賊大敗悉向昱嶺逃竄官軍乘勢追殺斃賊不

可數計傳言黃文金於數日前在甯國縣之七都受創甚重行至白牛橋而死羣賊推倒民屋三棟燹之其弟黃文英代領其眾踉蹌西行其譚體元等竄至黃石潭距威坪五十里劉明燈聞賊竄昌化卽率所部馳赴威坪截擊黃少春抵巖州後亦令道員李耀南副將周紹濂等馳赴威坪初七日賊至蜀口距威坪五里許眾尙三萬餘連營二十里是夜有賊數千圍由上河灘頭涉淺偷渡爲官軍所覺轟擊而退黃少春復令張福齊李良平馳往截剿自率中營繼之初八日黎明周紹濂等由河上嶺出蜀口之右張福齊等由坳上出蜀口之左

李耀南劉明燈等出蜀口之中水師唐連勝亦率師船  
沿河排礮轟擊賊始猶抗拒我軍數路齊進縱橫痛擊  
立斃悍賊數百賊隊大亂我軍乘勢斫殺又斃賊千餘  
追至洪橋頭譚體元麾眾憑橋力戰官軍中路與之相  
持左右兩路從旁抄出賊後賊方驚顧中路乘勢衝殺  
過橋黃少春復督中營及楊芳桂馬隊馳至分道縱擊  
銳不可當羣賊辟易紛紛奪路狂奔體元脫所著繡龍  
馬袿騎黑馬而逃官軍追及斬之並獲其馬是役也僞  
樂王之子莫桂先僞朝將廖豈才莠天義賀永聚歐天  
義劉明德蜀天侯趙思誠珥天侯曹得勝珍天侯許標



桂瓌天侯衡義杰琰天豫吳春彩宣天燕張發勝瑜天  
福饒祥芸珩天豫汪道發增天安藍增昫天燕李球珈  
等大小賊一百五十餘俱斬於陣殺斃編斃及自相踐  
踏死者約五六千生禽偽天軍佐將趙世舉晄天豫羅  
永福樂天安甘長富璟天安張先發吹天福黃本茂琪  
天福高啟厚暉天義李廣材尊天侯周學禮旺天燕毛  
大義珩天侯賀子秀等賊目二十餘長髮老賊千餘悉  
誅之拔出難民以萬計初九日黃文英大股又白豎嶺  
關竄至唐村黃石潭黃少春令各營分扼上下淺灘黃  
元吉等與唐連勝水師嚴扼街口劉明珍率所部出瀉

安而上嚴備之初十日文英率悍賊自蜀口四嶺蜂擁  
而來分撲我軍營壘而李遠繼一股由蜀口之左衝出  
僞王宗黃賊一股由洪橋頭衝出少春卽令彭俊光劉  
明燈等分扼上下灘李耀南周紹濂等悉壘轟擊劉昌  
選所部與楊芳桂馬隊排列灘上約會黃元吉羅順成  
於街口後山列隊以壯聲勢文英率悍賊自上灘爭渡  
我軍隔河環施鎗礮游擊張培基率師船扼灘奮擊斃  
賊二百餘其圖由河上嶺郭村竄越者亦爲水陸兩軍  
擊退時劉明燈率所部三營溫處道魏喻義率所部一  
營馳至卷旗蛇行而李耀南周紹濂皆出壘衝殺劉明

燈率親兵息水過河各路同時猛擊賊勢不支紛紛敗  
北文英手刃退後賊挺身督戰場芳桂伍先申禽生賊  
詢知騎黑馬微鬚者偽昭王黃文英也遂各麾隊衝入  
賊陣游擊盧華勝外委孔行斌斬文英於馬下我軍四  
而滅之斃賊數千生禽長髮老賊數百奪獲騾馬鎗礮  
旗幟刃矛無算追至洪橋頭始收隊賊之由廣德上竄  
也本無定向其併股而犯威坪者方欲乘虛而入而不  
知黃少春劉明燈明珍諸軍之由衢嚴突至先到數時  
也賊既不敢由威坪下竄仍踞唐村黃金嶺一帶十四  
日味爽黃少春令周紹濂張福齊黃元吉羅順成各營

西上以固徽防而自率各軍分路進剿縱橫盪決鏖戰逾時賊卽潰退我軍乘勢追殺陣斬及墜崖死者約五六千賊生禽千餘拔出難民萬餘遂將黃金嶺唐村洪橋頭洪池等處五十餘里賊卡全行掃蕩追至歙涇交界之門嶺而還十五夜賊由歙境大洲源繞出建口涉淺而渡渡未及半各營馳至分灘扼堵唐連勝師船往來轟擊賊不得濟劉明燈張福齊周紹濂等從上灘過河繞出賊後李耀南等從下灘過河兩路夾擊賊大敗會皖南鎮總兵唐義訓所部亦由歙南深渡馳至各軍四面兜剿賊無路可奔陣斬偽列王邱國文等賊目數

十生禽僞列王黃吉建及僞天將朝將等賊目二十餘  
其餘禽斬近萬向劉明燈張福齊黃元吉等馬前伏地  
乞降者五千餘人向唐連勝營中乞降者千餘人賊首  
范汝增身被數鎗落馬從賊昇之去不知生死官軍獲  
其馬而歸餘賊由續溪翻山遠遁其先由建口渡河者  
十七日踰雪嶺竄至遂安之章村郭村黃少春亦於是  
日馳抵遂安十七都十八日卽率各營進剿賊由東亭  
村中衝出我軍分路迎敵游擊彭俊光賀潤蘭彭在上  
首先陷陣俊光身受矛傷伍先申李良平張介和復衝  
殺而入賊潰走官軍追過郭村賊翻山向昏口遁去途

遇馬復震伍正得兩軍鏖戰四時殺賊無算官軍亦傷  
亾百餘人少春方撥隊策應賊已奪路向遂安十六都  
而竄僞列王蕭雅泗劉得義等率僞天將朝將百餘人  
羣賊二萬餘赴黃少春軍前乞降少春受之李遠繼自  
甯國敗竄後餘黨無多及聞劉得義等投誠霎時鬩散  
遠繼隻身遁走其隨洪福瑱者不過萬賊皆黃文金兄  
弟敗殘之餘能戰者止數千而已王開琳王德榜聞賊  
偏遂安卽各率所部由婺源馳赴開化華埠截勦十九  
日劉明珍抵馬金街卽令參將黃本富游擊張成元等  
分路出昏口截擊敗之賊繞竄開化七都村頭二十日

明珍率各營追至三路縱擊焚賊無算陣斬偽享王劉裕鳩偽天將謝元美李有才偽副將李世華甯天義柯林等賊目數十而賊之前隊已由二三都關入開化縣城以一股拒追軍以一股向華埠玉山七都竄去明珍急率各營進勦黃少春亦令楊芳桂馬隊馳至二十一日合軍齊抵開化城下賊匿不出明珍偽退誘之賊悉眾來撲甫近山邊伏兵突起賊駭而奔官軍乘勢追殺俘斬多賊是日王德榜一軍由婺源馳至黃夜會合明珍所部各營分路進擊賊不能支向華埠一路竄逸王開琳令丁長勝羅瑞山郭德馨康榮詔四營於是日

午刻馳抵開化白渡截之賊適從開化來官軍嚴陣以待賊衝突數次羅瑞山手刃騎馬數賊康榮詔復以鎗礮轟擊斃賊不少賊無路可逸是夜僞天將汪仁和等率黨數千赴榮詔營乞降二十二日王開琳王德榜劉明珍等追至華埠賊悉由小路走七都球明珍馳赴常山出草坪關古城截之開琳德榜等躡蹤而進未刻行近七都球訶賊後股尙屯村內卽麾軍衝入賊猶各執洋鎗拒戰相持兩時我軍大隊齊進縱橫盪決擊斃賊數百賊勢大潰一向玉山一向江山而遁德榜等分路逐北沿途斬馘不計其數是日明珍馳抵常山預令



張成元設伏草坪待之二十三日大甫明賊果大隊擁  
至官軍突出奮擊賊卽退竄黃本富賴長復從後邀截  
賊知不可脫仍拚死向前衝突正塵戰間明珍亦至橫  
貫賊陣截而爲兩前股竄江山邊界後股賊酋僞方王  
早王等均被官軍擊斃餘黨數千僞天將胡元興熊開  
玉陳高勝陳左祥等率之伏地請降明珍受之仍令黃  
本富等趨江山新塘截勦賊將由江西鄉繞竄石門  
峽口二十四日王德榜亦馳至與黃本富夾擊賊望風  
而潰是夜有僞天將方福泰及詹福隆陸義泛李金星  
劉三元丁天福各賊目率黨數千赴德榜軍前乞降二

十五日黎明前隊賊訶知率眾回殺遇總兵蕭得龍副將戴奉聘所部馳至迎擊德榜復令王德權何秀清黎榮等分路齊進得龍奉聘陣禽生賊詢之騎馬黃衣二賊一爲洪福瑱之堂兄洪元珍一爲僞王宗李金信因卽馳馬衝入賊陣斬之餘賊驚潰盡趨廣豐當德榜一軍馳抵新塘時賊之別股已竄廣豐五都街王開琳抵玉山後卽於二十四夜乘月色微明令各軍銜枚疾進行近五都遇大股賊擁洪福瑱逃竄我軍分左右兩路抄襲賊以洋鎗對擊軍士多受傷都司謝吉祥力戰陣亡丁長勝羅瑞山等麾隊奮擊四面賊之斃賊二百餘

幾禽福瑱爲賊拚死潰圍拔走官軍急追二十餘里至二十五日午刻始收隊賊卽由廣豐鉛山一路逸去於是浙江全省肅清昔趙景賢之守湖州也且數載糧盡援絕而後亾及賊踞之亦兩三年猝不得拔守易而攻難蓋莫過於湖矣其地北濱太湖東南則汶港紛岐桑林稠密西南則山嶺複峻轉饒維艱故列代取吳興皆由太湖廣德長興進兵以地勢順而糧道便也浙師東西南三面節節進攻數月未能蒞事實地勢有以限之幸蘇撫李公分軍先取四安長興因自西北路滾營而進逆賊四面受敵不攻自破乃得成功一則不存畛域

之見一則不萌嫉忌之心和衷濟美二公有焉黃文金兄弟既就戮李士貴亦就禽著名賊酋蓋已十殲八九其逸出而逋誅者惟洪福瑱及李世賢李遠繼汪海洋輩三四賊耳自後竄江竄閩竄粵江甯之軍既不遑顧蘇亦僅分軍一援閩而已獨賴我浙躡蹤追勦勞師遠征卒聚而殲之五嶺之外惟我左公實結粵匪之局此又天下之所莫與爭功者也今將克復湖州安吉兩城及追賊至瀉安開化蕭清全浙之頭末備著於篇而蘇軍戰事則別見於第十卷云

平浙紀略卷七

平浙紀略卷八

同治元年八月二十日奉

命督辦軍務浙江巡撫左公附奏處州府城已於七月十九日收復經慶端耆齡奏報閩軍入浙至是幾一載矣蓋自上年八月賊僞忠王李秀成率眾二十餘萬從江西犯浙二十一日糾合湖坊大股陷常山卽分路下竄龍游踞賊復竄至安仁街一帶爲夾攻衢州之計九月初二日圍城城中守兵多老弱餉又不繼貸之民間月給人千錢城外火光周圍數十里旌旂如雲從西而來者數日不絕晝夜環攻勢危甚督辦防務衢州鎮總兵李

定太署衢州鎮總兵崇志署金衢嚴道江允康候補道  
蘇式敬衢州知府吳艾生署西安知縣丁壽宸等嬰城  
固守間出軍擊之力據外壘水師礮船回環轟禦守備  
董興仁陣亡前後其斃賊數百並將三百斤以下各礮  
運置城外木柵之內平對賊營賊覺之遂於初八日解  
圍東走並復常山浙閩總督慶端具疏奏捷時道員李  
元度安越軍八千人總兵林文察臺勇二千人先後抵  
衢上下游水陸道梗賊方雄踞金嚴席卷浙東遂於十  
七日竄踞處郡屬縣唯慶元獨完賊氛蔓延一氣而溫  
屬平陽縣城爲金錢會匪所據頗猖獗慶公奉

命於十二月二日馳抵建甯府城調度軍事以全浙橫潰非  
厚集勁旅分路進兵勢必爲賊牽制乃令總兵曾玉明  
續募臺勇記名道張銓慶選募江西勇力籌各軍餉需  
月至三十餘萬欲俟總兵曾玉明到後由溫處分路進  
勦請調鮑超與李元度其解杭州之圍並申請左公軍  
赴援當是時杭州已陷唯溫衢二郡尙城守湖州未知  
存亡江常數縣僅存江山亦通浦城雖衢防兵力較厚  
而溫處建甯福甯兩府犬牙相錯邊防孔棘非援浙卽  
無以全閩故閩軍於左公入浙之後得專力溫處焉十  
二月十三日慶公奏言賊踞雲和不特溫州眉睫之憂



抑亦閩省肘腋之患同治元年

上令進駐浦城以杜賊竄鉛山而固浙軍後路二月初八日  
又奏云遂昌踞賊添集二三萬眾欲由龍泉抄出松溪  
竄犯閩境處州松陽之賊亦紛紛上竄各路軍情同時  
喫緊綜計兵力衛防有李定太所部七千餘人又撫臣  
駐軍開化勁旅八千餘人足爲聲援江山常山已派署  
布政司李元度安越軍八千扼紮並令參將薛師儀等  
所部闔兵一千五百在峽口一帶駐守浦城一路先經  
派令護總兵閔長齡游擊劉紹基等節節防守惟江浦  
毘連處所山路紛岐不敷分布又添募壯勇三千餘令

署游擊祝善銓等帶赴協防而龍泉松政三路僅有總兵林文察署浙江按察使張銓慶等所部四千餘人參將楊三益同知揭垂謙七百餘人實形單薄松政稍有疏失則水路可達建甯陸路可趨福甯不但慮擾閩省完善之區並恐由建陽崇安旁竄江西截我浙軍後路現檄候補同知趙均添募興化槍勇一千並催曾元福所募臺勇三千星飛來營擬看何路緊要調赴應援軍情朝夕變遷臣親部不滿二千已難策應各路若遠移浦城則調度未能靈捷諜知台賊將犯溫州總兵秦如虎雖率部前往而餉絀兵少當此大敵當前必須嚴陣

以張吾軍力勦以遏賊欲如能挫其凶鋒方可分路進  
取先是正月二十日賊陷青川秦如虎前隊於二十九  
日馳抵溫州賊已至界牌嶺距城八十里都司李世進  
等禦之而敗三十日賊眾數萬直撲郡城如虎令守備  
馬雲標等出東門拒戰相持未決李世進等揮軍夾擊  
殺賊千餘賊敗走我軍追殺二十餘里而還二月初一  
夜賊復糾合大股三面環攻初二日如虎令馬雲標等  
縋城出擊城上連開大礮革職道員張啟煊令千總陳  
連福生員張鎮樞等分帶團勇截殺其斃賊數百初五  
日城中悉眾出戰又敗之賊退屯四十里初九日遂昌

民團克復縣城賊悉下竄松陽之賊竄擾雲和延及景甯黃巖之賊又竄擾樂清之大荆溫州勢愈岌岌慶公調閩安協副將吳鴻源師船二十艘赴溫援勦於十七日拜疏後卽馳駐浦城先一日青田之賊竄踞瑞安白沙嶺擾及河上橋等處民團迎擊獲勝旋被賊圍抄生員孫貽穀陣亡十八日張啟煊親督所部並添調民團馳抵瑞安秦如虎亦派千總賴正脩領漳州兵五百赴援十九日啟煊先令張啟德等率領民團分路堵剿並令游擊李世雄扼駐牛皮嶺二十日啟煊整隊前進行抵陶山隘口賊數以馬隊衝撲不得入隘相持稍懈游

擊陳光彩等會合民團兩路迎勦斃賊數十遂奔二十  
一日進攻再捷賊退回青田景甯知縣管書勦督率民  
兵連日攻擊竄擾之賊遂昌泰順各紳團馳助二月十  
九日併力擊退殺賊三百餘其竄雲和之賊亦敗去紆  
溫州一面之警固閩省北路之防而溫處各屬團練敵  
愾同仇深明大義歷佐官軍殺賊茲復裹糧越境助勦  
慶公疏稱其功是時處州踞賊分屯碧湖與大港頭連  
營負阻三月初九日林文察密遣參將林文明都司陳  
慶善把總林廷棟等分軍夜襲大港頭賊營出不意拔  
之斬馘數百賊竄併碧湖初十日張銓慶獲賊軍師于

得喜於龍泉戮之以其僞稱團紳募勇將爲內應也銓  
慶令副將袁良巡哨至松陽二十四日遇賊雞鳴山擊  
斬數十級團紳李祥松等亦頗有斬獲是日林文察偵  
知賊分踞遂昌之饅頭嶺石練大柘等處搜山焚擄民  
團共起攻之二十五日賊竄至潘村及遂昌縣城糾合  
松陽一股眾至四五萬文察督軍進駐石練賊僞侍王  
李世賢旣屢敗於江山之新塘欲竄廣豐不得聞閩軍  
偪遂昌悉眾十餘萬來援將襲我軍之後文察偵知之  
二十九日令林文明陳慶善等伏於大柘之大廟千總  
陳兆熊等伏於石練之後山守備方國恩等伏於石練

之前山把總謝朝典等伏於百步嶺賊分三路而來我  
大廟石練後山百步嶺諸軍齊出奮擊文察督方國恩  
等分路接應其斃賊千餘賊敗竄文察慮其劫營分隊  
設伏是夜賊果至文察令教諭陳經等冒賊旗幟於村  
口暗招之賊爭先擁入伏兵四起賊自相踐踏擊斃數  
百禽騎馬賊四十餘人奪獲騾馬七十餘旗械無算拔  
出難民千餘賊敗退文察進屯大柘賊別股竄偏王村  
口張銓慶撥隊扼堵文察遣千總賴安邦等分帶台勇  
通判許鎮等調集民團馳赴夾擊其潘村踞賊眾二萬  
餘四月初二日文察令林文明陳慶善等攻之行抵排

前賊來拒戰而敗追至潘村賊棄營走我軍直抵遂昌破柵而入斃賊數千是日賴安邦等亦合攻賊於王村口賊皆遁回松陽老巢初九日銓慶亦令副將袁良進剿松陽踞賊民團前驅薄三义口賊壘斃驍賊二十餘先是偵知龍游松陽各賊下竄慶公恐其窺伺溫州卽令秦如虎預籌防剿三月二十一日守備陳登三率閩省師船會守備張文德等所部礮艇駛至樂清縣境之館頭轟斃數十賊二十五日秦如虎親督師船駛抵磐石開礮縱擊斃賊無數正欲進攻適大股賊由處州樂清竄至溫州之韓埠瞿溪並分股圖犯瑞安四月初二



日如虎令陳登三蕭邦佑等師船駛赴韓埠自率部伍  
馳赴瞿溪賊阻河列陣如虎督軍進勦擊斬頗多賊退  
走蕭邦佑等水師遇賊於小荆登岸擊之亦有斬獲初  
四日賊仍出瞿溪撲犯郡城溫處道支方廉等登陴嚴  
守如虎軍次太平嶺下距城五里賊已屯踞萬餘營游  
擊黃載清守備馬雲標把總胡榮革職知縣高樑材署  
永嘉知縣陳寶善等分路抄擊如虎令守備侯定貴先  
登各軍俱奮短兵相接斃賊數十胡榮衝入賊陣手刃  
二人受矛傷裹創力戰賊敗退我軍越嶺跟追復斬賊  
八十餘張啟煊率部進屯瑞安之河頭偵知賊在潘橋

是日令游擊陳元彩賴得福等進勦火器環攻遂破賊壘賊敗走啟煊督軍繼進其斃賊二百餘千總陳聯福陣亡初六日賊眾二萬回竄潘橋踞任橋之賊亦同時來犯我軍力戰四時之久殺賊數百賊乃退回慶公以溫州濱海環山水陸錯雜爲閩北藩籬賊不得志於衢必將盡力於溫爲窺犯閩疆之計今由台處分竄溫郡瑞安之賊眾至數萬秦如虎張啟煊所部兵力尙單雖迭有禽斬而賊氛環迫眾寡懸殊飛檄游擊李朝安所募臺勇一千五百馳赴瑞安歸張啟煊統帶並分調各營兵勇疾趨福甯交道員曾憲德調遣援應復由閩安

抽撥師船駛赴溫港助剿而令溫州師船分駛瑞安江面堵截以杜賊蹤竄赴平陽賊撲溫州雖經秦如虎擊退仍踞瞿溪初八日復益眾數千進撲西門三角門如虎督率馬雲標胡榮等出擊相持自辰至未把總姜玉麟邱廷標陣亡賊亦斃十餘而退張啟煊扼駐桐嶺十二日賊分五路來犯啟煊督軍力禦賊聚愈多游擊賴得福中礮死營陷啟煊突圍退守瑞安秦如虎分隊馳援溫州餉道中梗城外二十里賊營星羅棋布城內糧乏亦待援甚急慶公檄催前調各營及李朝安一營星夜前進並抽撥曾元福所部臺勇一千三百人令游擊

白瑛管帶問道馳往仍暫留曾玉明督各軍暨守備邱光立所募永春壯勇六百人赴溫援勦疏言賊犯溫郡踞太平嶺任橋瞿溪一帶牽制兵力以大股回撲瑞安與平陽僅隔一江迫近福甯避實擊虛賊之慣技恐其沿江偷渡徑襲平陽以窺閩疆當檄秦如虎分軍出擊力保郡城而令道員曾憲德張啟煊激勸民團合力夾擊先解瑞安之圍十四日賊由太平嶺來犯郡城并據小船僞作農民欲襲我南門營盤如虎督軍出三角門令守備陳子貴侯定貴等分隊迎戰斬賊數十馬雲標由西門抄出山後截擊胡榮轟沈二小船賊並敗退先

三  
日賊馬隊進逼瑞安大隊旋至布陣圍攻自桐嶺至  
西山數十里徧樹旂幟迺秦如虎派援之賴正脩率漳  
州軍五百馳至張啟煊督率城中文武登陴固守開大  
礮擊斃賊數十民團應募來援者共二萬餘人復有二  
萬人分守河鄉等處要隘賊見兵團大集卽解圍去十  
五日由蔥湖嶺竄擾河鄉廖國寶等率團堵禦啟煊遣  
軍策應殺賊數十奪獲旂械甚多賊敗還仍踞港鄉北  
岸程頭等處時縉雲青田樂清三縣先後報克復先是  
縉雲踞賊於三月二十七日四出撲犯均被民團擊退  
二十八日民團分隊設伏賊至隘口伏起前後夾擊斃

賊甚多縉雲知縣周士英密邀各團於四月初一二日  
進攻壺鎮賊巢斃賊三千餘乘勝攻城初十日縉雲訓  
導吳大治等督團直搗南門分抄東門從北門斬關而  
入遂克縣城餘賊竄走復被西鄉民團截殺無數青田  
踞賊前經溫處道支方廉檄令團紳何東泮帶礮船駛  
赴攻勦知縣吳兆祥等召集西柵溪團勇並聯絡各鄉  
民團訂期合攻秦如虎令忠毅全軍及侯定貴胡榮帶  
隊扼駐瞿溪蕭邦佑率長龍礮船進擊四月初九日吳  
兆祥等行抵水南遇賊敗之俄而兵團四集分門圍攻  
三晝夜何東泮與守備陶元鼎外委屈連陞督水師轟

擊至十二日黎明我軍由東門梯城而上賊開西門竄去遂復青田署樂清知縣孫家丞號召民團攻勦樂清踞賊武生周倫光等進屯竹嶼四月十六夜黃殿敗賊千餘奄至周倫光等截殺數百餘眾竄併入城總兵秦如虎溫處道支方廉署溫州知府黃維誥等派兵勇助戰守備陳子貴統帶師船陸營並進署溫州鎮總兵葉炳忠督軍由管頭一帶進擊孫家丞令下河鄉團葉品金等捐募壯勇千八人船四十艘合東西兩鄉民團攻城賊踞黃花關阻我進師之路十八日葉品金及李高魁等乘夜率團駕船駛至黃花關江口十九日清晨登岸

轟開關外木柵一擁而入先克黃花關維時各路兵團  
齊集樂清協副將陸爾善知縣孫家丞典史宋霖等分  
路進攻四面合圍賊眾驚潰開門奪路而走遂克樂清  
我軍追殺無算二十日礮石寨城居民約爲內應廩生  
陳廷揚率團會合官軍進攻斬獲數十賊并克礮石而  
松陽亦連獲大捷慶公先以松陽接壤金華賊大股屯  
踞意在遙應金蘭而近衛處郡巢穴若將松陽攻拔則  
各路賊勢漸孤而龍泉門戶亦固乃令林文察迅圖進  
取復令曾元福進扼遂昌以爲策應賊聚於松陽者分  
五股號十餘萬且將遂昌龍泉雲和進兵要路掘斷拒



守甚堅文察遣林文明營於松陽之界首四月十六日  
偵知舊市有賊營二十餘於村口擁眾數千列陣相向  
我軍出隊擊斃二十餘賊是日袁良一軍在松陽之南  
岱與民團夾擊殺賊百餘民團乘勢縱焚西北兩路賊  
寨賊竄至洋澳馬埠與舊市賊壘犄角二十日文察令  
民團導路賊先從馬埠繞出民團奮勇前驅師從之殺  
賊數十賊敗退二十二日林文明從徑路襲馬埠賊迎  
戰逾時擊斃執旂及騎馬賊二十三賊退踞橫岡二十  
三二十四日林文明力攻洋澳馬埠賊殺傷無算踏  
毀賊壘十七賊於舊市添築營壘二十五日文察約

袁良由南路進兵並調民團助戰曾元福領隊會鞠林  
文明率把總林廷棟李有福等以一隊誘敵三隊伏於  
舊市之右山賊眾數萬擁出林廷棟率隊轉戰林文明  
等伏兵突起鎗無虛發文察率軍衝殺陣斬黃衣騎馬  
賊十紅衣騎馬賊三十三共斃賊三四千悉毀各壘賊  
向松陽縣城逃竄曾元福從徑路截殺復斃賊數百二  
十六日文察等分路進剿正欲乘勝攻城忽宣平援賊  
麇至慮抄我軍之後乃收隊還營時謀報松陽踞賊由  
南路七赤進撲雲和景甯張銓慶精選所部遣將扼防  
七赤並令雲景民團嚴爲之備又偵知溫州瑞安賊聚

日多李世賢已竄入溫界前擾瑞安之賊自兩次勦敗後分踞桐嶺及澄頭上港金角山等處紮木爲陣謀竄平陽張啟煊率眾沿江扼守守備陳登三帶閩省紅軍長龍師船代理瑞安協副將黃載清率礮艇巡駛飛雲江上下並防賊偷渡四月十七日賊竄亭頭一帶陳登三督軍截擊斃賊數十是時瑞安湖石等處民團爲賊所敗傷亡甚眾文童吳國熙楊茂功戰死旋復整集秦如虎令馬雲標率四百人往援十九二十二十一等日金角山之賊從大樹埭馬嶼等處渡江張啟煊黃載清陳登三等與鄉團水陸堵剿擊賊半渡沈一船燒燬數

船南岸之賊兜殺溺斃殆盡北岸之賊勢蹙逃奔河鄉  
民團連日禦賊斬首三十餘級二十二日賊分股犯溫  
州仍撲西門三角門秦如虎督隊出戰斬賊三十餘二  
十四夜桐嶺賊突撲瑞安二十五日黃載清等由北門  
出擊民團由西路應援均有斬獲是日金角山賊四十  
餘船乘潮南渡適曾憲德派援之知縣徐承禧一軍馳  
抵平陽代理平陽知縣蘇金策紳士岳桂山等率團抵  
禦賊船復由上游偷渡徐承禧疾趨扼之擊沈三船斃  
賊數十賊敗還二十六日賊分一股出橫山撲瑞安之  
西門一股出高岡垵襲北門勢甚張千總賴正脩張光

榮等各督兵團由西門迎擊黃載清及都司孫純良守  
備賴忠腹等各率所部由東門出隊夾攻又令千總葉  
崇慶在籍江蘇知縣沈煥瀾等帶兵團由南北兩門殺  
出賊馬步前突我軍鏖戰數時互有殺傷外委陳鵬揚  
陣亡黃載清衝入賊陣手刃數賊賊始卻西路之賊爲  
兵團三面圍殺無算追奔數里賊逃至雙山腳復被師  
船轟斃數十二十八日賊分五路來撲我軍鎗礮環擊  
賊多死傷猶復猛進梟水過河冒矢石相踵攀城而上  
均被守陴兵勇擊斃黃載清賴正脩賴忠腹分出東西  
北三門迎勦陳登三率師船沿江轟擊並分隊登岸助

戰河鄉民團二萬餘人又從東路山後圍攻賊大敗四  
竄我軍分路追殺伏屍枕藉拋棄旂幟器械無算五月  
初四日副將吳鴻源率師船駛入飛雲江偵知金角山  
賊復謀渡竄北岸初六日鴻源令陳登三等分駕師船  
張啟煊令游擊陳允彩等分帶勇艇合軍進剿賊蟻聚  
江干開礮拒戰我軍轟斃賊數十奮勇登岸又擊斬數  
百墜崖溺斃者不計其數初七日鴻源等水陸各軍進  
攻瑞安廿四五都之賊知縣黃宗貴令河鄉民團截堵  
桐嶺我軍由三都嶺直搗巢穴水師登岸助剿賊驚潰  
卽由陶山遁往青田徐承禧一軍扼駐平陽之垵坑初

八日會合李朝安燬賊浮橋乘勝渡江多所斬獲初九日承禧朝安等復率所部渡江甫近北岸五六千賊擁至承禧等揮軍奮擊斬賊目五賊眾三十餘賊敗走還巢我軍分路進攻忽有大股援賊從山後衝出承禧等分軍擊敗之併力攻破賊巢追殺十餘里斃賊四百餘生禽三十六並燒燬沿江賊寨數十而溫州亦以初七日破走瞿溪任橋踞賊包澳團紳徐鎮南等四路兜剿生禽七賊秦如虎率隊夾擊遂北三十餘里民團奮勇窮追賊竄至青田之九都白巖等處會合各處敗賊縱火焚掠於十三日竄陷景甯十四日陷雲和均與閩省

接壤慶公飛檄戒嚴并令張銓慶督率龍泉慶元兩縣  
集團堵禦調回松陽白珙一軍由龍泉進剿以固閩防  
其松陽一路大捷之後援賊由湯溪武義絡繹而來屯  
踞舊市附近各村林文察督軍由上源口截擊曾元福  
由塔坪夾攻陳慶善等由舊市中路進剿署處州知府  
李澍等調集民團分兩路扼堵賊伏不出文察等佯作  
收隊之勢各壘出二萬餘賊分路來抄蜂擁包裹我軍  
奮擊民團助之大戰逾時賊陣披靡紛紛擲械退竄我  
軍追殺四五里踏平賊壘二十餘斃賊千餘生禽二十  
餘十六日文察親督各營設伏曾元福令所部僞作民



團誘賊出戰伏軍驟起斃賊數百山後援賊突至外委曾登貴擊斃紅衣賊目二各軍分隊迎擊斃賊二百餘賊敗竄各壘出賊四五千來援我軍連環開放烏鎗復斃數百生禽九賊餘眾奪路奔回臺勇亦陣亡三人傷四十餘人其金角山賊寨前經張啟煊吳鴻源水陸會攻破之殺賊數千賊奔回青田並分股竄擾小港頭爲團紳王言等截擊折入瑞安大帶屯聚十二日啟煊分調軍團兜剿斃賊二百餘陸溺死者甚眾其竄景甯之賊知縣管書勳督民團三千餘人進攻泰順民團數千復越境助剿於十六日收復縣治竄雲和之賊十五日

出犯龍泉張銓慶令從九品李燾等擊退復遣軍馳赴  
雲和於十六十七日在局村甯海洋等處勦賊獲勝十  
九日雲和知縣柯沆率民團收復縣治賊竄麗水之大  
港頭青田九都白巖之賊復擾及泰順團練委員林用  
霖與教諭沈應奎分守南向等處率團迎擊賊聞風退  
走截殺二百餘亦竄回大嶧李朝安遣千總施渠英馳  
往湖石堵禦徐承禧由平陽坑出軍賊之大隊已渡湖  
石而來施渠英率眾赴援敗之與承禧乘勝追奔對岸  
山後伏賊四起圍包承禧受矛傷而退馬嶼防勇亦潰  
賊進犯平陽張啟煊親率軍團手刃潰勇三人令賴忠

腹等督隊進勦浦門巡檢鮑復康帶勇策應陣斬賊三百餘賊奔平陽坑二十一日賊悉眾來撲營壘啟煊集團萬餘並督賴忠腹李朝安各軍迎勦三戰三捷斃賊無數啟煊揮軍逐北陳允彩等以礮艇截擊徐承禧由平陽坑扼殺斃賊近千生禽五百餘奪獲偽印四旂械千餘餘賊晁水而逃其未淹斃者亦被截殺此股賊數千由金角山分竄平陽越江深入勢極披猖至是殲焉慶公以捷聞分檄秦如虎張啟煊由青田秦順進兵白瑛及都司楊鳳元等各軍由景甯雲和進兵以規處州白瑛從七赤拔隊行次小順壘與賊遇敗之六月初十

日進至石塘分兩路夾攻賊壘民團渡河來助賊奔雙  
港軍團乘勢追殺斃賊數百並將雙港賊壘踏平林文  
察先因連日大雨未能出隊會天霽慶公檄革職道員  
廖士彥由衢州進駐遂昌爲文察後援促令迅攻松陽  
松陽賊酋喇天豫彭宏財扮天豫藍玉發林天豫梁梯  
率黨二萬餘分紮三大壘其踞舊市者爲僞主將譚體  
元枕天豫李三里等賊糾黨四萬餘分紮五大壘踞葉  
川者爲聚天福張泳受晉天義劉連榜等賊糾黨二萬  
餘分紮兩大壘各翼以小壘數十又於宣平屯賊數萬  
以爲援應連營百餘里負固七十餘日屢攻未下賊旣

深滿高壘久踞松陽勢必乘隙蹈虛爲窺閩之計且恐  
旁擾龍遂竄越江山牽制楚軍後路是松陽一隅關係  
大局我軍奮力相攻賊亦全力相拒林文察等所部臺  
灣兵勇精熟用鎗發必洞中實爲閩軍之冠而遠道運  
糧日不得飽慶公慮其因饑渙散一面由浦城購米運  
濟並密令文察等勉以忠義暗襲明攻更番迭進使賊  
應接不暇氣奪心搖自可一鼓而克曾逃出難民言僞  
侍王李世賢嚴令固守並欲由龍泉窺伺閩疆復檄張  
銓慶加意防遏袁良由龍泉之南岱進攻以勦爲增添  
調守備徐榮生等馳赴策應又令林文察張銓慶號召

松陽遂昌民團合力助勒布置已定六月初五日林文  
察曾元福分軍出隊賊伏守柵門開放鎗礮我軍不能  
進逼是夜偵知賊眾五六百在上方焚掠文察派隊截  
擊傷斃甚多生禽六賊次日兩軍復往會攻一軍伏山  
後一軍故令散而不整或前或卻示弱以誘之賊果突  
出數百我軍迎勦賊卽繞佔溪邊隔水抗拒壘中潛出  
數千賊來包我伏兵齊起大戰良久賊斃數百奔回初  
七至初十日文察等分隊迭戰均有斬獲生員吳呈玉  
等赴營密告處郡碧湖踞賊分黨數千潛運軍火器械  
接濟松陽文察卽令把總林文光等帶軍千人馳往南

坑等處截之十一日賊行抵南坑維時民團四集我軍出不意奮擊賊卽潰奔追殺十餘里斃賊緯天義楊英清等二百餘賊奪獲鎗礮三十餘具鉛藥三十餘石偽印八顆十二日壘賊出戰文察等設伏山前後殺賊二百餘十三夜選敢死士潛赴各壘拔取竹釘蒺藜賊眾驚譁我軍礮擊壘中旋卽收隊賊喧擾逾時猶礮聲不絕十六日後每夜分軍攻襲多放火箭延燒賊壘禽賊言官軍襲壘一次輒傷斃數十賊十八夜復斃賊五小壘十九日文察親率林廷棟教諭陳經千總陳兆熊賴安邦把總鄭蔡生等督隊衝攻舊市以下各大壘令縣

永八十四千總楊嵩生等帶勇策應千總林國安把總李成基等分軍伏於左把總蔡得標分軍伏於右曾元福親率把總梁清芳外委郭德高等督隊衝攻葉川頭大壘令同知潘恭贊等帶勇策應効用吳興隆分軍設伏俱用獨輪車三十輛前挂溼綿排推而進以蔽鎗礮舊市賊壘約出八九千賊迎拒我軍力戰兩時斃賊數百賊敗走伏兵邀之又斃二百餘葉川頭之賊出壘拒戰曾元福揮軍齊上伏起夾擊斃賊六七百日暮收隊是夜文察復襲賊壘賊不能支分向宣平湯溪而竄文察令各軍直薄松陽袁良一軍與松遂民團從東南兩



路馳至賊驚惶無措自相踐踏兵團乘勢進剿於二十  
日黎明克復松陽縣城共斃賊千餘生禽二百十七奪  
獲驃馬五十七匹鎗礮四十一件大旗四百餘桿拔出  
難民三千餘人我軍亦陣亡十九人受傷六十七人慶  
公疏言松陽賊眾九萬分壘負嶠我以五千之師加之  
饑困勞逸眾寡勢本懸絕而林文察等督軍晝夜攻剿  
無戰不捷賊望風奔潰遂克松陽從此楚軍之後路無  
虞閩省之邊圉愈固計處郡宜平賊勢益蹙攻拔不難  
高樑材所帶兵團已薄石帆距處郡僅二十里白瑛亦  
已移軍追逼臣現今林文察等各軍迅克兩城以仰副

聖主綏靖巖疆之至意高樑材旣至石帆分紮水營偵知城外賊眾分踞碧湖大港頭等處黃察黃壯各村民團俱集六月初六日都司陳啟經外委屈連陞紳士章寶書等分帶兵團進攻大港頭賊壘外委黃應春紳士楊啟祥等率眾策應高樑材及候選巡檢沈熙治等率隊督戰賊出拒而敗追至大陽嶺復殺賊二十餘別股賊千餘由箬溪嶺來抄敗賊復回拒敵我軍擊斃賊目三賊分竄碧湖而去初七日我軍出隊誘戰賊堅伏不動礮擊壘中賊乃分路來撲嶺後民團馳至四面夾攻斃賊數十賊奔至河邊我軍追擊溺斃甚多乘勢並擊退碧

湖踞賊十四日秦如虎派胡榮等帶隊馳抵石帆十五  
日高樑材胡榮於虎頭龍巖等山度地立營覓處州城  
外屯賊數千卽令水隊迎勦賊竄入城我軍焚賊館數  
處生禽一賊連日偵知賊情洵懼如虎又令馬雲標侯  
定賈分帶楚勇進屯石帆林文察於克復松陽後抽派  
臺勇二千與白瑛所部均由大港頭而進夾攻郡城松  
陽三都民團見逃賊狼狽赴林文察營請借號衣旂幟  
並給發軍火跟蹤追擊文察檄令宣平知縣郭光儀等  
傳集民團扼守賊由宣平下竄處郡之路仍給借衣旂  
火藥一面遣軍繼進竄賊甫入壘喘息未定民團卽揚

旂馳赴賊遠驚潰斬獲甚眾卽於二十二日收復宜平  
縣城處州賊勢愈孤慶公檄各軍進取並撥楊鳳元徐  
榮生兩軍歸廖壬彥調遣以固遂昌後路仍令林文察  
就近兼顧會賊復竄入處屬之縉雲境內台州紳士蘇  
鏡蓉調仙居民團馳往防勦文察得壹意進攻至處城  
東南連戰皆捷秦如虎亦率軍會勦身受礮傷督戰自  
若賊傷斃無算開門逃竄遂於七月十九日克復處州  
府城各軍追勦復斃多賊八月初六日慶公附奏以

閩嗣

廷命移慶公福州將軍而以廣東巡撫耆齡代爲總督時平

陽會匪已定溫處悉平唯縉雲東鄉踞匪以蘆塘爲巢  
穴時出擾害九月十二日縉雲知縣馮格及紳士胡兆  
脩等率領民團進剿賊眾出拒民團四面抄擊殺賊十  
餘賊敗奔回巢十四日總兵周萬遠令守備姜子豹把  
總胡榮各率所部馮格率同紳士楊學程等督民團會  
合攻剿途遇賊眾官軍民團兩路奮擊姜子豹復分隊  
繞出賊後賊腹背受敵卽時潰遁十四日姜子豹等率  
隊誘戰賊伏巢不出偵知其將竄是夜三更姜子豹胡  
榮與馬格楊學程等約會共率兵團往襲值賊方出壘  
欲走我軍噴筒火箭並發立將賊巢燒燬賊眾悉向東

陽一路逃去各營卽駐紮蘆塘以防回竄處境至是始  
肅清焉賊皆竄聚金華耆公令防守松陽宣平之副將  
曾元福等防守遂昌之從九品鄢太愚等各扼要堵禦  
力杜竄越并令周萬遠督率所部嚴密布置以固縉雲  
處州邊隘至是而括蒼甌江間民得蘇息矣先後捷聞  
得

旨嘉獎林文察秦如虎張銓慶以下敘功賞賚有差所有處  
次陣亡將士及前樂清失陷時殉難之教諭王連並  
子優卹賊之擾溫處也夔滋燎延非有僞王名酋曉銳死黨  
爲窺伺閩疆之計旋因左公大軍從三衢進攻龍游湯

溪而台州民團又方議其後勢不得不豕突鴟蹲以綴  
閩軍之力而牽衛防之師當全浙淪陷閩省大吏籌兵  
濟餉卽以援循溫者保邊圉亦殫竭心力矣諸將中林  
文察轉戰三郡在事最久秦如虎宿將資望亦重故能  
克成厥功後左公在嚴州營次奉

命接辦耆齡閩浙兩省防勦事宜疏言耆齡所部兵勇從前  
原有四大支統領粵軍者江西道員康國器統領閩軍  
者署提督秦如虎福甯鎮總兵林文察統領南康勇者  
參將化儒後以江西同知程培森代之現均撤退此外  
人數稍多者石字營一千餘人從九品鄢太愚管帶後

以江西知縣孔廣晉代之現亦撤遣惟章武軍千餘人  
尚留浦城乃耆齡舊部統計援浙各軍前其二萬數千  
陸續裁撤所存不過八千餘人而粵勇尚須汰遣統領  
亦僅存康國器一員並言浦城地勢在閩省固爲衝要  
而以近日局勢言之賊蹤擾及饒境是浮景爲門戶而  
廣信爲堂奧浦城又在江山玉山廣豐之後相距甚遙  
不必以重兵屯於閒散之地惟閩省轉輸入浙則舍舟  
而陸必問途於此暫以偏師駐之自無不可其臺灣一  
郡爲閩省外郭醫猶鎖鑰臺郡爲鎖澎湖廈門爲鑰而  
鹿耳門鹿仔港則通鑰之竅也兩處無事則全臺恃以



無恐而省郡之氣常通矣此因溫處廓清之後論浦城而并及閩省之形勝故附錄於此溫處屬縣多荒僻無城賊取之易守之亦難閩軍以全力注之而各路民團雲合響應敵愾同仇不分畛域暮月而奏廓清亦足以助浙軍一時兵力之所不及惟督府遙開各路軍情不盡由統軍大將彙報又或傳聞異詞鮮所折衷敘次不無闕略云

平浙紀略卷九

同治元年六月十六日奉

命督辦軍務浙江巡撫左公疏言定海解圍後克復鎮海甯  
波慈谿奉化郡縣等城均經前江蘇撫臣薛煥及署撫  
臣李鴻章先後奏報台州民團克復全境經督臣慶端  
奏報甯台各郡皆遠在海隅臣軍由開遂江常而至衢  
州相距千餘里賊氛中隔得報稍遲據各路文報證以  
所聞略悉梗概台郡地瘠民強上年賊首李世賢竄陷  
後分遣賊黨散踞各縣爲縱橫海上之計旋以官軍入  
浙急思抗拒乃由台州還竄金華賊目李鴻釗李元徠

李尙揚等在台大肆淫掠士民不堪其毒於是倡義討賊各相糾率出不意擊之旬日之間連復郡邑斃賊五六萬賊目皆就禽斬臣獲棧天義羅賊致李世賢僞文言台事甚詳其畏仙居士民尤甚論台藪出力士紳以在籍道員蘇鏡蓉爲最仙居出力士紳以副貢生吳琮爲最而吳琮因其父被害殺賊報仇英烈之風尤足矜式鄉里定海解圍後克復鎮海厥後會合外國兵船克復甯波多資布興有布良帶等之力布興有在洋橫行有年熟習海上形勢前任浙江臬司段光清撫而用之以護商旅司巡緝加意羈縻始就約束此次陳世章張

景渠用之亦克有功甯波旣克敗賊遁入紹興台州旣克敗賊萃於處郡溫郡之賊畏台州士民之議其後則由處郡以回竄金華就現在局勢言之裏賊中央絕其分竄似亦浙事一大轉機而臣愚竊不能無慮也台州之克全藉民團甯波之克半資外國而官軍曾無一旅與之周旋外國助勦但可偶用其長未可長恃其助卽台郡士民一時偕作同仇無良將吏爲之主持終慮情渙氣衰難以持久臣現檄代理台州知府崑齡於赴任之後詳察各處情形及實在出力士民分別安撫獎勵諭蘇鏡蓉吳琮等互相聯絡以收衆志成城之效令醫

寧紹台道史致譔先由安慶雇坐輪船駛赴上海由定  
海鎮海以抵寧波並經理稅釐事務然審其能養兵若  
干隨時馳稟以便核酌一面札調前臬司段光清紳士  
陳政鏞令隨同經理以資得力俟臣所調兵勇到齊餉  
項有出再當斟酌辦理如處州已復則分撥一軍由處  
台陸路直達寧波可無中梗之患至英國公使稱調印  
度之兵秋間大舉助剿或係懸擬之詞不必實有其事  
間英國兵餉最重亦頗以調撥之煩爲苦非公使等所  
能專擅印度兵船距中國五六萬里亦非一時所能驟  
集又諸暨縣民包立生聚眾殺賊頗著戰功然傳聞異

詞未敢遽信其真可倚任後印度兵船果不至而包立  
生據包村阻水爲塹賊屢來攻皆破之殺傷甚衆鄰境  
被難士民挈家從之者數萬人每戰勝掠賊金帛至於  
山積以分犒力戰者人皆不暇取徒受之而已叠次殺  
賊及團練戰死物故者各十餘萬賊憤怒大合衆晝夜  
力攻卒陷其村殲其人鮮得脫者悉如左公言八月二  
十日又奏張景渠稟報克復餘姚縣城溫台處之賊盡  
聚金華一郡九月初九日又奏甯紹台道史致諤於八  
月二十五日到任據稟慈溪失而復克賊又陷奉化甯  
波戒嚴臣維甯波一郡遠在海澨中隔賊氛雖藉外國

兵力暫保孤城主弱客強終非久長之計而彼中兵事  
穴雜每月糜餉至八萬餘兩入不敷出又值廣勇與外  
國兵頭構釁誠恐外侮內訌相乘而起臣原擬酌派新  
軍取道溫台防守甯波茲聞偽忠王李秀成及各大股  
賊黨分撲金陵大營兼及皖南意在竄入江西以緩浙  
軍之攻而抄襲浙軍之後臣隨時調撥兵力苦單勢難  
分赴甯波護理浙江提督陳世章失守獲咎新授提臣  
鮑超統軍皖南未能赴任前經慶端奏委葉炳忠護理  
臣已咨商耆齡催令迅赴甯波以重職守繼思葉炳忠  
卽由台郡前往部曲無多恐難得力現在溫台處三郡

漸就肅清雖有零賊竄擾邊界並非喫重記名提督秦如虎木係宿將所部在閩粵各軍中尚稱能戰近因攻處城受微傷回溫調治而所部現赴台州由台赴甯路甚捷近若蒙

恩旨令其署理浙江提督迅率所部由奉化而至甯波以視葉炳忠聲勢較壯甯郡必可無虞矣十月二十二日又奏臣奉

寄諭法國因甯波海口喫緊願將伊國副將勒伯勒東權受中國職任帶兵防勒現由總理各國事務衙門與之定議該國情願以勒伯勒東權受中國職任聽浙江巡撫



及甯波道節制著將該副將在甯波所練中國兵丁一千五百名應給餉項卽行按照舊章支放並據恭親王等奏稱以該副將旣歸浙省大員節制卽應給付劄憑以一事權著薛煥李鴻章左宗棠悉心籌議或山李鴻章或由左宗棠發給劄付旣須事權歸一又須力能控制方免貽悞該副將旣受中國職任之後自應遇事持平辦理一切按照中國法制不得稍存偏倚亦不得稍有寬縱史致諤甫到甯郡薛煥等務卽督飭該道於該副將所領之軍及甯郡兵勇賞功罰罪及稟報戰守各情務令秉公核實其支放錢糧尤不得有絲毫扣減浮

冒等弊致爲外國所輕視至籌防一節先經法國公使  
欲統歸勒伯勒東辦理復經總理衙門與之再三講論  
始願歸寧道督辦惟上年寧郡失事美國人歸咎中國  
官不肯照伊布置辦理以致誤事此次該副將有所籌  
商務飭該道與之和衷共濟不得意存齟齬致誤機宜  
一俟左宗棠等克復金華兵力足以兼顧寧波一帶卽  
日察看情形將勒伯勒東撤回法國仍用中國官軍防  
守毋庸俟浙省全行平靖方令撤卸等因臣初以寧波  
距上海近距臣軍遠中隔賊氛暫難兼顧且李鴻章威  
名丕著中外咸知臣於寧波兵事旣令史致諤就近稟

承則勒伯勒東劄憑亦應由李鴻章發給以資控制繼  
思法國請以勒伯勒東權受中國職任聽撫道節度原  
係就轄境而言異時更易撤留仍須由浙主持自宜先  
正其名已繕備勒伯勒東署理浙江總兵劄憑由安慶  
輪船遞史致諤轉發並咨薛煥李鴻章知照矣臣維人  
無中外其好惡同則其情理一忠信篤敬畿貊可行內  
治克脩遠人自服如賞功罰罪不秉大公諱敗穰勝不  
務核實以及冒餉侵尅皆主兵者所最忌有一於此部  
曲離心況施之荒遠內附之人乎史致諤人尚明白當  
不至於此臣亦隨時誠勵期免愆尤惟是沿海各郡自

五口既開之後人心嗜利忘義習尚日非又自上海用兵以來至今未覩戰勝之利於是妄自菲薄爭附洋人其黠者且以通洋語悉洋情粹至富貴趨利如鶩舉國若狂自洋將教練華兵桀驚者多每挾洋人之勢橫行鄉里官司莫敢詰治近聞甯波提標兵稍健壯者圖得厚餉且多棄伍籍而投洋將此常勝一軍所以增至四千五百人也若不稍加裁禁予以限制則客日強主日弱費中土至艱之餉而貽海疆積弱之憂人心風俗日就頹靡終恐非計臣擬熟察情形俟局勢稍有轉機再與曾國藩李鴻章熟商妥策是爲洋將受職任稟節度

之始昔回紇助唐契丹救晉皆率其突騎馳驟中原難  
紆一時之危或貽數世之禍泰西各國始因甯波馬頭  
人白爲戰有安危與共之心迨後遂能效順以彼兵法  
練我士卒並受疆吏節制

廟算之略旣出萬全而左公疏中數言復扼其要用能中外  
相安始終合力有昔人之利而無昔人之害雖曰時異  
勢殊非處置之善不及此十一月二十三日又奏中外  
各軍會克上虞後新昌嵯縣之賊皆竄諸暨二年二月  
初四日又奏我軍旣克浦江諸暨擊走東陽永康竄賊  
蔣益澧方令劉清亮率五營繼進規取紹興適接高連

陞稟報紹興府城已於正月二十六日經署提督葉炳忠等督甯波諸軍收復賊由臨浦義橋渡江而遁蓋至是甯台紹各郡俱次第恢復矣甯紹夙稱浙東饒沃繁富與嘉湖埒台亦負山阻海同隸一道自上年賊陷金華由紹台以及於甯郡縣并失惟定海一城孤懸海外得全先是甯紹台道張景渠與護提督陳世章等固守甯波賊從奉化攻陷郡城景渠受矛傷世章墜馬受傷均爲礮船所救法國提督卜刺以船送定海是時賊氛徧海隅勢若燎原景渠旣至定海謀恢復會游擊布興有及弟良帶先後以礮船至并收潰勇七百人景渠爲

流涕言浙事皆大哭令醫定海同知劉國觀籌餉爲餉  
畱之時時激以忠義士心益奮同治元年二月二十四  
日賊船至舟山直犯定海國觀等登陣守景渠世章督  
布興有等迎擊斃賊甚衆賊少卻已而民團四集賊遂  
大潰追殲之海中生還者十無二三焉而台郡民團起  
於十一年在籍道員蘇鏡蓉邀集參將陶寶登都司銜  
黃漣清知州徐灝副貢生吳琮廩生王瀚等共二十五  
人各相激勸義旗雲合鏡蓉寶登皆豪俠士好祖庇邑  
中諸無賴以爲爪牙及甯國設防寶登帶勇前往戰守  
數年頗習賊情亦漸知大義既歸里與鏡蓉相倚以爲

重台州故多土匪應募爲勇者亦往往不諳紀律迨鏡  
蓉等有志殺賊此輩皆歸之獷悍之風化爲剛健不煩  
官軍一士一卒而以次收復諸城竟得其力焉吳琮者  
仙居人因其父被賊所辱誓殺賊以報仇先遣人積石  
堵山路拒金華紹興之賊援更遣鄉人賫賂入城覘其  
虛實至賊之由新昌入天台也天台士民之黠者餉賊  
於要津每賊貽餅二賊喜甚而不知借餅以計其多寡  
也至是吳琮倡義天台首應之府城亦應之而鏡蓉竇  
登等先已克復黃巖太平兩城殲賊殆盡嗣因大股賊  
掩至復失寶登突圍得免退駐黃巖之三江口召集隊



船扼賊南竄之路賊出僞示招之元年二月十四日竇登率敢死士四百詐投入城李世賢陽爲優待分散其衆僅畱親兵十餘派賊日夜守視不得發十九日夜密約三江口礮船遙爲援應城內火起竇登手刃數賊越城而出從之者僅數十人餘皆被害賊追至三江口礮船擊敗之斬十餘賊禽二賊賊繇此疑懼退入台州城而天台自上年陷後賊見鄉團已集潛糾東陽新昌賊黨三萬餘來助十一月初四日民團會合迎勦鏖戰竟日斃賊七八千餘衆潰散復追殺千餘民團亦陣亡二十六人次日景天義秦賊等率大股賊衆復從東陽來

援與新昌援賊兩路夾攻民團因衆寡不敵陣亡千餘  
人心憤怒各鄉並起與賊連戰五晝夜禽斬甚多並殲  
騎馬賊二百餘盡獲其馬輜賊敗退追殺數十里直至  
東陽境始回元年正月初八日民團會集十餘萬行抵  
橋上莊賊開礮拒敵民團分隊繞至東門賊營後擲火  
包焚壘大戰五時之久賊大敗乘勝殺入城內賊猶抵  
死巷戰天台汛把總宋慶彪帶兵繼至民團愈奮陣斃  
僞酋李余二賊生禽一百三十四斬馘無數賊奪路逃  
走復被截殺二百餘奪獲僞印二顆卽於是日克復天  
台先是天台賊被圍出戰又挫自知不免乃皆反縛如

被虜人狀與民間談以爲難民而釋之也迨城破引頸受戮無一能脫者蘇鏡蓉等旋與督仙居知縣費希濂太平知縣吳奎祥等訂期同時進剿三月二十八日吳琮王瀚等率民團數萬圍攻田市賊卡殺賊四百餘二十九日進攻仙居縣城賊出戰擊斃數百退入拒守民團直逼城下四月初三日設伏誘賊出城掩殺數千虜獲賊酋延天義李元祿梟示遂克復仙居城而教諭周炳勳等亦於三月三十日糾合義眾先攻縉鎮踞賊圍殺三千餘四月初一日進逼太平縣城晝夜環攻初三日辰刻由南門蟻附而登殺賊七千餘賊由東西兩門

逃竄遂克太平初三至初九日鏡蓉等約會前黃巖鎮  
總兵張清標前黃巖知縣李汝紹臨海知縣鄭煜等進  
偪台州分道環攻費登令墩船駛攻南門一帶天台知  
縣王興杞等率團助戰聲勢大震賊數出戰皆敗之初  
九日併力殺入城中斬其僞酋李遇茂李紅保賊伏尸  
滿地遂復台州初十日乘勝直搗黃巖分路截殺斃賊  
無數斬其僞主將李賊卽將縣城克復十五日鏡蓉等  
派團約會參將蘇方拱及竊海教諭高錫蕃聯合鄉團  
進攻縣城賊拒敵團眾奮擊賊紛紛驚惶逃竄民團乘  
之復斃多賊竊海亦復台州全境肅清初賊由金華人

台實數萬人至是回金者無幾其敗匪多從寧海竄入  
寧波或翻山入溫處蓋以金台之歸路已絕云其張景  
渠陳世章定海之師及布興有布良帶前署寧波知府  
林鈞署鎮海知縣吳寶仁等於四月初七日率眾揚帆  
直指鎮海先一日聞省商船連檣過境乘夜製旂數十  
面使懸竿首爲疑兵並密邀洋廣艇船勇敢者三百人  
助戰又募人釘塞招寶山賊礮火門師船駛近關口賊  
開礮迎拒我軍酣戰數時擊沈賊船五十餘艘乘勝駛  
入關內薄暮抵城擊斃賊數百生禽十六燒賊船二十  
餘并燬城外賊卡賊背城力拒我軍受傷頗多益爭先

殺賊賊乃卻初八日分門環攻南門軍薄城而上被賊鎗斃一人受傷十餘賊復開門出戰我軍追至道頭東門兵勇分隊回擊互有傷亡時民團不期而至者數萬人先將四鄉賊卡踏平斃賊二千餘禽戮二百餘士氣百倍賊旌旗蔽野我軍悉隊擊之斃黃衣賊目十餘奪獲黃旂三百餘面賊鼠竄回城夜半我軍冒雨進攻緣城齊上賊懼而遁初九日寅刻復鎮海卽於是日整隊乘潮進駛甯波當鎮海戰急英國總兵哇樂德克乘輪船由甯來觀謂賊衆我寡殆不可勝及是舟次白沙外國兵頭皆賀揚揚有喜色賊方欲得北岸地外國人勿

許相持不下甯郡紳士中壽陳政鑰等因而間之密約  
兵頭助勦僉謂必賊破及其船乃可我師旣至民團十  
餘萬勢如熾集初十日賊由東渡門出隊我軍迎勦民  
團在浮橋一帶夾擊斃賊甚衆十一日兵團並進監生  
鄭維春以練勇五百人從之賊憑橋固守攻之勿克十  
二日黎明維春等率團勇進攻和義門布與有率破艇  
乘潮駛近東渡門游擊李光先然破擊賊賊開礮拒敵  
子落英法二國兵船遂助我軍轟擊賊亦悉力相持布  
良帶揮兵團由江東陸路馳赴靈橋門衝過江橋殺賊  
數百舟師往來奮擊盡毀賊卡數十自辰至申礮震數

千聲外國火器猛烈轟坍城垣十餘處斃賊無算洋兵  
先登鄭維春等揮隊從之賊嬰城死拒鎗礮如雨陣亡  
英國一參將水師二人受傷十七人受傷法國一副將  
水師十一人陣亡二人我軍亦陣亡百餘遂由和義門  
畢登克復郡城賊向西北兩門分竄自相踐踏復經我  
軍追殺死者不計其數奪獲偽印五十餘顆旂幟鎗礮  
器械無算當是時各屬民團並起數日之間燦流響應  
陳世章張景渠派守備羅熊縣丞查廷楨帶兵會剿比  
至慈谿民團已圍攻縣城十三日賊遁被鄉團兜剿無  
路逃走十四日同竄慈谿英法兩國輪船駛往太平橋



一帶轟擊賊創而奔輪船駛回甯港賊乘間仍竄回城  
輪船再往轟擊張景渠等復令兵團由陸路勦洗於十  
五日收復慈谿奉化知縣用永清都司魏杰卿等因民  
團於十四日克復奉化殺賊二千餘象山知縣嚴家丞  
紳士李椿等密令陷賊之柯有解散脅從一面集團請  
兵張景渠等派兵馳往助勦賊驚潰十五日收復象山  
於是甯境咸復二十三日景渠等率師規取餘姚賊置  
守甚固乃遣人赴上海添募壯勇並邀外國兵船及副  
將華爾所部常勝軍前來會勦新昌紳士孫善松等亦  
募勇來助七月初三日水陸俱發餘姚新昌兩城隔水

屹立賊於水隘密排木椿兩岸築卡列大礮以拒我師  
景渠乘船先進初五日行抵岳廟江外賊開礮抗拒初  
六日中外各軍分由南北岸並擊斃賊甚多是夜景渠  
親督勇士入水拔椿兩岸彈落如雨景渠不爲動須臾  
盡拔江路無阻兵船礮艇駛近城垣轟擊陸路兵團復  
從山背環攻賊勢不支先克新城乘勝追殺舊城亦克  
賊由上虞嵎縣一路竄去八月中旬景渠謀畫守曹娥  
江然後整兵西向會甯紹台道史致諤蒞任十二日上  
虞嵎縣大股賊撲餘姚爲我軍擊退十八日賊衆萬餘  
復四面來攻前護理提督陳世章等督各軍與英法兩

國兵船合力衝擊四時之久賊始敗退十餘里員外郎謝敬率團截殺亦有斬獲賊遂分而爲三一屯餘姚境內牽制我師一繞僻徑犯慈谿衆各數千一犯奉化陳公嶺衆二萬餘其犯慈谿之賊於二十五日突至小北門分攻東西兩門慈谿知縣孫紹芬等登陣守禦賊攻破西門縣丞薛世奎力戰陣亡城遂陷史致諤亟令中外軍船進剿陳世章亦令同知銜謝采璋率所部忠義軍並與稅務司日意格籌派法國兵勇馳往策應復令各軍扼守餘姚四門鎖而自率小隊折回甯郡守禦二十六日英國總兵哇樂德克及副將華爾茲將馬惇行

抵慈谿會合忠義軍與紳士邵箴等民團方欲進攻時有別股賊竄至半浦大西壩一帶距城二十餘里中外軍卽駐半浦截其來路二十七日華爾督隊前進指揮兵頭六人率衆攻城城上烏鎗洞中華爾之胸救護回船而常勝軍已冒煙登城遂克之賊潰亂由北門奪路走各軍截殺數百生禽數十奪獲馬匹旂幟甚多二十八日華爾殞於甯郡其犯奉化陳公嶺之賊二十六日都司邵英豪等迎戰而敗二十七日賊踰嶺由谿口直撲縣城署奉化知縣屈永清督衆守禦二十八日東南兩門破永清死之賊分屯南北濶距甯郡四十里英法

兵船駛截江口並將北渡之賊擊退聞八月初一日賊從北渡小路竄至懷社距郡城十五里史致諤等率兵團及外國軍咸登陣守日午賊進攻西南兩門城上鎗礮環開炸彈迸裂賊多死傷水師輪船釣艇復從東南門外江面截擊轟斃騎馬二賊及其眾數十賊敗回懷社初二日退踞姜山橫溪石橋夾村等處史致諤陳世章令游擊布興有等廣濟勇游擊史長安詔安勇都司楊應龍忠勇廩生李諤大嵐勇陳朝雲等義勇增生董會等鄞縣各鄉團與提標所部約會英國總兵哇樂德克繙繹官有雅芝美國帶兵官法爾師德法國參將德

克碑稅務司日意格等水陸各軍及我師船於十五日  
同時拔隊進剿偵知方橋南渡之賊退入奉化縣城姜  
山夾村之賊併聚橫溪石橋十六日中外各軍直薄城  
下哇樂德克等攻東北兩門楊應龍李謬等攻西門民  
團圍南門自辰至酉環攻竟日賊嬰城死拒鎗礮稠密  
繼以火罐美國陣亡兵頭那師及兵勇十一受傷二十  
餘我軍陣亡十一受傷三十餘戍剋收隊十七日黎明  
復整隊攻城橫溪石橋之賊自東北蜂擁來援哇樂德  
克法爾師德等令俟賊逼近放炸彈大礮轟斃騎馬  
賊十餘賊黨千餘救出被擄難民二千餘賊敗退陳世

章等邀而擊之生禽七十餘其逃匿山林者均被民團收斬無遺我軍復四面圍攻賊猶力拒楊應龍乘夜出西北隅梯城而上所部從之斬開北門關中外軍咸入殺賊二百餘生禽六十餘獲旂械無算拔出難民八百餘賊由南門奪路向夏毛嶺一帶竄去追逐十餘里又斃多賊於十八日竄刻克城自奉化復陷台屬甯海天台仙居等縣俱逼近賊氛圍八月初五日東陽岷之賊竄至新昌之汝巒距天台境二十餘里知縣王興祀台小西鄉民團扼要堵禦與署台州同知韓承恩督帶城中團練迎勦初六日賊來犯境城鄉團併擊頗有斬獲

逐北十餘里初七日賊繞由新昌之清境等處欲犯天  
台北鄉王興杞等復率團往禦初十日大股賊竄至小  
張蕉坑等處勢甚猖獗亟調各鄉民團策應十一日賊  
來衝撲營盤各團合力抵禦鏖戰三時殺賊四十餘及  
騎馬賊四後面賊衆來援王興杞分隊抄擊賊披靡而  
走追殺十餘里平其五壘奪獲烏鎗旂幟四十餘民團  
亦陣亡三人受傷十八人總督耆公疏言賊復陷慈谿  
奉化並由奉化攻撲甯波府城甯郡克復未久人情危  
懼經中外各軍戮力同心殺賊千餘將兩城次第攻拔  
餘賊遠遁地方復安厥功甚鉅此時甯屬蕭浦自應乘



勝進取上虞嶽以勦爲防杜賊回窺越浙江提督葉炳忠已由台州起程赴甯臣催令兼程前往與史致諤等激勵士卒聯絡外國妥籌防勦事宜惟賊不得志於甯波難保不窺伺台郡雖天台仙居等縣民團踴躍同仇屢挫賊鋒仍賴官兵接應以壯聲威前派游擊甯世杰等所帶楚勇一千尙駐甯海湯處道支方廉與記名提督秦如虎續派心誠勇五百前往協防有此兩軍足爲各縣策應游兵臣檄令甯州知府峴齡率屬獎勵民團嚴密防守確探賊蹤所向酌撥兵勇合力迎擊以固疆圉英國副將華爾自在松江訓練常勝軍以來臨陣

奮勇屢著戰功茲因攻慈谿中鎗身殞深堪憫惻請與  
陣亡之縣丞薛世奎分別從優照例議卹奉化殉難知  
縣屈永清亦請優卹其陣亡美國兵頭那師並令道府  
妥爲照料外國傷亡兵勇另核辦理史致諤旣代張景  
渠仍以兵事屬之會慈奉兩邑失而旋復餘姚四門鎮  
又陷員外郎謝敬爲賊所得不屈賊久乃害之景渠曰  
賊之敢鴟張者恃有嶠可負也巢穴若傾餘氛自熄遂  
與前護提督陳世章法國副將勒伯勒東部署中外各  
軍於九月二十七日直搗上虞賊沿途結卡樹柵一十  
四處悉奪燬之殲賊無算拔出難民數千三十日進薄

縣城以炸彈大礮轟之賊猶力拒稅務司日意格督隊直前箐中賊鎗各軍奮發斃賊千餘賊渡曹娥江遁去十月初一日收復上虞城新昌密邇天台前天台既克宋慶彪等卽於二十二日督團馳赴新昌助剿賊由南門出拒酣鬪三時斃賊數十民團亦陣亡十六人三月十七日約會新昌民團攻城鎗斃城上守賊百餘三十四日復往圍攻城賊三四萬悉出迎戰相持兩晝夜斃賊不計其數內有黃衣賊目八騎馬賊數十至二十六日賊始退入城追抵城下適嵊縣賊衆兩路來援各圍回剿失利陣亡一百四十餘僅斃賊數十旋因糧盡

引還天台會台甯俱平新昌之賊聞風震恐於四月十八日竄至嵯縣交界之黃宅鎮焚掠俄而兩郡敗賊竄入新昌二十五日王興杞等率民團三萬餘復與新昌民團合攻縣城轟破東門一鼓克之禽斬六賊酋二十六日整隊馳攻黃宅斃賊數百生禽十三餘賊竄向嵯縣而去嗣後新昌復爲賊踞十月初二日謀從煙山會墅嶺兩路夾攻天台時署天台知縣劉焯方與署台州同知韓承恩前杭州水師協副將王邦慶等率團進攻東陽閩警馳往分路扼守並調城鄉各團策應初四日賊蜂擁來撲會墅嶺劉焯出卡督隊迎擊斃賊數十賊

敗奔適王邦慶亦由輝山擊敗賊衆合力逐北復斬十二級追抵斑竹駐紮偵知敗賊盡聚新昌城中約會新昌各鄉團於初五日寅刻齊集攻城賊矢石如雨各團力攻兩時斃賊數十遂緣山腳梯城而登連斬執旂數驍賊王邦慶亦攻破東門兩路奮呼殺入賊勢不支由西北兩門分竄岷縣諸暨沿途復被鄉團截殺多賊拔出難民百餘民國團亦陣亡三十餘人受傷五十餘人劉焯復約會署岷縣知縣史致遜及團紳貢生庾德馨等乘勝攻岷於初七八日合勢偪之賊懼而遁於是再克新昌協復岷縣皆天台民團之力也耆公疏請獎敘並言

數城皆克我軍距紹興郡城不遠臣飛檄史致諤激勵中外各軍扼守曹娥江杜賊回竄一面相機規取紹郡十一月下旬張景渠等屯駐百官遂督各軍進薄紹城法國副將權受總兵職任勒伯勒東以上虞賊所遺土礮往景渠止之請取到甯波輪船洋礮再進不聽果因礮炸傷歿軍爲小挫乃以法國參將權受副將職任達耳地福一名買忒勒接統其衆十二月二十四日英國總兵哇樂德克親運大礮到營會商進兵景渠議分攻稽山五雲安昌三門達耳地福哇樂德克議攻西郭門景渠恐有疏失令各軍分路接應二年正月初一日達

耳地福呿樂德克率洋兵花綠頭各勇載車輪大礮徑  
攻西郭門王維圻率常安軍攻安昌門謝國恩率信義  
軍攻五雲門景渠及知府楊叔懌督隊由南路兜剿圍  
攻竟日轟坍西郭門城堞丈餘酉刻收隊初二日復攻  
西郭門連開洋礮轟塌城垣十餘丈斃賊無算達耳地  
福獨立橋上揮兵登城賊拚死抵拒正相持間突有黑  
夷五六十人助賊環放洋鎗達耳地福腦左中鎗殞命  
同時陣亡兵頭一人洋兵四人勇二十餘受重傷者數  
十次傷百餘賊勢復熾東關百官蒿壩諸軍紛紛潰退  
景渠與楊叔懌退駐斗門後路幾爲賊斷而安昌五雲

烏門山等處賊復日夜竄擾兵無可調景渠選親兵數十及各營親兵中敢死者二百四人帶烏鎗百九十四桿籐牌八面小旂二面前往迎擊六戰皆勝賊大潰竄去是時常捷信義兩軍亦戰無不克賊復由杭州蕭山諸暨調集十餘萬衆來援直抵下方橋柘林等處進逼濠湖花浦橋景渠移駐三江城城匝里餘距斗門三里宥奇賊四面圍撲火光炳天各軍拒之殊死戰景渠連促退守曹江諸軍來援守備張其光所部及定勝常安兩軍並葉炳忠添派外國師惠南適先後至衆心乃定連日四路兜剿斃賊無算燬其卡賊氣始奪城賊不敢



復出十九二十日蕭山義橋臨浦一路竄賊來援張景渠等督率中外軍攻勦一勝於下方橋再勝於安昌城外四十里賊氛如洗嗣是英國總兵吐樂德克復由上海解來大礮稅務司日意格調來法國洋兵陸續到營正議悉銳環攻而賊黨楊應柯密遣難民持信赴景渠營中乞降願爲內應二十五夜城中火起景渠約會諸軍齊進僞酋周賊率衆開稽山門向蕭山而遁二十六日巳刻我軍入城收復卽分軍進攻蕭山城聞官軍蹙蹤追至莫有固志於二月初二日潰走張其光李光等入復其城至是紹境盡廓唯諸暨先經左公遣軍克之

左公疏言達耳地福自上年八月到甯管帶花頭黃頭  
兩隊練勇訓習洋鎗防守餘姚剿退各鄉股賊上虞之  
捷亦與有力此次抵營未及一月忠義奮發急攻紹城  
身先士卒臨陣捐軀請照副將從優議卹又奏浙事之  
轉以金華爲一大關鍵金華未復之前甯波各軍力攻  
紹興未能猝拔迨十三日復金華二十三日復諸暨二  
十六日紹興卽隨之而下浙東肅清規取杭垣自宜由  
富陽前進而東路亦未可鬆防蕭山臨浦一帶已令葉  
炳忠張景渠督各軍嚴爲防守義橋仍暫由蔣益澧分  
兵扼紮蓋自大軍急攻龍游湯溪賊悉調精銳自救故

閩師得以清溫處甯師得以定浙東然紹興一城遲之又久必告復於席捲金華箠笞諸暨之後蓋有三焉紹蕭相去百里城孤不足守一也長江水師直下西渡將斷二也富陽受兵杭州洵懼又當捍其所急三也獨是台州義旗颺舉張景渠以一旅起海上並致克捷秦西人性忍鷙果而不同助攻各洋將迅銳忘死捐軀相繼以海邦之烈士爲中夏之鬼雄均有足多者焉

平浙紀略卷九

平浙紀略卷十

同治三年二月二十三日奉

命督辦軍務閩浙總督兼署浙江巡撫左公疏言嘉興府城經蘇軍於二月十七日大舉環攻晝夜不息十八日轟塌北門蘆席漚城垣十餘丈申刻由東北兩門衝殺而入署杭州知府陳思燭督率章文盛所部會合蘇軍併力攻勦當將郡城克復臣維嘉興浙西腴郡爲官軍與賊所必爭賊首僞榮王廖發受前往蘇州納款迨蘇軍壓境旋卽中變杭湖賊酋復調悍黨赴援並冀擾動海甯桐鄉新復各縣勢頗猖獗幸賴蘇軍嚴扼嘉郡東北

平江縣志  
十一  
兩面力破堅城俾平湖乍浦海鹽新復各區不致重遭  
擾害厥功甚偉所有在事出力員弁兵勇應由江蘇撫  
臣保奏浙軍於收復桐鄉海甯後分守兩城復擊敗杭  
湖援嘉之賊四品翎頂蔡元吉所部縱橫血戰勞績甚  
著可否由臣查明保奏出自

恩施元吉力禦援賊事見第六卷中先是江蘇巡撫李公鴻  
章令編修劉秉璋常鎮道潘鼎新及總兵張遇春副將  
楊鼎勛進圖浙江之嘉善同治二年七月十二日抵風  
涇北官塘天雨賊大至鼎新擊卻之十三日數道並進  
賊不出嘉善賊來援水師敗之鼎勛等設浮橋渡河攻

踞賊礮毀其三壘七卡於是嘉興平湖乍浦之賊至者  
數萬分踞干窰西塘縣亘二十里十八日秉璋等由楓  
涇進西塘太湖水師二營來會淮揚水師張元龍由蘆  
魁塘攻西柵楊宏勝朱開泰由揚漕攻北柵十九日我  
軍方出干窰賊驟至水師礮卻之烏涇塘與西塘賊出  
南柵鼎勛與戰傷膝賊亦少卻水師入烏涇塘登岸斷  
干窰之道賊首尾不相顧以炸礮猛擊之遂潰張元龍  
楊宏勝等破北西柵賊壘斬馘千餘賊竄干窰二十一  
日鼎勛復破之獲僞王宗及羅天安敬天福登天侯等  
酋斬之捷聞劉秉璋擢侍講潘鼎新加按察使銜張遇

春以下獎賚有差嘉善城東有鎮曰張涇滙賊以四營守之十月二十日劉秉璋由楓涇往攻不利參將王玉林死之秉璋傷股嘉善賊遂出犯秉璋軍累擊賊於干窰之鳳洞橋大通橋及東西茜涇互有勝負十一月初四日復攻張涇滙潘鼎新遣水師爲助始克之初平湖賊酋陳殿選遣人乞降於劉秉璋潘鼎新不許十月殿選出至大泖塘求見秉璋鼎新言城中不願投誠者半請謀定舉事鼎新等察其意誠許之及茜涇張涇滙之捷陳殿選復請師期初六日潘鼎新遣夏金標潘鼎立率部進屯廣陳觀動靜劉秉璋遣聶桂榮張應魁由楓

涇進新埭楊鼎勛出隊干審秉璋自進兵鍾埭以綴嘉湖各賊而絕陳酋反顧之心初七日令徐道奎率水師夜偪平湖城下殿選卽勒所部分圍各賊館開門迎我軍入城將賊洗天安陶雲從翼天福江之源蓬天福胡金鏘劓天安沈本立各館悍賊誅殺殆盡督令合城薙髮殿選率陳殿魁王應海錢玉興朱六玉等所部萬餘人悉降次日遂將平湖收復殿選初約乍浦賊酋熊建勛同降建勛未決十月二十六日茹天福甘酋密約內應請我軍夜襲乍浦十一月初五日鼎新夜督軍銜枚疾走過東門外殺入牛橋賊壘賊睡中驚起盡殲之比



抵乍城賊已有備甘酋謀不得發鼎新踏毀北門外三里橋賊壘四殺賊數百餘衆逃往沿海山坳自相踐踏而死者無算熊建勛氣懾始乞降鼎新令主簿趙濟川入城宣諭賊衆初十日復令丁壽昌唐宏成劉思洲帶三營屯城下自督潘國揚一營勒兵平湖南門外以俟十二日建勛率衆薙髮獻城遂收復乍浦次日鼎新令建勛隨唐宏成帶隊往海鹽城中踞賊多建勛舊部宏成等反復開導立率衆薙髮迎降海鹽亦於是日收復澉浦鎮踞賊聞風震恐亦降之鼎新秉璋以四營守平湖三營守乍浦二營守金山衛以固蘇省門戶海鹽一

城暫令降衆自守李公疏言平湖乍浦海鹽各城相爲犄角與浦東金山接壤爲滬防後路浙省東北沿海屏蔽平乍賊衆各有萬餘城濠堅深糧支數月設憑城拒守圍攻匪易降酋陳殿選等懾我軍威次第納款浙西踞賊藩籬已撤皆有首尾狼顧之象據各降酋皆願率衆往攻嘉興臣已令潘鼎新劉秉璋等分別遣留相機督勦惟聞僞歸王鄧光明僞相王僞獎王等賊三萬餘衆入援嘉興意圖復奪各城海鹽澈浦去蘇較遠檄令潘鼎新等隨時酌調應援並令程學啟速攻平望嘉善以牽制賊勢各降酋均有微功並非賊中著名大頭目

暫留助勦尚易控馭請免罪予獎

上俞之陳燬選卽易名陳恩榮云於是楊鼎勛屯軍干密洪家灘以截嘉善嘉興之道嘉善賊酋陳占榜余嘉德密詣吳毓芬請降不許及總兵程學啟克平望占榜懼請益力獻子爲質毓芬以白李公公命會學啟鼎勛秉璋圖之二十七日勒占榜盡撤城外賊營秉璋鼎勛率小隊往列東西門毓芬軍人自南門二十八日學啟秉璋鼎勛咸入乃收復嘉善縣城而潘鼎新之軍方克沈蕩新豐鎮當嘉興賊犯海鹽平湖時往來屯營於此海鹽守軍旣敗僞會王之衆僞王宗陳炳桂僞蔣王陶金僞

天將錢得勝併踞沈蕩日犯瑱城二十四日唐宏成督  
熊建勛等攻沈蕩盡毀其巢二十五日鼎新率師由乍  
浦勦新豐距平湖十八里二十六日潘國揚等攻中路  
炸礮塌其牆丁壽昌等自新篁里潘鼎立等自竹林廟  
分攻其南北賊皆潰追殺之阻於水鮮逸者時嘉善旣  
復劉秉璋率所部進屯新豐程學啟令劉士奇屯王江  
涇十二月二十一日嘉興賊僞榮王廖發受出犯秉璋  
鼎新大破之發受乞降李公命學啟偵之賊布守嚴未  
可信決進勦學啟以四營與李朝斌水師進屯金橋秉  
璋與吳毓芬七營進屯七里店鼎新軍由海鹽平乍遙

應之三年正月十九日學啟軍方築壘北門廢發受及  
偽挺王劉得功以礮船前犯並由西門出賊數千學啟  
分禦之陣斬賊凌天義秉璋軍亦移駐朝陽廟及會龍  
橋二十三日鼎新率三營來會時東北門賊壘尤多議  
以學啟軍與淮揚太湖水師分攻城北杉青橋御花園  
端平橋李公弟昭慶攻秋涇橋秉璋鼎新所部攻城東  
吳涇橋東塔毓芬攻合歡橋二十四日學啟軍分五路  
進戰未克城賊萬餘出援猝爲所滅學啟率親兵由小  
西門繞出賊後賊卻顧前軍攻益急乃破小西門北門  
賊營七禽僞朝將劉得福慕天義賈慕仁陣斬驍賊千

餘奪獲大礮五十守備姜寶戰不力斬之以徇昭慶軍  
三路達秋涇橋賊適饋火藥入其營我軍乘而入賊兩  
營皆潰吳涇橋合歡橋賊踞四營乘璋等方攻克大石  
壘賊亦由東南門出援擊走之追至鹽倉橋而合歡橋  
賊阻河死守毓芬令吳兆柎伏河干發炸礮斃登壘賊  
吳毓蘭率死士渡河礮船繼至營亦破是日戰甚力營  
官劉士奇周正林潘國揚黃士林聶桂榮皆被重創東  
北門賊亦殲除殆盡湖州賊圖援嘉興屢擾我後路水  
師敗之學啟益督各軍圍城築礮臺二十八日炸礮壞  
城垣十餘丈水師已設浮橋而渡學啟令何安泰劉士

奇率千人踰河乘城自率陳忠德王永勝繼之賊然火藥傾而下不克登安泰猝中洋鎗死之水師李助發周正林趙三德俱創甚軍士死者數百乃罷攻湖州賊復犯盛澤圍王江涇營二十九日學啟令王永勝鄭國魁往敗之陣亡總兵何安泰副將郭興發均請卹安泰爲學啟軍名將治軍嚴無擾其喪歸嘉興民有泣送者並請建專祠嘉興賊旣死守官軍多傷亡又遇雨兵不得舉二月十五日雨霽學啟卽令各軍薄城是夜親督梁安邦於端平橋下築護墩月臺黎明賊覺矢石交下時臺已築竟學啟手然田雞炸破斃賊數百十六日學啟

與劉秉璋李朝斌等會議猛攻令王永勝率陳忠德張  
行科龔生陽攻城東北以葉廷杓阮炳福繼之劉士奇  
率陳有昇梁安邦左日昇彭連升攻北門以朱寶元于  
奇泮繼之吳毓芬率吳毓蘭吳兆楣陳占榜余嘉龍羅  
義勝攻東門別遣張家瑜張自全堵禦新勝援賊兼遙  
攻西門以分賊勢水師歐陽利見率謝世彩鄧全楚費  
余綬等與陸路各軍夾擊劉秉璋潘鼎新令錢玉興朱  
六玉扼東門城外南湖之口萬重暗曹廣澤袁發由南  
湖南岸進攻王古魁潘鼎立夏金標劉廣福由東馬橋  
北岸潘國揚唐宏成丁壽昌黃仕林劉鳳翔王應海由



東馬橋南岸三路進攻水師蔡渭川李洪壽徐道奎等  
會合李朝斌所部礮船駛入南湖分攻西南東南城角  
賊於各垛口排開巨礮並擲火藥桶以拒我甚力是夜  
學啟令於沿城河添築月牆三道賊鎗礮甚密我軍縛  
草膝行且避且築自此各軍晝夜環攻不息十七日黎  
明學啟自率親兵督教練洋人備雷用開花礮三而轟  
擊立燬城上礮臺二十餘處壞城垣百餘丈賊爭負土  
堵之我軍薄城數次皆不得上申刻學啟揮軍若將登  
城賊以洋鎗密攢缺口我軍乘勢連開炸礮賊血肉雨  
飛仍更番死拒夜四鼓學啟督親兵成浮橋兩道賊鑿

城根實礮於中攔河阻截徐佩璆乘飛划猝奪其礮十  
八日湖州賊酋黃文金率黨萬餘突山新塍直撲我軍  
後路時攻城正急學啟令張家瑜張自全擊走之城賊  
漸不支學啟促各軍梯而登死亡相枕籍學啟憤甚自  
督親兵踰浮橋直上賊鎗子飛中左腦昏絕昇歸營劉  
士奇王永勝等急率隊以木筏分渡由城西北角先登  
吳毓芬陳忠德分撲西北兩門陳有昇龔生陽均中鎗  
裏創奮進炸礮中城賊火藥倉賊衆駭亂呼聲如沸劉  
秉璋潘鼎新各率所部乘勢拔樁過濠入東門襲城李  
朝斌抽撥水師登岸由南門踰牆而進廖發受猶率悍

賊數千巷戰韓杰持令大呼各軍奮勇格殺劉士奇王  
永勝歐陽利見等擊斬五千餘級餘賊竄向西門復經  
陳有昇梁安邦張家瑜與李朝斌水師攔截各軍分路  
進擊悉就禽誅磔斃偽挺王劉得勝於城獲偽榮王廖  
發受於井礫之送於是日申刻克復嘉興郟城二十一  
日李朝斌等復將新塍四亭子一帶賊壘塌平賊悉遁  
回湖州李公疏言臣查嘉興府爲東南財賦重區險固  
足食易守難攻自咸豐十年賊陷踞後黨悍且衆提督  
張玉良曾以數萬軍潰於城下此次偽榮王廖發受等  
勢窮負嵎嗾衆死守又有湖賊來援我軍腹背受敵程

學啟督軍急攻誓死必克始得速下名城盡殲驍黨出奇制勝忠勇謀畧突過尋常從此蘇滬之防漸固杭賊糧路已絕羽翼益孤我軍越境苦戰傷亡精銳於大局不無裨助請將程學啟劉秉璋李朝斌潘鼎新以下獎賚有差並

賜卹陣亡將士五月初二日李公疏言臣於四月十二日回蘇因湖州賊氛尙熾將蘇城防兵復加整練准閩浙督臣左宗棠咨稱浙軍擬卽日進偪湖城東南兩面漸次移軍而西湖州既有重兵則嘉興可無須蘇軍屯紮請酌調進規長興臣先派道員潘鼎新各營分守吳江平

望傳講劉秉璋駐守嘉興專防湖賊內犯之路常勝軍現經裁遣英領事方請添兵防守上海劉秉璋一軍既可騰出擬卽令移防松滬近偵湖州踞賊分竄城北楊漚大漚一帶潘鼎新由平望分紮南潯震澤適當其衝防勦正緊浙軍尚未進備城下臣未便派軍深入會攻惟查長興縣在湖州西境與蘇之宜溧皖之廣德均屬接壤湖城與長興踞賊掎角又恐從此路竄出自應揀派勁旅相機攻取以掣湖州賊勢於是遣郭松林劉士奇王永勝楊鼎勛三十營由宜興分道進攻長興並調李朝斌帶太湖水師數營歐陽利見陳東友等淮揚水

師四營由夾浦口會合進勦。慮潘鼎新軍尙單弱，復令聶桂榮等水陸五營往屯濱湖之堤，濶以應之。正在布置間，初七八日，湖州賊酋偽立王黃文英、偽樂王譚應芝等，糾黨數萬，竄踞吳淞，擾及陸家灣、軋村、殷濱村、丁公橋等處，橫亘數十里。初八日，賊圍陸家灣，練勇營道員丁壽昌會水師康嘉賓由南潯率礮船往援，自帶行隊繼進，轟斃賊甚多，練勇出壘夾攻，賊敗走，拔出難民數千。壽昌復令劉思桂、劉秉權由兩河橋、庫駕橋出不意抄擊丁公橋之賊，望風驚潰，禽斬無算。乘夜並襲破天到橋賊卡，禽其偽朝將史得成。初九日，潘鼎新馳

赴南潯聶桂林榮等亦至偵知吳淞賊東流分丁壽昌等進軍迎勦行過南貨港賊衆如蟻我軍分路兜殺斃賊數百追至殷瀆村暴雨收隊哨長汪立木陣亡別遣唐宏成戴春林等由溪港小路進抵大廟港遇賊各有斬獲是夜賊仍在殷瀆村一帶焚掠初十日晨鼎新令唐宏成韓照揚等由湖塘直趨吳淞聶桂林榮率曹光澤王應海劉廣福等由丁公橋進攻殷瀆村丁壽昌劉恩榮吳秉權繼之徐道奎聶桂林率水師齊進吳淞之賊前阻卡一後結壘三沿塘泊礮船數十民船數百水陸各施鎗礮抗拒我軍頗有傷亡唐宏成激勵士卒奮勇

爭先立破其卡於是唐宏成攻中壘韓照揚攻南壘都  
司何孝繼率衆躍濠突入將南壘賊禽斬畧盡戴春林  
等偪濠拋擲火彈肉薄齊登中壘亦破東壘賊奪門而  
出將乘舟以遁夏金標等揮隊奪獲其船賊之入水者  
甚衆餘賊沿塘狂奔我軍追至橋澳斃賊千餘聶桂榮  
等進至殷瀆村賊匿桑林中東伏西出我軍步騎俱不  
得逞乃列隊村外誘之劉廣福王應海進薄天到橋賊  
果傾巢來撲廣福等扼橋力戰聶桂榮曹光澤從中路  
迎擊徐道奎等督水師沿岸環攻陣斃多賊並禽龍衣  
賊目一賊棄械紛竄我軍卽屯天到橋偵知殷瀆村後



尚尚有湖澳可通十一日向晚各營燄食齊進水師駛  
至天到橋橫截其前劉廣福等繞過鄉村分抄其後賊  
出遁三面要擊斃賊甚多破其二壘忽中塘札村織里  
各賊來援勢極猛我軍鎗斃賊數百禽黃衣賊目二敗  
賊均退橋淩其李朝斌太湖水師亦於初九日由洞庭  
西山乘風駛抵夾浦口賊於象公廟前後爲石壘各一  
設大礮當湖口左右夾小河中開作橋立卡以護石壘  
適天雨朝斌以洋鎗陸隊乘之水師左右兩路分擊中  
路河窄陳定國轟其前壘賊負阻力鬪陸隊撲登數次  
均不得前朝斌令所蘆葦填河抄其後卡親梟水躍上

舳板大呼前進賊鎗礮如雨從礮眼中攀援而入陳定國江福山俱被重創仍兩路猛攻賊不能支先破兩石卡乘勝過橋四面合圍賊竄路旣絕仍以死拒僞烈王江賊中矛死前後石壘一時並破賊殲無遺遂焚其後壘卽前壘駐守次日郭松林劉士奇楊鼎勛等陸軍亦至分屯施溪夾浦王永勝所部進駐湯橋烏溪以防廣德泗安賊援十一日松林等赴長興攻克上莘橋跨塘橋兩卡徑偪城而軍李公疏言浙軍現紮湖州塘南此次踞賊大股出撲獲賊供稱圖犯南潯震澤牽制浙軍後路並擾蘇防經我軍攻毀其巢凶鋒已挫惟楊澗大

錢口等處踞賊尚多與吳漢昆連時出劫擾臣飛咨李朝斌酌撥兩營前往兼顧仍令潘鼎新固紮穩進夾浦既克長興踞賊奪氣現今郭松林等合力猛攻速克此城則湖賊竄路將斷或可以次得手十二日朝斌率水師進次城東北六里之後漾村十四日黎明令陸隊分伏山後先遣千餘人誘戰賊衆由北門小東門迎拒我軍伺近揮伏衝擊追至城根斃賊甚多陸軍分門築壘松林軍東門鼎勛軍東南隅士奇軍北門均距城半里許永勝所部自夾浦口節節爲營援應後路鼎勛又令曾明魁分立兩營於夾浦長興之中曰西莊橋爲浮橋

二道以通前後聲勢賊酋僞襄王劉官方負嵎不出十七十八日湖州賊酋黃文金嗾令僞天將陳賊糾黨二萬由東南路來援白鴻橋至跨塘橋不絕直達城下令其弟文英糾廣德泗安之賊四五萬由西北路來援依山築壘曼衍巖谷勢甚鴟張與城賊相應松林等會議分勦約王永勝一軍於二十二日黎明由夾浦繞至新塘口抄賊之後松林鼎勛由五里橋迎擊湖州援賊背水爲陣賊奮拒我軍但排開洋鎗屹立不動任其衝突俟氣衰一鼓齊進陳賊率黨死鬪戰正酣永勝從後馳至兩面夾擊鎗斃斬獲數千遂將鴻橋跨塘橋沿河傍

山賊營一律蹋毀朝斌水師登陸由磨盤山繞出賊背  
士奇亦由磨盤山直偏廣德泗安援賊各壘朝斌率隊  
由山梁疾趨而下用火器焚燬賊營煙燄蔽天賊首尾  
莫顧士奇分路抄殺擊斃溺斃者近萬西北路沿山各  
賊壘亦俱蹋平二十三日各軍方擬於西北兩門外架  
浮橋以攻城援賊敗逃未遠湖州賊酋復添撥大股會  
合折回以圖再逞於是松林鼎助與淮南水師迎擊湖  
州續至之賊士奇永勝與太湖水師迎擊廣德泗安續  
至之賊乘其喘息未定合力奮勦各殪賊數千追殺二  
十餘里賊乃遠颺松林朝斌等謂湖賊必爭長與援且

復至定議力攻令廖德旺張正全於西門外王平西舒  
義志於北門外各架浮橋三道賊鎗礮噴筒並發頗傷  
士卒哨官王備與中礮死張正全鎗中左臂仍裹創督  
工是夜橋成二十四日黎明游擊劉玉隆同洋人備雷  
由城北安設炸礮靠城轟放士奇永勝各分二營松林  
分三營鼎勛進攻北門松林自攻南門士奇與李朝斌  
水師合攻西門永勝攻東門淮揚水師及松林所部礮  
船攻東南東北兩隅朝斌復分一營於北門外河邊排  
大礮助備雷轟攻不兩時卽塌城垣十餘丈鼎勛督隊  
渡河鼓噪而上賊以鎗礮密排缺口並擲燒火藥桶死

拒參將向大鵬游擊周金才俱中鎗洞胸殞並傷總兵高占魁右臂將士傷亡數百人營官梁安邦于奇泮易用剛李長樂陳忠德黃廷杓周蘭亭等身先士卒肉薄以登各營奮勇繼之朝斌松林士奇亦率所部三面緣梯齊上于奇泮鄧明遠王平西均各裹創力戰賊面面受敵尚無退志松林率宋德鴻首先攀城入于總劉隆興隨之爲捕木擊破額顛而死各軍一擁畢登將城內悍賊次第禽斬其由西門衝出者朝斌預設伏悉殲之遂於是日午刻克復長興縣城李公疏言長興毘連蘇皖枕山帶湖屏蔽湖州與泗安廣德爲犄角是以堵輔

各酋糾黨力援城外重岡疊嶂桑田陰翳汶港紛歧兵  
勢頗難展布若相持曠久恐生他變賴水陸諸將協力  
同心於炎天烈日中奮迅猛攻傷亡枕藉不稍回顧自  
克復夾浦至城下之日僅及半月神速赴機殲賊殆盡  
實屬勞績卓著諸將楊鼎勛李朝斌郭松林等以下及  
陣亡之參將向大鵬等優加獎卹李公旋奉

旨撥兵會勦金陵於六月中由太湖至長興察看地形知湖  
州賊勢尙盛附城三十里面面堅壘其時浙軍方規孝  
豐安吉斷賊竄路尙未急攻湖州李公以蘇境與湖郡  
接壤中隔太湖有李朝斌水師禦之其太湖西岸由長



興而達宜興溧陽最爲要衝令郭松林楊鼎勛分屯長興城內外並調防守溧陽之道員吳毓芬水陸五營移駐夾浦口又以太湖東岸由吳淞南潯而達平望潘鼎新一軍分扼數處尙嫌單薄復調劉秉璋松江七營進屯平望如浙軍由湖州東南進攻則西路郭松林各軍與東路潘鼎新各軍卽可聯絡並進會同李朝斌由大錢小梅各口進感湖郡西北以紉爲堵分賊勢而助長圍並謂長興距湖州六十里形勢扼要賊與我所必爭旣經克復若不分兵他往自應乘勢進攻已而江南軍克金陵李公遂於七月中旬檄劉銘傳各軍攻廣德郭

松林各軍攻泗安潘鼎新劉秉璋各軍分進晟舍大錢口三面圍逼湖州會合浙軍夾攻潘鼎新克晟舍沿湖東岸賊營皆潰劉秉璋一軍由吳淞楊淩進屯大錢口道員張樹聲一軍又由南潯進屯織里以壯聲援各營連日出隊迭有斬禽李公見湖州賊勢趨重西而尹隆橋大德橋一帶爲通泗安廣德大道賊節節聯營以護竄路於是令郭松林王永勝劉士奇楊鼎勛各軍由呂山進攻尹隆橋扼其中間要害賊已先於尹隆橋大河南岸築十餘堅壘又於橋頭築石卡及月牆一道上流橫塘渡別築多壘多架浮橋以爲尹隆橋援應永勝遣

軍與賊對壘賊復於月牆左右增立兩營牆外掘壕二道寬約二丈引灌河水深可滅頂排釘木城繞壘五匝外加梅花樁數十層防守極固松林等日夜趕築長牆調齊劉玉龍所部開花礮隊轟攻十五日未刻賊壘稍缺守賊於地窖中堅伏不動湖州大股賊眾憑河埋伏勢若長蛇營官廖德旺高占魁舒義志李長樂文茂林等奮勇先進拔樁偪濠因水深不能躡渡伏賊齊起環施鎗礮哨官張祖述陣亡高占魁舒義志等皆受重創天晚收隊十六日我軍復用炸礮轟擊于奇泮顏邦桂張正久王受釗等衝鋒齊進賊鎗礮愈密我軍三面受

敵傷亡不可勝計是夜松林令李長樂宋德鴻等鼎勦令王萬釗周河清等率隊潛拔濠外木椿十七日激厲衆軍鼓勇直前並令呂山大德橋橫塘渡各營嚴截援賊已刻炸礮轟缺賊卡一處我軍各負蘆葦填濠而過一呼直抵內濠賊層層狙擊士多死亡郭松林鎗傷左膀猶揮軍疾進忽大雨如注火藥皆溼乃收隊湖城黃文金復挑悍賊數千繞出呂山後路八字橋阻我饗道十九日松林令李長樂文茂林顏邦桂三營馳往李家巷搶築營壘又令各營出隊助之辰刻築壘半就賊衆由洞子門蠶擁來撲我軍迎勦兩時斃賊甚夥參將何

錫恩陣亡各軍憤戰愈厲賊潰退二十日湖城賊大隊  
自尹隆橋逸連八字橋洞子門沙水橋白龍洞一帶袤  
延二十餘里傾巢來爭松林飛調易用剛宋德鴻周蘭  
亭等迎敵自督李長樂等接應劉士奇王永勝各率兩  
營由呂山夾擊鼎勛督守尹隆橋老營已刻山上賊旗  
搖動羣賊吶喊衝下易用剛等整隊接戰鎗斃對轟用  
剛身受重創松林率李長樂等捲旂突入來往縱橫並  
令王平西礮船由河助轟斃賊無算賊陣漸亂永勝士  
奇率隊由山脊翻下疾如風雨賊衆倉皇紛竄乘勢掩  
殺禽斬數千永勝追過洞子門別股賊由山後小路出

援松林分隊擊走之將士傷亡百餘李公偵知賊有奔竄之意飛檄潘鼎新劉秉璋等相機進攻二十六日夜鼎新會合日月山浙軍總兵劉樹元等攻拔昇山賊壘瞭見城中火起卽督隊追勦二十七日清晨追至八里店賊回拒水陸各營併力夾擊大破之追至三里橋壘賊望風奔潰會李朝斌劉秉璋張樹聲等各進大錢口攻破賊營十餘並至城下沿途斃賊無算敗賊擁擠入城閉門不及潘鼎新劉樹元等各率隊奮追由東門殺入城賊已啟西門逃去遂於是日巳刻克復湖州郡城其浙軍事畧見第七卷中李公疏告捷潘鼎新劉秉璋

李朝斌張樹聲以下並請獎叙得

旨嘉允李公麾下多猛將精兵乘新製火器之利自克蘇州  
銳氣無前以境接浙西不分畛域先遣劉秉璋潘鼎新  
兩軍招降平乍并復海鹽嘉善蘇浙之路已通復任程  
學啟攻拔嘉郡百戰驍將先登傷殞亦足見行師之猛  
迅矣其時浙中悍賊悉萃杭州餘杭兩城我軍血戰其  
間日不暇給湖州未下海甯桐鄉新附蔡元吉之賊雙  
橋劉樹元之守烏鎮但能遏湖援賊斷杭餉道遙爲蘇  
軍聲援至於靡堅克銳速下名城使我軍無西顧之憂  
杭賊失右臂之助剪除黨羽賊勢益孤微蘇軍之力不

及此遂乃指揮諸將水陸並舉攻復長興會克湖郡爰  
次其事以識中興將帥和衷宏濟之美焉



平浙紀略卷十

平浙紀畧卷十一

同治元年十一月二十三日奉

命督辦軍務浙江巡撫左公疏上會勦竄徽股賊並克復績溪祁門之捷自皖南告警左公卽調駐守遂安道員王文瑞所部全軍於九月移屯草市爲歙休婺三縣交界之所相機援剿十月旌德被圍旋解時有股賊由昌化闖入徽界糾合竄擾旌德之賊於十月二十五日突陷績溪王文瑞卽會皖南鎮總兵唐義訓馳剿師至臨溪二十八日前隊遇賊生禽數十二十九日賊復來犯敗之禽斬數百十一月初一日官軍分出擊賊唐義訓由

左王文瑞由中朱聚賢由右賊撲中路甚猛我軍陣斬先鋒賊數十黃衣騎馬賊目一營官楊海泰龔隆貴王明輝等怒馬陷陣賊勢少卻羅瑞山郭德馨等復從山凹橫擊朱連芳陳清泰葛蘭世賀章彬鍾邦林方有才等奮勇衝殺賊陣大亂奔還績城唐義訓朱聚賢左右截之各有斬獲計殺賊千餘解散千餘生禽二百餘奪獲馬匹數十洋鎗礮二百餘旂械無算因雨收隊是夜三更賊棄城遁逐北至叢山關而還初二日收復績溪禽賊言此股賊首爲巢洪陳三賊洪賊已被擊斃其鋒大挫初五日王文瑞仍回草市旋報古賊率黨近萬由

旌北竄入太平縣之黃花嶺初六日文瑞冒雨拔隊由  
休甯前進初七日至漁亭聞駐屯祁門之良字兩營已  
出嶺迎勦文瑞以良字營兵單不守而戰慮有疏失乃  
星夜馳往援之行距祁門二十五里偵知良字營被賊  
衝散縣城已陷文瑞因軍火在後山徑滑澁未便乘夜  
深入仍回駐漁亭會商唐義訓併進左公以祁門既失  
徽郡餉道中梗饒景一帶堪虞亟令劉典一軍輟蘭谿  
之攻由華埠趨婺源助勦而王文瑞等已於初九日進  
屯花橋令勇士數十於近城山上放擲火箭火彈擂鼓  
以助軍聲賊驚疑四更後啟西門逃竄次日收復祁城

分軍追之斬尾賊二三百文瑞復遣軍出桃樹店以扼其繞竄浮梁景德之路時江西巡撫沈公葆楨亦調回道員王德榜及接守遂安之同知王沐各軍分扼玉山景德左公遂令劉典擇駐涪遂蘭谿適中之地兼顧邊防二年正月二十七日左公於克復武義永康等縣疏內言劉典一軍仍須由嚴赴徽爲肅清皖南之計必俟皖南局勢漸定江皖邊圍又安然後臣軍無後路之虞其時賊由桐廬併趨皖南太平石埭之賊亦時窺祁門黟邊界二月初一二日爲分駐漁亭總兵丁長勝副將王明輝等擊敗初十日賊從藍湖米坑而來將窺祁門

北界新授江西吉南贛甯道王文瑞令郭德馨楊海泰  
羅瑞山喻勝榮等迎擊行至半途卽與賊遇郭德馨怒  
馬衝入賊陣連斫數十賊各營乘勢衝殺賊大敗潰官  
軍躡蹤追之比近藍湖賊復回鬪藍湖之左有數賊騎  
馬張蓋突出指麾羣賊向前抗拒德馨馳斬其一軍士  
共攢矛刺之數賊皆斃餘賊翻山逃逸喻勝榮羅瑞山  
等各率隊馳至截殺與德馨合隊追過米坑十餘里沿  
途共斃賊千餘生禽七十餘內有僞軍政司蘇四達黃  
齊升美天福張北湖被天福張小滿謙天福鍾有朋賜  
天燕易明陽僞丞相王大吉等賊誅之墜崖落澗無數

奪獲騾馬十三匹擄鳥鎗一百餘桿旂幟三百餘面刀  
矛尤夥左公疏言皖南此捷胡占兩酋之勢頓衰惟徽  
休間賊眾日多花旗一股計已合併而譚星復山昌化  
出千秋關竄備徽州徽防各軍紛然告警劉典一軍前  
經調回嚴州現由威坪前進臣又檄催其新募之勇出  
廣信疾趨婺源或可力遏奔衝二十一日劉典行抵屯  
溪偵知賊已偪近徽城由巖寺街上萬安街北至許村  
南至東關四五十里一片賊氛禽賊言僞金王鍾賊踞  
潛口僞主將賴賊踞巖寺僞襄王劉官方等踞長林萬  
安街等處眾約十餘萬典以賊未知我軍猝來利速戰

卽於二十四日分四營進屯梅林杜賊由休甯南路繞  
竄並與唐義訓王沐約期會剿二十五日令黃少春張  
聲恒率所部攻巖寺李耀南黃有功朱尊賢率所部攻  
長林典白率中營及楊芳桂馬隊從長安街馳勦而下  
賊方上竄不意浙軍大至卽潰退追過河西始結陣回  
拒別股賊從山谷中竄出抄我後路典分軍截殺一面  
督親兵從中橫擊朱尊賢黃有功率隊奮戰賊大敗向  
山路猱附而遁時黃少春等已奪據巖寺街後山梁王  
沐率所部馳至夾擊喻可宗齊蘭禮扼卡截殺賊爭先  
過橋擠溺死者不可勝計追至潛口始收隊約斃賊近



萬生禽三百餘獲馬三十餘敗賊退往許村箬嶺及藍田一帶復分黨進踞潛口劉典以藍田可北趨黔西出漁亭而漁亭僅兩營駐守兵力尚單卽令王沐移駐九鞏橋張聲恒朱尊賢接屯草市以固徽州西南之防三十日劉典移營前進忽昏霧四塞大雨如注前隊已至長林猝不及防賊分數路來撲典率親兵往策應甫將前隊收過小港數十賊騎環繞而來相去不過數丈典及劉大謨劉敬廷數騎左右衝突黃少春等各率所部馳至賊始敗退是役殺賊百餘而參將張顯榮守備金友成左萬明均以深入力戰死其部下陣亡者又八十

餘人三月初一日僞金王鍾賊率黨萬餘來撲梅林營  
勦我軍俟賊逼近急起擊之分軍從山谷左右抄出賊  
敗奔追殺十餘里斃賊數百生禽百餘初五日鍾賊賴  
賊又糾黨數萬來撲設伏掩出賊後復敗之禽斬如前  
並斃瓏天義黃宗保等賊初七日黃少春黃有功等五  
營由東關出潛口之右劉典率兩營由長林出潛口之  
左賊望見官軍隔岸遙放鎗礮劉典麾軍渡水猛擊賊  
棄械狂奔追過潛口十餘里沿途斬馘數百生禽數十  
解散脅從甚多而潛口賊營於初六夜驚傳官軍至踐  
踏死者又數百人逃竄尤眾至是竄向太平黔而去典

合黃少春楊芳桂等率所部趨漁亭會王文瑞王沐進  
勦黟縣文瑞先於二月十三日分遣總兵丁長勝等出  
嶺巔敗藍湖之賊二十五二十六日賊僞襄王劉官方  
僞天將劉官福等復竄至藍田胡村山坑一帶二十七  
日漸徧漁亭丁長勝王明輝鄧榮達周玉南莫坤和等  
督隊迎勦王明輝手斬先鋒數賊我軍乘之賊大敗追  
殺三四百生禽四十餘二十九日賊復悉眾來撲直徧  
街口並分黨由對岸抄過漁亭之後鄧榮達周玉南等  
從街巷中殺出王明輝率所部右出繼之時河水陡漲  
迤左山如壁立鄧榮達等繞出賊後奮擊賊墮溺數百

丁長勝盡殲抄後之賊賊愈震駭奪路狂奔我軍四面  
蹙之斃賊千數百陣斬劉官福等賊目數十生禽二百  
六十餘奪獲騾馬鎗礮旂械無算賊竄回黔城糾合僞  
對王馮春元僞顧王吳如孝僞輔王楊輔清等賊謀竄  
祁門三月初一初二日至柏溪距祁門二十餘里初三  
日王文瑞率軍進勦行近伯溪遇賊力戰敗之躡蹤追  
出嶺外遇雨乃還是日往返百數十里殺賊數百生禽  
五十七署皖南道葉兆蘭令民團預伏山坳亦搜斬餘  
賊二三百而王沐一軍力戰草市屯溪之間克捷頻聞  
徽婺士民深感之左公疏言賊麇聚徽休祁門一帶原

岡由此越竄江西幸王文瑞王沐力扼郝門漁亭草市  
劉典迅赴屯溪得以收歛休之危扼其上竄賊賊多趨  
黟與祁門緊接必殲除此股然後可無後顧之虞謀報  
甯國府有別股賊續竄績溪而甯國旌德太平石埭等  
縣仍爲賊踞其被劉典擊敗者又竄入池州所屬之建  
德縣逆氛漸趨江西防務喫緊臣前令王德榜一軍由  
白沙關速回浮景冀可稍遏奔衝惟賊數太多占地太  
廣浙軍未免爲所牽綴劉典赴徽時臣卽與籌慮及此  
若援皖得手賊必由池建竄越宜無分江皖相機援剿  
以收夾擊之功倘皖事漸緩浙軍可敷分撥自當星馳

入江共圖掃蕩未幾僞堵王黃文金僞佑王李遠繼等  
鈞結太平石埭賴古兩賊由建德踰新安嶺至太白鋪  
浦口等處偏近祁門西境黟賊亦時擾祁門東路王文  
瑞以賊氛四偏將駐守漁亭各營調回祁門並由王沐  
分兵助勦初十日賊蹤西至千佛橋小路口一帶距城  
十里十一日王文瑞督隊分路迎勦至七里橋遇賊力  
戰敗之追至小路口賊復分眾回拒我軍奮擊數次斃  
賊千餘賊殊死戰喻勝榮策馬陷陣手受矛傷哨長彭  
友年羅廣林陣亡我軍鼓噪而前羅瑞山郭德麟楊海  
泰鄧榮達康榮詔等分道並出擊其中堅復斜包其右

賊乃大潰羅瑞山據隘口截殺賊酋棄馬挺矛怒闖我軍四面賊之禽斬畧盡後隊之賊紛紛竄走楊海榮鄧榮達等繞出千佛橋兜勦又殲多賊是役共斃賊七八千生禽八百六十五奪獲偽印三百餘驛馬二百餘鎗礮旂械無數劉典一軍肅清徽州北路後亦於初十日令黃少春等七營進勦藍田之賊斬賊百餘十二日進勦小溪之賊又斃數十賊由黟西竄橫路楠木嶺一帶祁門漁亭之間道路梗塞十四日王沐率所部轉戰而前斃賊二三百而賊之大股萃於黟縣白黟西以至祁門東又北折而至南境皆爲賊踞且立築堅卡以阻漁

亭進軍之路劉典慮王沐軍單卽令黃少春等各營進駐漁亭助之張聲恒齊蘭禮移駐九鞏橋自率親兵於十六日馳抵漁亭登山瞭望謂賊眾我寡非速戰不可遂於十七日率黃有功廖渭臣楊芳桂黃少春喻可宗劉昌選李良平張福齊王沐朱明亮等分路進剿卡中出賊千餘布列山巔以扼我師王沐率所部奮擊賊敗入卡典令各營馳水攻卡而城鄉數萬賊眾大至黃少春率軍沿崖左下中右兩路齊進賊潰奔典急毀賊卡令黃少春率所部攻四五都之賊王沐朱明亮率所部攻八九都之賊而自率黃有功楊芳桂劉志友等各營



追賊直至黟城下賊回撲數次均敗我軍乘勢奪門而入賊由東門竄走時王沐等勦賊獲勝追至大園黃少春等勦賊獲勝追抵城東又合追十餘里始收隊小溪有賊千餘來撲爲張聲恒擊敗餘賊向羊棧嶺方干嶺一路竄去共斃賊四五千解散脅從甚眾獲賊遺米一萬餘石騾馬五十餘匹十九日王沐率所部與朱明亮黃有功廖渭臣三營進屯黟城右山築壘未竟賊糾黨萬餘由原路竄回分撲右山王沐等禦之賊敗復還殊死戰黃少春等繞出其後擊之始駭而奔追十餘里殺賊數百生禽數十據言屢爲官軍擊敗尚拚死回竄入

嶺者以太平古賊扼其去路必欲嗾各賊竄越江西並  
加騎賊來助而別出大股潛竄徽州休甯以撓官軍後  
路故也二十四日偵知黟之十都王村蘆村等處賊已  
築壘有久據之勢二十五日劉典令各營進勦時曉霧  
迷漫不辨行徑賊見左路有官軍至出壘抗拒黃少春  
率所部奮擊張福齊乘間破其一壘李良平招降二百  
餘人賊悉眾來撲李耀南楊芳桂馳至助戰王沐黃有  
功陳瑞和廖渭臣朱明亮截住去路前後夾擊陣斬綯  
天義古文祐等賊賊奪路走黃少春等追至羊棧嶺賊  
回拒復敗遂竄出嶺計共破賊壘二十一斃賊近千生

禽百餘拔出難民無數二十六日有零賊回竄李耀南等擊斃三百獲僞主將林賊誅之是時賊由池建竄備石門而青陽等處之賊亦併上竄饒景戒嚴王沐已率軍回援旋報賊踞石門陶溪渡茅屋嶺楓田街等處典遂留知府朱明亮與王文瑞扼守祁門令張聲恒軍漁亭李耀南陳瑞和軍屯溪以固徽婺之防而自率所部四千人由婺源之清華街出路以出景德鎮偵知賴巢兩賊率大股擾及高橋洗馬橋等處距景德二十里典卽於五月初九日進駐洗馬橋適道員席寶田率所部及仁右營進扼淇源距楓田街四十里約次日會剿面

賊聞浙師至先於夜間分路潛遁典遣隊追之斬其尾  
賊數十獲馬二百餘賊竄鴉橋爲江西軍擊殺百餘王  
沐復追斬數百餘賊退往斜谿而大股仍盤踞陶溪渡  
結壘自固典以江西軍駐賊對岸足以遏其前衝必分  
一軍從崇光渡後路進勦乃可收夾擊之功遂與席寶  
田等定議進軍值斜谿港口橫湧壩等處之賊回竄建  
德於是黃少春聶邦光楊詠春王德榜劉勝祥等進屯  
橫湧壩陳家墩劉典督黃有功楊芳桂楊在田廖渭臣  
等於十五夜拔營十六日會軍進勦崇光渡賊壘前隊  
黃少春王德榜等捲旂疾驅乘賊不備連破二巢五營

殺賊八九百生禽百餘奪獲騾馬五十餘賊敗走又被黃有功等截殺數百餘賊向石門竄去先一夜賊僞堵王等撲席寶田新壘力禦收之是日復出隊綴賊使不暇相援十九日諸軍會攻陶溪渡賊於一大壘中包數小壘長約數里小港之西又築五壘以爲犄角我軍環攻數時賊伏不出二十三日典令各營移屯茅屋嶺二十四日約道員屈蟠及席寶田韓進春等分路直撲賊壘拔開樁籤三十餘層踰濠而進賊鎗礮如雨副將喻可宗陣亡環攻數時賊壘垂破復完者數四我軍受創者多乃收隊典率各營涉陶溪渡移屯賊壘之西席寶

田進偪其東賊於二十五日向洋塘石門而遁典派七營與席寶田等追剿擊斬及踐溺死者甚眾二十八日王德榜黃有功軍至洋塘擊拒賊敗之斬首百餘級以石門雞公包等處援賊並至遂收隊典令黃少春四營馳助雞公包之賊先遁三十日各軍進攻石門賊壘負固不出我軍放火箭焚其柵賊驚擾棄壘而走逐北里許值鐵鑪岡賊黨來援併力回戰又敗之賊趨嶺紛竄追殺賊馬步千餘直至鐵鑪岡賊眾尙二二萬悉向彭澤縣境竄去前後共斃賊數千拔出難民萬人賊自陶澍渡石門蔓延彭澤湖口都昌等處退無所掠必欲竄

據江西腹地我軍乘勝深入賊喘息未定旋復奔走於是浮梁鄱陽皆得廓清都昌之賊亦聞風下竄前浙軍入皖多雨軍行泥淖無日不戰至是天旱水涸疫氣盛行左公疏言李榕一軍現駐湖口江忠義一軍已入江西兵力較厚阻前躡後或能聚殲惟賊由彭澤可橫竄建德以出祁門劉典尚須防宣歙一路未宜深入自援江以來士卒冒暑遄征病者殆半勞瘁異常擬令稍爲休息確審賊蹤所向以定進止江西敗賊果回竄石埭太平與原踞各股合隊乘間復犯徽境六月十六日僞奉王古賊僞朝將江賊朱賊等率黨萬餘竄至郭村十

七日晨卽由羊棧嶺樟嶺竄入黔縣勢甚剽疾王文瑞約會分防九弓橋漁亭各營於四鼓出隊往剿十八日辰刻行距黔數里見城上旂幟林立遠近村莊皆爲賊館文瑞急令張聲恒丁長勝王明輝朱明亮賀章彬分張左右翼自率親兵督喻勝榮鄧榮達等並進甫成列賊蜂擁出犯文瑞揮隊擊卻熊常富從村後抄襲賊驚走我軍追至大小南門奪關而入斃賊百餘復追殺出城朱明亮率馬隊從外截擊又斃百餘賊之先據官軍舊壘者丁長勝屢擊不動張聲恒分兵繞出其後喻勝榮等又至賊乃潰正掩殺間而後路蘆村際村宏村等



處之賊分道來援各營整隊迎戰良久朱明亮丁長勝等復左右抄擊賊大敗棄旂械塞路追奔二十餘里是夜駐軍城中十九日王文瑞督各營追出羊棧嶺外俛斬尾賊餘黨奔回石太老巢是役也其斃賊千餘生禽三百餘解散近千獲騾馬三十餘賊自上年盤踞皖南每思就食江西且以牽制金陵浙江官軍之勢屢受重創狡謀未已劉官方等賊徘徊於彭澤建德之間其偽堵王祐王金王等賊麇聚湖口與江李兩軍相持雖屢戰獲勝賊亦負嵎自若而我軍自攻克陶溪渡賊壘後黃少春楊芳桂等六營進駐梅源橋屈蟠一軍進駐章

田渡席寶田一軍及仁右營進駐洋塘韓建春一軍進駐陳家嶺賊踞上下彭青山橋蕭家嶺等處爲湖口聲援劉典以秋成將屆恐賊刈湖口彭澤都昌之稼則民食寡而寇糧益滋爰約席寶田顧雲彩兩軍於七月初一日進攻青山橋賊巢出其不意奪卡而入賊驚惶失措分兩路竄走官軍追殺十餘里斬馘二千餘生禽五百餘解散脅從無數奪獲牛馬二百餘時上下彭賊黨來援劉典督親兵暨仁右營擊退斃賊百餘賊竄至祁建兩界之王家村彭澤之賊退竄馬當古牛嶺都昌湖口之賊退竄彭澤惟上下彭等處尙有賊踞初四日席

寶田顯雲彩乘夜進剿大破之僞佑王李遠繼率死黨  
來援復爲我後軍擊敗斬首千餘級各賊紛紛回竄江  
境肅清左公以徽防尙單恐乘虛內犯令劉典仍由清  
華街一路回軍以固徽浙之防疏言江西都昌鄱陽彭  
澤湖口各境北阻長江西臨鄱湖南隔昌江皆有水師  
防禦賊鼠竄其間三面皆水惟江西之浮梁安徽之黟  
祁可爲旁竄之路建德石埭一帶可爲退竄之路臣始  
令劉典嚴扼嶺路以保徽休祁黟如賊入江西則力保  
浮梁以杜四竄後令其扼浮北建德之衝以要賊歸路  
而牽掣之亦形勢所在不得不然也劉典曾從臣用兵

江皖熟悉地方形勢是以所向有功賊憚後路之塞故  
退竄亦速良由江忠義遮之於前而諸軍要之於後足  
以制賊死命故也偵賊仍欲由石太竄入嶺內亦有謂  
其將趨廣德以赴金陵之援者臣維石太一帶無糧可  
掠勢難久踞能偪其下竄廣德以重兵扼之則徽甯之  
防可固卽浙師攻取湖州亦較易矣八月初三日劉典  
率軍先後抵休分屯漁亭萬安街等處初七八日青陽  
之賊由香口琅田竄黃嶺城安八都墟一帶距小樺嶺  
大洪嶺均止十餘里初九日王開琳率所部葉兆蘭率  
民團前進初十日黎明兩路同時踰嶺遇賊前隊突擊

之各有斬獲開琳等進抵鴉坑列陣田境後隊伏於栗樹街賀章彬督騎衝入賊陣手刃數賊奔馬四匹王開琳喻勝榮繼之往來灑決葉兆蘭率民團從旁抄擊賊大敗奔適我別軍將城安賊館埽除馳至助戰王開琳令鄧榮達率所部繞出蘆林橋扼其歸路而自督各營從後掩殺直追至琅田斬馘甚多日暮收隊卽駐城安黃嶺賊於是夜回竄石埭七都一路而去共計斃賊近千內有僞朝將陳矮子等賊生禽百餘內有僞主將鍾亞才崙天安劉永安等賊訊明戮之奪獲馬匹鎗礮旂幟無算我軍亦陣亡十一人受傷十八人祁北肅清劉

典王開琳王沐議出嶺會勦石太以掣賊勢忽報太平古賊來犯十六日竄橫潭十七日竄郭村其黨甚眾典令張聲恒聶邦光黃少春楊芳桂等各營進駐黟縣賊知有備改竄箬嶺二十一日至許村前隊已近潛口其行剽疾徽歙大震典令萬安街屯溪各營往勦並令都司劉敬廷先帶親兵乘夜馳赴潛口多然瞭火以張虛聲使賊疑忌不敢銳進一面邀皖南鎮總兵唐義訓率師來會比我軍抵潛口賊已遁出嶺外二十三日復竄至許村一帶並分股由績溪擾及歙東石門裏東鄉等處勢張甚二十四日唐義訓出隊至豐口以牽上下豐

之賊典令楊詠春張福齊劉大謨李耀南朱尊賢廖渭  
臣彭俊光楊在田李裔輝等分隊進搗許村賊巢自率  
親兵策應賊陣層列我軍奮擊賊已不支猶復扼橋力  
拒張福齊怒馬衝之斬其驍賊乃潰而奔斬馘五六百  
生禽二百餘解散脅從數千獲騾馬十五追至正村餘  
賊越嶺竄去禽賊言僞金王等賊謀仍由徽境竄入江  
西不能則竄昌化擾浙二十五日典移軍徽城次日黎  
明卽與唐義訓分道進剿橫村口石門裏藍田等處股  
賊先一夕賊已竄回旌德老巢唐義訓追至孔靈劉典  
追至八都斬其尾賊而返偵知賊之大股由甯國分竄

廣德浙境石埭太平旌德各城尚有賊踞左公疏言賊意似在牽綴上游官軍使不得悉銳而東曾國藩現檄鮑超一軍由蕪湖進攻南陵涇縣等處檄江忠義席寶田李榕喻吉三朱品隆等軍由青陽池州進攻石埭太平旌德等處兵力甚厚如果嶺外肅清節節掃蕩而下則皖軍攻建平廣德扼東壩浙軍由昌化於潛孝豐臨安進規湖州兩路聲勢聯絡遙合長圍庶可保完善之區以制鴟張之寇至三年四月初二日賊果竄昌化白牛橋被官軍擊敗向甯國績溪竄去左公慮其仍循前路闖入腹地令黃少春分軍由上游徽境威坪街口等



處截剿賊於初七日折竄歙縣南境之建口在深渡下  
十里方欲造架浮橋適副將張福齊周紹濂游擊劉昌  
選等率隊由小川馳至副將唐連勝率礮船沿河而上  
水陸並擊賊不得渡卽在建口一帶屯踞初八日張福  
齊等督水陸各軍進剿賊傾巢出拒我軍力戰敗之其  
斃賊四五百生禽二百餘內訊有僞指揮吳年龍等賊  
誅之拔出難民數千奪獲騾馬四十餘僞甲十餘追至  
績溪所屬之孔靈而還別股繞竄黟縣之八都葉村者  
亦爲徽軍所敗其僞聽王陳炳文僞康王汪海洋等賊  
前由皖浙竄入江西玉山縣境復欲由沙溪過河南竄

道員王德榜副將劉明珍馳扼之四月朔日賊從沙溪  
上下夜架三浮橋劉明珍令參將王本富游擊賴長張  
成元分段堵禦相持一時許我軍梟水過河奪其渡船  
十餘賊猶力拒明珍復令守備王益隆梁友武率死士  
數百於上流乘筏潛渡出賊後擊之賊始駭走掩殺三  
四百悉毀其浮橋賊向西竄去明珍恐賊直犯廣信乘  
夜疾趨比曉抵信城則賊之前隊已及靈溪距郡止二  
十里矣而賊自沙溪敗後見官軍馳援廣信分黨一枝  
折回渡河而南竄入廣豐邊境初三日午刻明珍率所  
部擊賊靈溪賊勢少卻賴長抄小路橫衝賊陣賊潰走

追十餘里中鎗墜溺者甚眾斬黃衣賊目四龍旂賊目二十餘白衣賊二三百而還王德榜一軍旋至初四日各率所部出廣豐洋口值賊隊大至數百騎衝鋒來犯明珍大呼陷陣我軍以火彈擊倒二三十賊短兵繼進賊殊死戰王德榜率各營夾擊斬黃旂賊數十賊敗走追斃千餘德榜以賊竄廣豐二十九都距縣城二十里復率所部窮追至青荆山前擊其後隊廣豐防軍亦疾馳迎勦又斬敵百餘是夜營於中塘埠初五日黎明再進賊潰遁我軍追斃數百獲馬五直至水門鎮收隊賊向鉛山竄去旋由南岸竄至上清宮一帶撫州戒嚴江

西軍繼果精捷兩營回援德榜令副將戴奉聘率三營扼貴溪自率所部進駐弋陽二十二日主簿劉廷選以礮船護運米糧軍火先發行抵黃沙港距弋陽二十餘里賊踞山設卡攔截矢石如雨德榜急令副將呂永貴游擊何秀清鍾元興等督率擡鎗小鎗各隊偪擊之賊乃走我水師亦擊沈賊船十餘左公疏言賊由皖浙邊境上竄其粵賊林彩新一股兩經浙軍剿截一經徽軍截剿漏逸無多尚不足爲江西之患惟由浙境竄江西一股現踞湖坊陳坊等處與皖境竄江西一股合併而前而竄入福建之賊又復回竄江西各賊麤聚一方探

爲可慮王開琳一軍現由廣信進屯興安與弋貴聲勢  
聯絡劉典新募之三千人計已行抵袁州臨江一帶臣  
令王德榜戴奉聘兩軍并歸劉典調度俟湖城賊蹤稍  
定仍當調濟遂防軍前赴江西爲其後繼也王德榜旣  
至弋陽偵知賊由德興海口竄來一股已抵鋪家畝距  
弋陽城三十五里謀先犯弋陽再從黃泥港渡河與先  
竄南岸之賊合股共犯撫建德榜令各營整隊以待二  
十三日賊奄至弋陽東北門外我軍憑城轟擊已斃多  
賊總兵蕭德龍副將呂永貴率隊出北門游擊何秀清  
都司李運龍率隊出東門德榜親督游擊鍾元興黎榮

鈞策應知府楊士樑率馬隊繼之江西師船亦沿河排  
列賊見官軍齊進紛紛卻退德榜揮軍衝入陣禽冷天  
燕鄭定懷泳天安張德福偽丞相吳得斌等戮之賊相  
顧喪膽棄械狂奔追殺無算生禽百餘解散難民數千  
獲馬五十五其傍河逃走者亦多斃於水師餘賊向湖  
西一路竄去左公謂林彩新一股再經此次大創爲數  
無幾殊易殲除惟此尚係常州竄出之頭隊其續竄數  
股尚屯踞湖州安吉等處未動也五月初八九日王德  
榜追勦汪海洋於大田畝汪二渡黃沙港連戰皆捷湖  
坊陳坊肅清旋經幫辦江西皖南軍務劉典調赴臨江

德榜軍次貴溪偵知賊酋丁三洋欲由貴溪盛源洞竄  
踞安仁鄧家埠一帶恐其沿河直下繞出我軍之前遂  
率所部疾趨並約王開琳從貴溪渡河截勦比王德榜  
於二十日馳抵安仁賊已踞鄧家埠羅田岡上等處距  
縣城僅十五里二十二日德榜督軍進勦羅田岡上破  
之適戴奉聘率所部與江西內河水師從上游並至賊  
大潰追至張家灘收隊二十三日進勦鄧家埠賊已先  
於夜間架浮橋逸去蕭德龍等追及賊正爭渡我軍感  
之溺斃無算賊向東鄉逃竄值連日大雨溪水暴漲德  
榜不能渡軍乃暫住鄧家埠對岸馬岡嶺六月初一日

過河行至梅村橋遇數百賊擄糧回邀殲殆盡並將界  
牌村河村賊館廓清生禽賊酋黃正魁斬之拔出難民  
數千左公疏言汪海洋一股現已悉數由許家灣下竄  
東鄉李世賢一股尚踞崇仁臣令王開琳一軍馳赴貴  
溪與王德榜相機渡河南勦必須肅清東鄉一路方可  
與劉典合軍臣相距較遠楊岳斌由水路起程此時計  
已入江嗣後王德榜王開琳兩軍攻戰情形應卽由楊  
岳斌沈葆楨奏報以免遲延會賊竄閩境復奏言臣維  
竄閩之賊僅林正揚花旗一起現已回竄江西意圖合  
併大股其近光澤建甯甯化各邊界時有賊蹤出沒暫



尚未足爲害揆度賊情非經江西攻勦窮賊必不能遽  
竄閩境惟延建邵汀一帶盜賊素多急應誅鋤以靖內  
患現在康國器之軍已抵邵郡臬司張運蘭亦由江西  
取道信豐定遠以入汀州臣已飛檄各將邊腹土匪迅  
速殲除確偵江西賊蹤相機兜勦張運蘭康國器久經  
戰陣自知以勦爲防不至畫疆自守惟閩省關隘與江  
西緊接者自光澤至武平延亘千餘里客兵越垣祇能  
相機截勦不便久戍致滯戎機臣惟有與撫臣徐宗幹  
慎以圖之迨八月間賊由湖州廣德甯國上竄各軍迭  
次截勦著名賊目十殲八九浙省全境肅清惟僞嗣太

平王洪福瑱卽所稱洪幼逆也自金陵逸出沿途衝竄未獲死黨數千於二十五日向江西廣豐竄去適劉典一軍已抵貴溪黃少春劉明珍兩軍馳赴廣信河口一帶王開琳王德榜等亦率所部急追左公嚴令各軍無論賊竄江竄聞悉數戰除母任漏逸而十六日總兵劉明燈在歙南建口大捷生禽賊酋李士貴又於屯溪搜獲僞王宗蘇得萬僞神將周先發僞朝將熊國仁等李士貴籍隸湖北江夏咸豐二年被擄僞忠王李秀成收爲義子封僞職歷隨忠賊竄擾江浙擁眾二十餘萬本年三月率黨三萬由丹陽廣德竄入湖州茲復竄出眾

屢敗盡潰以護眷屬落後被禽解省左公訊明磔之湖  
州賊首黃文金先於七月杪在甯國縣七都被擡鎗洞  
穿右肋昇至昌化白牛橋氣絕賊葬之距橋十里水寧  
司地方姚姓宅旁墻根參將劉光明前往起獲徧身黃  
紅綢包裹殮以黃緞繡龍袍帽方氍枕元寶二口含金  
葉左右腕籠金鐲四頭面尚可辨認於是破裂其屍割  
首級馳送左公驗明梟示武林門外廣德賊首黃文英  
亦就禽戮二十六日王開琳劉明珍馳抵上饒鐵山及  
賊尾隊急擊之賊由小路趨鉛山劉明珍率所部繞出  
弋陽黃沙港截之王開琳簡勇八百乘夜追至上路畝

分隊鳴鼓而進賊奮路奔至鉛山界天明見軍少列陣  
回拒俄而大隊馳至賊復潰竄是日共斃賊數百生禽  
數十二十七日賊竄鉛山楊村五都距河口二十餘里  
時提督黃少春道員王德榜已抵河口料賊必走湖坊  
陳坊二十八日黎明進軍湖坊賊方踞村屋見官軍猝  
來僞王宗譚賊等率眾乞降黃少春受之卽令回戈前  
驅擊賊時王德權蕭德龍及劉明珍各營由黃沙港馳  
出夾擊斃賊二千餘賊大敗我軍追近陳坊三面蹙之  
賊拋棄馬匹軍械奔越山嶺而遁是夜王德榜復降僞  
王宗譚長元僞朝將龔賢德汪元貴等及其黨千餘二

十九日追過陳坊四十餘里賊之前隊已分二股一由  
茶山竄瀘溪境一由雲際關火燒關竄入閩疆黃少右  
等甫收隊而總兵劉明燈道員李耀南副將張福齊周  
紹濂游擊黃元吉劉昌選六營適至卽令由小路躡追  
而溫處道魏喻義亦率軍由玉山廣豐馳抵陳坊見賊  
入雲際關急從大路追及尾隊擊斃數十解散無算餘  
賊悉向福建光澤及江西新瀘邊界逸去左公疏言賊  
由皖浙邊界西竄眾尚二十餘萬經浙軍截剿窮追除  
禽斬解散投誠外闖入江西者不滿萬人復經王開琳  
黃少春等節節追剿其由茶山竄瀘溪者僅一二千人

均無器械劉典伏軍於貴溪北岸要其尾隊降之分別遣散新瀘一帶兵力厚集無虞漏網洪福瑱李遠繼等由山徑竄越閩境計止三四千人所過不住市鎮夜則然火照路散漫奔走勢極窮蹙臣前慮賊入閩已令康國器張運蘭預籌截勦浙軍轉戰數千里往來奔馳病者過半暫令休息弋陽河口之間黃少春原部一營三旂外所有克勇各營仍歸劉典統帶此次各軍將領兼程逐北備極艱劬擬請併入克復湖州安吉案內獎賚其前後陣亡之副將喻可宗參將張顯榮朱連彪都司張亮華守備左萬明金有成彭友年把總羅廣林等均

請優卹

旨命之始左公軍發信州先清徽境而後入浙自河口廣信常玉山達衢州設轉運供征緝焉江西實爲大軍後路而饒廣一帶錯壤皖南門戶洞開無險可阻賊旣盤踞金陵視皖南如四達之衢日馳騁出沒於其間鶻落稀奔飄忽無常東備則西走尾擊則首應故其地繫江浙安危虛實緩急率爲所誤江西稍遠而游騎往來蹂躪郡縣殆徧浙疆最近受害尤酷左公力攻腹地頻克堅城賊狡悍俱竭師其故智牽綴多端左公以別將屬之劉典忠勇奮發將士輯和援皖援江縱橫數千里戰無

虛日始摧其銳繼伐其謀終且聚江浙逸出之眾雕鋏  
霆擊十不存一困獸游魂假息閩粵傳曰以此始者以  
此終是以不旋踵而奏蕩平也



平浙紀略卷十一

平浙紀略卷十二

同治三年九月十五日奉

命督辦軍務閩浙總督兼署浙江巡撫左公既奏洪福瑱李  
遠繼等賊由鉛山竄入閩疆而李世賢汪海洋兩股屢  
被官軍勦敗賊黨尙眾時出入江粵邊界按察使張運  
蘭總兵關鎮國擊退瑞金踞賊後賊之入粵者復由大  
埔竄犯汀屬武平縣境張運蘭分軍駐守縣城自率隊  
馳援扼紮下赤屢戰皆捷九月十一日賊抄徑路襲破  
永平知縣沈玉出死之張運蘭還救以兵少陷伏中矛  
落馬賊擁入城罵不絕口十四日被戕總兵賀國琛王

明高副將雷照維以下二十人皆死賊卽分陷龍巖南靖土匪游勇內應遂於九月十四日竄陷漳州閩撫徐公宗幹調泉廈各軍六七千人分防興泉兵力甚單左公以漳龍失陷汀州亦徧地賊氛北與延平永春毘連南與廣東潮嘉接壤江西瑞金會昌尙有賊踞康國器駐劄武關鎮國駐汀州均未可動乃檄提督黃少春副將劉明燈兩軍四千五百人由衢州取道浦城赴建甯以趨延平爲中路軍令援江各軍幫辦軍務劉典所部八千人取道建昌趨汀州爲西路軍記名按察使王德榜率二千五百人繼之又以此兩路山徑險仄恐滯戎

機復令提督高連陞率軍四千五百馳赴甯波乘輪船  
由海道直趨福建省城出興泉爲東路軍左公部署已  
定遂於十月二十八日啟行十一月十六日次浦城謀  
知漳州龍巖南靖永定平和雲霄各城賊勢愈熾署陸  
路提督林文察於十一月初三日敗死漳州曾玉明水  
軍亦多死傷退守江東橋其時高連陞已由福州前進  
初七日行抵泉州劉典黃少春及署按察使王德榜各  
軍先後至閩左公亦於二十七日進駐延平賊氛連延  
數百里並由龍巖散布連城上杭甯洋各界道員張恆  
祥率張運蘭舊部一擊挫之康國器由永安雁石進勦

十二月初二日知府鹿熊飛等率各營進屯鐵石洋距龍巖城八里賊來撲營力戰却之連日皆捷十二十三日賊又至日戰數合喪其精銳千餘而遁會賊丁太洋由永定出漳平之永福里以撲縣城朝天嶺守將陳允彩軍潰熊應烈退保漳平適左公所調游擊賴長亦至自甯洋相與登陴掩旗設伏大破之賊即退還當是時劉典由連城進駐朋口聞漳平被圍乃令護汀漳龍道趙均馳援自率各營進屯楊家坊以攻南陽新泉十七日分勦下車上下羅等處賊卡破之十九日令總兵楊芳桂道員李耀南副將張福齊參將劉大謨等攻破馬

洋洞賊壘大謨恃勇深入賊四面包抄副將盧華勝參將劉廷敬陣亡劉典聞敗往援行半里卽與賊遇接戰而別股已抄出軍後游擊郭立本戰死賊遂乘勢撲陷楊家坊營盤知縣夏世楷州判姜景焜從九品蕭子麟生員謝封龍鴻賓監生沈超文童黎斗城等俱遇害二十日典收集各營退保連城已而趙均擊解漳平之圍上德榜王開琳先後抵汀州疾趨連城二十八日德榜進攻莒谿典遣軍攻朋口俱克時護浙江巡撫蔣益澧檄署衢州鎮總兵劉清亮率湘軍三千移駐浦城聽左公調遣又合游擊張政順洪楨祥赴甯波募花綠勇千

人訓練以備緩急十二月初十日我軍進駐莒谿朋口  
十二日復乘夜襲破下車南嶺賊巢高連陞聞同安上  
匪謀應賊於十一月初十日由泉州馳往撫定卽進屯  
萬松嶺瑞香亭扼漳州東路黃少春亦由同安馳抵江  
東橋於十二月初四日進屯北谿扼漳州東北十五日  
城賊大股夤夜撲至莒谿之西少春連陞夾擊敗之初  
降將劉得義邱萬勝稱李世賢部黨僞天將李魁元有  
眾數萬投誠少春以未審情僞不許二人計沮遂約賊  
乘夜撲營斫傷參將周雲遠游擊黃元吉而叛少春聞  
變率各營還捕追至崎下橋叛卒多散禽獲賊目劉隆

章余萬年陳金元及其黨數十誅之得逃入城者三百  
餘賊而已十七日賊復傾巢分四路來撲擊敗之十九  
日賊陷長泰游擊龍順友戰死二十一日少春等進攻  
破之賊夜遁左公疏言東南遺賊全數竄閩分爲四大  
股李世賢踞漳州其黨僞來王奏王各賊踞龍巖永定  
南靖雲霄等處眾約十餘萬汪海洋踞長汀連城上杭  
三界之南陽鄉分爲一百八十五隊每隊五百合計賊  
九萬有奇丁太洋林正揚則出沒漳龍間眾各數萬而  
粵之潮嘉閩之泉漳汀龍永春等府州向稱盜藪從亂  
者更不可勝計賊雖殘敗之餘皆逋誅劇寇廣東江西



邊防愈固則賊之竄聞愈深將欲聚而熾旃非厚集兵力不可現在主客各軍之可恃者不足三萬臣親兵各營亦止三千人以之分布數百里且防且勦實形不足如欲廣爲徵調則籌餉倍難惟就現在兵力多方激勵以收餉節兵精之效汪海洋分黨復踞下車南嶺馬洋洞及古田涂坊一帶阻我進攻之路劉典抽軍駐文坊令王開琳張恆祥進屯汀南四十里河田以規南陽十二月二十六日開琳等進勦涂坊破壞其巢並敗賴坊援賊其斃千餘陣斬賊炳天茂李斗箕欽天豫洪世芳二十九日汀州鎮道遣守備李仰山率隊知縣張行楷

集團會與軍攻克永定縣城四年正月初七日開琳率軍及王文瑞所部新湘九營進駐涂坊劉典亦令李耀南張福齊進屯楊家坊張恆祥進屯塘背王德榜屯扼廟前長圍漸合十一夜上德榜等進破下車賊巢陣斬僞王宗任運勝等賊十二夜張恆祥遣隊攻破南嶺賊卡漳州之軍自去臘克長泰後分營移屯郭坑對岸賊來犯高連陞督洋鎗隊四百敗之追至河邊而浦東渡南數萬賊大至黃少春亦率馬步精銳百餘夾擊賊乃退連陞偵知李世賢欲嗾汪海洋守龍巖而調龍巖之賊會丁太洋林正揚等犯安谿調永定賊由坎下入漳

分樟賊犯長泰併擾泉州斷我軍餉道以窺省城乃分軍駐長泰復召民團憑河而守王德榜既抵廟前阻汪海洋赴龍巖之路賊謀中沮而龍巖賊勢亦孤正月二十三日分五路撲鐵石洋康國器督各營力戰敗之二十四日復擊退古田援賊萬餘是夜乘勝攻城賊不能支啟南門逃去遂克龍巖留軍守之仍率各營追剿左公令劉明珍率所部由白沙總兵劉端冕副將馬駿發由永安甯洋漳平均出華封司以厚漳州東北兵力而斷賊內窺安谿之路爲長泰守軍聲援復調浦城劉清亮所部三千人由福州出興化趨泉州同安以固高壘

陞黃少春後路會正月二十三、四、五、日劉典令張福齊、楊芳桂等出馬洋洞右及新泉下車連破賊卡數十直抵南陽誘汪賊出戰敗之斬首數百級王德榜截勦古田攜糧賊於蛟洋從馬洋洞開道出禾樹凹破賊六壘並敗南陽援賊斬其僞王宗汪海林攻破古田賊巢追至小池復破之共斃賊二千餘王開琳敗賊於羅源嶺僞天將胡瞎子率黨萬餘來援又破之復分軍敗賊楠木嶺及茶樹下生禽僞天將孫學保張鴻順等三十四賊誅之張恆祥破賊於香塔白雲嶺井贛坑各路皆捷二十七日典令李耀南張福齊扼紮新泉王德榜進次

馬洋洞汪海洋率黨湧至我軍且戰且退至新泉壘邊賊分兩大枝來撲劉大漢劉存藻等由下羅赴援典亦率親兵馳至諸將奮勇搏戰賊敗踣山邊汪海洋揮之還鬪官軍陣動典亟傳令斬退者屢戰十餘合賊見水逃竄西岸崩斃甚眾我軍追至下車幾獲汪海洋共斃賊五六千生禽四百陣斬僞天將陳李等賊禽賊言海洋選諸悍賊被以黃白號衣名標旂手厚待之事急輒麾令向前自謂無敵至是喪失過半爲之奪氣劉明珍趙均先聞龍巖旣克卽由漳平進扼永福里偵知敗賊未遠而下太洋橫踞水潮和谿一帶是日率黃本富張

成元等進剿誘擊和谿賊敗之夜復襲破三卡正月二十日李世賢復犯漳浦二十一日陷之高連陞等分軍馳駐海澄石碼二十七日黃少春出隊破賊於漳郡河邊二十九日連陞復破之三十日賊攻陷曾玉明丹洲陸營直趨鎮門師船俱潰連陞率隊馳援賊退走我軍渡河追殺賊折奔丹洲爲蕭立信等所扼復赴小港梟水欲遁又被劈山礮轟截各營乘勢蹙之生禽三百內有侍賊僞參府元勛等百四十餘賊悉戮之我軍亦陣亡副將哈必發守備王福泰時曾玉明所部臺勇從險橋馳至民團爭出殺賊芟夷略盡禽賊言李世賢率黨

數千欲從鎮門攻取石碼以絕官軍餉道蹶敗至此二月初三日劉典慮汪海洋他竄令楊芳桂李連勝等赴中村截之初四夜賊果棄南陽走初五日楊芳桂等追擊於上杭之舊縣粵軍邀擊於石腳下皆勝典復慮賊內竄令李耀南等於初六日進駐華家亭適賊竄踞白沙張福齊等追及與耀南夾擊敗之初七日典會王德榜進勦白沙賊悉銳拒戰把總康德修軍功郭慶雲陷陣死軍少卻會王德榜及康國器所遣羅洪標等兩路馳援賊乃大潰追殺十餘里禽斬數千王開琳聞南陽賊竄亦追敗之茶樹下並破兩壘賊且戰且退初六日

竄永定之坎市復竄龜陽汀連肅清是月初三日劉明珍遣岳炳榮黃木富等由永福里攻破板場後壩賊卡初四日和谿水潮賊合黨來撲敗之我軍乘虛繞襲和谿守備梁友武先登遂平其巢初五日進攻水潮丁太洋棄壘遁其斃賊千餘會汪海洋退竄南靖永定兩界之奎洋苦竹梅林場校施洋山城金豐等處李世賢於漳州東北浦南金沙烏頭門社一帶加築城壘劉清亮由同安抵江東橋見賊勢趨重漳北遂進屯北谿黃少春進屯北尾橋高連陞進屯好景山二十五日少春復令周紹濂等移屯翰林洲僞天將譚賊由樓內寨來撲



少春援破之二十六七日均有斬獲三月初二日漳州城賊萬餘分路來犯少春連陞等各擊敗之初七日連陞進屯響水橋初九日復率丁賢發錢貴仁等過河築壘偏之少春設伏北尾橋河邊與連陞向東關而進各門城壘賊分來抄撲連陞少春自扼東路分麾諸將迎戰皆破走十三日賊五六萬眾復出連陞督知府魏光炳等力戰破之李世賢嗾偽天將李學金驅敗賊回關內有洋人十餘擎洋鎗突前傷我戰馬數匹官軍馳斬二洋人少春擊賊馬傷卽躍下持矛督戰賊敗遁追至東關而還其斃賊二千餘官軍亦傷亾百餘人十四日

復大破之十六日連陞令朱體盛屯扼赤嶺南部院祠  
世賢復糾合南靖賊共十餘萬並用開花礮出戰時蘇  
撫李公鴻章遣提督郭松林率所部十營航海來漳與  
高連陞合軍踰赤嶺黃少春軍踰北尾橋分路迎擊福  
州稅務司美里登亦由廈門海澄攜帶開花礮助勦各  
軍齊進呼聲震地郭松林督小隊直搗中堅羣賊辟易  
官軍急擊勢如風雨賊大敗入城其別股由樓內寨突  
出畱岡山者俱被劉端冕等擊退計殺賊三四千而王  
德榜由龍巖馳赴漳北華封見賊聚豐山對岸金沙一  
帶乃畱軍駐豐山自率各營進屯潭口與劉清亮渡東

谿環之軍相應十四十五日擊破吳倉烏頭及對岸數  
賊壘劉典亦由龍巖進駐城南六十里遣軍分屯上坪  
水尾邊村東偵知汪海洋踞所連互數十里而奎洋尤  
爲通南靖漳州大路十五日遣張福齊周顯民徐萬福  
等各由白石門上下與進軍典自率楊芳桂齊蘭禮等  
出嶺頭遇賊皆有斬獲行至奎洋山嶺賊來撲敗之擊  
破下奎洋梅林賊援並斃賊千餘十六日王開琳由永  
定分所部八營屯扼距城三十里湖雷鄉賊黨萬餘分  
路來犯迎勦至跌馬寨敗之追至岐嶺設伏而後進殲  
其援賊追及復大破之共斃賊二千餘生禽偽佐將譚

如春僞指揮周正南等七十餘賊我軍亦陣亾游擊黃柳谿都司李文質陳道政守備羅福清等左公疏言賊汪海洋踞龍巖永定南靖三界之奎洋等處與李世賢相爲首尾其地可由永定武平竄江西廣東亦可由平和竄廣東李世賢黨分踞雲霄平和丁太洋復陷詔安其地緊連廣東潮嘉濱海之區素多盜艇出沒汪賊志在竄江李賊志在入海現被閩軍急攻則賊必以粵東爲退步徐圖遂其竄江入海之謀防賊入海以潮屬之汕頭詔安之銅山嶼口爲要而目前形勢則銅山嶼口尤急前已調蕭端芳六紅單船駛赴嶼口仍催水師提

督吳全美所屬紅單拖督船各二十迅赴銅山並令曾  
憲德鄧延楨就近派撥師船先往防守至扼賊入粵之  
路衝要惟饒平大埔粵軍防邊向密方耀一軍亦已調  
回兵力似不爲薄閩軍中隔賊氛實無餘力繞越兼顧  
臣現籌王開琳康國器及關鎮國所部各軍共一萬二  
三千人嚴防永定湖雷撫谿一帶足以遏賊奔衝婁雲  
慶一軍萬餘近始由江西赴武平距粵咫尺似可移紮  
就急爲江西助粵之軍庶粵東固而由粵竄江之路亦  
可無虞汪海洋於十七日潛赴漳郡二十三日仍回場  
校自二十至二十七日康國器督軍由龍巖分路進剿

更番迭戰力破茅畚磔下各壘並擊敗苦竹梅林場校  
援賊劉典督各軍分路進攻奎洋先破嶺巔賊壘我軍  
傷亾數十乘勝破平下奎洋壘卡及中奎洋賊館汪海  
洋從梅林場校來援亦破之共擒斬六千殺其僞天將  
翟玉山陳光明等賊十三十六十八日漳州之賊屢撲  
劉清亮王德榜營壘均擊退二十四日我軍兩營渡河  
賊來撲尤猛德榜親督洋鎗隊力戰破之共斃賊千餘  
官軍亦多受傷二十七日王開琳督軍進剿苦竹馬傷  
復易已破數壘忽援賊大至亟收隊參將文任重戰死  
各軍陣亾游擊鍾元興以下十三人四月初十日康國

器令康熊飛羅洪標等擊破賊於巖前十一日牽洋賊  
竄至大谿十二日黎明乘霧迎剿敗之副將吳光亮等  
由東安進薄苦竹並分屯苦通磔下備之參將林福喜  
等夜襲賊破其八營及附近各壘江海洋由大谿來援  
康熊飛等遇於東坑破之進破湖坑大谿賊壘直追至  
大埔所轄之三角塘太平寨始還共擒斬二千餘拔出  
難民數千苦竹旣克漳州賊勢益孤蘇軍提督楊鼎勳  
由廈門至海澄後卽與郭松林議扼通漳浦之路初十  
日松林率八營進屯城南十里古縣東山前一帶鼎勳  
接駐鎮門城賊數萬由下古縣浦西社來撲松林分軍

迎勦敗之別股繞出恆倉社鼎勳令提督黃中元出古縣之前截其歸路總兵周河清舒義志王萬釗高占魁副將張遵道朱興榮等往來奮擊高連陞黃少春亦各出隊過河策應賊始奪路而奔王德榜偵知南靖賊分竄汰內恐其繞犯安谿乃令戴清輝等分屯貫口黃聚是月初六日貫口軍擊破汰內賊二千餘賊退回南靖初十夜吳倉烏頭門之賊潛撲河西李運勝等營十一十二日賊復悉銳來犯德榜命戴奉聘李金信等過河夾擊皆破之斃賊千餘我軍亦傷多人十五日王德榜劉清亮合攻烏頭門從浦南沿河直指其巢賊傾巢而



出各路援賊亦集我軍磨戰自未至戊適賊中火藥轟發乃驚潰其斃二千餘賊我軍亦陣亡百餘人李世賢復謀勾結同安土匪內訌郭松林遣隊會道員曾憲德將西塘上宅許井各鄉巢穴掃蕩並令在籍知府葉文瀾縱火焚其停泊海船百餘左公以東北一路兵力尙單令新授福甯鎮總兵劉明燈五營由延平馳赴安溪華封一帶防剿二十日王德榜等復進攻烏頭門未克高連陞黃少春謂烏頭門與樓內寨犄角不拔其一則漳州終不可復遂於二十一日會郭松林楊鼎勳王德榜劉清亮進軍分截南靖援賊並扼北尾橋以牽樓內

寨賊勢環攻兩時連陞部將何世載先破一壘各營連克賊壘十四殺賊萬餘生禽三四千拔出難民數千追奔至天寶寨距南靖十里賊望風走魏光邴馬駿發等見烏頭門賊寨煙起率隊燈附而登斬其斷後賊二百餘躡抵東關乘勝攻賊附城十餘壘北尾橋一帶民團亦吶喊助勢時風雨大作連陞等馳至督放噴筒火箭東風愈烈各壘並然遂奪門而入提督曾玉明亦率臺勇攻克石亭賊卡由南門殺入李世賢巷戰踰時乃率死黨從西門逃去是夜亥刻克復漳州清亮德榜各邀斬賊數千時劉典方攻南靖十九日李耀南等攻破緘

口塞五壘並擊敗南靖上社小溪山城援賊禽斬二千  
二十二日進攻縣城王德榜追賊適至城壘各賊震駭  
俱奔遂克復南靖收降四千人其餘追斬略盡左公以  
漳州閩省腹地菁華聚積一經賊踞全局震動洋人之  
通賊者又從中接濟其勢更張自攻剿以來戰無虛日  
賴諸將和衷共濟並克堅城疏上其功並請優卹陣亡  
參將鄭金麟都司張大勝千總張得勝把總李金信等  
詔俞之王德榜由南靖追剿敗賊二十三日至羊城大捷又  
敗之林浦共斃賊五千餘賊竄平和二十五日高連陞  
黃少春劉清亮等追及於馬鞍山五鳳山下再破之斃

賊七八千二十六日追斃千餘二十七日攻破磁洋賊壘殲之並進克楚碛安下賊巢李世賢率黨數萬來援殊死戰我軍繞擊其後賊陣始動世賢雖連斫數賊不能止其奔逸也追至平和賊繞城而走城賊亦急開西門狂竄遂克之進追敗賊前阻嶺港賊死甚眾世賢連馬墜橋下負創而遁又追二十餘里至大埔所轄赤石收隊共斃賊萬餘生禽三千餘而郭松林楊鼎勳軍自克漳郡後卽進屯長橋二十三二十四日連破賊於博孝嶺水磨嶺南坑尾坑等處二十五日令提督易用剛總兵李長樂宋德鴻曹仁美謝連陞副將洪寶林王德

駿郭文武黃中元等圍攻漳浦盡捕附城各壘二十六日擊退援賊轟攻至夜賊於三更由南門竄走丑刻克復縣城雲霄賊益震懼於二十七夜縱火由西南門竄向平和次日吳鴻源收復廳城初雲霄岳坑文生朱得時通賊至此郭松林等並平其巢高連陞等由平和追賊四十里間雲霄漳浦敗賊竄至二十九日向大嶺迎勦民團截之生禽僞天將陳有才胡艾森並斷僞祥王黃隆芸左臂獲之護從賊目悉被禽戮降斃各數千降賊言守漳浦之僞凜王劉肇鈞危迫自盡守雲霄之僞列王朱義得亦被陣斬其僞利王朱賊僞來王陸賊兩

股是日王德榜追至大埔縣境粵軍截之賊斃無算德榜受降四千餘內有僞天將郭楊維等五賊僞神將朝將何華炳艾孫武等六賊僞總檢同檢提點徐添寶等三賊僞天義天豫天安朱大寶等六賊僞編修馮祥雲功醫蔣永瑞共賊目二十四及驍黨百五十四悉誅之收軍還駐平和郭松林等遣軍進攻詔安亦於是日破之梅村五月初一日收復縣城丁太洋率眾向烏山竄走初五日至白土王德榜勒軍追擊禽斬四千餘賊由間道竄下洋苦竹繞越龍潭乘虛撲坎市行營劉典亟調各營夾擊大破之賊走高陂橋我軍扼之太陽壩丁

太洋路窮乞降繳偽印四百餘典受之令選畱千人隨軍效力餘悉薙髮給資遣歸汪海洋一股自大埔回竄永定王閩琳遣軍拒之四月二十日攻陷我湘營於獵射凹總兵丁長勝游擊陳觀光等死之賊遂進圍縣城二十三日延建邵道康國器馳抵湖雷二十四日毀賊羅灘浮橋二十五日汪海洋糾偽佑王黃賊偽裕王周賊偽列王羅賊偽天將翟火姑等分七路撲營國器督諸將吳光亮林本羅洪標賴長關鎮邦等力戰破之二十六日賊復悉銳來撲又破之賊越嶺而走先後禽斬六千餘賊二十七日進剿至劔灘賊望風潰是夜向永

定西北一路竄走時劉典復遣李耀南張福齊等往助  
劉明珍亦自撫谿馳至二十八日與國器合軍追殺獲  
其輜重偽陪王譚賊偽天將林賊一股續竄劔灘各軍  
截擊禽斬殆盡典回軍坎市令張福齊等駐湖雷李世  
賢續敗至永定三十日偽來王陸順德偽王宗李元茂  
等賊眾爲谿漲所阻五月初二日康熊飛追至塔下賊  
猶力戰守備劉振伍陣亡我軍突出賊背敗之遂破三  
浮橋禽斬淹斃及棄械乞降各萬餘偽天將潘起亮曾  
洋貴陸連福偽朝將劉貴福鄧雲貴等皆死初三日張  
福齊朱定元等別追賊大隊於獵射四轉戰至永定河



邊扼其西渡陣斬僞王宗李賊及既降復叛之賊劉得  
義共斃賊四五千降其後隊萬餘僞天將神將何春貴  
等率黨二萬四千亦降於王開琳軍前五月初十日十  
二日高連陞等追賊至大姑灘連敗之十五日破賊浮  
橋與汪海洋大戰三時並敗其援賊十七日過河窮追  
賊竄武平縣境十九日我軍急馳至武平二十日擊走  
車刃之賊二十一日進勦中赤巖前而賊已折回下壩  
仍向粵東邊界竄去連陞等進駐下壩共斃賊三四千  
閩省肅清時丁太洋已降李世賢林振揚兩股禽斬殆  
盡而林振揚旋縛歸來王陸順德降於粵軍惟汪海洋

一股竄粵五月十八日賊前隊陷鎮平粵軍擊卻之俄而失利二十二日鎮平復陷擾及平遠分黨回竄巖前上赤二十九日我軍進擊破之遂分扼中赤巖前下壩閏五月二十日出隊擊破分水坳口賊卡康國器先進軍嘉應之松源欲規鎮平會賊之踞龍虎墟者偽利王朱興隆偽稽王吳玉堂乞降國器遣人約爲內應他賊覺之朱興隆等遂走投鄧安邦粵軍國器於十五日改道三谿口進剿擊退藍田之賊會汪海洋攻陷石峰徑兩營粵軍退守嘉應而寔字營叛卒由湖南江西廣東邊界竄至興甯與之合併賊欲復張國器由龍牙進兵

連敗賊於高山瓦窰並破白渡新鋪墟賊壘六月初三  
初四初五日賊潛入閩邊廣福鄉刈稻高連陞黃少春  
等擊走之初六日海洋大舉出分水均分撲巖前豬股  
坳營卡血戰數時殺其偽總統護朝將伍金保賊猶短  
兵搏刺良久兩路皆敗乃遁初八日賊復傾巢而至裏  
兩日糧以期致死我軍堅壁待之賊撲近輒排礮一轟  
相持至未申間度賊氣衰各鳴鼓揚旗突出賊卽駭奔  
遁還鎮平連日禽斬數千而將士傷亾亦三百餘副將  
湯復春通判龍朝翼游擊黃春田及王朝先袁金榜何  
亨全等均陣亾六月初九日康國器遣軍攻破海棠亭

賊卡僞陪王譚富僞朝將莫恩皆降二十七日國器由  
高思前進七月初二日分軍進屯程官埠初六日攻破  
藍坊石坑排南坑頭各賊壘初八日進至南坑頭賊胡  
瞎子率黨三萬餘結陣山巔仰攻未克前約降之僞天  
將李積曾務鄧伯才嚴進恆僞朝將陸鵬鄧成李香鄧  
金麥祖等四千餘人焚壘衝出賊驚潰追殺至鎮平南  
門外八里收隊十三十四日汪海洋連撲程官埠高思  
營壘其鋒甚銳我軍力戰破之生禽僞神將祝雲僞先  
鋒游竹潘得壽游諸生陣斬僞王宗汪大力僞神將朱  
三元等賊並擊傷海洋左腕數戰共禽斬賊六千餘我

軍亦陣亡把總區昌並傷亡三百四十餘人二十四日  
十五日高連陞黃少春等進屯廣福鄉羅岡賊於城東  
北路亭下築壘開濠嶺路屈折峻削仄不容趾旁徑如  
梳勢險守固八月初一日我軍進營分水坳初二日  
汪海洋來撲新壘迎擊破之殺賊三千餘我軍亦傷百  
餘人初七初八日連陞等進攻白泥湖賊壘而康國器  
先於七月三十日進擊石古排並敗九曲岌援賊降其  
僞天將張祥順周建榜等千餘人時粵軍已克龍川長  
壽西南之圍亦合至初九夜攻破石古排守備李如陣  
亡賊各壘皆潰國器乘勝進攻縣城汪海洋率黨從西

門逃竄連陞等亦從白泥湖追至衝殺入城殲其餘賊  
初十日黎明克復鎮平汪海洋等賊分由梅子畚大寨  
東石並向平遠而遁少春等追破之東桃鄉江西席寶  
田軍破之東石賊折回大柘竄走白十一十二至十六  
十九日諸軍連破賊於竹子澳茅樓坪河頭石正楓葉  
坑甯興屬之黃陂墟羅浮司長甯屬之小山墟等處共  
斃賊一萬數千降五千餘解散無數二十一日王開琳  
從長甯鷺公墟進敗賊於瓊田二十二日進破嶺路及  
烏鴉寨賊卡並敗小山墟援賊禽斬數千賊間道遁入  
龍南縣境時高連陞康國器兩軍窮追六晝夜至黃陂

墟爲土匪所給深入伏中輜重軍火多失多將王德盛  
以下李鳳翔關鎮邦周興義於長林王汝洪李恆王興  
寶朱傳孝李光斗胡得貴梁材康達本李起生吳世欽  
等死之一二日間賊已遠颺遂成尾追之勢左公所謂  
譬猶捕鹿有其犄之無與角之終必絕塵而奔也二十  
五二十六日賊竄定南信豐兩界小江墟一帶爲江西  
軍擊敗復竄廣東連平境上下坪擾及龍南始興邊界  
以我軍嚴扼各路遂由連平翻山繞平和興甯各境疾  
趨十月二十一日徑陷嘉應州游擊英秀死之閩防復  
棘左公令王德榜賴長林珠等分扼武平永定平和之

衝而自率親兵及新右營出屯瑄谿以固漳州南靖門  
戶調劉典黃少春及浙江提督鮑超軍入閩布置甫定  
高連陞等已尾賊由興甯東北趨嘉應時粵軍方耀鄒  
安邦軍藍口賴長軍井塘與西洋白官市粵軍何雲章  
容朝章等三營夾河而守旣而康國器由鎮平進屯烏  
泥坪高連陞劉清亮進屯漳樹坪各距城二三十里黃  
少春楊和貴朱明亮先在大埔左公率親兵繼進十一  
月十六夜方耀軍挫二十一日白官市粵營敗潰容朝  
章陣亡何雲章退至丙村二十四日劉清亮進屯鳳寨  
高連陞出隊翼之汪海洋傾巢來犯兩軍分禦血戰四



時之久賊由雙板橋遁去斬獲甚多我軍亦陣亡知縣  
汪遇元縣丞晏際時游擊朱體盛鍾敏遂都司錢貴仁  
王連斌趙玉林何文祿守備蕭煥武鍾洪霖千總鍾成  
魁等左公飛機朱明亮馳赴三河壩以扼賊犯潮州之  
路二十九日左公次大埔劉典亦來自永定卽令其前  
隊進屯丙村並檄黃少春王德榜於十二月初二初三  
日由松口繼進德榜向塔子巖扼正東佛子高一路與  
井塘丙村之營相接少春向金谷坑扼東北葵嶺一路  
與樟樹坪之營相接而塔子巖與金谷坑樟樹坪與烏  
泥坪又互相聯絡復令總兵鄭紹忠粵軍六千屯長沙

墟以扼西南一面並檄惠潮嘉道張銑調礮船數十艘  
駛赴三河壩以遏梅江通汀潮水路與朱明亮陸營相  
爲犄角賊狃於數脫險不復以絕地爲慮見我軍漸次  
進紮乃謀於州東佛子高分水鄉曹塘設伏以待初十  
日少春德榜分屯橫徑深坑石灰窰一帶十二日五鼓  
復自率數營進屯塔子輿劉典遣張福齊李耀南及高  
連陞劉清亮康國器各率隊前往策應並分伏葵嶺左  
右是日黎明賊從左側衝出少春等率親兵擊退其前  
隊已由曹塘潛抄深坑橫徑別一支由雙板橋潛經葵  
嶺均欲繞截我軍之後又出黃坑一支牽制井塘丙村

各軍俄而汪海洋胡瞎子各率黨數萬由佛子高黃竹  
洋來撲漫山徧野勢極披猖我軍左右設伏自辰至未  
戰數十合斃賊已二三千瞥見指湖頂有伏賊丁太洋  
率所部馳上敗之會築壘已成我軍皆出隊夾攻將士  
舍騎步戰呼聲動地無不以一當百橫徑深坑各營亦  
齊出奮擊少春德榜復率親兵緣崖橫出截之賊敗走  
直追至佛子高收隊還視戰處賊尸枕藉血漬谿徑谿  
水盡赤我軍亦陣亡副將以下陽命伸趙輝光宋成祥  
周壽臣歐隆盛施輝林章海輝蔡文蔚蔡名吉等其出  
雙板橋黃坑之賊亦皆敗潰戰前數日劉典預與各軍

統領營官審度數十里內地勢規畫兵形瞭如指掌賊  
是以甚敗汪海洋顧中鎗子穿出眉際墜馬鼻回而絕  
先是李世賢鎮門之敗我軍已獲其馬顏厝前民顏魁  
以破舟載之還漳及敗於永定未知下落六月二十八  
日潛逃至鎮平汪海洋郊迎並馬入城世賢以汪賊藉  
詞不救又殺其僞王宗李元茂等意殊不平海洋亦不  
自安遂於七月初三日遣人刺殺世賢及其黨五鎮平  
克後乃得其詳至是海洋亦斃海洋驍銳殆冠其曹我  
軍當之者必血戰而後勝世賢狡悍亞之縱橫江皖荼  
毒浙閩比於諸賊獨爲後亾乃或假手儕偶或殞軀礮

石孰謂天網疏而可漏哉汪海洋既死賊情惶擾乞降者日數至其黨復推僞借王譚體元爲首左公謂必四面合圍誅具桀悍宥其脅從勦撫兼施乃可蒞事於是出松口前進令諸將連營環偪十七日鮑超一軍行抵州城西北相公亭十八日劉明燈簡桂林李耀南進軍西洋市十九二十日賴長進軍龍津橋鮑超進軍平城鋪山子下高連陞黃少春王德榜進軍黃竹洋佛子高曹塘一帶朱明亮進駐井塘以固各營後路並令各軍於西洋市架浮橋夾河齊進廣東布政使李福泰亦進至州西藍口遣方耀鄧安邦列隊古塘坪與鮑超犄角

十九日賊出七樹徑直撲粵營擊敗之二十日超出隊相度營地賊來撲追遣提督唐仁廉李文益譚勝達總兵婁雲慶曾成武段福副將龔占熬羅運昌等奮擊大破之禽斬無算我軍亦陣亡守備以下鍾福春章邦俊余勝才蕭大春方惠林王興志及軍功王錫紳等三十四人左公察賊情勢將竄欲令閩軍迤而東粵軍迤而西以遏南路之衝二十一日張福齊進軍黃坑芹菜洋之間左公亦率親兵前進二十二日粵軍曾敏行鄭紹忠由羅衣堡進屯州西南長沙墟迤屯州南小密方耀鄧安邦迤屯西南大乍堡三門坳進偪州南爲之策應

江軍席寶田劉勝祥由大坪迤屯州西方台鎖閉是夜  
二更賊卽啟西南門由小密出黃砂嶂而遁胡瞎子開  
路諸賊酋爲殿劉明燈偵知之而賊口沈文有等亦先  
輸款於黃少春並飛報各軍黃砂嶂者州南險隘羣峰  
峭削一徑盤紆爲嘉應出新田大田右至豐順左至潮  
州間道賊以數萬眾冒死出險急不得前劉明燈楨長  
簡桂林率所部馳抵泮坑斬尾賊數百追過小密鄭紹  
忠營各相混戰天明別識始向黃砂漳併追禽斬三千  
黃少春劉清亮四鼓聞報卽率隊馳入東門追出南門  
僞佐將劉廷貴以三壘降劉典亦降千餘賊及鮑超高

連陞王德榜康國器黃少春方耀等軍各追至黃砂嶂以徑仄陸續前進劉明燈等緣崖驅殺勢如拉朽禽斬解散又各數千獲馬五百餘高連陞劉清亮踵至追抵分水坳明燈等收隊鮑超前軍又至二十三日黎明連陞等及賊於大田掩殺二十餘里降其黨萬餘收斬連營叛卒頭目歐陽輝及賊酋賴裕新賊猶越嶺狂竄又搜殺二千餘胡晴子衣黃擁賊千餘匿長崑山密密林中丁賢發禽之餘賊悉降追至嶺脊遇粵軍詢無賊蹤乃還是夜王德榜由黃砂嶂左追及賊於北谿四圍皆山我軍扼路登高呼曰降者棄械僞先鋒肩天義曹玉



科鈞天義楊世如會天福何至清偽天將彭大貴神將馬有玉等率眾跪求免死受降約四萬是日鮑超所部唐仁廉等亦追及何明亮黃矮子各賊酋於北窰沙壩大破之各軍乘夜躡追仁廉率洋鎗隊八營疾由兩崖小徑繞出賊前二十四日黎明賊猶奪路奔突鮑超親率駐城十營追至復分隊抄前爲仁廉後應洋鎗排列環擊各營從後衝殺截賊數段其斃賊七八千賊見圍合路絕始羅拜求生超將二萬餘賊悉數兜禽訊明偽天將何明亮偽佐將何明輝戴禮煌蕭秋林偽副將黃燾發偽先鋒鍾有誠黃正元劉明盛增天義吳慶寶袁

天義袁戴春奮天安廖大順祈天安楊文魁隲天安陳  
世路意天豫鍾意興段天福巫得盛僞衛國侯龍大賓  
及叛勇頭目黃矮子等俱磔誅僞侯丁德泰等大小頭  
目七百三十有四並斬之而康國器軍亦於二十三日  
由黃砂嶂右追剿至豐順縣北白水寨一帶禽斬無算  
內有賊渠洪秀全壻僞金玉鍾英僞幼陪王譚標僞懷  
王周春姪周社福僞朝將黃松僞佐將何昌勝黃蘇寶  
均解左公行營正法並訊明胡瞎子卽胡永祥磔之鮑  
超王德榜續獲汪海洋妻張氏養子汪長林及僞列王  
李海清僞天將栗時之僞神將劉文昌僞朝將尹炳朝

龍天義劉大福安天義譚有年魯天義謝引富喜天義  
陳大有合天義蔣明富保天福楊世求及賊目張開元  
馬東海唐有元宋興貴魏亞底周助坤萬金勝曹正保  
等三百餘粵軍副將鄭紹忠搜獲偽贊王賴阿養偽朝  
將劉必勝等並悍賊一百九十六鄧在倫李元順等亦  
獲王友才江德勝王亞凱等十數賊皆伏誅惟偽奉王  
黃十四卽黃明厚以先納款輸賊情免死其老弱及被  
脅日淺者遞遣回籍婦女幼孩雇海船解送閩浙各籍  
紳商畱養轉覓親屬領歸仍選其精壯分隸各軍暫給  
口糧以待分起遣散而賊酋汪麻子斃於黃砂嶂譚體

元續爲黃少春所獲磔死計其斃賊一萬六七千生禽數千墜崖死者無算解散難民萬餘受降五萬餘僞帥凶渠無一漏逸附賊之士匪從賊之叛卒亦皆撲滅靡遺左公所謂逋誅劇寇自入網羅被脅窮黎長登衽席十餘年醜孽一鼓盪平非始願所及從此山陬海澨益震

天威而東南各省亦可脫甲解嚴與民休息矣左公於五年正月二十四日班師回閩前此嘗固辭一等伯封及席寶田軍獲洪福瑱於石城始拜

命後錫號恪靖至是捷疏入得



旨賞載雙眼花翎劉典鮑超高連陞黃少春王德榜康國器  
劉清亮以下獎資有差追賊陣亡之千總顧惟奇李賢  
並優卹自古黃巾赤眉眾並百萬然皆蹂躪關輔流轉  
中原構患未成殄滅亦易從未有阻兵十七年流毒十  
六省亂久禍深如粵賊者賊起於粵亦滅於粵諸帥咸  
著削平之績左公兼收盪定之功越境討賊指揮若定  
大軍雲集旣和且勇雖以嗾嘆夙將猶秉節度用能釋  
南顧之憂勞拯民生於水火勳懋史牒業震寰區有以也夫  
江皖閩粵皆平浙之餘烈事有始卒所宜附著而困獸  
銜險死綏者眾軍行煙瘴物故者多橫草裹革同爲國

殤亦足見節制之有素而成功之不易焉

平浙紀略卷十二

平浙紀略卷十三

左公自奉

命入浙寇氛充塞遺黎僅存凡大軍克復城邑及所過地方  
 蒿目淪胥亟籌撫卹無日不接見士民延訪疾苦同治  
 元年四月二十四日疏言浙省膏腴之壤盡為賊踞衢  
 嚴一帶山鄉瘠薄素鮮蓋藏頻年屢遭兵燹小民死喪  
 流亾田屋荒燬臣軍行所至目覩災民男婦露宿野處  
 道饑相望有數日不得一食者有一家餓斃數口者近  
 復疫氣流行十人九病而浙之殘黎幾於靡有孑遺矣  
 此等飢民何忍任填溝壑日夜思維憂心如擣六月十

斤已各卷十三



七日疏言上年賊首李世賢李秀成先後竄浙正值農  
民分秧割稻之時舊穀被掠新穀無收不但軍食無從  
採辦卽遺黎僅存者率皆飢疲不堪而無人色甚則槁  
死破屋之中齒骼縱橫無人收殮疾疫傳染田上荒蕪  
皆由於此臣軍行所至目覩此狀無淚可揮經過聞化  
馬金遂安西安等處皆勻撥錢米交地方官紳酌量分  
給聊緩災民旦夕之死過後則又不知作何景象矣後  
又疏言浙江一省自賊竄擾以來郡縣城池之僅存者  
惟定海石浦龍泉慶元泰順而衢州一城以外均徧遭  
蹂躪溫州則先被會匪入城繼被賊肆擾鄉村幾無完

士統計被禍之烈實爲各省所無左公於此恤恤乎三  
致意焉蓋浙江雖擅絲茶魚鹽之利產米素少嘉湖甯  
紹號爲膏沃而地濱江海水患洊至杭州九屬澤國居  
半金衢嚴溫處台各郡山多水少或海溢蛟發則苦潦  
恆暘兼旬則苦旱蠲征緩賦殆無虛年當承平無事物  
力豐盛時歲輸漕三四十萬至五六十萬石而江蘇湖  
廣之米至於海甯所屬之長安壩以濟浙西謂之米市  
臺灣海島之米至於甯台各口以贍浙東民皆仰以爲  
食浙之西境有時或取給於江西至省垣則米尤騰貴  
較之數十里外價輒贏千錢有奇富室菽米不入城郭

常平義倉俱無積蓄咸豐十一年杭州再陷雖力盡援  
絕亦由掘鼠煮苕無食以爲守故也賊至之區如梳如  
篦鋒鏑餘生皆爲餓殍昔之洛下邱墟關中喪亂郎吏  
餒於牆壁氓庶填乎溝壑其慘酷豈有過於此哉維時  
衢州解開城外米穀爲賊擄括悉聚大室士民之賢而  
愿者多輸助軍食或據非已有因而與訟其無主者官  
爲封運入城安越軍初攻龍游民分糧助軍若恐不及  
迨後賊益蔓延惡民之饗官軍也焚殺特甚又久踞龍  
游日肆掠村鎮閒於是十室九毀閒有斷瓦頽垣病呻  
其中者率無升斗之需瞑然待死而已左公旣數獲大

捷電埽三衢廓清開遂進軍分圍龍游湯溪至元年冬  
閒通檄已復各屬曰浙江頻年遭賊擾亂幾無完土兵  
燹之後疾疫流行哀我殘黎何以堪此本部院受任於  
傾覆之餘德薄能淺用兵遲鈍致士民久嬰困阨上負  
九重特達之知下虛兩浙來蘇之望日夜思維罔知攸濟是  
用條列十二事府縣其各設一局名曰同善擇廉幹紳  
士董之並聽其分局鄉村應辦事宜四條一收養幼孩  
遇有被難幼孩自數歲以至十五歲者卽收入局立冊  
註明姓名年歲籍貫居址父母伯叔兄弟姊妹存亡及  
有無宗族親戚每口日給米半劬鹽菜錢八文兩人共

絮被一牀如有親族來領須經幼孩自行認明方准給領以防冒詐有拐賣者事發斬首或鋪戶願領出學習手藝取具領字黏卷倘案姿性穎異者送入義學讀書日後長大聽其歸家其有無家可歸無親屬可依本地人民願收留作養子者援照道光年間兩江奏准成案由官給與執照作為嗣子收入族譜宗族不得以異姓阻撓一收養婦女凡遇被難婦女問明年歲籍貫居址翁姑丈夫父母伯叔兄弟存亡及有無內外親屬詳細註冊由局發棉麻課令紡績織成布疋歸局發售以充經費十歲以下如無可依歸本地人民願收留作女作

媳者官給執照爲憑以免異時爭訟其餘與幼孩同一恤養孤寡殘廢城鄉市鎮遇有孤寡殘廢報局施賑並准該地境寫立緣簿沿門乞食一收埋齒豁尸骸暴露慘不忍觀且凶穢薰蒸易成疫癘急宜收埋掩葬凡收埋一尸掘深四尺者給錢二百文每日由局僱人巡視遇有暴露不問親屬有無卽予收埋插立竹標暫爲誌識應籌經費四條一增鹽茶釐稅鹽除官運及零星肩挑負販數在三十筋內不再加征釐稅此外每鹽百筋加釐稅錢五百文茶釐亦然或於場壚征收或於水陸口岸各卡局征收溫處境內總以此爲限專款提充同

善經費一增船戶釐稅海船出口除所載貨物應征釐稅外每百石增船稅錢四百文江船每石加抽船稅錢四文均於載齊之日收取給票一勸捐祠廟私租凡民間宗族祠堂積存公款以三分之二贍其本族地方廟宇所有田土租息劃提三分之一歸公充作經費一勸捐紳儒凡捐錢八十千者給予六品功牌六十千者給予七品功牌四十千者給予八品功牌二十千者給予九品功牌每捐至百名卽由局稟縣造冊轉詳專送本部院行轅立將各等功牌填給其已捐領六品功牌願換捐從九品者准赴行轅換給從九品印收如現有部

照卽發部照或力不能捐貲而設法能全活百人者准  
詳明實蹟給予六品功牌各縣官委及局紳辦理妥善  
全活最多者分別核請保獎應行嚴禁四條一禁拐擄  
亂離之後民間父母妻子均不相顧其因窮苦難度將  
子女妻媳轉鬻與人者原難一概禁止倘匪徒因此販  
賣人口乘機拐騙或恃強擄搶法所不容事發立予斬  
決一禁擾索賊前踞各縣徧設鄉官其中固有甘心從  
賊之人亦有因家族累重脅迫不堪勉受僞職者若一  
律查辦無以昭法外之仁所在官司宜苦心分別妥爲  
辦理倘書差營兵及地方棍徒藉端嚇詐擾索事發先



科詐索之罪一禁欺浚兵勇殺賊原以安民團練禦暴非以爲暴敢有恃強恃眾擾害閭閻欺壓良善擅違軍令者官司訪查得實卽通稟本部院分別治罪如係游勇立于斬決一禁屠宰耕牛稼穡爲民生之本耕牛乃農務之要亂後田土多荒牛力缺乏宜禁宰殺以裕耕稼之用倘有販賣耕牛售與屠戶或自行宰殺事發究懲以上十二條貼就目前補救事宜而言地方情形各異習俗亦殊如有應行推廣增減之條與明核奪所有各縣辦理經費由官運甌鹽項下每縣先籌發錢二百千文以爲之倡凡我寮屬士民當此痛定思痛之際咸

宜努力爲善勉圖補救萬一若有藉端斂貲肥己或玩  
視人瘼見義不爲本部院耳目所及亦必分別參究以  
昭大戒二年二月初四日左公在嚴州營次附奏言浙  
江目前困敝情形人物彫耗田土荒蕪彌望白骨黃茅  
炊煙斷絕現屆春耕之期民間農器毀棄殆盡耕牛百  
無一存穀豆碾糧種籽無從購覓殘黎喘息僅屬耆耄  
則緣伏荒畦廢圃之間擷野菜爲食夜則偃枕積垣破  
壁之下就土出以眠昔時溫飽之家大半皆成餓殍憂  
愁至極并其樂生哀死之念而亦無之有骨肉死亾在  
側而漠然不動其心者哀我人斯竟至於此臣於去冬

曾籌補救十二條刊發各屬現復籌採買豆穀種籽購  
求耕牛招集鄰省農民來浙耕墾冀將來或有生聚之  
望惟浙省被難地方極廣巨富紳民早已避地遠徙捐  
無可捐臣軍之餉積欠太久日食尙艱雖所過地方每  
與各統領營官哨弁共圖分食煮粥俵散錢米所獲賊  
中穀米亦酌量賑糶暫救目前然涓滴之施無裨大局  
且距新熟之期太遠災民朝不保暮難冀生全查有浙  
江之富紳楊坊俞斌毛象賢等十數員身擁厚貲坐視  
邦族奇荒竝無拯卹之意且有乘機賤置產業以自肥  
者爲富不仁莫此爲甚現今盡力速措巨款廣購米石

運回辦賑濟卹危而昭仁卹之誼旋奉

上諭浙江此次之變吾民顛沛流離千里赤地朝廷軫念民  
瘼哀憫殊深左宗棠現擬散錢煮粥拯救饑民招集流  
亾給資耕種具見該撫能體朝廷德意惠我災黎而富  
紳楊坊俞斌毛象賢等十數員非但膜視邦族不加拯  
卹且欲乘機賤置產業實屬忍心害理爲富不仁著照  
左宗棠所擬飭令富紳楊坊等力措巨款廣購米石迅  
救卹危如敢不遵卽行嚴辦是時難民來歸者日眾至  
於人相食楊昌濬商請左公設以商代賑之法下令收  
買銅錫鐵鉛茶葉竝傭婦女揀茶而以米給值以茶濟

餉全活甚眾迨三年二月杭州克復三月十三日左公  
附奏言臣於三月初二日進駐省垣巡視各城堞身聞  
有蘇州之處尙易修葺惟駐防城身概行拆卸房屋但  
存牆壁省城以內倉庫衙署俱已蕩然無存街市房屋  
亦大半折燬聞無事時省城內外居民共有八十一萬  
餘口現除逃亡死故外陸續來歸及存留遺民合計不  
過數萬口一片劫灰傷心慘目蓋兩次淪陷被禍爲尤  
酷也現已遴派員紳設立賑撫局收養難民掩埋屍骸  
並招商開市一面將急須修濬工程辦理以期通商惠  
工暫救時局左公初入卽傳令申儆各軍嚴禁攜帶婦

女搬運器物出城先是在籍道員胡光墉豪於財杭州  
初次失陷賊以城內居民力協官軍守陣恣行殺戮輒  
反接其手每纍牽數十人而駢斬之伏屍盈地流血成  
渠貞婦烈女相率赴水城河爲滿賊退之後貌皆如生  
光墉捐貲具槥或兩人一棺埋之湖上及城之再陷也  
光墉先領銀六萬兩往上海湖北購米不及則具海舟  
入鼈子壘泊錢塘江僻處全濟頗眾泊左公大軍入浙  
檄光墉來謁首繳還前領銀六萬兩並輸助軍餉左公  
察其可任令經理賑撫局務於是購米爲食訪明被難  
婦女家屬所在分別領送修義渡復牛車以便難民渡

江來注牛車者爲水沙而設從前江多沙少幾可直達西壩前於東岸漲沙數里每逢潮至沙皆沒水潮退又阻淤泥貧窮婦女無力僱肩輿者蹠躓泥中時有陷蹠滅頂之患或倩人背負亦多危殆且無以別男女之嫌自捐設牛車迎送潮泥中而民皆利涉賊擾遂廢至是復之並收城鄉暴骨數十萬具分葬大家於岳王廟左里許及淨慈寺右數十武地繚以粉垣而阡表之江干湖墅則就近掩藏之存歿以安當是時糧儲道楊昌濬方克武康井舍煙稀雞犬絕聲遺民百不存一所復各城瘡痍無有過於斯者賊之初起也矣謂堅明約束人

多惑之縱火恣殺所過爲墟復盡擄其餘分男女館母  
于夫婦不相見後益肆行淫掠慘酷萬狀破城旬日輒  
謬稱安民遍徵城鄉見戶貢獻各設鄉官搜括一次許  
以永免錢糧愚民或欣欣然相告以爲從此春租秋稅  
不患追呼化日光天得安寢息未幾而賊騎復至擄其  
箱篋未幾而賊騎又至括其米穀乃至日用器物尺布  
斗粟悉罄所有而過門入室持刀相恫喝者猶日纍纍  
不絕卒乃盡刈田圃之禾黍菜蔬以去而民食惟草根  
樹皮矣其富而黠者或先避去或後逃亾轉徙江海且  
饒裕如故其貧而愚者或在江鄉水村則以小舟載其



家室稍攜餘糧贖物託命於小溪汶港叢蘆密葦之間朝此夕彼撿魚蝦採菰苻以爲食韜蹤匿跡多所全活至負山傍嶺習見林巒無舟楫之利溪港之便保抱攜持厥婦子及其姻鄰晝伏哨哇夜潛深箐遠竄百里近走數十雖復深山大澤巉削幽邃賊從而弋獵之兇啼犬吠皆足爲累或以烏槍長矛擊刺林中希得免者是

以浙中喪亂水國被害較輕戶口十或全其五六武康旣素瘠多山又當賊往來皖浙道路之衝故蹂躪至此楊公惻焉傷之於是進其遺民耆老勸之招徠籍賊餘糧並籌備米穀而施之賑時蠶桑已過令稍種蔬菜他

處難民婦女一體贍濟旋進軍克復安吉孝豐地方彫殘情形與武康相若平時戶口約二十萬至是縣存數萬人皆爲駐多日極意撫綏而後行民深德之一時論者亦咸以規畫爲至善云先是二年六月奉

上諭浙省曩遭兵燹小民流離失所殊堪軫念白應將該省漕糧量予減免以示公溥之仁著將杭嘉湖三屬稅則各按重輕分成核奏辦理左公旣平浙遂於省城設立清賦局議減三分之一並裁革浮費定爲經制從此吏畏其法民安其業服疇食德永永無極最爲善政之大者又以海塘坍壞潮人浸灌民田事關七郡水利奏令

前按察使段光清於塘身後築上備塘一道高寬各數尺屹然保障繼左公撫浙者荷澤馬公新貽合肥李公瀚章暨楊公昌濬並盡心講求石工柴埔以次修復均有專案茲不具載他如北新關紫杭州一方民瘼奏請停止劃釐以抵權稅嘉湖鎗匪爲奸盜之源風俗之害經布政使蔣益澧節次禽斬劇匪百餘編立船埠稽查保甲勒繳器械後又會同江蘇捕治其風遂戢任劉璈爲台州知府以除豪暴整頓瀕海水師以制盜艇濬治西湖南湖城河以便農商建修各祠宇書院以興祀學招集遠方農民以墾荒蕪城中採積米穀至十餘萬石

左公疏內所稱二臣與臣共事多年信心有素於整軍治民之事必能補臣缺漏仰答

恩知者也及報銷軍需詳文有云尤萬不可緩者杭乍駐防兩營官兵壯丁皆已殺賊捐軀婦女亦多從死所存鋒鏑之餘及各屬難民皆無食無衣無所棲止必須酌給錢米席片並籌給牛種以延殘息並不能待至辦理善後始行賑撫又白骨徧地道殫相望急須掩埋以示矜憫又云軍行所至地方半成灰燼遺黎鮮有生機皆隨地隨時設法撫卹卽村鄉市鎮閒有賊遺穀米亦均儘數散放以延難民旦夕之喘未任顆粒暴棄惟二年內

克復金華海甯二城三年內克復省城暨石門桐鄉二縣塘鄩一鎮湖州一郡各因賊酋投誠封遺米穀鹽甚多散給貧民之餘委員盤量變價及以穀米抵用尙共得銀三十四萬七千餘兩除海塘經費前出民捐後撥釐金巡撫布政使衙署出於捐廉修建外所有祠廟各署監倉城垣考棚書院以及內外城河各屬堰壩塘渠皆取辦於此不足仍以釐金益之不數年閒流凶漸復田土漸治絃誦漸興鬪鬪漸盛鋒刃不狎於皮骨烽火不驚於心魂回思賊勢縱橫民生塗炭之時已天地不足喻其否泰矣向微左公援之於前數公濟之於後而

能若是乎易曰弧矢之利以威天下又曰以此毒天下而民從之今師行無秋毫之擾民困有倒懸之解所謂拔之水火而登於衽席者非邪據其梗概附於兵事之後匪誌異量之恩亦以備列一時之變云爾

平浙紀略卷十三

平浙紀略卷十四

左公始自奉

命幫辦軍務由長沙募五千餘人訓練兩月率入江西嗣增募三千人江西月議給餉五萬及景德鎮樂平之捷旋駐廣信府持軍嚴整秋毫無犯民安樂之復先後議以景德河口釐捐由左公委員筦收並以浮梁樂平等縣錢糧劃歸兵餉蓋數縣境皆瀕邊向爲賊擾民不得耕穫官不得征斂左公軍至賊怖而東走境土漸安民間錢糧輸供左公軍始肯踴躍完納而釐捐號爲利藪兩處皆巨鎮通衢計一歲收捐不過數千金左公遴員整



理遂至倍徙稍裕軍食而終不敷迨督軍援浙徵兵愈眾需餉愈鉅籌食愈難咸豐十一年十二月左公奏言奉

旨令江西撫臣籌解臣軍餉十萬兩以速師行福建按月籌撥十萬兩同軍火接濟然江西前已欠餉十餘萬一時恐難齊集福建預已諉之江西事同兒戲請

旨敕下部臣查明各省應協濟浙江之款閩省暨各省應撥解援浙軍餉各款趕緊運解廣信府交臣後路糧臺以應急需並請發職官花翎藍翎部照及封典虛銜監生從九執照交湖南江西撫臣遴派所屬籍隸浙江道府

各員勸諭浙江流寓兩省之官紳商募捐輸兵餉旋奉  
廷諭浙省軍情萬緊餉需自不能不寬爲籌備前因薛煥奏  
杭城危急曾照王有齡所籌將廣東每月協浙餉銀五  
萬兩江西湖南湖北每月協浙餉銀各三萬兩均由上  
海預納中外商人貨稅給單執赴各省抵滙浙餉卽由  
薛煥收集此項抵餉設法運浙其各省如有海道及他  
路可通浙省者均卽各將應協月餉分途解運並將曾  
國藩所請福建閩海關撥濟浙江月餉三萬兩諭慶端  
等撥解左宗棠軍營廣東粵海關撥解浙江月餉十萬  
兩諭勞崇光等或由江西轉解左宗棠軍營或由海道

駛運上海由曾國藩轉解左宗棠軍營總期得以迅籌  
接濟俾利軍行現在各省協餉斷難得濟滬關釐稅兩  
項自有盈餘浙餉緊急本日已諭令薛煥先行酌撥接  
濟並著曾國藩查明如有收集前項抵滬浙餉一併催  
提以濟急需同治元年正月二十九日奏請於廣信暫  
設糧臺以廣信知府鍾世植總司之設轉運局於玉山  
委員會同署玉山知縣章澂經理其事並請調湖南候  
補道王加敏及在籍江西候補道胡光緒來營辦理糧  
臺四月二十四日奏言臣軍未入浙之前已欠餉六月  
有奇僅恃兩江督臣曾國藩所撥景德鎮河口釐

源樂平浮梁三縣錢漕及江西奉

旨協撥一欵陸續彌補欠數尙多入浙以來積欠又二十餘萬兩從前李元度李定太兩軍餉需由閩省酌發雖所欠甚鉅然每月尙各有二萬兩自正月以後閩餉稀至賊氛更緊曾國藩發給衢防李定太一軍銀二萬兩米三千石臣亦發給衢防銀二萬兩又撥給李元度安越軍閩餉銀五萬兩買米銀八千兩米一千三百餘石復擬遣撤十營由臣發給一月口糧銀三萬四千兩以作行資而臣軍之餉又挪空兩月有餘合之舊欠仍六七箇月不等所有奉

旨協撥浙江軍餉各省以粵東每月十萬兩爲大宗督臣勞  
崇光來緘備言支絀情形將來縱微有接濟亦斷難如  
期如數閩海關協浙之款從前每月五萬兩近奉

旨每月協撥三萬雖已委解在途卽令按月解到臣以之分  
給衢防安越兩軍而亦不敷甚鉅此外湖北按月協餉  
一萬兩僅解過一次湖南按月協餉一萬兩除給劉培  
元一軍行資及臣軍增募勇丁經費並軍火帳棚等項  
此時亦無應解之款總計各省除福建解過五萬兩湖  
北解過一萬兩外別無解款現在劉培元蔣益澧及臣  
調募各軍約五六月間均可陸續到浙每月又須增餉

十三四萬臣軍及備防一軍安越汰存之軍每月共須餉二十四五萬兩卽令各省協餉如數按期源源委解每月亦不過十五萬兩尙有十萬兩虛懸無著而各軍舊欠之餉尙未暇計也至奉

旨諭令薛煥抵滙餉銀已收若干臣與曾國藩距滬甚遠無從查悉薛煥亦並無先行設措接濟仍請

旨飭將各省抵滙浙省餉銀委解曾國藩大營俾臣得就近迎提以資接濟六月十六日奏言臣軍食米水陸運道艱阻所經河路灘高水淺逆流挽運一船數石至十數石而止陸路惟玉山至常山較爲平坦可通小車餘皆

攀崖踰嶺頂踵相接每人挑負日不過三四斗行不過  
數十里勞費不可勝計軍中常恐缺食未能迅赴戎機  
各省解到協餉甚少江西撫臣沈葆楨及布政使李桓  
深知臣軍飢困情形於省倉撥米穀二萬石陸續解抵  
廣信交臣後路糧臺動碾接濟復令江西現在各官捐  
助浙餉並各捐廉以爲之倡其爲浙省軍民計者實已  
無微不至然爲數無多不過暫時敷衍詢奏調各軍  
齊至何以鋪之請援照湖北減成米捐辦理湖南江西  
業經請發執照應自奉

旨允行之日爲始由兩省藩司查照減成新案填給皖南各

屬一體勸辦廣東亦委員前往照章收捐採購洋燄火藥以爲配駕兵船之用此外如有非浙籍而情願捐輸者聽從其便

上俞之於是就委王加敏勸捐湖南知府周開錫勸捐河口旋令開錫署溫處道以同知黃維詰署台州知府移署溫州知府並勸辦捐輸兼收鹽茶釐稅令同知李壽榛於衢城設牙釐總局暫辦官運甌鹽仍銷廣信饒州等處並收茶稅變通牙帖成案紳民一律准領委前按察使段光清勸辦上海捐輸二年正月二十七日附奏首臣軍餉銀軍火本省無從籌措支絀情形久已仰邀



聖鑒現因復地漸廣需兵愈多臣軍添募及按察使劉典所募新勇合計四千餘人轉餉到齊臺庫早空無以爲計此外尚須添造礮船僱募水師亦因經費無出暫未與辦而現在各軍之餉積欠已九箇月忍飢力戰雖未遽至譁潰而兵增餉絕大局堪虞計各省奉

旨協撥之餉自上年正月起至十二月止廣東每月十萬兩除抵撥蔣益澧一軍行資十二萬兩僅收過釐餉十萬兩尚欠一百零八萬兩福建自上年正月解過五萬兩以後每月三萬兩僅收過十九萬兩尚欠十七萬兩湖北每月一萬兩僅收過三萬三千四百兩尚欠九萬九

千六百兩除湖南江西撫臣於臣軍餉事最肯關心解  
款撥項未經截算外其湖北等省積欠如此之鉅在各  
省或以動撥頻仍不無爲難之處然以浙省較之緩急  
懸殊相應籲懇

聖恩飭下廣東福建湖北將軍督撫迅速籌解大批以資接  
濟如再遲延卽將各省布政使從嚴參處其湖南江西  
兩省亦請

諭令以後仍須源源接濟俾得拯此飢軍二月二十五日奏  
言臣令段光清赴滬勸諭甯紹等處紳商共捐銀二十  
餘萬兩除已捐未繳及解過甯波洋銀六萬九千圓外

復親解到臣軍銀六萬兩當此軍餉乏絕之際得此一  
款暫資敷衍軍心稍固臣已飭該員總辦浙江捐輸兼  
理上海鹽茶絲捐事務以觀後效又紹興克復浙東肅  
清應設立鹽茶專局抽收釐稅請以試用道葉熊辦理  
熊卒以知府王慶勳顧菊生代之並令許瑤光兼籌辦  
捐輸甯波則委甯紹台道史致諤督率同知汪元祥知  
縣臧均之等辦理委前溫州知府王景澄勸辦江西吉  
瑞袁臨等處米捐前後亦收銀十一萬餘兩並採辦米  
二萬石硝二萬觔解交廣信糧臺六月初十日奏言臣  
入浙以來因本省徵捐俱窮餉需奇絀是以奏於江西

廣信設立後路糧臺轉輸外省協濟餉需以資接濟今  
幸浙東一律肅清軍數日增師行日遠非由本省設立  
糧臺無以供軍實而速戎機擬卽於衢州府城設立閩  
浙總糧臺總司各軍支應請以代辦布政使署杭嘉湖  
道蘇式敬前奏調之湖南道員王加敏總司其事其浦  
城糧臺相距太遠應卽改爲轉運局專司閩省運浙餉  
需仍委前辦糧臺福建道員前署建甯知府汪達專司  
其事七月十四日奏言甯紹中外防軍月需餉銀六七  
萬兩臣所部浙閩粵各軍月需餉銀三十萬兩而各省  
協餉報解寥寥前由曾國藩撥歸臣軍江西河口景德

樂平婺源等處釐金一欸業經曾國藩咨開於本年六月初一日起仍撥還江皖臣處頓失此欸已覺拮据其廣東釐金一欸本係專濟皖浙軍營上年及本年春間尙每月撥解二萬兩數月以來未據報解閩海關協餉欠解十餘萬兩兵增餉缺較前倍形支絀而一切軍火米糧近來俱由甯波採辦請將洋稅一欸從緩起解泊省垣旣復移設牙釐總局於杭城並擇各郡縣衝要市鎮分設釐卡令知府高卿培試行票鹽卿培旋擢浙江運使仍督辦牙釐總局當大亂之後更章之初浙東徽州課釐日有起色旋因賊竄閩疆派撥重兵馳援餉事

復急三年十月十四日奏言浙省自經兵燹彫敝萬分  
新復地方不獨錢糧無可徵收且須另籌賑撫經費臣  
軍餉需截至本年二月底止積欠或七八箇月至九十  
箇月不等至今未能清釐新餉又欠兩月茲幸全境肅  
清擬將各勇丁陸續裁撤爲節省之計而裁撤一營總  
需銀二三萬兩計自八月以來新舊共撤四十餘營需  
餉甚鉅尙有數營應撤以餉項不敷未能卽遣本省軍  
需已形支絀復加以援江援閩各營餉項俱由浙省支  
應尤覺竭蹶萬分值此庫藏空虛本省欠餉尙難籌給  
所有應解甘餉懇請暫免協撥至廣東前奉

旨由粵海關月撥解浙江餉十萬兩旋經曾國藩奏請開辦  
廣東釐金凡釐務應得之餉先解浙江軍營次解安徽  
軍營其廣東協浙月餉十萬兩卽在釐金項下抵除仰  
蒙

恩諭允准特簡副都御史晏端書馳赴廣東督辦分批撥解  
皖浙軍營在案臣查廣東協浙之餉自元年正月奉  
旨之日起截至本年八月底止連閏共計三十箇月應協浙  
餉三百三十萬兩道員義泰於同治元年領解廣東協  
餉銀五萬五千兩又官捐銀五千兩除短平色實共收  
銀五萬一千五百四十七兩六錢一分係前撫臣王有

齡飭赴廣東催提應歸從前欠餉結算臣接任後僅收廣東撥給蔣益澧行資銀六萬兩又採辦洋鎗洋藥銀一千兩又前後十二批共解釐餉銀二十四萬兩臣因曾國藩軍營需餉甚亟又由釐餉內分撥二萬兩解赴金陵計浙省共收粵餉二十八萬一千兩其釐金項下實僅收二十二萬兩曾國藩前奏至八月底止共收廣東釐餉一百二十萬是臣軍所得不過十成之二現在浙省軍務肅清所有前項協餉自應停止蓋籌餉之難如此當金陵告捷之日卽奉

旨同治三年六月以前各處辦理軍務未經報銷之案准將



收支欸目總數分年分起開具簡明清單奏明存案免其造冊報銷至四年閏五月省城設局辦理所有大營軍餉收支同知黎錦翰實綜核之布政使蔣益澧按察使楊昌濬詳言查成豐十一年十二月楚軍各營入浙於同治元年正月十七日起開支薪糧湘軍各營於同治元年四月分起開支薪糧所有軍需其時全浙糜爛幾盡本省萬無可籌多賴外省接濟而外省亦各有軍務又道路多阻批解不前以致浙省軍需絀短萬狀積欠甚多前兼署撫憲左設法籌濟奏開米捐遴派委員分地勸辦並採買米鹽茶筍轉輸接濟雖薪糧積欠仍

多而本司等躬在行間目覩艱難時以開諭眾軍各知感奮全省以次克復遊委州縣籌給錢米招徠流亾商賈漸集因整頓鹽課牙釐規復甯關稅務復體察始終保全及最先收復地方或動碾倉穀或酌量啟徵及提查咸豐十一年征存未解銀欸並聲明大義剴勸捐輸兼籌併計輾轉補苴至支放各欸薪糧爲大悉照楚軍定章核實支給逐月皆有欠欸積壓甚鉅次則招募資遣整裝川費又次則採辦製造軍火器械及轉運各經費購買並仿造洋鎗礮洋藥火帽各價值而浙省襟帶江湖水師礮船最關緊要設厰趕造費亦不貲皆以餉

項支細核實急需方准支發仍力求撙節而其中製造採辦兩項亦多借挪挂欠又弁兵凶傷賞項亦查照楚軍定章分別支給其完善各標營與滿綠各營續奉

旨節放大員及陸續補署各員弁奉文收伍各勇丁分別額支防剿廉俸薪糧等項隨營差遣文武員弁書識夫役並投誠隨剿各營所有一切支款均不容稍有冒濫而亦必隨時照章放給以資口食業已竭蹶日滋又凡克復一城卽須遴委正佐各員前往署理撫綏彈壓難使枵腹從事亦須酌給半廉以爲辦公經費其地方例支各項如元年春季克復普夏季卽應酌量撥給以免曠

誤或新復地方鄰近賊烽尚多伏莽大軍進剿他城不能分兵駐紮復須酌募壯勇以資防守各屬驛站均已被燬其時各軍分道攻剿文報不容稽遲必須趕緊補設並照例分設腰站以資接遞而撫卹難民掩埋暴骨尤不可緩雖餉項匱竭異常亦必查照例案酌量緩急分別籌辦統計大營軍需悉心釐剔皆照實收實放之數開列自咸豐十一年十二月楚軍入浙之日起截至同治三年六月止其用兵兩年有餘計收各省協餉銀二百九十七萬八千一百五十四兩零咸豐十一年同治元二兩年地丁屯餉正耗銀四十七萬一千九百六

十一兩零又咸豐十一年至同治三年漕項正耗銀六萬六千五百三十四兩零各年契稅襍稅學租存留孤建及溫處等府屬芽茶鄉飲歲貢旗扁等款銀六千六百六十六兩零藩庫撥濟軍餉銀三十八萬兩鹽課銀九萬一百四十九兩零甯紹關撥解銀四十二萬三千八百二十八兩零本省米捐銀七十三萬五千三百七十三兩零本省捐輸銀七十一萬八千四百五十八兩零江北上海捐輸銀二十萬八千八百二十五兩零本外省各釐捐銀一百三十九萬九千九百七十八兩零牙帖捐項銀九萬九千五百六十九兩零各營兵勇

截曠銀三萬八千七百十七兩零採買米穀茶筍變價  
贏餘銀四萬四千七十二兩支放製造採辦各款平餘  
銀九千九十一兩零甯紹紳捐代賠前護關道段光清  
海關短征稅銀四萬八千四百七十五兩前閩浙總督  
耆發撫卹銀一千兩奉

旨查抄革員家資銀八千一百八十三兩零咸豐十一年同  
治二三年南米五萬三千八百二十六石五斗九升九  
合八勺各屬倉穀碾米七千一百六十四石九斗九升  
三合五勺江西等處撥解捐米五千三石八升採辦兵  
米除扣價外贏餘暨出庫米一萬九千七百五十三石

二斗七升二合採辦出屏殺五千七百十四石二斗三升共收銀七百七十二萬九千三十八兩二錢五分三釐零米穀九萬一千四百六十二石一斗五升五合三勺支楚湘暨閩粵各軍兵勇口糧銀五百八十三萬三百十三兩零滿綠營額支員弁兵丁廉糧馬乾各項銀七萬八千四百六十二兩零帶兵大員補支停廉銀六千七百十七兩零隨營文武員弁薪水書役薪工飯食紙張等項銀四萬九千四百七十七兩零招募各營勇夫安家整裝沿途口食川資銀十五萬一千四百五十七兩零隨營攻剿投誠勇丁鹽糧及裁撤資遣各勇川

資銀二十一萬八千二百五十四兩零陣亡故傷各員  
弁勇丁卹賞銀三十六萬五千七百三十八兩零製造  
仿造軍火及製造一切器械帳房各項銀二十萬二千  
一百九十五兩零興造戰船並各項運船僱用渡船等  
費銀三萬三千七百六十一兩零採辦馬匹硝磺銅鐵  
藥材油燭紙張等項銀十八萬八千三百十八兩零運  
解軍火軍米軍裝餉鞘木料及押運員弁水腳夫價等  
項銀十九萬三千二百六十六兩零通省官員并衛所  
各員廉銀十二萬六千五百二十四兩零地方例支各  
款及雩祭昭忠祠祭祀囚糧不敷等項銀五萬八千一



百八十九兩零各屬設立腰站銀四萬一百九十六兩  
零隨營工匠及糧臺各局護勇長夫口糧銀一萬一千  
八十九兩零撫卹各項銀十七萬二千九百十六兩零  
同治二年各大員衙門書吏心紅紙張銀八百三十兩  
零支軍需兵米及團練撫卹等米八萬二千八百九十  
九石零種籽穀五千七百十四石零收支相抵外存銀  
一千三百三十兩零存米二千八百四十八石零尚欠  
發各軍薪糧銀八萬六千七百一十一兩零傷賞銀八千  
七百四十四兩零其有不經大營收支者作爲第二起  
報銷詳云咸豐十年省垣失守文卷盡燬惟十一年以

後備局文卷尙全應卽以十一年正月爲始溫處設防自是年八月起甯郡設防自同治元年四月起截至三年六月共收支銀二百五十九萬五千五百一兩米五千一百八十七石零其賊遺米穀鹽變價充作善後經費一欸事見第十三卷大軍之初入浙也強寇堅城所在林立匪唯兵單亦患餉絀幾幾乎師行千里士不宿飽矣左公殫慮圖維擇人任使每語之云能爲吾軍籌餉卽與戰功無異苟有成效奏獎隨之故人皆樂盡心力仰賴

廟算周詳明見萬里之外凡有陳請靡不曲荷

允從鄰省協餉兩江福建各五六十萬江西湖南各二三十萬並無負

朝廷申命未及三載全浙蕩平綜核軍需不過七百餘萬而大營兵餉尙祇十分之八可不謂撙節之至者乎自來軍需支銷或多襍歛茲獨實事求是未嘗濫費

國家鈎金斗粟蓋由大帥廉明而司其事者亦克精心敏幹約已奉公故能盡絕浮冒侵剋之弊昔孔子論政曰足食足兵關中餽餉河內供軍史策皆深美之是以武侯糧盡引還相逃無仗而弱成敗利鈍不外乎此備誌其事於編末以見籌餉之艱用餉之節實爲軍事所倚賴

云

正折巴洛 卷十四

五

平浙紀略卷十四

平浙紀略卷十五

咸豐十一年冬奉

命督辦軍務巡撫左公率大軍入浙至同治三年八月全浙告平凡用兵兩載有奇而其初之失之也亦非一朝一夕之故浙省負山阻海錯壤閩吳近迤皖南遠控江右屬承平日久休養生息魚鹽饒沃人物滋豐財賦之利亞於江南自粵賊颺起建瓴五嶺之脊長驅入湘圍長沙不下於是浮洞庭夷武昌破九江安慶以踞乎金陵白馬青犢之眾實繁有徒乃逞其跳梁北拔揚州東守鎮江以爲固豕突池太之屬以蹂躪皖南江西而浙之

調兵籌餉遂無晏日矣始浙中不知兵適恃金陵大軍  
爲援歲供餉銀七十二萬上海軍月四萬未幾上海平  
而賊氛延徽甯間及滄安警歲數至當事輒少發兵扼  
威坪昱嶺關千秋關各隘慙以虛聲時復乞援於金陵  
賊非大股亦未敢決深入方黃公宗漢撫浙時議者倡  
言抽收釐金不果行而是其兼轄皖南之說後何巡撫  
乃疏請皖南道得奏事並設皖南鎮如臺灣鎮道之例  
將弁兵勇胥由浙定餉精軍火胥由浙濟倚之爲屏蔽  
而金陵大營亦視浙爲餉源猛將勁兵絡繹調赴甯國  
月餉至十餘萬前後統帥惟提督鄧紹良任最久咸豐

六年力克甯國城因駐師焉旋丁母憂不聽去紹良宿將前守桂林長沙功最著轉戰數省賊輒披靡自入皖南牽制於浙卒以餉絀兵單未能大張撻伐賈志以終先是五年春賊由祁門以竄徽防統領浙軍之福建汀漳龍道徐榮樂之於漁亭戰敗陣亡賊遂連陷徽州歙休甯婺源四城浙撫令金華知府石景芬等率兵會民團收復之及六年春賊復由浮梁樂平祁門竄徽浙防昱嶺及威坪賊知我有備又由太平涇縣徑犯甯國三月二十八日陷之並竄廣德建平賊騎直薄紅林橋且入浙境賴總兵秦如虎適至擊之而退而甯國府城久



爲賊踞鄧紹良旣授浙江提督乃統領各軍萬餘敗賊於東溪橋復潛師取七里墩遂薄城下圍攻半載餘始得克復當是時李公績賓戰死三河蘇撫吉爾杭阿公戰死高資金陵大營旋潰向公榮卒於丹陽蘇常大警而甯國旣陷浙防尤岌岌微紹良幾殆其後參將師長鏢知府畢大鈺都司徐勇皆戰死婺源徽防且無歲不警矣江西之袁瑞撫建前後告陷廣信亦屢失賊常往來常山玉山之間自是衢防始重調貴州安義鎮總兵饒廷選鎮衢州廷選在閩嘗平小刀會恃部將畢定邦賴高翔健闕有功實無將略六年八月率軍六千餘往

援廣信不立一營亦得畢賴二將力戰解圍廷選獲晉  
勇號八年春賊僞翼王石達開貳於金陵賊首欲自據  
一方由江西河口鉛山廣豐繞竄江山以圍衢州廷選  
敗於大南橋常玉防兵退保郡城金衢嚴道繆梓率數  
百人擊賊城下大破之遂與衢州知府馬椿齡西安知  
縣李甫出及廷選登陴固守甫出者李文襄之七世孫  
也鎮道故咀晤防務一柄於道聞警數日守具悉備楊  
國正瞿先仲兩將隸麾下所部並能戰民倚賴之西安  
將軍福興由廣信奉

命來援軍既至索犒洵洵出戰而勝仍閉門按甲請再戰不

允旋奉

廷旨切責愠甚遂還江西同知李元度亦由河口入浙其將  
彭定童梅華郭世源彭斯舉等軍於屏風關水田遙爲  
衢州聲援並隱扼賊回竄江西之路賊西陷常山開化  
南陷遂昌松陽以三月二十七日入處州與溫州僅隔  
一江夕烽相聞知府王景澄集溫郡兵屯青田以上防  
賊順流下竄厚集民團與官軍犄角並分委員紳管帶  
兵練於永嘉之上下河鄉西溪柘溪瑞安之大羅山大  
巒嶺樂清之桐嶺平陽之古磬頭泰順之百丈日等處  
水陸要隘嚴密防守又於溫溪小荆等處建設浮橋爲

水師礮臺就兩岸山險爲土山礮臺以固甌江之衝巡撫晏公端書檄溫處道俞樹風溫州鎮葉炳忠率兵剿賊而令景澄辦理防堵兼支糧餉金陵大營先後遣總兵明安泰李定太周天培督辦徽防副都御史張公弮遣總兵周天受各來援浙明安泰所部仁勇二千最無紀律軍中多婦人乘馬招搖過市民皆怪之浙撫合進攻處州由蘭谿金華入縉雲沿途擄掠至桃花嶺下之鉛錫場鄉團知其可侮值夜雨大呼賊至軍果潰卽奪輜重並拾其棄械而戕之死者過半時周天受適由金華率親兵數百覘賊踵明安泰之後亦喪其精銳而還

明安泰僅免遂不能軍俄撤歸自是民團始輕官軍生  
心掠殺矣天受退守金華城所部三千餘人佔住民房  
復因買牛不給價兵與團鬪殺傷數十人民心滋不悅  
又令周天培率所部出諸暨陸路進防永康乃天培由  
錢塘江乘舟至蘭谿檄之不順幸賊以全力注衢城俱  
未遑深入時衢防各兵二萬有奇金陵及徽甯兩防徵  
調踵至不相統制於是晏巡撫奏以周天受督辦金處  
而請張公芾移駐嚴州督辦衢嚴未至會賊之考竄壽  
昌者爲李定太所敗而衢州城守九十一日數破賊賊  
掘地道五皆不成食盡力疲解圍宵遁天受遣吳再升

等尾之遂迎復武義永康縉雲宣平而溫州鎮道及陳  
開選瞿先仲等亦於六月十五日克復處州賊由松陽  
龍泉竄入閩境署松陽知縣張士超死之晏巡撫檄總  
兵饒廷選副將張騰蛟援閩又令副將陶茂森韓廷桂  
出江山分兵出龍泉援浦城而全浙已肅清矣浙警駭  
聞中外震駭援師大集餉不足用鹽運使楊裕深議減  
糶各屬常平倉穀又疏請截留漕米十九萬石變價充  
餉

朝廷曲從之密令胡公興仁來浙訶事俄授巡撫頗以皖南  
糜餉爲慮始議減之是冬賊圍灣汜截文英鄧紹

力戰死金陵遣總兵傅振邦擊賊皖南名將也署杭州知府何紹祺亟言於巡撫滋欲任之而振邦懲紹良前轍堅辭乃以提督鄭魁士代魁士治軍嚴厲驟繩其下皆怨之又負氣多所陵忽久之不能和當事劾之則稱疾棄軍獨率親兵赴東壩而提督江長貴周天受皆隸徽防號敢戰張公芾之所獎拔也天受素謹事芾且新有功於浙幕中多才文傲斐然可觀遂以代將甯國而仍秉節制於新安內不平浙餉又廢之天受未能恩威迭用撫馭饑軍幾至譁潰識者固已憂之歲己未十月江皖就浙江貢院舉行鄉試諸生及媼媪僕從由皖南

來者眾且盈萬關隘莫能詰賊之南下也固心豔蘇杭  
金帛子女未嘗一日忘惟久恍浙中虛聲又不諳路徑  
未敢徑犯會逢是役其渠魁乘便入偵備知虛實其時  
巡撫羅公遵殿甫蒞任甯防告警石埭踞賊竄入樓子  
店藍山嶺副將石玉龍游擊申明照守備鄭國泰等陣  
亡周天受以黃池兵退飛書請援羅公知其不足禦寇  
而鄭魁士軍於高涓乃奏請與甯防軍爲犄角又函商  
江督以徽防兼總甯防議未定值江南軍克九洲金  
陵賊窘甚僞忠王李秀成僞侍王李世賢及吳廷彩陳  
炳文譚孝先陳坤書李尙揚諸賊由六合渡江集蕪湖



謀擾浙以分官軍之力而紓金陵之圍甫度歲卽率黨由南陵疾趨十年正月周天受遣二將往禦勢鈞弗相下兵又少不戰而潰賊遂連陷涇太平旌德甯國四縣天受不能救二月初三日廣德州又陷浙省門戶盡失初八日賊出東亭湖陷安吉十三日由泗安陷長興時惟有李定太一軍二千餘人在杭倚之甚重警初聞或謂宜調其軍徑出獨松關分扼泗安東亭湖兩路並屯兵百丈關以固邊圉而軍已由水程赴援待船一日夜又留湖州一宿進援泗安改援安吉皆不及敗於梅溪退守湖州十五日賊進攻湖州直薄青銅橋守軍三百

潰走賊從之定太與紳士趙景賢湖州知府瑞春歸安  
知縣廖宗元等亟登陴禦賊礮及青銅門頗傷士卒會  
總兵曾秉忠以長龍礮船六十艘至自江蘇銜尾鳴鼓  
軍容甚壯急擊賊走之謀稱賊沿太湖趨夾浦惟宗元  
深以省城爲憂十七夜賊從山徑陷武康十八日走狗  
葬夜焚良渚聞者尙以爲土匪也十九日黎明賊至武  
林門已入十數騎人猶未覺統帶寶勝勇候選道陳炳  
元登城望知其爲賊始傳令閉城擾攘聞賊之闖入者  
竟不可蹤跡云蓋賊稔知是日爲觀世音大士誕辰大  
吏必至天竺欲邀戕之湖上乘勢搶城而未知故事皆

以十八日預祝也遂分圍武林錢塘湧金清波等門城中除滿營外僅有撫標各營兵二千餘署鹽運使繆梓傑勇二百協防局團勇三百都司姚發科福勝勇五百城外則有江南大營新募江西勇二千人過境未去其按察使段光清所部親兵四百皆先出守餘杭之獨松關爲賊所格二十日光清由獨松關回援且戰且行滿營應之乃得入城旋調甯紹台道仲孫懋興勇二百助守二十二日賊登玉皇山段光清繆梓各出隊民團隨之見賊驚潰官軍亦不戰而歸二十五日賊於湖上立十餘營光清率親兵及江西勇三路出戰皆敗初羅公

知浙軍不足恃奏調道員蕭翰慶由湖北率訓字營赴浙過徽州值太平旌德不守張公芾令助勦克復三城又留其副韋志俊一軍翰慶馳躡賊後至湖州虹星橋與賊戰以兵單敗死芾遣革職提督米興朝由徽州來援頓富陽不進縱兵掠爲民團所圍殺傷數百時賊踞饅頭等山爲壘取淨慈寺羅漢像環壘執旂城上望以爲賊發礮多中之賊居高瞰城中礮子雨落至是守陴者皆怯矣始被圍巡撫飛章告急並乞師於金陵大營隨遣提督張玉良赴援二十二日副將向奎率前鋒千五百人至平望取道海甯赴杭屯清泰門外李定太由

湖州率軍來援均與賊隔絕二十四日張玉良率所部二千餘人至蘇州吳中大府意謂援杭且不及欲合向奎駐嘉興張玉良駐湖州陰固蘇省門戶以故玉良過常蘇皆飲之酒俾閱城置守而後行杭州城中段光清主戰繆梓主堅守望援師眼穿賊於清波門外西竺庵掘地道日夜擊金鼓亂其聲丁憂紹興府照磨陳奉勢請開城內地道以防之繆梓以爲然連日雨甚工不得就二十七日卯刻雨止地雷忽發城塌數丈賊湧入梓在城上禦賊死之城陷巡撫羅公遵殿署布政使王友端杭嘉湖道葉堃甯紹台道仲孫懋署杭州知府馬昂

霄著仁和知縣李福謙皆死之候選道陳炳元亦巷戰  
陣亡浙屢警旋平士民習而安之此次賊來剽疾遷避  
者不及十之一二賊圍城鋪戶多集丁壯助守及破猶  
力鬪傷賊頗多是夜賊仍退出城二十八日賊眾盡入  
恣行屠戮死者填路人馬不能行將軍瑞昌與都統來  
存佐領傑純率旗兵力守滿城婦女亦撻矛刺賊賊憤  
屢攻死傷枕藉終不能克張玉良於三十日晚行次湖  
州三月朔日乘小舟以六百人進抵武林頭知省城已  
失初二日全軍抵武林門城外無賊營故莫之阻是夜  
五鼓令勇士由艮山門民屋上置梯攀城大呼先登斬

其守賊十八賊見張宇大旂驟驚愕謂副帥張國樑實  
來又以滿城未下在其肘腋所過城邑均未置守既飽  
掠恐官軍大至合圍斷歸路且揣知金陵大營空虛謀  
還襲之卽於初三日棄城由湧金清波門走平糶出獨  
松關破孝豐竄回甯國縣廣德州一帶金陵續遣總兵  
熊天喜來援由安吉長興進敗賊於廣德克之並復建  
平此次賊來犯浙者不及萬人原爲圍魏救趙之計初  
不意杭城空虛而破之之易也卒以人寡勢孤不守而  
去浙境乃得復清賊旣遁還糾合江北死黨由句容林  
陵關回撲金陵大營甚急城賊突出內外夾攻亟調回

援浙各軍未至而大營已潰賊遂由丹陽常州無錫進陷蘇州布政使王公有齡先已授浙江巡撫於三月赴任又假紳士趙景賢令箭督守湖州向倚金陵大營若長城故但嚴湖州一面遮皖南而未籌備嘉興及大營潰張副帥戰死丹陽常蘇並破浙中大震張玉良師潰蘇州乘腳槳船以親兵數人一日夜駛至杭其他將卒絡繹奔潰殆二萬人浙西鼎沸巡撫亟遣人持令箭止之俾駐嘉興多有越過杭城四走及散入江西者已而賊李世賢由金壇回撲提督江長貴軍潰平望賊進偪嘉興四月二十六日城陷府教授蔡兆輅及訓導張詠



死之玉良收集潰卒萬二千人以圖嘉興於是爲之辦糧餉製器械百計補直經費大絀則取挹於甯紹而十倍紹捐之議起十倍者謂視初捐兵餉而十其數也玉良六月出師盛具舟楫而行浙旣無重兵勁旅專任客將士卒悉潰敗之餘驕驁不可復制遠近駭然惟湖州團練多兵勇少主強客弱節制整肅守具嚴備省城亦浚濠脩隍爲固守之計當是時民團四起金華蘭谿城鄉團眾至十餘萬悍而無律藉殺逃勇爲名專害行旅取資橐死者常盈舟雖持令箭公文者不得免焉溫台民風素勁團且勇而遷地弗良集台勇爲軍輒僨事遺

掠爲各處民團所殺者殆千餘人杭屬惟餘杭富陽有團前此賊竄出省道經餘杭或誤走富陽界兩縣民頗邀之獲利無算賊銜恨至深是時僞英王陳玉成以十萬眾由皖南寇浙破餘杭杭州戒嚴賊旋退去甯國府已於上年十月失陷全軍俱覆周天受戰死而杭州西北恃湖州爲屏蔽賊慮夾擊不敢偏惟北一面當賊衝張玉良旣至嘉興軍於三塔灣白衣庵肉薄攻城七月十七日轟破南門堦口城賊半逃我軍阻水不能入二十四日湖勇通賊陣亂各營官畫船繡幕攜眷舟居者先奔河狹舟爭水師亦亂軍潰至石門知縣李宗謨請

駐守王良佯諾夜半走天明賊至宗謨死之而嘉善於  
十二日平湖於十五日桐鄉於二十六日次第失陷賊  
得石門卽棄去越日復之旋爲賊據毀城爲壘平湖亦  
越日復之八月初五日再失又復之至十一年三月初  
八日鎗船通賊導之破海鹽初九日破乍浦副都統錫  
齡阿死之復破平湖於是嘉興惟存澈浦一城浙西與  
江蘇皆瀕海澤國地犬牙相錯兵與餉交相籌借有輔  
車臂齒之勢蘇州陷後署巡撫薛煥駐上海縣城平湖  
三泖與滬通十年七月至十一年三月嘉郡旣失正道  
雖梗而鹽平乍澈尙存浙中軍書可出海甯繞之以達

上海其守鹽平者有革職提督米興朝副將黃金友革職副將張威邦水師提督曾秉忠及其弟守忠而乍浦滿營亦苦戰卻敵故嘉興由漢塘一路不能竟撲平湖至是土匪導從旁襲黃金友力戰陣亡而杭滬之路斷矣杭州將軍瑞昌奉

旨總統江南諸軍不能離滿城督戰始議攻嘉興不果賊僞聽王陳炳文僞榮王廖發受踞嘉大造僞府折祠廟梁柱以供材開嘉善千竈以供陶攬蘇州香山梓匠以供役盤龍翔鳳重矩疊規前後七重外列僞朝房中有崇陛繞以禁城七邑鄉官各承修一重迄至克復之日工

尚未竟費用皆取於民間而爲之剝削者鎗船博徒居多嘉郡水國饒沃士秀文而民習好賭博無賴者修造兩頭尖小輕船上架鳥鎗始護私鹽繼護賭做勾通胥吏作奸犯科無所不至其風延及湖州頗預官長每收漕時恐鄉民滋事或轉雇之以資彈壓而鎗船益無忌憚其廉幹者欲加懲創令尚未行得吏通風輒先颺去持之過急又或爲所窘辱白道光之末養癰不治以至賊擾江南愈務姑息而勢愈熾及郡城淪陷亦有受招入伍願立效贖愆者如石門一城曾招鎗船克復是也第陰鷙凶頑性多難革旣爲士著誰富誰貧歷歷可數

而又熟識支河汊港故鹽平乍浦及海甯四城之破皆其所爲迄今嘉興士民猶切齒言之其禍烈矣夫禦外寇者先清土匪當於平時豫謀且可乘用武之勢剪除之若強寇在門坐視其因風生燄豈有及哉



平浙紀略卷十六

咸豐十年春杭州旣失旋復未幾嘉興告陷賊雖據我門庭而杭湖守險難攻浙東及金衢列郡固皆完善也是秋徽州復失賊由淳安竄嚴州副將封九貴死之九月初七日城遂陷復分股竄富陽總兵劉季三副將劉芳貴皆力戰而死二劉俱勇將而芳貴寶慶人也尤驍健至是陣亡富陽遂不守浙撫王公設奠於仙林寺哭之哀時張玉良收嘉興潰卒進攻嚴州復之十月賊由富陽餘杭兩路分撲杭州城守數日出擊獲勝始得解圍而自後餘杭富陽桐廬各城旋復旋失賊幾無後顧



慮則由婺源出入江皖履若通衢而江西饒信之防亦  
棘十一年春賊僞忠王李秀成僞侍王李世賢先後竄  
江西擾及撫建袁臨其先恪靖伯左公方以四品京堂  
襄辦兩江軍務軍於景德鎮屢破賊於廣饒之間江督  
曾公倚以爲重至是大破李世賢於樂平又連破之婺  
源清華街及柳家灣橫山等處賊喪魄東走仍由婺源  
竄廣信玉山三月十五日陷常山并糾范汝增黃成忠  
練業坤三僞王由玉山入江山境守兵皆潰范汝增等  
由湖口村繞犯處州李世賢率大股賊拂衢州城而過  
十七日由靈山撲陷龍游知縣龍森死之並陷湯溪以

犯金華賊之在江西也不踞守城池惟日掠人益其眾  
識者知必回竄或謂宜募湘勇數萬自成一軍且慮省  
城穀少思有以賑之並議於通江門外夾築土城屬江  
便扼守以護運道事皆未及行時張玉良屯蘭谿金華  
知府王桐聞警乞師十八日玉良率親兵百人抵郡城  
中團練謂自能守禦不需官軍力城西通濟橋跨大河  
陸路舍此無由入議折之又不得遂玉良闕城而返十九  
日賊以六騎先至關城皆潰李世賢乃率眾踞之浙東  
大震巡撫王公延請諸將入宴問孰往禦各默不言處  
州鎮總兵文瑞江西援浙將也所部三千人食江西餉

巡撫待之素厚文瑞亦彬雅知禮義自請行五月朔日  
次諸暨初諸暨東鄉有團首何文慶創蓮花教夥黨甚  
眾陰謀不軌知縣許瑤光曾任諸暨得民心十年冬再  
署縣事欲捕之而力未逮及是省中以文瑞兵少給何  
文慶翎頂軍火器械并錢萬串檄令率團五千人受文  
瑞節制從擊金華文慶擁眾數千居江東五日殺文軍  
四人冀激而生變許瑤光曰此土匪也急擊可解若縱  
之入城則殆矣遂出隊戰於東門大橋敗之追殺數十  
人乃散文瑞率所部及游擊曾得勝貴順勇千人進駐  
金華之孝順街又有在籍提督余萬清者詭請助勦領

火器數百藉斂錢三十萬串每村夜以竹竿然數燈照之而已張玉良軍在蘭谿蘭谿民團憤其平日之擄掠又以不救金而回蘭詈之旋因掠一火燄店相攻殺各傷斃二千餘人因拔營走沿江擄船而下賊由金華進陷蘭谿江路遂梗玉良旋率兵由嚴州進蘭谿欲報民團之仇下令肆殺老弱婦女無一得免並縱火焚其屋女埠上下七十里皆灰燼三衢被難士民舟居蘭谿下游者同時爲兵擄殺以下百計知府程兆綸擊楫往救亂兵戕其幕友血濺兆綸衣兆綸憤甚訴之玉良無一語亦不出一令乃赴省上訴王巡撫慨歎而已兆綸無

如何嘔血死於杭是役也漂尸如木柶蔽江而下可謂慘矣先是有參將王浮龍者帶奮武軍千人赴蘭谿防堵歸張玉良節制玉良分其軍爲三以三百守蘭城以三百守界址嶺而浮龍自領四百守小方嶺及蘭谿旣失玉良之兵先退浮龍腹背受敵仍鏖戰殺賊至五月初五日卒以眾寡不敵而死其時小方嶺居民未遷賴浮龍捍禦十數日得以從容奔避又其馭軍有法未嘗擾民故蘭谿民團與兵爲仇惟見奮武軍之腰牌號衣無不互相救護其感人深如此浮龍直隸人武進士以戰功擢至甯海參將嘗守省城慶春門城樓夜不解

衣日不下城者半年巡撫王公異之令募勇千人卒以  
血戰陣亡左公奏云其先未能專任而盡其長卒以分  
兵而孤其勢孤忠偉績掩抑堪傷益痛惜之云浙撫令  
米興朝吳再升各率眾二千餘爲文瑞後繼未至諸暨  
而孝順街軍潰六月朔日義烏失守賊蹤突過查林蘇  
溪諸暨教諭韓煜文率民團扼善坑嶺賊不得前旋棄  
義烏去官軍畏暑不進七月米興朝吳再升曾得勝並  
入義烏東陽土匪陳上達殺舉人吳榮誥爲亂米興朝  
移軍勦之先是浦江告警都司劉嘉玉率衛勇千人營  
於五麓嶺及蘭谿賊勢披猖文瑞進守浦江并令副將

劉長培固勝勇千四百人由諸暨況文榜川勇二千人由小力埠抄山路繼之初四日賊大至五麓嶺守軍退入縣城賊圍之文瑞繼書告急適饒廷選自蘭谿敗歸遂令援浦先是紳士胡光墉結好於前皖南道李元度請檄募安越軍八千人援浙會賊由萍鄉萬載竄援醴陵瀏陽等處湘撫雷元度禦之賊退道出江西又雷助剿輾轉數月而浙事已裂新調浙江布政使林福祥由弋陽募定武軍三千同知陳大力新湘勇一千知縣張振新新寶勇二千先後抵衢時龍游雖無賊踞衢杭陸路已梗城中兵勇數千多貸食民間新軍至者無所得

餉主客將勢如水火福祥自攜重貨或謂宜出以犒軍  
並收兩軍張左右翼從龍游水陸俱進以攻蘭谿而衢  
防出軍攻湯溪則賊勢分而下游之禍亦紓若但圖與  
杭兵合并同入囊口失用武之利且兩敗福祥不能從  
乃聽陳張兩軍自行旋以礮船載親兵輜重南岸列隊  
並下僅乃得達遂會蘭谿軍張玉良饒廷選各營三面  
攻城與賊相持月餘聞嚴州陷諸軍潰至義橋爭舟而  
濟俄報總兵羅大春復嚴州眾心稍定七月十四日廷  
選率眾六千援浦江以周璧閩潮勇五百爲前鋒潰於  
鄭義門逾數日鹽運使莊煥文率所部千人及閩省道



員張啟焯繞道處州率雲霄勇二千來援廷選整隊同  
進五日行八十里八月初二日及鄭義門又潰巡撫王  
公憤甚致書於廷選略云省中庫無餉倉無米出陣之  
兵不見一賊而潰新置鑼鼓帳篷盡棄度日如年度夜  
比年更長咨查首先潰退之人廷選乃殺其不悅者二  
人以解未幾紹興又急省中無兵可遣王公乃令副將  
楊金榜率親兵振武軍千五百往守諸暨營於城南五  
紋嶺饒莊潰軍營於城東金雞山及城西七岡嶺時軍  
資盡棄亦不遑深溝高壘但築土牆三尺以葦箔蔽風  
雨林福祥住城中日惟飲酒而已文瑞知無援於初四

日衝圍走桐廬山中浦江遂陷賊分路犯諸暨十三日  
西南鄉團奮勇殺賊斬首四百級十四日西鄉團敗賊  
於蒲團嶺南鄉團敗賊於豐江均約官軍會擊僅出城  
列隊終不敢近賊二十一日賊知軍怯乃大至民團陣  
亡二百餘會僞來王陸順德由浦江富陽山路出和尚  
店渡臨浦以二十四日陷蕭山我方防南路而賊已抄  
過北路裏官軍中間眾益洶洶諸暨東達紹興北走杭  
州是日楊金榜退回省城林饒兩軍出東門聲言援紹  
過江東橋亦折而北歸留奇勝勇駐橋旋多散去何文  
慶舉眾投賊二十五夜城中民盡走知縣許瑤光然燭

南城堞賊猶逡巡不敢備二十六日巳刻四鄉火起始  
有賊騎入城遇瑤光以長刀連劈之暈絕於地俄蘇爲  
民扶出昇至楓橋以免蕭山諸暨并失而紹興危矣紹  
之爲郡與杭州隔江相距百里而遙北濱海西北當錢  
塘江諸暨楓溪之水由西南出臨浦義橋旋繞之其東  
則曹娥江也惟正南一綫山脈與諸暨嵎相聯屬士秀  
民樸風氣素柔自嘉興不守

廷命前漕運總督餘姚邵燦前副都御史會稽王履謙先後  
爲團練大臣欲以紳助官以民助兵凡賊擾各省皆有  
之不獨浙也顧羣然聳異相與奉以尊大燦知事不可

爲謝去履謙愿易欺有王梅溪者游幕江蘇二十餘年  
王巡撫在蘇時嘗發其奸通檄各屬禁勿關聘乃歸越  
銜之刺骨及撫浙以指事頗賈怨又官紳釣峙咨牘往  
來各指摘文句謠詠漸興王梅溪從中構煽遂若仇讎  
履謙不知兵漫無布置名爲全省團練實止山陰會稽  
蕭山又惟郡城內有器械旂幟招水龍勇及坊巷游民  
以實冊籍反欲專制浙東餉益市洋船鎗礮務自張而  
實不足恃當金華初陷巡撫以歸安知縣廖宗元屢保  
湖州有將才檄署紹興知府而調懷清署杭州王履謙  
數貽書留清當事復緩宗元檄久不得之任又議令署

甯紹台道張景渠來脩守備以鹽運使莊煥文所部閩  
勇守城腹謙信羣言謂兵適擾民不如團練自爲守力  
沮其議愈相咀晤浦江危急廖宗元始受事至則促脩  
城垣令移附郭厝棺議設柵扼大道民皆以爲不便浙  
省習用洋銀咸豐七年以來每圓重七錢三分值幾一  
兩嗣經喪亂奸商益壟斷於舊號光板爛板輕板繡板  
外復立大糙小糙淨光名目任意軒輊價相懸殊旦夕  
之間亦有漲落把持盤剝民甚病之嘉滬路斷惟紹興  
居甯杭之中益操利權宗元嚴禁之大拂商情積此數  
者俱含怒未發九月二十六日內河礮船禦賊錢清而

挫退至昌安門外摘食河中菱角團民責其騷擾毆之  
譁甚宗元出城彈壓民間聞賊前由臨浦入蕭山得燬  
船始濟又以錢清之敗營官陷賊中遂誣水軍通賊宗  
元意守城尙資礮船撫慰之而斥其妄語漸侵宗元謂  
亦通賊毀其肩輿王履謙聞變往勸不止比入城觀聽  
者益眾間通賊語更相唱和奸民王淮三等五人嗾眾  
毆宗元傷甚扶入署昏卧不可復出於是團民擣水勇  
及宗元親兵數十人殺之履謙亦弗能禁宗元先請調  
楚軍二千履謙不聽入城協守二十九日賊偪郡城團  
練聞然盡散城陷知府廖宗元死之惟謝主事之黃頭

姚勇與賊巷戰於大善寺前護王履謙出走上虞賊又  
至知縣胡堯戴死之履謙乃航海入閩賊遣人聘請山  
陰峽山前戶部郎何惟俊惟俊從容作書戒賊無殺百  
姓投繯死屬縣次第陷歿論者謂嘉湖甯紹根也餉源  
所出也衢嚴節也所以通江皖也溫台處葉也邊圉之  
外障也以形勢言之金華乃浙東之心而亦浙西所視  
爲安危者也自十年四月嘉興不守湖州蔽賊比於睢  
陽日不暇給及十一年三四月閒浙滬隔絕衢處被擾  
金華告陷八月嚴州又失然猶恃甯紹接濟軍餉以東  
道之通爲四達之漸至是紹興失而杭城孤危愈甚西

存一困守之湖州東留一彈丸之海甯則幾無節不斷  
無根不掘無葉不翦矣諸將由東陽諸暨退回饒廷選  
所部閩軍習不爲壘居城中供護林福祥出軍望江門  
外賊至潰還楊金榜營於饅頭山十月初二日賊從慶  
春門繞至清泰門金榜率六成隊擊退欲以通江路也  
西湖賊見金榜出戰從淨慈寺後撲襲其營金榜收隊  
而營已失敗賊復回來擊軍潰自刳不殊爲賊慘戕而  
死僞聽王陳炳文於羅木營結五壘初五日張玉良至  
自富陽文瑞況文榜踵至力攻羅木營破之兵疲甚暫  
憩爲食饒廷選謂姑徐之城中無應者賊乘夜仍搶築



成壘遂合圍十門並於清波門外及鳳皇山夾木爲城中實以土鑿穴安鎗礮日夜轟擊張玉良屢攻賊壘並令江頭礮船夾擊弗克十九日玉良送客出營門還中賊飛礮折右脛將士以船護送至聞家堰而卒城中奪氣二十五日閩軍自請攻羅木營饒廷選阻之王公不聽廷選乃令部下俟天明齊出放空鎗而回圍至十一月初旬城中糧盡升米值銀一兩候補道胡元博主議借捐民踴躍從命集錢十餘萬串而已無米可購飢民哀號滿街市浮萍蕉葉草根樹皮皆盡折取新舊皮籠爲食僵斃相望其後死者或割食先死者肉以延殘喘

將軍瑞公病甚乍浦副都統傑純屢欲出戰而杭州副都統關福堅持不發兵初九日有賊從望江門外來投誠林福祥信之給黃金二百兩及軍火號衣紅藍頂花翎約官軍四鼓出隊彼卽燒海潮寺賊營爲應至期如約往賊先發空鎗礮旋加彈多傷士卒追至城根適鳳山門空心礮臺火起城幾破副將曾得勝力戰城上賊始退是日武林錢塘清波門外各營皆投賊十三日有放出監犯徐姓通賊約期開城門事發斬之至是兵食亦盡碾義倉穀七千石并殺馬驢以餉王公與士卒均甘苦至以糠粃攪米煮粥對之流涕林福祥以下其家

人或日食蠟燭數枝軍士有搜取民家食物者上匪導之擄掠城中大亂巡撫自出禽斬數人勢稍定城之初圍也居民備粥飯擔送城上餉軍若需用木板蔴袋等物片紙下立即輸送而是月杭州紳上胡光墉以白蠟殼船由甯波運米二萬石從黃道關入江十五日泊三郎廟守數日湖州紳士趙炳麟亦由上海以輪船運米至遇颶風返皆不得通時賊糧亦罄李秀成欲回蘇州度歲陳炳文調知城中虛實不肯去延至二十八日守城軍已數日不食乃各潰散賊於巳刻由各門梯城入遂陷巡撫王公有齡學政張公錫庚處州鎮總兵文瑞

署布政使麟趾按察使甯曾綸糧道暹福道員胡元博  
彭斯舉朱琦署仁和縣知縣吳保豐皆死之初彭斯舉  
度地勢復議自望江門築甬道適福建新解儼至今斯  
舉試放礮裂傷額幾殞議遂格吳人候選主事周騰虎  
慷慨奇士王公撫浙招至杭州檄辦洞庭山團練而太  
湖已爲賊踞則由山路間關走廣信謁左公軍門備陳  
杭州艱危狀旋從江督曾公於安慶請援皆不及城中  
惟日望李元度安越軍來援先是李秀成於八月由江  
西竄浙賊眾二十餘萬九月朔攻衢州數日不下乃解  
圍東走以徇杭州渡至危急衢警漸平元度亦至因無

餉壁城外旬餘進攻龍游兩月不下接杭城告急帛書  
亟商發衢防兵接攻龍游不應乃收軍赴援杭州既陷  
城中官五六百無一得出居民六十餘萬半已餓死時  
嚴寒被驅出城凍死江干及被擄殺而死者不可勝計  
巡撫王公先令壯士持帛書遺摺并絕命詞縋城出由  
海塘走黃道關交胡光墉轉達上海著蘇撫薛煥爲之  
代奏其略言紹興失而杭州不守咎由紹紳團練大臣  
士履謙臣死不瞑目云李秀成以禮殮巡撫學政及文  
總兵題曰忠臣某官之柩交林福祥暨署杭巡道劉齊  
昂送之上海既至當事不臨奠而發視之貌皆如生王

公頸帛猶繫張公目忽動血淚迸落人皆異之十二月  
朔日滿城亦陷將軍瑞公縱火自焚副都統傑純力戰  
死之闔城皆殉初三日賊遂攻破海甯州而處州旋復  
旋失者再台州亦先失處州知府李希郊署台州知府  
龔振麟署台協副將奎成皆死之賊由嵎奉化兩路偪  
甯波卒不守惟湖州守堅至同治元年五月初三日始  
陷知府瑞春死之城中官吏無一從賊者擁趙景賢至  
蘇州日罵賊求死李秀成禮敬甚至欲釋之歸因而乞  
款爲他酋所阻至次年三月十八日賊譚紹光不能堪  
擊以洋鎗死之湖州自十年二月卽自爲戰守賊數大

舉圍攻出奇制勝無不負重創以去間復平望廣德兼  
援杭州威名甚著及杭州再陷孤城獨存四圍千數百  
里皆賊日益危蹙時

朝廷已授景賢福建糧道重惜其才

傳旨令棄城之任景賢衝圍可出顧不忍去元年二月猶敗  
賊七里亭賊知不可力攻遠合長圍絕其餉道城中十  
餘萬人餓甚至是千總熊得勝開門降賊乃得逞焉左  
公方攻衢州城東北賊壘聞報深爲惋惜當是時全浙  
淪胥惟衢溫兩郡城及定海石浦龍泉慶元泰順五廳  
縣僅存而衢州一城之外幾成焦土溫州前金錢會匪

入城城外復被賊擾左公疏中已備言之金錢會者咸  
豐八年金華人周兆榮以妖術教人喫茶於青田永嘉  
兩界山中投錢沸湯中焚符誦咒飲之刀棒不能傷謂  
之銅錢壯是時粵賊方陷處州村民懼招寇糾眾掩焚  
其巢兆榮流轉至平陽錢倉鎮易名榮與埠役趙啟相  
結啟故無賴自云山中得金錢七當貴遂糾合奸民朱  
秀三謝公達繆元張元孔廣珍劉汝鳳等爲金錢會人  
給銅錢一文曰金錢義記紅帖一帖分八卦各數千人  
無少長皆稱弟兄又言陰受粵賊口號入會者無賊禍  
誘脅日眾明年延及瑞安生員潘英林景淵鄭日芳奸



民黃孔標林福瑞黃梅宇等皆從之已而署平陽知縣  
翟維本以事召趙啟入城重犒之去益斂財置器械爲  
逋逃藪咸豐十一年春事稍露維本誤聽奸人議言之  
道府給牒改會爲練劫官同祭旗勢愈張瑞安孫氏方  
督治團練欲討會遂相仇六月劫林洋焚陳氏謝氏七  
月焚雷瀆溫氏團首陳安瀾等募台船水陸攻錢倉匪  
眾奔潰啟欲自盡其黨止之旣而知非官軍復聚眾攻  
殺溫氏數人焚孫氏義安堡屋並劫平陽城外富室二  
十八日匪首趙啟潘英蔡華等率眾二千餘揭竿持挺  
襲溫州城入自三角門先犯試院殺捐輸委員前麗水

縣典史許象賢次犯道署殺一人次犯府縣署各殺數  
人道府縣印俱失分黨焚南門民居大掠城中府縣以  
事先出溫州鎮總兵葉炳忠聞變及前永嘉知縣高樑  
材各召勇入擊鎗斃數人匪卽驚潰奪小南門逸去九  
月初三日瑞安會黨出桐嶺焚婁橋民居明日復犯郡  
城勇目徐文久千總陳國泰逆擊走之生員張家珍率  
湖石團練及各村義民數千擊匪戰常勝及十月二十  
四日戰死次日匪遂由岫頭渡江薄焦石並引海盜船  
進攻瑞安知縣孫杰與紳團百計守禦連攻十日不克  
會閩省道員張啟煊由處州來援高樑材以廣艇入飛

雲江趙啟棄龍山潰竄鄉民咸粉其眉以助官軍沿河  
數十里截殺無算生縛五百人至城東皆破其腹而斬  
之十二月張啟煊軍至連戰皆捷生員孫詒穀戰死總  
兵秦如虎盡焚蕭家渡瀕江會匪巢穴嚴檄責獻爲首  
者趙啟竟逸去同治元年正月秦如虎人平陽張啟煊  
破金谷山復搜殺數百人貨其脅從會匪平朱秀三潘  
英等皆就獲磔之惟周榮張元繆元謝秀球鄭日芳等  
十餘人倖脫趙啟逃至玉環二年二月爲守備鍾國泰  
所禽伏誅左公疏稱翟維本李明邦雖無通匪故縱等  
情而一意彌縫釀成巨案咎無可辭請從重發往新疆

蓋亦持平之論矣安越軍之援杭州也再得帛書亟進  
欲道壽昌沿途阻賊卡弗能前聞杭州失守徬徨未決  
進退衢防馳書迎之乃還議屯常山及衢州城外或遣  
其總理營務知府陳奉彝書略云衢城有防兵無俟近  
衛江西不供餉奚事常山而閩省爲衢防餉源江山爲  
通閩咽喉不如屯江山顧餉道遙與衢城相應賊必不  
敢略江山而攻衢州亦必不敢略衢州而攻江山卽常  
山不守自全因而待大軍策之上者也元度聞之卽日  
拔營駐江山留三衢一綫以爲左公進兵之路豈非天  
哉浙奧區物產宏博地險足守也財力足富也項籍用

會稽戚繼光用金華義烏皆無敵於天下兵非不可戰也馬服君之言曰譬兩鼠鬪穴中將勇者勝鼯錯論兵事謂將不知兵以主予敵主不擇將以國予敵自浙閩警設防首尾十載殫土竭廩以事人一借將金陵再借將福建三借將徽州江西迄無解於十年二月之禍而金陵亦因兵少備分而燬師卒乃收其潰將敗卒因循不振以迄於亾前湖北巡撫胡文忠公疏云用兵數年各省皆有得力之將數人以折衝禦侮於其間浙省之有與否臣不得而知之是鄰封皆知借將之非也而且官與紳仇官與官紳與紳亦仇民與軍仇民與民軍與

軍亦仇乖氣致戾莫之或救孟子曰天時不如地利地利不如人和不其然乎夫不有廢也何以有興論者謂草木之被翦伐而復萌芽必存其本根焉故賊圍長沙不下恢復東南之本也上海孤存一角恢復蘇省之本也衢州亦然第衢州雖存於十一年之固守恪靖伯之善援而實由八年先警以兵使官與將習捍禦而民利入城附郭牆屋盡燬而守益堅深所謂莫之爲而爲者歟語云前車之覆後車之鑒故詳述浙中喪敗所由附爲末卷其有因文連綴已見前卷中者則敘次從略直書其事亦治亂之著蔡得失之淵藪也死事數公大節

凜然雖將略不長而見危投命律以與城存亡之義又何憾焉